



清代傳記叢刊·綜錄類⑦  
周 駿 富 輯

# 國朝耆獻類徵初編

(四十)

卷二七〇至  
卷二七九

(清)李 桓 輯



明文書局印行

1/25/02

國朝耆獻類徵初編卷二百七十目錄

將帥十

劉光弼

黃梧 兄子芳世 芳泰

瓦爾喀

根特

圖喇

鄂莫克圖

陳世凱

傅喇塔

達理善

孫達哩

愛松古

褚庫

鮑虎

察哈泰

卦喇

楊愷

卷一百一十四下

--	--	--	--	--	--	--	--	--	--

國朝耆獻類徵初編卷二百七十

通奉大夫前署江西巡撫江西布政使司布政使湘陰李桓  
將帥十

劉光弼

劉光弼遼陽人初冒姓曹後復姓劉隸鑲藍旗漢軍 太宗文皇  
帝天聰五年任耀州城守尉率兵從 上征明圍大凌河城攻克  
近城三臺城內兵突出光弼先眾馳擊斬一人我兵有陷陣者力  
援出之明監軍道張春總兵吳襄等由錦州來犯光弼衝入敵陣  
斬其裨將崇德五年任參領隨大軍圍明錦州同侍衛李國翰等  
攻克呂洪山諸臺屢擊敗松山杏山馬步兵敵以兵據山口阻我

師光弼同國翰率兵奮戰敵皆敗遁錦州旣下復以礮攻克塔山杏山兩城及附近臺堡敘功授騎都尉世職七年六月擢鑲藍旗漢軍副都統八年同都統劉之源赴錦州督鑄紅衣礮尋隨鄭親王濟爾哈朗征明甯遠取前屯衛中後所二城敘功加雲騎尉世職 世祖章皇帝順治元年隨大軍入山海關擊敗流賊李自成旋同都統葉臣等征山西攻克太原城三年隨端重親王博洛征浙江拔金華進定福建乃還京五年授禮部侍郎尋隨征南大將軍譚泰討江西叛鎮金聲桓復南昌府譚泰奏以光弼署江西提督事六年平廣昌縣山賊招降僞官三十餘員旋得 旨特授提督時山賊張自盛洪國玉等踞湖東劫掠光弼率參將陳陞等往

勅斬獲無算僞總兵董明魁郭承珉等率眾降七年八年三遇  
恩詔晉世職至一等輕車都尉十三年 詔獎力捍巖疆著有勞  
績諸臣 賜鞍馬弓矢等物以示優異光弼與焉十六年以老病  
致仕康熙十二年卒 予祭葬如例子顯祿襲職

右 國史館本傳





黃梧 兄子芳世 芳泰

黃梧福建平和人明亡海賊鄭成功加以僞總兵職令率眾守海澄 世祖章皇帝順治十三年七月梧斬僞總兵華棟等率眾以海澄縣投誠大將軍鄭親王世子濟度奏入得 旨予敕印封爲海澄公十四年八月總督李率泰奏增梧標兵合原額共足四千名仍駐漳州彈壓閩南九月梧同李率泰與提督馬得功都統郎賽水陸並進晝夜攻擊連破七城遂克閩安鎮十五年二月敘功賜甲冑貂裘等物尋因捐造戰艦一百加太子太保先是梧 封海澄公 敕印未至卽移牒總督李率泰言鄭成功飄泊海岸往來靡定欲撲滅之非熟悉情形者不能敬舉所知有委署都督施

琅者仇賊甚深知彼知己胸有成算其輸款 本朝已久一出受  
事卽著微勞且智勇兼優忠誠素矢宜假以事權俾盡展所長與  
梧戮力馳驅必能翦除海孽又牒言鄭逆猖獗全借內地接濟福  
甯沙堤爲木植絲棉所出晉江之福前所同江之鼎美高浦爲油  
麻釘鐵所出海澄縣之南溪漳州之佛潭橋爲柴米之藪至閩粵  
錯壤則饒平縣之黃岡澄海之南洋米粟山積土穴陰爲轉輸齎  
粵糧養閩寇最爲大患宜先就接濟之地設法嚴禁又條列勦滅  
鄭逆五策一曰駐海濱以堵登岸成功乘春收之時散遣僞將四  
出派餉深入內地官軍駐劄城內尾後相追賊已飽颺應分駐重  
兵於福興泉漳濱海要地往來馳勦則賊不敢登岸矣二曰造小

船以圖中左成功恃中左爲三窟盈盈隔水一葦可航而陸地將  
弁殊無問津之意故負固至今請於漳州港口多造入槳小船伺  
潮渡海成功恐懼必盡撤各僞鎮護其巢穴身不敢離中左半步  
我師壓水而陣廣布招撫兼用閒謀不出兩月內變必作成功可  
坐擒也三曰清叛產以裕招徠鄭逆及各僞鎮產業多詭託他姓  
掌管梧頗知其詳應奏請 敕下督撫會同梧徧行察出所收租  
稅永充兵餉今海上諸僞鎮願附者多常事蒿目乏餉而不敢收  
此項既清卽以叛產招叛兵於以解散成功黨與易易矣四曰設  
五商以絕接濟成功於山海兩路各設五大商爲之行財射利梧  
在海上素所熟識近且潛住郡城爲其子弟營謀鄉舉邑庠爲護

身之符其實陰通禁貨漏泄虛實貽害莫大應奏請 敕下督撫  
嚴提正罪庶內宄清而接濟之功可拔矣五日剗賊墳以快眾憤  
成功父子殘害生靈實戾氣所鍾聞其石井祖墓風水最險輿論  
咸謂剗掘以破賊旺氣且快人心亦懲惡之一端也梧又密牒李  
率泰言成功父芝龍雖經禁錮尙未伏誅天下人心以爲 朝廷  
欲畱之以撫其子自海澄內隸以來成功勢力已絀猶藉其父齎  
書下海揚言撫局已成致沿海人情搖惑諸僞鎮之欲投誠者反  
多觀望官軍亦未敢盡力翦除必速誅芝龍則海上聯翩投誠而  
獨夫坐擒矣李率泰先後以梧所建議疏 聞施琅得擢用申嚴  
海禁移兵駐防增造戰艦梧偕施琅會同提督馬得功總兵蘇明

赴晉江縣之大覺山南安縣之覆船山橄欖山金坑山剗毀芝龍  
父祖及先世墳五芝龍初得 旨流徙尙陽堡尋伏誅成功亦病  
死僞都督萬義萬祿楊學舉陳莽僞戎政總督陳輝僞平南將軍  
顏立勳僞總兵何義林明黃昌黃義余期英等先後就梧招撫相  
率來降 聖祖仁皇帝康熙二年十月進剿廈門靖南王耿繼茂  
出溇尾梧同李率泰出蒿嶼督水陸官兵擊敗賊眾斬獲無算遂  
克廈門金門浯嶼三島十二月耿繼茂奏賊遁銅山時值隆冬未  
便進兵令梧統兵駐雲霄相機堵剿三年二月梧遣鎮海生員陳  
克峻入銅山招降僞伯周全斌僞都督陳昇四月招降僞侯黃廷  
僞都督何政許貞李思忠等遂同耿繼茂李率泰提督王進功乘

夜渡海拔銅山焚其巢穴成功子鄭錦竄走臺灣六年三月疏言  
臣自納土歸誠而後竊計報 恩必先滅賊而滅賊必先用撫故  
一面隨征閩安一面陰行閒牒十二年中其招撫過偽官二百餘  
員兵數萬餘名節經題報有蒙 賜封侯伯且世襲者惟臣之公  
爵未知何等及承襲次數乞 敕部定議得 旨下部議以實心  
效力著有勞績封一等公襲十二次七年四月疏言臣標有給銜  
支俸者二百餘人銓授無期投閒可惜乞察其弓馬材技 敕部  
錄用有年老願歸農者令地方官安插得所其有願終依臣標者  
亦另立一冊於臣標遇缺充補事下部議行尋廷議裁汰各省額  
兵列奏標投誠時原帶官六十餘員兵一千二百名後續增歸誠

願隸梧標下者官二百餘員兵三千八百名今沿海俱有額兵防守除梧自帶兵一千二百名酌畱官三十員其餘自帶官三十餘員并歸誠願隸梧標官二百餘員兵三千八百名俱令移駐河南十三年三月逆藩耿精忠叛應吳三桂使人持逆書招梧值梧方病疽恚卒年五十有七子芳度陽以梧命荅精忠而陰募兵自守凡兩月餘得壯士六千遂斬精忠所置僞都督劉豹等誓師登陴以蠟丸函疏遣官黃藍聞道馳齋是年八月至京得旨海澄公黃梧自海上歸誠殫竭忠盡鎮守巖疆勞績茂著今聞溘逝深用軫惻應從優議卹黃芳度設計全城擒斬僞將具見能繼父志卽令承襲公爵今大兵由浙江江西廣東三路進閩黃芳度偵何路



先到可與迎會合勦十一月芳度疏言漳州介耿鄭兩逆之間獨力難守不得不百計圖全自八月以來堅與耿拒僞與鄭和因得陰行召募以練成勁旅萬人分布漳城及龍溪等五縣自守之勢頗成九月間耿逆遣兵來犯臣率眾迎擊擒斬無算觀二逆構怨已深勢必俱敗誠得粵省大兵克潮之後乘勝進取臣當率師迎會迅奏埽除之功十四年五月疏言臣拒耿餌鄭設爲固守萬全之計已歷一載有餘近二逆通好臣謀已洩鄭逆遂撤回各僞總兵蜂聚海澄備糧繕器臣揣其狡謀不測若南行則不利於粵擁兵畱澄則不利於漳二者皆爲封疆之患臣乃於閏五月初三日宣布 皇上屢頒恩旨及平南親王照會密劄遣總兵楊壯猷等

扼守平和並令臣兄芳泰帶兵赴粵接引大兵鄭逆聞之率眾來圍晝夜攻擊臣連次出兵斬賊將黃鼎新盧英等但臣孤城缺餉百計難支計粵路援師旦夕可至伏乞 皇上密敕浙江江西兩路大兵迅速進發俾二逆不能相顧臣可會合奏功七月疏言漳州自五月被圍日夜對壘至七月賊兵益集攻城愈急賴將士用命奮力堵禦西南北三門盡豎賊梯東門城堞礮毀三十餘丈鄭逆親督賊萬餘來攻臣率將士死戰用火器殲賊無算賊仍環圍不退城中兵單餉缺恐日久變生乞 諭趣大兵速進三疏並得旨嘉獎趣統兵大將軍等速卽應援并撥近地錢糧接濟十月漳州城中糧盡芳度督眾死守叛將吳淑引賊陷城芳度率兵巷戰

力竭赴開元寺投井死年二十有五賊戕其尸母趙氏妻李氏自縊死從父樞從兄芳名親弟芳聲芳祐並遇害期功男女從死者三十餘人賊又掘梧桐棺毀尸副將蔡隆遊擊朱武外委張瓊戴鄰陳謙俱罵賊死事 聞得 旨海澄公黃芳度矢志忠貞保守孤城勦殺逆賊屢建奇功叛將通賊陷城閤家殉難以盡臣節深可憫惻可優贈王爵諡以忠勇照多羅郡王例遣大臣致祭蔡隆朱武張瓊戴鄰陳謙 贈官有差梧桐兄子芳世先於康熙元年齋梧疏入 覲畱京授一等待衛及黃藍齋芳度疏告急芳世自陳生長閩疆深知道里情形乞隨大兵由廣東進援 詔以芳世爲福建隨征總兵官 諭曰爾在朕左右十有餘年凡事諳練嫻習弓

馬特授此職宜勉力圖功以副擢用芳世至粵隨援兵前進會芳  
度遣芳泰自圍中衝出與芳世合兵連破數城距漳州兩日程芳  
度戰歿 詔以芳世襲海澄公爵十五年二月芳世兄弟俱在廣  
東爲叛鎮馬雄等誘附吳逆不從乘閒脫走由三水至四會入山  
谷中晝伏夜行十一月至江西信豐遣黃藍齋疏具陳陷賊始末  
上嘉芳世不肖從逆閒關冒險全節來歸加太子太保仍鎮守漳  
州黃藍由參將擢充海澄總兵官并令馳赴康親王軍前俟漳泉  
恢復後收集海澄公散失官兵鎮守汛地十六年三月芳世疏言  
臣叔梧已故之身遭賊殘毀請與芳度一體議卹至臣叔樞罵賊  
而死臣弟芳名芳聲並奮力守城同日見害並請議卹得 旨贈

梧太保 賜諡忠恪芳名芳聲 贈太常少卿樞 贈按察司僉  
事各 予難廕 賜芳世蟒袍弓矢鞍馬傳 諭曰卿由粵東進  
剿忽遭兵變孤身涉險而出可見忠貞不貳顛沛不改其守十七  
年三月海賊將劉國軒吳淑率賊眾數萬犯海澄芳世與總督郎  
廷相副都統孟安等連敗之於觀音山秬山頭石瑪村等處賊退  
犯漳州芳世復同郎廷相孟安統標兵奮力堵剿斬僞將洪傑等  
殲賊甚眾又山賊蔡寅冒稱朱三太子與海賊勾通蔓延流毒芳  
世與營總都巴等擊敗之於天寶山斬其僞提督楊甯等得 旨  
嘉獎四月疏言漳州亂後臣叔梧弟芳度所轄官兵俱已離散臣  
漸次收集共得四千八百餘選補本標五營六百名此外無額可

補竊思此項官兵遇變矢志一心報效今海氛未靖豈可聽其離散乞汰畱三千照經制給餉另立三營付臣弟芳泰管轄分扼漳浦以資調遣部議芳泰已補授京口右路總兵官此項官兵如所請定爲三千卽令芳世自委標員管轄俟剿滅賊寇後再行裁減未幾芳世病卒遺疏言逆仇未滅區區此心齋恨無窮竊思封疆尙有緊要數大事其一水師戰船不可不備額船二百業已在省興造今沿海皆有賊船出沒不可不以習練之兵配此額船宜卽多募水兵使之操練其一投誠官兵不可不收今逆黨雖熾其中固有向仁慕義傾心歸附者急當厚給俸餉以示招徠再閩疆自甲寅亂後受害已慘而漳州之慘更甚近來山海交訐如平和漳

浦等十餘縣處處蹂躪臣願大師底定之後 皇上嚴飭有司輕徭薄賦甦此殘黎以固疆圉至臣弟芳度閭家殉難不遺一孤臣子黃溥年纔九歲臣弟芳泰久歷戎行備嘗險阻祈 聖恩准與承襲公爵效力疆場以繼臣犬馬未盡之志 諭曰黃芳世侍從有年才猷素著鎮守巖疆屢著戰功勤事以死深可憫惜下部議卹 贈少保 賜祭葬諡忠襄 命芳泰襲爵時海賊陷平和芳泰遣參將呂孝德攻復之斬賊將陳志等及兵千餘尋總督姚啟聖疏言芳泰年少懦弱標兵八千不能管轄或裁減兵額或移駐內地部議令芳泰來京 上曰黃芳泰乃功臣之嗣遷移來京乃保全至意可令沿途應付驛站食用芳泰疏請暫駐汀州爲兄芳

度營葬啟聖復奏海澄公標下舊兵聞芳泰在汀州皆奔依之賊首劉國軒係汀州人今在汀在漳多冒充公府之人良頑莫辨有司不敢過問況僞將吳淑兄弟曾害芳度聞芳泰在汀州不敢來漳投順請 敕芳泰速離閩省十八年十月芳泰抵都疏言臣年三十三久經行陣不爲幼弱兵民冒充有司何不察究臣離漳已十閱月吳淑不聞投誠督臣無計辦賊以臣藉口臣當此壯年正竭力報效之秋乞得仍駐海疆馳驅督勦以報 主恩 上慰諭之二十二年 允其回籍營葬二十九年三月卒於里請以子應纘嗣芳度後襲爵四十九年應纘爲芳泰請卹議令閩省有司察覈 上曰耿精忠叛時黃芳泰乘閒至廣東請兵值尙之信叛芳



泰同其兄芳世及巡撫楊熙力戰而出實心效力朕知之甚明可  
卽議卹 贈太子少保 賜祭葬如例 今上乾隆三年四月應  
續爲芳泰請謚部議不准 特旨賜謚襄愨三十二年六月 諭  
廷臣曰海澄公黃芳度閤門盡節忠藎可嘉業經准襲公爵十二  
次以酬義烈因思綠旗世職向無承襲罔替之例但如黃芳度之  
捐軀授命大義炳然自應破格施恩賞延於世以昭褒忠盛典著  
特加恩准其世襲罔替

右 國史館本傳

黃忠恪公諱梧字君宣漳之平和人也生而岐嶷倜儻有大節饒智  
勇喜任俠當鼎革初八閩雲擾海氛方熾公時以數萬人保海澄

海澄南據山三面皆海爲海島咽喉賊恃以出沒縱橫 王師環  
攻六載殺傷士卒以萬計不能下公獨率先歸誠納土地籍府庫  
獻倉米三十七萬四千餘石火藥四十一萬斤戰艦礮甲軍械數  
百萬迎 王師鎮撫焉自是島寇勢孤嚮義者踵至實自公倡之  
世祖章皇帝嘉乃丕績 特詔封海澄公時順治十三年九月也  
沿海皆賊盤踞三山道梗公率所部奪烏龍江羅星塔通南北路  
以兵護定遠大將軍和碩簡親王固山貝子福公喇塔還京師十  
四年同固山額真圖公賴復閩安鎮躬冒矢石斬獲最多 賜蟒  
袍玉帶貂裘鞍馬雕弓十五年統標員副將施公琅等大破賊於  
雲霄港梟其僞伯張進陳璋等賊大創復捐造戰船一百艘益募

習水軍屢出奇敗賊十七年 詔與大將軍達公素攻廈門破浪  
前進擒斬僞閩安侯周瑞賊有驍將蔡祿郭義據銅山爲閩粵邊  
害公遣使示以威信祿義率二萬人捲土歸附賊勢愈蹙事 聞  
晉太子太保錫賚有加康熙二年公令謀者招降僞伯黃廷陳輝  
周全斌僞統領林順陳昇許貞何政李思忠顏立勛黃昌陳蟒林  
明等五萬餘人收其樓船戰艦五百餘號有 旨選精銳七千人  
分隸麾下五標餘悉移駐江西河南等省安插歸農遂疏請大蒐  
三島 聖祖仁皇帝命同閩浙總督李公率泰固山額真郎公賽  
率所部前進連破廈門金門等島餘孽遠遁時瘡痍未復輸餉不  
易公令部曲分屯兵不弛而食裕軍費以紓諸島悉平 策助第

一晉一等公世襲十二次時康熙六年十一月也公由是開府漳  
州益簡卒伍謹烽堠閒有伏莽未靖遣標員分捕破茶仔畚賊擒  
其魁余角楊古姐等或勦或撫紓 朝廷南顧憂十餘年閒寇賴  
以弭屹然海邦鎖鑰焉康熙十三年會滇黔叛閩耿精忠陰蓄異  
志公時患癰疾甚策其必反呼公長子芳度泣曰吾病殆不可爲  
恨不能捐軀報 國脫叵測精忠必通海寇則漳危矣亟宜密疏  
朝廷預籌其變亡何精忠果據閩叛傳僞檄至漳公聞變大怒投  
袂起癰迸裂急召芳度曰守城拒賊以死繼之孺子勉矣言訖癰  
潰遂薨軍中皆感泣及賊平 上特詔優卹遣官 諭祭二壇  
賜卹 葬 加贈太保謚忠恪公治兵嚴而有恩與士卒同甘苦

人樂爲用故所向有功善任使屬將如施公琅許公貞皆爲世名臣性孝友母吳太夫人年逾耄朝夕視膳惟謹下堂扶掖必躬親不假侍婢痛贈公早背每祭嗚咽不已待二兄怡怡和敬分俸賜以贍族子三黨藉以舉火者數百家公之曾祖祖父俱 贈如公爵妣皆一品夫人元配鄧夫人繼配王夫人趙夫人俱 封一品夫人趙夫人康熙十四年城破殉節 賜同公祭葬子三長芳度嗣爵守城殉節 追封忠勇王次芳聲廕授員外郎殉節 贈太常寺少卿有附傳三芳祐幼殉節初公七世祖應元公始居新安里隱不仕葬之日昇至獅山半嶺會大風雨眾奔避旣霽視之沙壅成墳則石獅鈴處也形家目爲玉鉤金鎖至公而大顯故至今

傳黃氏發祥獅鈴云

右家傳翁方綱撰

黃芳世

少保忠襄公諱芳世字周士忠恪公兄子也幼讀書補郡庠生忠恪治兵於漳表公代 覲授二等侍衛尋擢一等侍衛階資議大夫出入禁廷十二載小心勤勞深被 恩遇凡 行圍遊燕必從康熙十三年耿逆連海寇爲亂七閩相繼陷忠勇王在漳被圍援絕 聖祖仁皇帝授公福建中路總兵官提師由粵入援適弟芳泰自漳突圍至粵遂會師前進時汀州已爲賊據公所向披靡道出永定賊乘城將邀公師公一鼓拔之倍道至梅壠距漳二百里

聞城陷忠勇王闔門殉難公母及弟并二子死焉公進無可援餉  
運復險遠不繼乃退屯惠州未幾粵亦告變公蹤跡孤危或有言  
公從逆者 上獨深信不疑久之閒道歸 朝備陳城破家亡流  
離閩粵閒狀及賊中事宜 上爲垂涕 命襲海澄公爵晉太子  
太保提督福建水師駐劄漳州兼轄汀邵 賜王令十三桿得提  
調天下兵馬 賜戴雙眼孔雀翎如外藩王例時差家人進京請  
安 賜宴 賜五爪蟒袍褂朝衣貂帽內緞鞞鞮又 賜金盞甲  
寶石玲瓏撒袋雕弓金鏃雕翎箭鍍金刀黃坐褥鞍韉并御馬一  
匹 陸辭復 賜宴 賜白金二千兩 太皇太后賜宴 賜白  
金一千兩瀕行又 賜御服織金蟒袍御用鞍馬馳驛莅闕在軍

中 上時加眷念馳 賜服御無虛月 賜元狐帽一頂元狐袍  
一件時漳泉寇盜充斥公日夜簡練士卒招服賊黨計一舉撲滅  
十七年二月賊攻陷石碼復進圍海澄二十四日鎮守總兵黃藍  
飛書告急公卽遣正藍旗夸蘭大等將滿兵督標中軍副將朱志  
麟本標前營參將呂孝德等將綠旗兵卽日赴援遇賊於彎腰樹  
衝擊之賊退屯觀音山明日公自與副都統孟公安等將滿漢官  
兵抵山下僞鎮陳福等以萬餘人布山而陳公麾軍擊之賊大敗  
陣斬及溺水死者不計其數追至下澣堡會日暮收軍二十七日  
早遣人閒道趨黃藍軍夾擊仍以滿漢官兵分三路翼而進至祖  
山頭遇僞統領劉國軒等二萬餘人列陣迎敵公親冒矢石督戰



國朝書牘彙編卷一百一十一  
大敗之斬獲無算賊僅餘數百騎遁歸石碼石碼賊出援又擊敗  
之遂解海澄之圍 天子下詔褒美公復率滿漢兵攻石碼柵連  
勝擒斬賊黨獲軍械戰船甚夥柵垂破白頭賊蔡寅者僞稱朱三  
太子聚眾數萬人與海逆連距漳城二十里許結寨於天寶山官  
津崙分踞蜈蚣山天寶市絕西溪來漳糧道將薄漳城勢張甚公  
乃使總兵黃藍等守海澄并畱兵守祖山頭而自以精騎數千還  
漳勦之閏三月朔抵天寶後塘賊悉眾拒敵公出奇兵夾擊之斬  
僞提督楊甯等十四人殺傷賊兵無數遂奪天寶市柵賊陳順以  
數千人來援公奮勇大呼馳擊斬順等十七人賊眾四竄明日分  
兵四路直搗蔡寅老營賊大潰追斬僞將軍李榮等十人生擒僞

軍師張俊寅走死餘黨悉平復擊敗叛賊吳淑於天成寨奪其軍  
於是引兵屯海澄祖山頭掘水陸衝與賊接壘攻勦無甯暑公遂  
積勞成疾矣或有勸之休息者則曰吾欲上報國恩下雪家仇  
叛賊未滅何以身爲也猶日派兵力戰疾益劇遺疏請安插投誠  
官員厚給俸餉以示招徠又言閩民自變亂以來盛遭蹂躪漳民  
更甚請飭有司加意撫綏輕徭薄賦以紓元氣又言臣一子纔九  
歲請以從弟芳泰襲公爵乞簡賢能任提督水師重寄遂薨於  
軍上悼焉加贈少保謚忠襄遣官諭祭二壇御賜碑文  
公人備宿衛出典海疆整理戎旅各有條次任使皆盡其力能在  
軍中與士卒均苦樂雨不張蓋勞不坐輿是以人思自效及薨朝

野惜之考諱桓忠恪公伯兄早卒以公貴 贈如公爵母汪太夫人城破自經死 贈一品夫人遣官 諭祭夫人張氏 誥封一品夫人子溥博俱襲拜他喇布勒哈番早卒以從子應縣嗣

右家傳翁方綱撰

黃芳泰

太子太保襄愍公諱芳泰字和士亦忠恪從子質性醇篤少治舉子業爲諸生習韜略精技勇騎射賊之寇漳也公傾貲募兵佐忠勇王守城洎圍急王謂諸將孰爲我出請援者公奮曰男兒死疆場此其時矣乃躍馬潰圍馳出殺僞鎮黃鼎臣等十餘人所過山寇寨柵揮戈直前皆望風辟易無敢撓其鋒者至粵與忠襄遇遂

會師來援倍道疾驅未至漳而城陷公父母妻子皆遇害乃退次  
惠州當是時粵變並作所在盜起海寇劉國軒猖獗惠潮諸郡索  
公兄弟急公以計脫忠襄使問道歸 朝獨提孤旅播徙肇慶廣  
甯閒會疫作軍無見糧瀕危者數公以忠義激勵將士軍得不潰  
復勦平老鴉江山賊破叛將謝闊扶復順德縣又拒逆將馬雄於  
肇慶以兵迎將軍莽公吉免入定粵省瘴嶺蠻煙崎嶇徧歷初公  
至粵承 制授福建右路總兵官尋奉 旨黃芳泰效力行閒家  
屬盡皆殉難忠貞可嘉給與拜他喇布勒哈番准襲二次及粵平  
奉 命還閩佐忠襄公治兵海上共圖滅賊已而 授都督僉事  
江南京口總兵官會忠襄公卒 上命公襲爵總管所屬官兵一

依忠襄故事公兩疏讓爵於忠襄公子溥不許有旨以所給世襲拜他喇布勒哈番令溥承襲公乃起就職視事重申號令壁壘一新三閱月屢勦賊寇收復平和漳平諸縣康熙十八年疏請入覲命文武大臣官員出郊迎接遣一等公佟胤舅賜茶彰儀門溫旨慰勞賜宴禁中公以國恩未報叛賊未滅上疏請自效其略曰督臣姚啟聖等以臣一日在漳吳淑等一日不敢投順竊臣未離漳時僞總兵陳愷會同吳淑謀獻漳城後帶眷屬數十人來歸臣仰體朝廷招徠德意倍加撫慰若吳淑果能革心效順臣安敢以私廢公臣自二月離漳四月至汀八月進京計今已十閱月未聞淑等有投誠之舉且賊首劉國軒與臣並無私

讐亦奚忌於臣而不敢來是賊之順逆非關於臣之去留明矣竊計全家殉節無如臣家之慘卽一心報國亦無如臣叔臣兄臣弟之矢志不貳臣久歷行閒備嘗險阻今臣年三十有三齒已及壯當此海疆未靖聖主宵旰不遑之時正微臣竭力圖報之日臣雖蒙恩保全而逆賊未殄誼不共戴若使糜祿養安銷磨歲月上旣不能仰答高厚下又不能繼成臣叔臣兄臣弟報效之志是臣忠孝兩虧所以朝夕飲泣不得不瀝陳於君父之前者也同日復密陳滅賊機宜六事曰一分兵攻勦以蹙賊勢也逆賊以廈島爲巢穴侵踞海澄各處水汛近復上自陳洲下至江東沿河一帶屯營築壘日夜與我師相持計在漳新添綠旗及調集官兵

不下十萬而與二萬餘之賊眾咫尺支吾不能剋期取勝則狃於招撫之說彼且陽順以緩師期乘閒以備戰具老師糜餉奏凱無日非策之得也臣謂蕩平海寇勦先於撫若不分路大舉誰肯畏威順命今亟當分撥精銳攻取要汛仍調的當土著將領以爲嚮導凡賊所據邊地馬步可通之處不時進發攻勦復多張疑兵使賊顧此失彼則賊勢窮蹙就撫者日多元慙不難成擒矣一覈撫真寇以散賊黨也海逆之眾不過二萬有奇今日報撫以百計明日報撫以千計而賊黨未滅者究其來歷非姦宄則窮黎往往假冒投誠希邀官賞而未聞海上巨魁僞鎮有率其大夥來歸者甚至指少爲多或逃去復來費金錢濫名器臣愚以爲宜加辨識照

前年欽差戶兵二部專責撫事又選海上投順質實之員識認察覈分別賞罰則假者難於希冒真者倍加感激賊黨日散而海氛可靖矣一速據險要以迫賊穴也逆賊尙敢占踞內地者以我師未據賊險之故欲平海逆先奪廈島窟穴則海澄各處汎嶼不攻自潰廈門雖四面阻海尙有對岸水狹之處入槳快船可渡如同安劉五店潯尾及龍溪排頭嵩峙等處康熙二年大兵進擣廈門皆由於此今當調發勁旅出其不意速踞要區屯劄大營以示欲渡復令水師大小船隻沿邊相爲犄角相機進剿賊必驚怖靡甯潰敗之不暇安敢復肆侵犯一操調八槳以擾賊巢也戰艦之設閩省原有額配但大船須待風信兼防擱淺惟八槳快船旋轉便



利操練易習造費省而工程捷今之賊勢鴟張以我舟師未集倚水爲險連舫入犯毫無顧忌而我陸師不能飛渡但立視其隨潮來往剽掠耳此大弊也前提臣施琅督視舟師操習八槳選募水性順利之人配爲水軍不時出沒島中攻其無備賊環顧靡甯既有成效可觀爲今之計請 敕各官隨力捐造八槳船分布要汛配兵調操輪番出哨則賊自顧不暇豈敢肆橫內港俟水陸大舉之時雖大船足用亦當用小船配兵隨剿追逐尤爲快捷此平賊要著也一嚴查保甲以清賊藪也自古保甲之法承平無事奉行惟謹況多事之秋乎海賊之眾率多內地良民失身入夥其中不無父兄眷屬尙在內地者請 敕有司令地方約保編設家甲互

相稽察如從前投入賊夥者見有父兄眷屬勒限聽其召回或有  
新投入夥者約保立行舉首徇隱者坐之此法通行尤須嚴禁挾  
私擾害等弊保甲既清奸匪屏跡卽如前來投順弁兵告歸原籍  
歸農者亦皆有著落安插可以稽查而鄉閭族黨自相勸誡無有  
來而潛去去而復來者則內地民人無何連之慮矣一綏集殘黎  
以弭賊源也閩地經播亂之後驚鴻未集皮骨僅存重以逆賊未  
殲軍興驛騷而漳州一府疲憊尤甚飢寒交迫鋌而走險以爲一  
日入賊便可一日飽煖是以法不能禁請 敕地方有司加意撫  
綏除額外之差徭禁胥吏之剝削如軍需孔亟權宜採買尤須使  
小民得霑實惠 皇上不時遴遣廉能內臣巡問訪察據實入

告則地方官益知惠下而民安本業姦宄之源永杜矣疏入 上  
嘉納之逾年賊平皆如公策焉二十二年三月疏請回漳營葬殉  
節骸骨 上許之四月自京回籍二十七年復進京謁 太皇太  
后梓宮 賜宴於暢春苑傳 命海澄公中坐 陛見諸提鎮皆  
旁坐時有副將何應元於 上前演藤牌 上問藤牌有破法否  
公奏用長刀可破卽 命公試之須臾三中其臂 上大歡笑尋  
請歸二十九年以疾薨於里第四十九年 追贈太子少保 賜  
祭葬乾隆三年 加贈太子太保謚襄愨 御製碑文初忠勇王  
旣殉節無後公之疾革也合其族而告之曰爵忠恪公之爵也惟  
忠勇王繼忠孝以殞其家其忍令二勳無嗣乃立長子應纘爲王

後遺疏請於 朝而歸爵焉公爲人敦樸平生疏食澣衣不喜車  
裘之飾居鄉愛賢禮士以謙謹自持出屏騶從曰吾不欲以富貴  
加桑梓也親故雖單寒者握手極歡治周窮賑乏傾囊無吝姚制  
府啟聖嘗議削公柄而公在 上前屢稱其能制府聞而歎曰黃  
公可謂公爾忘私者矣有郡佐嘗以事忤公及罷職貧公假之館  
月給糈厚贈歸之其寬厚長者類如此考諱樞忠恪公仲兄漳之  
陷殉節 贈按察使司僉事後以公貴晉 贈如公爵自有傳母  
董太夫人暨夫人李氏俱殉節 贈一品夫人夫人萬氏 誥封  
一品夫人子均功視霽皆幼殉節又生子六長應纘嗣忠勇王後  
是爲溫簡公次應甲以僉事公殉節廕授知縣未及仕三應政六

國朝正史類傳卷之五

應縣嗣忠襄公以溫簡公廕授治中即今嗣公仕簡本生父 贈

光祿大夫一等海澄公四應安五應覃早卒

右家傳翁方綱撰

瓦爾喀

瓦爾喀滿洲鑲紅旗八姓完顏 太宗文皇帝天聰時任前鋒校  
每臨陣奮勇爭先中創不退屢得 優賞崇德三年隨貝勒岳託  
證明由牆子嶺入邊越燕京趨山東攻海澄克其城七年隨饒餘  
貝勒阿巴泰證明由黃崖口入邊轉戰至山東攻范縣眾皆俟雲  
梯登城瓦爾喀以長槍鑿破城垣爲磴先登克之 世祖章皇帝  
順治三年隨肅親王豪格征四川屢擊敗流賊張獻忠兵斬級二  
十餘生擒賊哨騎十人有護軍阿納海者爲羣賊所困攢刃將及  
瓦爾喀馳騎突前格殺二人援以出五年隨副都統烏拉禪駐防  
大名攻勦土賊於祁州及臨潼關並多斬獲是年敘征四川功

予雲騎尉世職三遇 恩詔洵晉三等輕車都尉九年授工部理事官十三年以董修 乾清宮成晉三等輕車都尉十五年 奉先殿成晉一等輕車都尉十六年署前鋒參領隨都統卓洛前鋒統領白爾赫圖等駐防雲南元江土司那嵩既降復叛卓洛率兵進剿瓦爾喀督雲梯兵攻克元江城 聖祖仁皇帝康熙元年還京授參領兼督捕理事官五年遷駐防西安副都統七年擢西安將軍十二年冬吳三桂反 上命瓦爾喀偕副都統佛尼埒率西安官兵馳赴四川防守險隘十三年正月 上聞四川巡撫羅森提督鄭蛟麟總兵譚洪吳之茂等並叛附三桂因 諭瓦爾喀暨佛尼埒曰爾等久歷戎行素稱諳練朕可無西顧之憂大兵入蜀

後吳逆僞屬官兵有來降附者應密爲防閑嚴設巡哨整飭營壘至綠旗已叛官兵爾等相機招撫便宜行之三月瓦爾喀至漢中聞叛賊譚洪等已距陽平關四十餘里於野狐嶺上下及諸險隘並遣賊黨迎拒瓦爾喀部署諸將分兵三路奮擊潰野狐嶺賊隊並發其伏殲之乘勝疾趨克復陽平關四月攻復七盤關五月攻復朝天關先後奪壕毀寨擒斬賊眾萬餘獲旗幟器械無算上嘉其調度有方命事平日察敘時賊眾堅據保甯我軍距城十里鑿壕塹與相持久未下八月瓦爾喀疾卒賜祭葬如典禮謚襄敏立碑墓道十六年三月議政大臣等追論瓦爾喀進征保甯不乘賊未設備時疾進既至復不簡精兵分守要地致賊劫掠戕



我兵眾又不以實奏報應追奪原官及世職削謚毀碑籍其家  
詔免籍沒餘如議行

右 國史館本傳

根特

根特滿洲正黃旗人姓納喇氏父達雅里 國初來歸以軍功授  
騎都尉遞加一等輕車都尉卒以其孫達漢泰襲根特初以閒散  
隨貝勒阿巴泰征明至山東攻泗水縣先登還攻定州先登敘功  
授騎都尉兼一雲騎尉世職並 賜巴圖魯號尋晉三等輕車都  
尉順治元年授刑部理事官五年三月隨征南大將軍譚泰征叛  
鎮金聲桓於江西七月大兵薄南昌圍之未下根特由城南繼蒙  
古兵登城拔之聲桓中二矢死生擒其黨王得仁江西平師還擢  
副都統兼管佐領七年九月兩遇 恩詔晉世職爲一等輕車都  
尉康熙十二年十一月逆藩吳三桂叛十三年正月 命都統尼

雅翰爲鎮南將軍與克州副都統瑪哈達同赴安慶根特代駐克州二月 上以江西界福建廣東湖南爲三省要地 命根特偕副都統席布率兵速赴南昌三月江西巡撫董衛國疏報湖南長沙失守江西袁州吉安二府與接壤請撥兵駐防得 旨著根特率見駐南昌兵往相機剿禦尋 命內大臣希爾根爲定南將軍帥師赴江西根特參贊軍務四月平南王尙可喜疏言吳逆遣賊二萬屯黃沙河叛鎮孫延齡欲與合請就近撥兵會剿孫逆以分賊勢 諭曰根特候希爾根等兵至江西卽率所部官兵速赴廣東是月授平寇將軍會逆藩耿精忠叛於福建 詔根特由廣東仍返江西六月衛國疏報叛弁柯昇句閩賊竊據廣信諸處 詔

根特先定廣信再偕前鋒統領舒恕由袁州進取長沙七月兩廣  
總督金光祖疏報廣信梧州失守 諭曰根特等率兵由袁州取  
長沙進廣西以襲賊後則取道廣東必致遲久其與平南王尙可  
喜總督金光祖提督馬雄會同酌議添撥官兵規取橫州否則固  
守梧州諸處相機勦禦八月卒於軍二十二年 賜祭葬如例子  
智宏襲世職

右 國史館本傳

國朝書牘類卷之二十一

三

圖喇

圖喇滿洲正黃旗人姓舒穆祿氏世居瑋春初任兵部筆帖式  
太宗文皇帝崇德七年隨饒餘貝勒阿巴泰征明山東攻泗水縣  
流矢中目戰愈力攻新泰等城奮勇爭先 世祖章皇帝順治元  
年隨豫親王多鐸征陝西二年復隨征江南七年擢兵部主事兩  
遇 恩詔予騎都尉世職十二年擢兵部郎中十三年隨都統伊  
勒德征舟山僞伯阮思率巨艦百餘拒戰圖喇與副都統根特擊  
敗之阮思復糾其黨陳六御張洪德等合兵三萬餘犯我舟師圖  
喇與副都統柯永綦連破其軍圖喇中礮傷手足舟山旣平敘功  
加一雲騎尉十八年山東土賊于七倡亂 聖祖仁皇帝命圖喇

同郎中察奇至棲霞逮鞠賊黨時于七踞棲霞之岨嶠山其黨段忠續林萬鵬龐應魁高起英各擁眾數千分踞龍山潛結棲霞城中奸黨爲內應圖喇邏獲賊謀二人詰之盡得賊情適靖東將軍濟什哈率師抵萊陽圖喇遣使約濟什哈調綠旗兵七百疾馳至棲霞獲城中從賊者三百餘人遂趨鼇山忠續萬鵬等聞風遁擒賊黨六十餘獲牲畜以數百計尋偕察奇還京擢大理寺少卿康熙二年五月授駐防杭州副都統十月同總督趙廷臣至定海招降賊鄭錦之偽靜波將軍阮美及偽官一百二十餘員兵二千九百餘名七年擢杭州將軍十三年三月逆藩耿精忠叛圖喇奉詔與總督李之芳提督塞白理率滿漢官兵相機防剿尋以都統

賚塔爲平南將軍赴衢州禦賊 命圖喇駐守杭州兼防海疆六  
月疏言杭州兵少請增兵協守 詔移江南綠旗兵五千駐杭州  
又疏請杭州增設防禦每旗各一員下部議如所請尋以病還京  
十月卒 賜祭葬如例子明德襲職

右 國史館本傳



四三二一  
一  
二  
三  
四  
五  
六  
七  
八  
九  
十

十一

鄂莫克圖

鄂莫克圖姓納喇氏世居葉赫 太祖高皇帝時來歸隸滿洲正  
藍旗初任護軍校天聰元年正月大軍征朝鮮鄂莫克圖隨副都  
統阿山等攻克義州城五月 太宗文皇帝統師征甯遠明總兵  
滿桂於城東二里列陣抗拒鄂莫克圖隨諸將進擊殪敵無算三  
年隨貝勒岳託征明大同攻保安州城先登克之 賜號巴圖魯  
授三等輕車都尉世職任參領八年隨步軍統領巴奇蘭等征黑  
龍江虎爾哈部崇德二年復隨都統葉克舒征卦爾察並俘獲丁  
壯視諸參領獨多三年七月授兵部理事官九月隨睿親王多爾  
袞征明由青山口毀邊牆入過燕京擊敗明太監馮永盛兵攻克

臨潼關城略地至濟南府明年三月班師同啟心郎詹霸先還奏捷七月 上遣使齎書與明議和 命鄂莫克圖同前鋒參領努山等率兵護以行五年授前鋒統領隨大軍圍錦州明總兵祖大壽糾眾逆戰鄂莫克圖率所部先諸將敗敵追逐至城壕六年復圍錦州明總督洪承疇自松山赴援爲大軍擊敗鄂莫克圖追其潰卒至筆架山斬級甚眾獲其馬與糞承疇集兵十三萬分踞杏山乳峯山 上統師親征駐營松山杏山間鑿壕塹絕其糧運明兵自松山夜遁鄂莫克圖追敗之海濱敵騎自杏山遁又步軍潰奔塔山鄂莫克圖先後邀擊並多斬獲七年隨大軍圍杏山分兵略甯遠獲牲畜以還明總兵吳三桂以兵六百躡我後我師擊卻

之尋益兵來窺我營鄂莫克圖拒戰大捷窮追至連山敵騎五十  
自沙河犯我所牧地復往奮擊敵遁並敗其後隊兵四百錦州既  
下晉世職二等輕車都尉 世祖章皇帝順治元年隨睿親王多  
爾袞入山海關擊流賊李自成追敗之安肅及望都尋率前鋒兵  
征山西殲流賊於絳州渡口二年隨英親王阿濟格征陝西破賊  
延安自成走湖廣追勦至安陸連敗賊營獲賊艦三十是年敘入  
關戰功晉一等輕車都尉三年隨肅親王豪格征張獻忠過漢中  
擊敗叛鎮賀珍兵進勦獻忠於西充同護軍統領白爾赫圖等連  
破拒戰賊眾敘功加一雲騎尉三遇 恩詔晉爵一等男十一年  
授正藍旗滿洲副都統十二年致仕康熙十三年卒年七十有八

賜祭葬子綽世琦襲爵

右 國史館本傳

陳世凱

覽古命世之英多歷試於艱難而後成天下之庸功當其窮蹙困  
踣幾不得苟活與傭販者伍及功見名立天下以偉人歸之說者  
謂有天幸要非其智深勇沈經百折出萬死而不挫則尺寸不能  
以倖成譬若楸枏松柏之材天固老之以待用向使其材不勝任  
則凋急雪而殞崩崖其不爲槁莖腐草者鮮矣陳公贊伯之以戰  
績顯也余舊聞而偉其人頃故人高使君尚孚分巡溫處二州說  
溫鎮陳將軍不去口既相見抑抑禮讓如偏生語及戰陣閒事惟  
上稱頌 朝廷之福親王貝子督撫將將之能及師武臣之力無  
一語自伐請至再乃出紀略一冊夫功業待時而建者也勇略不

待試而具者也。公姿岸，不過中人生，而雄武有畫地爲陣之意。明末寇大擾，其先公蒙難，憤不共天，聚鄉人殺賊，殲其渠羣，賊必欲得公，甘心公脫身，獨走衝虎豹，披榛莽，飢三日，夜至生啖野蔬，肩墜，晉井深穴中，伏匿得免，可謂萬死餘生矣。然終不肖黃項老牖，下轉徙川蜀。國家拓定蜀土，仗劍效順，累功，劄授都督同知。僉書公始以敢戰聞，久之，部補協守杭城，會滇閩構逆，溫處連陷，金與衝且剝膚督府。大中丞李公謂公才可大任，親王貝子試可決策，推轂一二歲，閒大小三十餘戰，卒復溫處，而綏靖。金衝遂以總兵鎮溫州。當是時，賊眾所在數萬，東陽義烏之間，蠶食豕突，而金衝故浙西門戶也。溫處又所以屏翰金衢而閔海之衝也。公料敵

策勝於處則先奪桃花嶺於溫則率其子紀先破石塘皆二郡最  
要害處要害既奪迎刃節解二郡遂平公既負勇敢戰數以寡殲  
眾直擣中堅或做陰平入蜀故智騰鳥道繞出山背皆身先士卒  
或免胄冒矢石大呼而入閒手舉一礮摧鋒折纛應聲而倒賊望  
之披靡呼爲陳鐵頭及其師旋則又以身殿全軍無恙昔人有言  
使遇高帝萬戶侯甯足道哉捷聞 天子大悅於是以左都督加  
世職有一拖沙喇哈番之 命公感涕霑膺未嘗不追痛出萬死  
而重被 國恩也客請書其本末乃略紀之以勸有功以示後裔  
且誌諸王督府之知人善任使也功臣宿將多漁獵子女玉帛以  
侈娛樂公懲念少賤仳儻不置歌兒舞女戢部曲無淫掠又多方



國史闕遺以遄歸不暇請爰敘其略  
從他將贖釋俘婦嗚呼豈非所謂智仁勇廉者哉余重公之爲人  
欲就公談悉具列戰功備  
如此

右戰功紀略序施閏章撰

傅喇塔

嵎爲越支縣而自錢唐浮西陵渡徑於越絕曹娥江而東必由是假道焉以達於臨海郡而後之東甌洄沿登頓道狹多阻是爲東越之重蔽而居長維漢元封初樓船將軍出武林攻東越者蓋道此而東越發兵拒險使守武林者亦道此也 國初康熙十三年耿逆起閩越旣西陷衢之常山諸縣乘勢蹂躪東甌長木之標天台黃巖仙居以次淪寇域而震於其鄰實徧處嵎嵎多窮鄉篝火狐鳴往往與相應和於是乘城者以攻城告北道諸村保以焚掠告西道之貴門山又以剽奪告蠡蠡焉人莫必其命當是時甯海將軍固山貝子聞章安警方董師往徇之而取漢樓船攻東越故道

道嶮知狀則曰鼠子敢爾彼意大敵在前吾弩千鈞必不爲鼷鼠發也法當出其不意且圖大者於細可姑縱邪以勁卒一千隸參軍滿進貴方略教導并指畫山川要害處命與郡守許洪助好爲之文武吏胥用命凡三與賊遇而殺其僞將五人降二人就擒者二人斬首七百餘級械資如山有吉語聞貝子喜曰寇可盪矣然禽困覆車慎勿與鬪力也令僞若退師者各取酒張坐飲而設樂以賀戰勝中酒則銜枚襲之是爲貴門之戰賊大首自邱恩章以下凡九十人率坐縛無一脫者駢斬以徇而宥其黨脅二百餘根株雉獮走伏路斷嶮人乃以手搶地望貝子遙築曰更生更生伏惟貝子以華蓋之金枝擁上游之玉帳其薦功在閩越其籌勝在

臨海在東甌烏巖之尾則狄武襄之奪崑崙也西山之屯則李長  
侍之掘洄曲也石塘之攻則鄧征西之縋陰平也維此嶮邑道塗  
所經未遑信宿然而碑在人口於今不衰易不云乎重門擊柝以  
待暴客蓋取諸豫以嶮之蔽東越也癘疥有疾失時不治則並潰  
漏發五管指天彼且鷓張我且狼顧而帥之居上流者支左誦右  
備多力分八閩之期曠日持久魚則游釜燕乃笑堂救溺者濡豈  
應若此是故貝子之早計也雖以張睢陽蔽遮江淮之功況之匪  
汰也今嶮人離湯火七十年所矣其老者如痛定之思當痛其少  
者以所聞逮所傳聞雖豐碑桓楹已卓道左而栖神蕭寺或匪憑  
依循甘棠之芟舍謀庚桑之俎豆相方視陟以諏以龜在邑東維

國朝禮制卷之三十一  
三十一  
厥既得卜屬功課程邪許自倍麗譙有門祭有堂繹有祊納牲有  
庭左右夾配食有序明宮齋廬品式具備顏曰惠獻祠從厥諡也  
既告成事郡人士禮拜祠下仰榱棟而俯几筵念貝子以勞定國  
以死勤事既已銘書太常發縱指示爰自嵬始尸而祝之實應祭  
法而使金隄勿潰蟻穴其不惟嵬之爲抑稽陰開千巖萬壑胥安  
堵焉郡人士其又敢忘賜傳有之公侯子孫必復其始今制府膺  
天子命爲諸侯帥閩嶠江濤囊兜戟纛昌黎碑曹成王所云王亦  
有子處王之所者也此之謂不朽豈特世祿家之守宗祊而已歎  
仰之不足乃緒功狀於繫羊豕之石而綴以詩曰閩爲鷓鴣張厥  
觜距趾我東甌以培牖戶黑雲壓城赤標失據嵬小而偪墮三里

霧西鄰北管奪釜中路我公天威大師相遇米聚山川塵知敵數  
計定後戰以指畫肚倚之角之三捷彌怒大廩貴門覆諸山下矜  
甲坐縛阮塞蹊杜魚鼈謹聲剡溪疇浦甲子終矣如旦且暮祭於  
大烝司勛有故鹿胎之山風飄靈雨益東徙屯大啟爾宇其筵肆  
肆維物牲具刲羊擊豕烹葵采瓠並走羣望春秋卽序神無不知  
以篤我祐

右嶧縣神祠碑銘方絜如撰



達理善

達理善滿洲正黃旗人姓那木都魯氏 國初有綏芬路長明安圖巴顏之族岳蘇納者同族眾來歸達理善其四世孫也崇德三年以閒散隸驍騎營隨睿親王多爾袞征明越北京攻山東濟南府以雲梯先登第三克其城 賜巴圖魯號授三等輕車都尉世職六年隨大軍圍錦州進擊明總督洪承疇援兵於松山杏山閒連敗敵眾順治元年秋隨都統葉臣征山西攻克太原二年冬隨副都統珠瑪喇和託等駐防杭州先是明福王朱由崧就擒其大學士馬士英竄杭州總兵方國安守嚴州及太兵定杭州馬士英走依方國安糾眾來犯達理善偕眾擊走之又屢敗之朱橋范村



國朝通志卷一百一十一  
及餘杭臨安富陽五年隨大將軍譚泰赴江西勦叛鎮金聲桓復  
南昌七年九年三遇 恩詔晉世職至一等輕車都尉又一雲騎  
尉十三年二月任參領十五年隨信郡王多尼征雲南十六年明  
桂王朱由榔竄緬甸其舊將高應鳳結元江土司那嵩負固抗拒  
達理善與都統卓羅前鋒統領白爾赫圖等攻克元江城那嵩自  
焚死擒高應鳳斬於軍康熙二年敘功晉爵三等男尋以老乞休  
十三年十二月陝西提督王輔臣叛於甯羌達理善請往軍前效  
力 命署副都統率八旗每佐領下兵三名赴西安十四年二月  
由西安至隴州仙逸關時輔臣畱賊黨踞秦州自引兵退舊駐之  
平涼僞總兵高鼎蔡元率馬步賊四千自關山河岸迎戰達理善

同前鋒統領穆占將軍佛尼勒等率兵進攻賊潰走追擊五十餘里復關山關三月復同穆占等自清水縣進距渭河橋二十里遇賊哨擊敗之乘勝奪橋抵秦州立營秦州賊二千出城衝突達理善揮軍夾擊賊敗入城四月分兵攻東關克之四川叛鎮吳之茂引賊萬餘援平涼偪秦州城結寨城內賊八千餘出應台犯我營達理善時已病猶督兵力戰大破賊眾尋卒於軍 賜祭葬如例 諡曰武毅二十五年兵部彙敘陝西軍功以達理善紀功二次例不晉職奏得 旨達理善巴圖魯係告老解任之員後願隨征盡心效力著有勞績又病故行閒殊爲可憫不拘定例給一世職於是 予雲騎尉台前三等男晉爲二等男以其孫雷占襲四十四

年十二月畱占任冠軍使兼一等侍衛因庸懦解退部議銷去  
恩詔所加職改一等輕車都尉另襲得 旨達理善巴圖魯本有  
成勞致仕後復從軍效力免其銷去原職仍以畱占之弟岱其里  
襲二等男

右 國史館本傳

孫達哩

孫達哩姓魯布哩氏世居葉赫太祖高皇帝取葉赫籍其人戶分隸八旗孫達哩隸正黃旗滿洲尋選充驍騎每隨征輒奮勇爭先中創不退屢得優賚太宗文皇帝崇德三年隨睿親王多爾袞征明由青山口入邊越燕京轉戰至山東攻克濟南府城明年四月凱旋先登功第一賜號巴圖魯予二等輕車都尉世職兼管佐領世祖章皇帝順治七年授兵部理事官八年遷護軍參領三遇恩詔晉爵至二等男十二年擢正黃旗滿洲副都統十六年遷護軍統領先是流賊李自成竄死其黨散處楚蜀至是餘孽劉二虎郝搖旗李來亨袁宗第等猶聚匿歸州興山閒

聖祖仁皇帝康熙二年以都統穆哩瑪爲靖西將軍都統圖海爲  
定西將軍統八旗兵赴湖北會合陝西四川兵剿賊 命孫達哩  
領護軍以隨直抵茅麓山破賊巢二虎來亨自經死搖旗宗第就  
擒餘賊悉平乃班師十二年 諭獎久著勞績諸大臣加孫達哩  
太子少傅十四年四月卒年七十有三 賜祭葬如典禮諡果壯  
子杭書襲爵改隸鑲白旗

右 國史館本傳

愛松古

愛松古姓納喇氏世居葉赫 太祖高皇帝天命四年來歸隸滿洲鑲白旗屢從征伐 太宗文皇帝崇德二年 命偕察漢喇嘛等赴明邊殺虎口互市尋復 遣往科爾沁調敖漢奈曼扎魯特吳喇忒諸部兵征明三年七月初設理藩院以愛松古爲副理事官十月自歸化城導厄魯特部長墨爾根戴青來歸四年 詔率巴林吳喇忒兵赴四子部追捕逃人愛松古至中途潛歸論死命從寬鞭百仍令供職六年隨大軍圍松山明總督洪承疇遣其兵夜遁理藩院官屬未偵報又不悉力邀擊愛松古復坐鞭責罰 世祖章皇帝順治元年擢任佐領隨都統葉臣等征山西時

流賊李自成西遁其僞伯陳永福據太原我軍以紅衣礮攻之城  
圯永福挾眾突出愛松古以蒙古兵迎戰多斬馘獲馬千餘又追  
敗賊將馬驥於黃河獲舟十有五二年隨都統巴哈納進圍延安  
賊馬步出城來犯愛松古卻之尋率八騎躡追自成獲其孥三年  
五月蘇尼特部騰機思等率所部叛奔喀爾喀七月豫親王多鐸  
奉命集兵克魯倫河進剿愛松古率前鋒兵扼據險隘大軍繼  
進騰機思遁走復隨侍郎尼堪副都統明安達哩乘夜追擊獲其  
輜重斬其台吉茂海遂渡圖喇河喀爾喀土謝圖汗以兵二萬拒  
戰愛松古隨鎮國將軍瓦克達等敗其馬兵追逐三十餘里四年  
敘功 予雲騎尉世職五年四月 命率蒙古兵六百名駐防太

原涇陽叛賊李陽以二千人來犯愛松古敗其眾斬李陽以徇十一月又擊敗叛賊王享明於交城是時叛鎮姜瓖據大同賊黨劉遷糾眾萬餘謀犯代州與瓖犄角愛松古聞報率駐防兵馳赴代州偕遊擊高國棟籌畫守具遷擁眾猝薄城下立雲梯爲乘城計愛松古力禦之獲梯九斬賊三百賊益兵掘城我軍自城上發矢石賊多死遷走繁峙六年正月賊復來潛犯城郭奸徒爲內應門啟賊眾擁入郭愛松古督兵嬰城固守越十餘日端重親王博洛統兵赴援擊敗賊眾斬賊渠郭芳遷遁代州平乃還駐太原四月瓖黨十餘萬由清源犯太原愛松古與巡撫祝世昌議賊勢猖獗宜相度形勢據險防禦使不得逼城下乃分遣將士赴清源徐溝



禦賊會昌端重親王率兵自晉陽入剿賊眾敗遁七年遇 恩詔授騎都尉敘功加一雲騎尉八年擢參領尋擢鑲白旗蒙古副都統兩遇 恩詔晉世職爲二等輕車都尉九年流賊張獻忠餘黨孫可望等寇掠湖南愛松古隨敬謹親王尼堪率兵剿賊師至衡州王歿於陣師還以不及救王降世職爲騎都尉兼一雲騎尉十六年致仕康熙十四年六月卒 賜祭葬如典禮子納青初以三等侍衛於順治十六年隨征海賊鄭成功至廈門卒於軍至是以納青之子瑪爾繼襲職

右 國史館本傳

褚庫

褚庫滿洲正紅旗人姓薩爾圖氏先世居扎魯特祖柏德遷居葉赫 太宗文皇帝天聰五年大兵圍明大凌河褚庫年十七從征有蒙古驍將徹機格突陣褚庫迎擊之生擒以歸尋征明大同攻萬全左衛褚庫首先登城頸被創猶力戰破其城論功 予騎都尉世職 賜號巴圖魯授佐領兼參領崇德三年任吏部理事官世祖章皇帝順治元年隨英親王阿濟格追勦流賊李自成由廣西至湖廣賊將吳伯益以賊眾三千拒戰褚庫率兵擊敗之三年隨肅親王豪格征流賊張獻忠同尙書星訥敗賊將高汝礪等於陝西進師四川復屢敗賊兵六年隨大軍征叛鎮姜瓖圍大同僞

國朝書成類補卷之二十一  
三  
總兵楊振威糾賊犯正紅旗汛地並擾土默特營褚庫連擊卻之  
賊又犯鑲藍旗汛地同護軍參領瑚葉赴援以步戰敗賊眾賊平  
還京尋以值宿失印鑰解理事官任仍管佐領兼參領九年隨都  
統噶達琿征鄂爾都斯部叛酋多爾濟於賀蘭山俘獲甚眾屢遇  
恩詔晉世職至二等輕車都尉十三年海賊鄭成功犯福州時鄭  
親王世子濟度統師至漳州遣副都統阿克善偕褚庫率兵赴援  
賊以戰艦二百自烏龍江來犯褚庫率本翼兵登舟奮擊敗之追  
至大江口獲船十二賊又以千餘眾於江岸迎戰褚庫督兵奮擊  
斬級二百餘 聖祖仁皇帝康熙二年擢正紅旗蒙古副都統三  
年敘累次隨征功晉一等輕車都尉七年以年老解副都統任十

四年卒 賜祭葬如典禮諡襄壯子海存襲世職

右 國史館本傳

褚庫姓薩爾圖氏滿洲正紅旗人世居葉赫年十七從軍天聰五年從征大凌河擒蒙古將徹機格八年攻萬全左衛首先登城

賜號巴圖魯授佐領世職崇德三年擢吏部副理事官順治元年從豫親王多鐸征流寇兩敗其眾三年從肅親王豪格征四川再敗張獻忠兵又同尙書星訥敗賊高介兵六年同大兵征叛鎮姜瓖攻大同賊眾來侵連擊卻之九年從都統噶達渾征鄂爾多斯率本旗兵攻多爾吉營步戰破之斬殺甚眾圍沙克巴營降之十一年從定遠大將軍世子濟度征福建十二年師次高齊賊自烏

龍江引舟師二百餘艘列陣以扼褚庫率本翼兵兩戰俱卻之追至大江口大殲之獲艦十三康熙二年授正紅旗蒙古副都統後敘功加世職爲一等輕車都尉十四年卒 賜祭葬諡襄勤

右 國史賢良小傳

褚庫巴圖魯少爲先烈親王牙將勇絕一時攻宣化府城首登其堞頸爲明兵所刃公左手撫額右手猶手刃數人僵於城側其氣僅屬大兵因以破城時有善醫者云其喉未斷使婦女撫吸其氣猶可望生 特命妓女如法治之用巨繩縫其頸公果得復生至康熙中從 上幸南苑彎弓逐獸馬蹶其頸復斷公因之薨

右錄宗室昭棟撰

鮑虎

鮑虎山西應州人順治二年由行伍從大軍定江南進取江西有功洊授南贛鎮標前營遊擊五年正月廣東提督李成棟叛據南雄九月糾洞蠻土寇十餘萬分路出信豐南安犯贛州南贛巡撫劉武元總兵吳有升督將士出迎戰虎由小東門城薄營奮勇直入諸將繼之大敗賊眾斬首萬餘級成棟單騎逃竄捷聞得旨嘉獎十月賊犯上猶虎以兵往援距城七十里抵土橋遇賊萬餘擊之潰追二十餘里擒僞提督劉飛參將姚元藻等斬獲甚眾詔下所司彙敘擢參將特賜蟒服十二年署山西渾源城守副將十三年遷江南狼山營副將康熙元年調浙江嚴州城守副將

十三年八月逆藩耿精忠黨寇浙江温州黃巖平陽三鎮皆叛壽昌等縣相繼陷精忠潛以逆劄誘降虎不從擊賊奪險隘一日六戰皆捷遂復壽昌九月偵賊萬餘糾土寇黃應茂犯遂安虎率子輔仁志仁依仁希仁及效用守備熊仲雲等陣斬僞副將葉姓參將王師古等殺賊千一百七十餘康親王傑書以聞詔獎其功下部議敘並以舉首逆劄加都督同知尋擢黃巖總兵十二月僞總兵王飛石等犯淳安虎逆擊之於圍屏鎮斬賊二千餘生擒飛石及僞副將江明等四人又招降僞副將江城敘功加右都督十五年六月海賊大艦偪海門虎提師進剿以勞暍成疾師旋卒於官諭曰鮑虎效力行間著有勞績其子作何錄用該部議奏

尋議錄其子輔仁爲參將 允之輔仁歷官廣東春江協副將

右 國史館本傳



廣東省圖書館藏書

四二

察哈泰

察哈泰滿洲鑲紅旗人姓薩克達氏世居甯古塔 太宗文皇帝  
天聰時察哈泰以護軍隨征明永平大凌河大同等處積功授驍  
騎校管佐領事崇德元年隨征朝鮮先驅敗敵於納穆山三年隨  
貝勒岳託征明越燕京趨山東攻克濟南府城六年圍錦州敗明  
總督洪承疇援兵於松山八年隨鄭親王濟爾哈朗取明前屯衛  
中後所二城 世祖章皇帝順治元年隨豫親王多鐸追流賊李  
自成破之潼關進定西安三年隨征江南監造戰艦尋隨端重親  
王博洛征福建五年隨征南大將軍譚泰討叛鎮金聲桓於江西  
擊敗迎戰賊眾焚其戰艦進圍南昌城屢戰克捷六年隨護軍統

領敦拜勦獻縣雄縣任邱諸土賊盡殲渠魁毀賊寨師還擢戶部  
理事官尋改太僕寺理事官先是敘征流賊及江南福建軍功  
予騎都尉世職至是遇 恩詔晉三等輕車都尉十四年授參領  
尋兼太僕寺卿十六年擢鑲紅旗滿洲副都統十七年同甯古塔  
總兵巴海征鄂羅斯抵使犬部界率舟師設伏江隈擊卻鄂羅斯  
來犯賊眾獲其船及器械因招降斐雅喀百二十餘戶十八年追  
論征鄂羅斯時有五船兵失利察哈泰不以實奏罷副都統任革  
世職專管佐領事尋以營總隨靖東將軍濟什哈征山東土賊于  
七賊黨呂思曲俞三等數千人一再來犯察哈泰同護軍參領通  
嘉奮擊敗賊進圍岨嶠山擄平賊巢 聖祖仁皇帝康熙三年授

鑲紅旗蒙古副都統十年以老乞休 上以其效力行閒有年慰  
畱之十一年調本旗滿洲副都統十二年二月遷護軍統領五月  
諭獎久著勞績諸大臣加察哈泰太子少保十三年授鎮東將軍  
駐防兗州十四年七月 命仍以護軍統領率兗州所駐滿洲軍  
赴荊州聽順承郡王勒爾錦調度勦禦逆藩吳三桂十五年三月  
賊將陶繼智等犯宜昌察哈泰率兵駐江陵通聲援七月卒於軍  
賜祭葬如例

右 國史館本傳



卦喇

卦喇滿洲正黃旗人姓伊爾根覺羅氏世居界藩 國初來歸由  
前鋒校世管佐領屢從征伐崇德三年授兵部副理事官尋署副  
都統七年大軍征明至黃崖口卦喇偕都統譚泰從山右奪隘進  
圍薊州敗明總兵白廣恩等兵順治元年隨睿親王多爾袞入山  
海關破流賊李自成二年敘功給騎都尉世職三遇 恩詔遞加  
二等輕車都尉授副都統六年四月 命偕參領羅碩赴太原駐  
防時叛鎮姜瓖黨陷汾州 諭固守太原卦喇於城南八十里立  
營偵賊攻清源縣偕羅碩分路奮擊斬首五千餘級餘眾潰走五  
月偽巡撫姜建勳擁眾犯太原卦喇等迎擊之斬級千餘賊立寨

晉祠堡據險不退會端重親王博洛統兵至卦喇隨大軍破賊營  
斬萬餘級八月賊眾犯壽陽縣卦喇率兵援勦復大破之康熙十  
三年以老病乞休十五年卒子烏爾禪襲世職

右 國史館本傳

楊愷

儀徵武進士楊愷康熙時受知 聖祖召入南書房與何義門蔣  
南沙諸公同校書史後提督兩湖頗著勳績入爲鄒枚出則襄鄂  
文經武緯亦 本朝希有人物已

右紀聞陳康祺撰



國朝名臣奏議卷之二

五

國朝耆獻類徵初編卷二百七十一目錄

將帥十一

額司泰

伊勒都齊

彭有德

許占魁

鄂齊里

瑚里布

王可臣

曾孫進泰  
元孫柄

覺羅豁特

武穆篤

阿賴

--	--	--	--	--	--	--	--	--	--

國朝耆獻類徵初編卷二百七十一

通奉大夫前署江西巡撫江西布政使司布政使湘陰李桓輯

將帥十一

額司泰

額司泰滿洲鑲白旗人姓富察氏大學士額色赫弟也初事世

祖章皇帝任一等侍衛 聖祖仁皇帝康熙三年授鑲白旗蒙古

副都統九年遷護軍統領十二年逆藩吳三桂反 上命順承郡

王勒爾錦統師征討以額司泰參贊軍務會侍衛阿爾賽自荊州

還奏賊由貴州陷沅州總兵崔世祿降賊澧辰道梗湖以南半入

於賊總督蔡毓榮亦飛章入告因 詔額司泰同護軍統領伊爾

漢簡精銳先發十三年二月抵荊州 上以常德長沙二郡爲  
三楚要地 命額司泰與前鋒統領碩岱都統珠滿移駐守禦值  
二郡已爲賊陷仍駐荊州未幾賊將劉之復陶繼智率賊萬餘犯  
宜昌營於江之兩岸總兵徐治都告急額司泰乃自荊州移師赴  
援與徐治都等率舟師橫江逆擊戰甫接賊潛以三百人率登岸  
擾我後我師分擊敗之得賊舟三賊遁走越三日師次岳州界時  
三桂踞澧州其黨吳應麒廖進忠柯鐸高起隆踞岳州馬寶張國  
柱復率眾二萬自澧州水陸至集並於陸地設鹿角阻我騎兵額  
司泰與貝勒察尼將軍尼雅漢定議三岡爲賊門戶令前鋒兵先  
奪之以阨其吭繼令護軍驍騎分路堵截且檄綠旗兵奪據城陵

磯及七里橋使賊首尾不相顧至期聞貝勒營吹角額司泰率前隊戰艦擊賊眾軍以次並進攻毀賊船殲賊萬餘賊退踞七里橋東木柵乃收兵還營是年冬奉 詔參贊貝勒尙善軍規復岳州值賊勢猖獗我軍未能進取久相持十五年三月 上諭尙善曰頃安親王岳樂已復萍鄉醴陵進取長沙逆賊吳三桂遺其黨馬寶高起隆自岳州赴援賊勢旣分毋坐失機會於是尙善以所部水陸諸軍令額司泰統率進剿賊船列陣洞庭湖鐵鎖句連礮火矢鏃如雨額司泰自率銳卒衝其北令副都統洛什擊其南軍士皆奪船奮進大敗賊追擊三十餘里賊之踞君山者皆遁獲船五十二偽印五纛仗盜甲無算擒賊百七十餘人十六年二月卒於

軍先是統師王貝勒屢奏額司泰敗賊功皆得 旨嘉獎俟事平  
日議敘至十九年大軍凱旋部議王貝勒大臣征岳州時退縮不  
前罪額司泰既病歿應籍家產 上原宥之

右 國史館本傳

伊勒都齊

伊勒都齊姓莽努氏世居察哈爾 太宗文皇帝時來歸隸正黃旗蒙古尋授護軍參領天聰八年七月 上親征明由宣化府入邊伊勒都齊從率所部攻下十二堡八月班師齎 敕先還以入邊功 諭畱守諸貝勒崇德五年六月隨睿親王多爾袞屯田義州敗明騎兵於甯遠九月鄭親王濟爾哈朗統師圍明錦州令伊勒都齊與前鋒統領勞薩等率兵三百設伏高橋北以縱敵弗擊議罰家財半六年復隨鄭親王圍錦州敵兵自松山來犯鑲黃旗汛地伊勒都齊同護軍統領濟什哈擊卻之八年鄭親王征明前屯衛以礮攻毀城堞伊勒都齊率本旗護軍先登取其城敘功



予雲騎尉世職 世祖章皇帝順治元年隨大軍入關敗流賊李自成追至望都是年冬署護軍統領隨豫親王多鐸剿賊至陝州距潼關立營自成遣賊眾迎戰賊將劉方亮乘夜劫營伊勒都齊與護軍統領圖賴奮擊破賊遂克潼關二年四月豫親王多鐸師定江南至揚州伊勒都齊同護軍統領圖納岱率兵攻城南獲敵船二百餘尋隨端重親王博洛征浙江敗明總兵王之仁等於平湖縣追剿至太湖獲船數十大兵既定杭州伊勒都齊與前鋒參領鄂碩勞罕往偵錢塘江渡口擊敗敵兵三百先是敘入關破流賊功晉世職騎都尉兼一雲騎尉至是敘平江南功晉三等輕車都尉三年隨豫親王征叛逃蒙古騰機斯等將追及賊眾遺戰伊

勒都齊與都統阿賚先率兵繞出其後俟賊潰遁截擊擒斬甚眾  
我兵自圖喇河西行喀爾喀部土謝圖汗之子及碩類汗之子各  
率眾邀戰伊勒都齊列陣奮擊敗之獲馬駝無算敘功晉二等輕  
車都尉六年隨鄭親王征湖南時明桂王朱由榔之將王進才袁  
宗第郝永忠等據沅州靖州伊勒都齊同前鋒統領努三護軍統  
領都爾德副都統金維城率兵由武岡進征破進才賊寨九袁宗  
第列十寨於洪江南岸伊勒都齊先眾破其五寨賊皆潰遁復分  
兵進勦郝永忠攻克黎平府永忠竄遁躡跡至永從孫斬級百餘  
獲馬數百七年四月凱旋得 優賚八年擢正黃旗滿洲副都統  
九年兼刑部侍郎三遇 恩詔晉爵二等男十年十一月以勘鞫

佐領敦達哩岱敏互訐事論敦達哩削職罰鍰敦達哩訟冤得釋  
伊勒都齊坐偏徇降爵一等罷侍郎任十七年以疾解副都統任  
聖祖仁皇帝康熙十二年 諭獎久著勞績諸大臣加伊勒都  
齊太子少師是年冬逆藩吳三桂反 上命順承郡王勒爾錦帥  
師赴湖南征討以伊勒都齊爲護軍統領參贊軍務同前鋒統領  
碩岱簡精銳先發十三年二月至荊州賊陷常德窺武昌十四年  
冬 諭責順承郡王駐師踰年未復湖南郡邑罷伊勒都齊參贊  
十六年四月卒於軍十九年追論伊勒都齊守武昌時不勦滅虎  
渡口賊寇致太平街失陷降世職爲雲騎尉以其弟之子瑪哈襲

右 國史館本傳

彭有德

彭有德漢軍正黃旗人順治元年由將材從大兵入關二年授山西大同都司尋遷遊擊管右衛參將事五年十二月逆鎮姜瓖叛遣人持書招有德降有德囚其使同城守備王曰吉等陰通賊有廢弁閻某糾眾圍有德署礮石並發有德奮勇突圍奪門出妻妾子女及家屬六十餘人皆遇害馳至英親王阿濟格軍前告壤叛狀並呈逆書隨奉令同守備王化鳳攻大同城又率兵至右衛招撫賊眾賊於城上施礮穿有德甲不爲動復雲岡威遠等堡六年十月敘大同戰功遷參將管陽和副將事九年十月授浙江杭州副將陽和軍民具狀乞畱下部議准以升銜畱任十一年十一月

新設大同總兵 詔以有德充補尋加署都督僉事十八年加署  
都督同知康熙八年正月因老病乞罷得 旨以原官致仕十六  
年十一月卒 賜祭葬如例

右 國史館本傳

許占魁

許占魁陝西蒲城人流寓遼東 世祖章皇帝順治二年隨豫親王多鐸定江南授陝西陽平關參將六年二月僞侯趙榮貴擁僞秦王朱森溢聚眾數萬犯階州占魁從間道山碧魚口襲其後而先與定西將軍李國翰臨鞏總兵王允久期師夾擊遂大破賊眾陣斬森溢榮貴及僞參將二俘男婦二百餘人十一年七月遷山西平陽副將時土賊張武擁僞魏王朱秀唐劫掠聞喜縣占魁與遊擊苗成龍等分路搜剿敗賊於紫家峪斬首百餘級擒朱秀唐等十五年調陝西西甯副將十六年八月以裁缺調直隸紫荆關副將 聖祖仁皇帝康熙九年擢延綏總兵官駐榆林十三年陝

西提督王輔臣定邊副將朱龍俱叛應吳三桂十四年三月占魁  
舉首朱龍所與逆書疏言臣雖武夫亦聞大義豈肯移忠貞之素  
志遺臭名於萬世 上嘉獎下部議敘加都督同知銜先是延綏  
標兵調征四川者過半至是朱龍等窺榆林防守單弱屢糾眾來  
犯占魁遣副將張國彥孫維統遊擊謝鴻儒錢應龍等分路堵剿  
又自督兵勦賊綏德既已踞城出拒河濱我兵以礮擊斃賊數百  
終未能薄城占魁慮賊襲榆林適張國彥孫維統大破賊兵於懷  
遠縣遂率孫維統謝鴻儒等回榆林張國彥回守波羅堡未幾朱  
龍煽誘波羅營千總劉尙勇等脅偪張國彥劫奪 敕印國彥禦  
賊力竭閣門自焚死叛將孫崇雅引賊眾戕神木道楊三知知縣

孫世譽守備張光斗等遂據神木縣城賊勢熾甚占魁遣子登隆詣闕告急 上投登隆鴻臚寺少卿 詔趣見駐大同之將軍畢力克圖副都統覺和託移師援勦占魁復分遣孫維統錢應龍等往隨覺和託兵勦賊擒斬無算魚河響水波羅三路營堡及神木縣俱復畢力克圖進復綏德延安朱龍孫崇雅劉尙勇相繼就擒伏誅殉節之張國彥楊三知等皆 賜卹贈榆林從征將弁並特敕議敘占魁疏言自叛提王輔臣令逆協朱龍竊踞定遠遂陷綏德米脂及葭州神木賊騎竟至歸德堡北至榆林僅二十里許臣集開城官員士民誓死守城調遣兵馬擊賊潰遁人心始堅嗣因臨洮鞏昌慶陽平涼漢中興安固原相率從逆獨存榆林孤城



餉道阻隔粒米如珠百姓日食糠粃臣罄捐家貲於邊地購米計口給散及大兵既至道臣高光祉措辦糧草軍需不匱諸將士各奮勇擊賊刻期奏凱回思逆賊環徧之時榆城危若累卵今得安全如常者皆由閩城文武同心兵民合力宣揚 聖上威德堅守三晉門戶保全數萬生靈既恢復十五城堡又召回兵民二萬餘人安輯得所今出征有功人員已奉 恩旨察敘其在城各官勞績謹另冊開報祈 敕部覈議以爲因守孤城者勸 上諭吏兵二部曰鎮臣許占魁道臣高光祉及文武各官勦禦賊寇保守孤城措辦糧草安輯地方實心任事深爲可嘉俱從優議敘於是光祉與各官加職有差占魁晉左都督 予騎都尉世職尋以病兩

疏乞罷並奉 溫諭慰留十六年八月擢鑿儀衛鑿儀使占魁聞命復以病劇乞罷得 旨卿久鎮巖疆勦滅賊寇安輯地方勞績茂著特擢鑿儀使正資倚任覽奏以病乞罷情詞懇切准馳驛回籍調理仍支原俸俟病痊起用十二月卒於家年七十有二 敕所司予卹兵部議加贈禮部以鑿儀使舊無卹例奏上 特旨贈太子少保 賜祭葬如一品例諡曰恪敏長子登隆仕至雲南臨安知府次子登伋襲世職

右 國史館本傳

卷之三十一

一

鄂齊里

護軍統領鄂公以康熙十四年乙卯從大師西征越二年丁巳以疾卒於秦州軍訃聞 朝廷軫悼不忍使良將之沒於王事者久暴露於外也 命以骸骨歸葬於是公子博君奉公喪葬於西直門外西北郊之白塔庵而持所爲狀來請余銘余與博君交有素不敢辭因據狀而爲之誌按公姓鄂氏諱齊里滿洲世胄也祖某父某 世祖章皇帝初入關公年甫弱冠卽與從龍之列嗣後才譽益顯 簡置侍衛每遇戰陣輒執螯弧先登騰機思之役和碩德豫親王師行百日略地四千餘里俘獲無算行閒諸將皆極一時之選而公其一也繼偕禁旅定雲中之變又隨和碩英親王靖

羣盜之竊發晉地者又從征東粵有克敵功授佐領世襲不替公  
既嫻於戰略尤以威望爲諸將吏所讐服於是 朝廷欲倚公之  
重彈治都會 特擢侍郎巡視西城一時輦下姦宄斂跡未幾  
王師入滇公又在行陣師還又入西曹以平允著聲蓋公之才兼  
資文武如此康熙初年升授參領 國家承平十餘年矣方欲寢  
兵息獄與諸老臣宿將講恬熙之樂忽歲甲寅滇黔構禍蔓延三  
秦大將軍統師西討復 命公爲護軍統領公至以計克延安又  
率精銳攻拔綏德賊聞公名輒股慄軍次平涼躬冒矢石屢挫賊  
鋒王繼貞敗困武州王屏藩卻走天水公之功爲獨多大將軍雅  
重公諮訪軍事委任如左右手乃積勞遘疾竟致不起康熙十六

年十二月二十二日也距公生天聰庚午十二月二十一日享年  
四十有八余昔與修 國史稔覩累勳積伐疑公爲白首耆舊及  
公卒而年甫及艾何樹功之蚤也今公之名已垂不朽而公滅寇  
朝食之志抑而未伸不及偕諸將士獻俘飲至以告成功於宗社  
甯不痛哉配關氏累 封夫人子二長卽博君靈安次撻拉馬俱  
太學生候補某官哲嗣繼武以竟公未竟之業公可以無憾矣爰  
系之銘曰  
天生我公棟梁倚重孝斯作忠謀以兼勇川渟岳峙夙荷殊寵斬  
將搴旗風馳電悚星實於西一軍號踊沒而猶視敵爲震恐天烝  
酬功祁連象冢勒功豐碑韓范接踵

右墓碑張玉書撰

瑚里布

瑚里布滿洲正紅旗人姓赫舍里氏世居和多穆哈連地父吳巴  
海當 太祖高皇帝討平葉赫時來歸授佐領俾分轄其眾瑚里  
布其少子也 太宗文皇帝天聰五年由佐領擢一等待衛旋任  
前鋒參領崇德三年隨貝勒岳託征明自密雲東北毀牆子嶺入  
邊同護軍參領魯克都等擊敗明步騎兵獲馬駝百餘六年隨征  
錦州明總督洪承疇據守松山瑚里布與前鋒統領勞薩等率兵  
越壕誘敵出戰奮擊敗之復同參領席特庫布爾遜屢敗杏山敵  
眾松山敵騎夜遁瑚里布沿海濱躡擊殲殪無算七年三月駐師  
杏山敵騎四千餘自甯遠來犯見我軍容盛卻走瑚里布與前鋒



統領努山追蹙之連山尋遇沙河所敵兵五百欲走甯遠復擊敗之十月貝勒阿巴泰統師征明 上命瑚里布與席特庫隨右翼軍入長城卽以軍事還奏於是大軍自黃崖口進克長城明總兵白騰蛟白廣恩合眾數千邀戰瑚里布同諸將擊敗之於薊州遂先還奏捷八年四月 上念征明大軍將出長城復遣瑚里布與努山席特庫及參領瑚沙羅實等率兵九十赴界嶺口偵之遇明兵俘斬甚眾 世祖章皇帝順治元年冬 命英親王阿濟格勦流賊李自成於陝西瑚里布率正紅旗前鋒以隨二年春師至綏德州賊乘我未列陣掠取馬數十瑚里布追及之山巔擊潰賊眾盡獲其所掠馬會自成奔湖廣大軍追征攻克安陸府瑚里布

敗賊獲戰艦追剿至九宮山五戰皆捷師還敘功授雲騎尉世職  
三年隨肅親王豪格剿流賊張獻忠過漢中擊敗叛將賀珍兵大  
軍將至西充肅親王令瑚里布同參領席卜臣率前鋒四十人持  
檄先行遇賊騎邀截突前衝擊斬三十餘級生擒二人進薄獻忠  
營斬其執燾者大軍繼進遂殲獻忠瑚里布復與都統準塔征遵  
義府過璧山縣擊潰賊眾數千六年隨鄭親王濟爾哈朗順承郡  
王勒克德渾征湖南攻圍湘潭徇衡州道州及全州皆有斬獲七  
年九年兩遇 恩詔晉三等輕車都尉十年擢正紅旗滿洲副都  
統十三年遷右翼前鋒統領十五年隨信郡王多尼征貴州十六  
年大軍克雲南明桂王朱由榔及其帥李定國白文選等竄遁瑚

里布與左翼前鋒統領白爾赫圖率兵趨永昌渡潞江戰磨盤山  
克騰越州窮追至南甸皆有功還京追論戰磨盤山時都統沙里  
布遇伏陣歿瑚里布弗及援停止敘功仍任前鋒統領康熙十二  
年五月 聖祖仁皇帝念瑚里布宣力有年克著勞績 特加太  
子少師十二月逆藩吳三桂反 命都統赫業爲西安將軍瑚里  
布以護軍統領爲副將軍率禁旅赴西安會同駐防將軍瓦爾喀  
進討十三年正月 上念四川接壤滇黔恐賊煽動 詔瑚里布  
與前鋒統領穆占簡精銳疾馳相機援剿三月會師漢中賊黨已  
踞陽平關瑚里布同穆占攻克之乘勢趨七盤關及朝天關連敗  
賊眾擒斬無算遂追征保甯賊將吳之茂擁眾抗拒大軍整塚斬

與相持六月 上遣貝勒洞鄂爲定西大將軍征保甯以瑚里布  
參贊軍務十一月提督王輔臣叛於甯羌 詔撤保甯兵還守要  
地瑚里布同赫業等還漢中尋隨洞鄂還西安十四年賊阻截棧  
道平涼秦州俱陷 詔趣進勦瑚里布隨洞鄂征秦州圍城四月  
克復之移師征平涼距城數里駐營輔臣連結蜀賊阻大軍薄城  
十五年 上以大軍久駐平涼未能攻取 命大學士圖海爲撫  
遠大將軍將收洞鄂等 敕印令受圖海節制瑚里布畱供調遣  
十六年卒於軍子剛元襲世職

右 國史館本傳

--	--	--	--	--	--	--	--	--	--	--

166-124

王可臣

曾孫進泰

元孫柄

王可臣陝西人 世祖章皇帝順治四年肅親王豪格統師定四  
川可臣來歸卽令同諸降將石國璽蔣登雷率其降卒七百人爲  
大軍前導進勦山寨山賊乘夜由小路登奪其東門克之師旋隸  
正白旗漢軍 予騎都尉世職准襲二次六年十月隨都統石廷  
柱征叛鎮姜瓖至澤州獲僞官有功十年七月隨經略大學士洪  
承疇南征舟至嶧縣臺兒莊有正藍旗騎都尉張任先抽刀欲向  
提督李本深可臣驍壯多力扼而奪之洪承疇入奏 詔革張任  
先職治罪賞可臣銀三千兩師至湖廣委左標遊擊駐防常德府  
十二年正月授經略左標右營遊擊時明桂王朱由榔據雲南以

流賊餘黨孫可望李定國劉文秀馮雙禮等爲將出入川黔分兵犯常德可臣率兵於陬溪西南江邊設伏伺賊船過半邀截之賊敗奔德山沿江堵剿斬溺無數得 優賚冠服弓刀十三年九月隨大將軍阿爾津進剿辰州敗賊於瀘溪縣十五年三月大兵進取貴州可臣督率兵丁由沅州伐木造太江橋修路六十里並紀功十六年二月可臣同水師副將石玉貴擊賊於楓落壩擒僞副將蕭聲玉復追至三會塘生擒僞總兵李正洪及其子並獲僞參將曾學仲等三月會各標兵於湄潭縣招撫僞副將薛萬珠蔡魁敗馮雙禮子僞總兵天裕於泥落壩僞總兵盧正友等踞木猴屯可臣同參將陳福等分兵兩路擊敗之疾追至席樂坪馮天裕復

合僞總兵冉宗孝馮任國等踞合馬箐抗拒可臣與參將張攀龍  
守備王友名分三路圍攻親冒矢石自寅至午大破賊巢斬馮天  
裕馮任國又射死冉宗孝於萬佛山追盧正友於瓜子溪斬之十  
七年十一月遷貴州提標中軍參將兼管左營事十八年九月黔  
逆劉鼎結連丹平土司莫之廉等犯定番城官軍赴援卻賊可臣  
掩擊賊眾於城西北歸路斬級甚多復由谷龍一路進破陽城地  
賊巢 聖祖仁皇帝康熙元年貴州土司李國柱謀犯鎮西可臣  
同遊擊席登雲董朝祿等領兵援勦陣斬李國柱盧明臣十一月  
丹平土司莫之廉窩藏劉鼎抗拒官兵總兵楊茂勳令可臣統領  
督標參將南容安順鎮標遊擊劉學正馬步兵由定番東谷嶺西



路進攻會都勻參將龍略於丹平合力擒勦之廉退保西梁踞入貢山迎敵攻克之擒總管廖國忠之廉走大峒可臣議四面進攻自率標兵當大峒之前分撥南容截其後劉學正擊左龍略擊右乘夜進兵未明舉礮官兵奮勇四合殺苗眾三百餘人之廉見勢迫竄後路爲南容所獲餘黨及家屬俱被擒拏捷聞下部紀功三年三月隨征水西駐營大廣有苗目阿布者密約劫營可臣同各鎮兵乘夜過河至化乍地方埋伏俟賊過掩擊斬殺甚多又大敗苗賊於塔寨箐口可臣生擒苗目黑者子受斬之四月進師勦箐峒自雪棚起營直抵賊穴攻克阿哈箐口進勦至黃沙渡多斬獲六月同總兵王友進領兵往雄所則溪一帶搜勦由擡石壩進

抵阿利木江箐賊潰遁追逐四十餘里至明家渡殺賊千餘獲馬  
匹器械七月同總兵李如碧前進渭河七山及遵義鄰界克高寨  
坡箐及法中石叢山等八峒殺逆目九名賊千餘十一月賊目陳  
老善嘯聚東隆箐可臣領兵至魚孔衝殺賊眾追至賊窩斬陳老  
善等二百餘級獲器械二百餘又同千總張起鳳從樂摺峒追賊  
至大木廠擒逆目阿市等三名尋授西甯鎮總兵九年正月敘平  
水西黔滇等處功加署都督同知十二年十月擢湖廣提督尋以  
逆藩吳三桂反畱新授雲南提督桑額於湖廣令可臣回京十五  
年二月授鑾儀衛使十六年六月授廣東提督疏請隨帶平日親  
信之八旗閒散官治儀正文養謚等三十四員給副將以下職以

資防勦又請復提督駐劄惠州爲省城犄角以便往來援勦並從之又疏言粵東初附兵心未一欲收其兵惟餉是賴當此變亂之餘庫藏未免空虛糧餉或有不給臣標額設兵五千名粵省甫定必多缺額若俟到任召募恐一時不能卽得擬於出京之日沿途召募年力精壯弓馬嫻熟之人以恩結之收爲腹心帶之入廣卽充臣標經制額兵先給月餉以爲路費仰懇不拘常例發內帑十萬兩沿途應用仍於到汛入伍之日按月補還作正開銷以其餘交貯司庫充經制兵餉士卒感 恩必飽騰奮勵以圖報效矣下部議給五萬兩行十七年三月卒於任加 贈左都督 賜祭葬如例諡襄敏部議可臣原領庫銀五萬兩置備馬匹器械支給

俸餉及召募兵丁安家行裝銀扣抵准銷外尙有沿途應用銀九千餘兩應於其子朝用朝欽名下追賠 詔以可臣效力行閒勤勞有年優免九月總督金光祖奏可臣次子朝欽可稱驍勇可臣臨危欲其承襲世職行閒效力其關中所帶親丁二百餘皆久經征戰精銳之士各有餘丁約可挑選壯勇五百名令朝欽統領立爲拔勦營下部議朝欽襲騎都尉授兩廣督標援勦營遊擊嗣以入粵召募各兵月餉扣抵無以存活逃散將半僅存二百五十名隨朝欽入援勦營從征粵西朝欽復呈請豁免未足銀二千七百餘兩奏入 特旨免扣十九年隨金光祖入潯州會勦叛賊馬承蔭由水路攻取粵灘峇進克武宣縣復柳州十一月隨大軍進勦

逆擊吳世璠於雲南二十年二月率本營兵爲頭隊攻石門坎奪  
第一峯隘口進攻黃草壩直抵雲南省城領親丁殺賊有功尋令  
署援勦副將二十一年還京敘黃草壩功加十等授左都督二十  
二年八月補巡捕北營遊擊十一月遷四川龍安營參將二十五  
年四月敘雲南省城殺賊功由騎都尉加一雲騎尉二十七年九  
月遷福建延平副將三十三年三月卒子王治襲雍正四年改隸  
鑲白旗

右 國史館本傳

王進泰

王進泰漢軍鑲白旗人曾祖可臣任廣東提督授騎都尉有傳祖

朝欽任福建延平副將由騎都尉加雲騎尉皆世襲罔替進泰以  
雍正元年承襲旋授鑾儀衛整儀尉洊歷參領乾隆三年六月奏  
八旗白局向由本旗揀員帶領催等辦理更換差委不無推卸請  
每局揀參領一員章京一員驍騎校二員照印務章京例定爲額  
數引 見補授議行十一月擢鑲黃旗漢軍副都統四年二月奏  
入旗有因代賠祖父虧空未完問擬枷責人等較本身緣事者有  
閒且在屢次 恩赦以前有情願考試者請令一體赴考議行五  
年七月奏向例旗人投效河工由該旗考驗後出具印結咨送近  
有借端自往公所具呈請嗣後俱由本旗送工下部議行七年正  
月署鑲黃旗漢軍都統八年七月奏見當 駕幸盛京京師夜禁

綦嚴臣奉 旨輪察京城堆撥於七月十七日夜見護軍喜兒傳事夜行驗其執照年月不符恐有假冒交護軍統領查訊據稱傳事屬實其七月應給執照已用圖記交辦事護軍關保領尙未給發等語伏思夜間傳喚事件應將關防執照註明月日臨期給發如查察不符除一面拏究外請將給發執照之該管官交部照例查議得 旨允行十三年十月授直隸天津鎮總兵十四年二月奏天津米價騰貴前任總兵曾代兵丁挪借庫項買米查鎮署有存庫公項請於米價稍賤時收買酌借以紓民力 上嘉之十六年四月調補江南壽春鎮總兵十一月奏六安營額設千把外委各五員內塘務把總外委各一員查傳遞公文無汛防之責緣該

營向隸狼山鎮塘汛較遠今改隸壽春相距僅百餘里汛弁儘可稽查無須專員管理至壽春一鎮汛廣弁少公文每多遺誤請將六安營把總外委改歸鎮標稽查全鎮往來公文下部議行是月擢京口將軍十七年三月奏前任將軍薩爾哈岱欲將兩淮鹽政衙門生息銀兩在江南城外購地牧馬查京口八旗之馬共二千匹卽牧放一半亦有千匹之多該處地勢狹隘產草無幾實有不敷芻秣之慮未便濫費官項 諭曰此不可行之事南方豈有牧馬之理罷之甚是六月奏京口水師左右二營自瓜洲至江陰靖江環互八百餘里額設副將一員駐江陰游擊二員一駐瓜洲一駐靖江守備千把二十二員分轄八十餘汛右營近京口官弁尙



未敢輕離汛防至左營把總外委或汛署坍塌或本未建署離汛  
羣居請照例補設又左右二營例於京口八旗水操時各撥沙船  
上船合操查二營見有沙船十六號船數儘敷合操之用請照八  
旗例每年合操四次又右營圖山關地方山高江窄向設礮位十  
二僅看守兵數名查江洲汛有千總一員已足彈壓其協防外委  
一員請移駐圖山關專管礮位議行十二月奉 旨調補安西提  
督十八年四月奏本年三月巡汛至塔爾納沁距哈密東三百餘  
里築有土城向駐防兵後經裁去前提臣綽爾多奏請於哈密三  
堡等處撥兵三百照前防守查哈密三堡兵未可少沁城並無人  
民倉庫兵不必添又哈密偏近準夷不但冬防緊要春夏秋亦不

可弛安西有中北南三路中路行旅常通南北兩路往來稀少擬  
每月會哨一次疏入報 聞八月奏向來準噶爾夷貢使到境均  
派防兵內稍通蒙古語者作通事今由兵部撥通曉蒙古語候補  
千總四員到安擬派一員先往哈密聽候遣用奉 旨竟應派二  
人往哈密十二月奏哈密毗連夷壤北路有準夷大隊來降恐西  
路亦有降人見飭各卡弁兵詳查真偽如係逃夷及引兵來追當  
阻畱卡外無許闖入並宣諭 皇上施恩和好之至意若無人追  
逐查訊來降屬實亦須安置僻處拘其器械馬匹庶免疏虞奏入  
諭曰此奏所見甚小撫馭外夷之道全在隨時籌酌相機辦理從  
前策安多爾濟那木扎勒及喇嘛達爾扎皆噶爾丹策凌之子是

以准其遣使入覲今彼中紛爭構釁皆篡弒之人達瓦齊又非其族類何屑以和好爲言其所屬夷人避亂投誠乃窮蹙來歸自當收畱安置何必阻諸卡外絕其內附之心如或引兵來追卽當守我卡座無令闌入至所請投降人等拘其器械馬匹此向來綠營小見飾詞旣許其內屬自不當示以猜疑使之駭懼看來王進泰不過小心謹慎之人於邊務機宜未能仔肩重任已傳諭永常於明年夏秋閒親往安西節制調度見在瑪木特夷人闌入北路卡座不得不遣人究問已命舒赫德等前往軍營相機辦理所有前後情節王進泰未能稔知著將北路軍營奏摺并所降諭旨一併錄示王進泰知之十九年四月調補甘肅提督時大兵將征準夷

諭王進泰揀所部兵赴軍營十月奏揀選得西甯甯夏兵遣守備  
舒明阿帶赴軍營報聞二十三年五月調江南提督十二月奏  
蘇松鎮總兵施廷專於署提督任內侵漁公項經臣查察仍行交  
還係先侵後吐命下兩江總督尹繼善審明具奏尋議革廷專  
任二十四年五月奏崇明鎮各營戰船見屆小修例限半載完工  
請先修一半以應秋操餘緩至來歲接修諭曰所見甚是水師  
船隻專爲出巡操演而設今小修之年卽如例限以半載完工爲  
期已屬太寬大修拆修又不知當如何遲緩矣且自登舟以至出  
水又需時日是三年之中勢必停操一年官兵經歲不得登舟練  
習於設立水師防汛哨探之制甚爲有名無實應行酌量分別修

造下軍機大臣會同工部議奏 諭曰此事既有康熙年間定例  
各省自應遵照辦理何以江南崇明鎮標等營額設船隻同時修  
造遂至各營以無船爲辭停歇操演可見地方陋習於奉行故事  
之中卽寓廢弛之弊如果見在按期興修次第辦理則王進泰身  
任提督必不遽行陳奏此案不行先後興修以致無船應操之各  
該管官著尹繼善逐一查明具奏交部議處以爲不遵定例者戒  
十一月奏據松江城守營稟報有營兵蕭德榮拾信一函係婁縣  
民人王還因索詐楊玉英未遂造書圖陷經楊玉英投首獲犯供  
認不諱除移交督撫嚴辦外今先鈔扎具奏得 旨所辦甚屬可  
嘉尋奉 命查辦沿江沿海各營兵丁賑務二十五年四月奏崇

明洋面縣互數百里向於每年二月至九月派營官出巡十月至正月無巡緝之例請無論冬夏一體出巡得旨允行又奏福建漁船在江南崇明地界劫蘇商潘紹先當獲張七等三人並查取疏防各職名奏參在案今正犯已於閩省緝獲張七等並非正犯前未經有司審確故不敢冒昧具奏諭曰究屬巧言以汝尋常尚屬黽勉此次姑從寬以後諸事認真據實奏聞不可再錯二十年二月調補廣西提督九月奏廣西營汛向例每年止鎮將查閱三年提臣始親閱一次粵西爲苗疆邊要提督職任軍務必周知通省營務水陸情形庶調度合宜請嗣後每年巡閱分別勸懲上遵其言二十七年六月奏營中設礮大小不一小礮用鉛子大

礮例用鐵子方能致遠有力今查檢各營鐵子不敷配用應製造  
儲備再查義甯協未設礮已於南甯城守營酌撥飭該協分設城  
垣奏入報 可十二月奏融縣流犯高深因向城守營兵丁鄧世  
得等索欠未遂率領流犯多名至守備署前毆傷守卡兵英胄升  
蔣錫煥等該營外委陳守邦往查亦被毆傷除移會督撫嚴究外  
應將不能約束之守備何國璽題參奏入報 聞二十八年二月  
奏永甯州一營向於提標五營內輪派備弁分防有名無實請將  
南甯城守營都司守備二員內裁去守備一員提標五營千把外  
委內裁去四員改爲永甯營備弁下部議行十月 陛見以母老  
奏懇留京 命署鑲白旗漢軍都統三十年三月補鑲紅旗漢軍

都統因杖責雇工身死部議革職 命從寬畱任六月奉 旨王  
進泰之子王柄著在鑿儀衛上額外行走遇缺坐補三十二年七  
月授直隸古北口提督三十三年十二月疏獨石口古北口二處  
驛站承領夫馬工料及蒙古站所領馬價辦理不同獨石營站司  
員將領報明督提轉咨戶部理藩院向口北道庫支領古北口站  
員徑赴直隸藩庫請領蒙古站徑報理藩院轉咨戶部支領提督  
俱無憑查覈請嗣後照獨石口例報提督稽察疏入議行三十五  
年六月 諭曰三和自熱河回京奏古北口地方於本月之二十  
六日午後山中驟水漲發兵民房屋被淹人口聞有傷損者王進  
泰見在彼處查勘繕摺具奏齋摺人在後未到等語古北口此次



被水情形較重朕心甚爲軫念著派侍郎烏納璽帶內庫銀二萬兩速行馳驛前往會同王進泰查勘被水各戶不拘兵民人等一體撫卹照二十四年之例加倍給與七月 命烏納璽和爾經額會同王進泰勘被水狀疏言河道情形全勢直偪城根誠如 聖訓必須改歸故道 上嘉之又奏關門至水門城基較舊時地面衝低一丈二三尺不等築墊難保堅久擬將城牆自關門起循舊式移向西南高坡地勢高一丈三尺餘離河亦遠二十六七丈旣無填墊之勞亦無水侵之患 諭如所請行八月奏古北口驛站司官所管口外蒙古七站每站設有章京都闡筆帖式等員並無額缺由管站司員揀派伏思蒙古臺站每站有驛馬五十匹自應

額設章京等管轄請於每正站額定章京一員都閫一員筆帖式一員腰站定都閫一員筆帖式一員缺出由該司官保送提臣驗補下理藩院議行三十六年四月奏潮河故道淤塞河身愈加北徙督臣奏挑四段俱在綠營下游其東南上游請於提標三營內撥兵給與飯食上緊疏濬期於伏汛前蒞工報 聞時吏部兵部會奏進泰甄別干總過少議降調係革職畱任之員無級可降請革任奉 旨寬免七月奏古北口被水新修城圯 諭曰王進泰奏古北口被水情形已令侍郎桂林帶銀一萬前往會同王進泰查勘酌量撫卹去年潮河暴漲衝及古北口邊牆致有傾頽因特發帑金派和爾經額會同王進泰鳩工庀役重加修築以復舊觀

本年七月雨後河漲復盛新修之牆仍然摧崩此項工程歲役未及踰年何以一遇水衝卽復潰圯究係施工不能堅實所致若按成例理應著賠但念工料繁多非伊等力所能辦著加恩免賠而承辦草率之咎難以輕貸和爾經額王進泰俱著交部嚴加議處尋議革任又本年七月 駕幸木蘭都司李肇祥等辦差疏懈進泰不能先爲督率議革任俱得 旨寬免三十八年六月大兵征金川進泰請赴軍營效力 命授四川提督七月 諭曰綠營兵丁怯懦不堪而川省尤甚則將領等平時之不能約束訓練亦難辭咎所謂兵不知將將不知兵安望其能得實用乎王進泰久膺專闢閱歷有素自能措置合宜今授四川提督前往軍營凡各省

調到綠營皆可經營而川省官兵尤其專轄著傳諭王進泰先就川兵實力整頓激其羞愧之心作其勇敢之氣使人思自效營伍改觀俾諸軍有所觀感奮發方足以副委任時定西將軍阿桂副將軍富德統兵分西南兩路先剿小金川 諭王進泰同常青分鎮要處另籌進剿金川九月 諭曰朕因阿桂等見在收復小金川及將來進剿金川不可無大員統領重兵在後策應莫若令富勒渾王進泰會同妥辦富勒渾係見任總督王進泰亦本省提督且於軍務曾經閱歷人亦頗有見識實可勝任著阿桂於進兵時酌量緊要之處令富勒渾王進泰統兵策應所需之兵卽於見調楚兵內酌留二千備用十一月偕富勒渾奏見在大兵雲集臥龍

關擬將前派該處護守糧臺之民壯一百五十餘名調至日隆防  
守臣進奏駐劄日隆稽查彈壓得旨嘉獎是月大兵克復美諾  
將軍阿桂定邊將軍明亮分路攻勦金川諭派兵防禦後路糧  
臺請務富勒渾王進泰妥爲經理十二月諭曰小金川一帶前  
諭富勒渾王進泰在彼駐守今美諾一帶縣互四五百里而僧格  
宗明郭宗皆其扼要之地富勒渾王進泰或各擇一處駐守或於  
兩處選派委員分駐兩人同駐美諾設法聲援方爲妥協是月偕  
富勒渾奏阿桂等見在進勦金川其小金川降番眷屬人口眾多  
應加意防範巴朗拉鄂克什等處防兵合計不及八百名實難再  
撥臣等酌於成都存營兵內調派一二百名駐劄草坡一帶彈壓

將來酌定何路進攻卽相機前進 諭曰富勒渾王進泰駐守美諾一帶其事最爲重大該處需用之兵令於各處糧站及成都駐防川省綠營兵內選撥二三千名備用今據奏省城所留之兵僅能再撥一二百名而鄂克什各寨見有之兵不及八百名是其應添兵數大費籌畫著富勒渾王進奏悉心妥酌作何抽調應用之處迅卽復奏又 諭曰據阿桂奏小金川全境必有能事大員始堪督率富勒渾王進泰二人均屬小心謹慎然過慎則惹此論頗爲近理前次原以二人身任督提地方乃其專責且呼應亦靈是以派令後路照料今阿桂所奏如此則二人自不足恃據稱雲南提督常青練習軍務熟悉邊情於緊要之路酌令常青往駐等語

常青畱駐美諾等處自爲有益已有旨令富勒渾等諸事與之虛衷商酌勿稍存畛域之見三十九年正月阿桂奏大兵由谷噶進勦此一帶後路縣長一切接應事宜俱關緊要常青自當於布朗郭宗底木達駐紮王進泰往來美諾達木巴宗等處情形漸悉應令其駐紮美諾 從之又阿桂奏據王進泰報稱博羅克守卡將弁將自金川投出之小金川番人斯塔克達爾得實爾根關勒等三名解赴大營 諭曰阿桂奏據王進泰報稱博羅克守卡將弁將投出番人斯塔克達爾等解送大營是賊番於小路潛出並非難事恐其借名投降暗藏奸計自當早爲防守若於隘口見其形跡可疑者卽當立時勦殺既可多殲賊眾且使賊人知所畏懼不

敢妄圖逸出王進泰常青等當一體妥辦二月 諭曰前以阿桂軍營後路關係緊要因令富勒渾仍隨阿桂大營督辦一切今富勒渾奏到籌辦糧務情形是該督自不便輕離西路至僧格宗爲南路扼要之處卽著王進泰前往駐守三月偕富勒渾奏賊番等向以布朗郭宗一帶爲我兵後路是以時來礮礮等處驚擾今改由揪砥運供則附近大板昭各臺更須加意防範查薩拉距大板昭一站爲揪砥軍糧軍火出口總匯明郭宗一處爲西南兩路要隘兵止二百實難守禦適准文綬鈔寄摺稟請於內地存營兵內酌派二百名前往三石谷草坡分駐查該處附近內地非如薩拉明郭宗實當扼要者比隨將往三石谷兵一百卽由揪砥前駐薩



拉往草坡兵一百卽由臥龍關前駐明郭宗似於防守機宜均有裨益。上慰之又奏翁固達守卡外委趙林被夾壩截傷臣旣未往查又不卽奏實屬茫昧隨下部議革任。諭免又奏獲賊番阿那什兒噶捏稱小金川大壩溝人併供伊父母妻子姓名今將小金川降番底冊查對不符顯係不法之徒且所帶銀兩衣服驗係肆行夾壩之人當卽正法示眾。諭曰旣有所供不符處何不嚴問其故而卽處斬完事王進泰不應糊塗如此又奏本年三月初六日有猛固站背夫陳正明運軍火赴破礮行至三倒灣被夾壩截傷隨差弁追緝經守備胡封在大壩溝水口拏獲賊番木太供係金川頭人戎納雍忠差來偷放夾壩共有六十餘人臣處兵單

山遠未便往探呈報將軍阿桂並咨督臣富勒渾提臣常青會同辦理奏入 諭曰汝竟老而無用矣何必求往金川乎又 諭曰前因王進泰求赴軍營出力是以諭令往駐美諾以資防守今伊自到軍營以來一切設卡巡查事宜毫無調度王進泰辦理軍營事務本非所長且年力漸衰諸形竭蹶卽畱防後路亦屬無益所有四川提督著旺保祿馳驛前往署理其廣西提督員缺卽著王進泰調補進泰奏請進京以旗員效力 諭曰據王進泰奏殊非情理王進泰如果天良未泯引咎難安不敢復赴粵西之任卽當懇切陳情仍畱軍營自效以贖前愆乃竟急求進京實不解其何意卽此可見老邁糊塗王進泰在美諾已踰半載於該處情形亦

國朝通志卷之三十一  
應稍悉仍著革職畱任在美諾幫同旺保祿辦事自備資斧效力  
贖罪五月奏帛噶爾角克礪營卡本月十九日夜有賊番百餘從  
山梁來攻又巴木通有賊從左右山梁衝下直搶營盤俱被官兵  
擊退賊復駐紮山卡斷絕水道驍騎校雙喜千總張可雲帶兵衝  
擊賊眾潰逃水道始通奏入 諭曰據王進泰奏夾壩滋擾情形  
賊番當窘迫之時尙潛出劫奪實爲可惡且從前擒獲賊番供詞  
功噶爾拉大頭人木撒斯等派賊番往僧格宗一帶偷放夾壩此  
等賊人實堪切齒俟平定金川後務當專派勝兵數千將各處夾  
壩賊匪盡行剿洗勿使稍畱餘孽七月偕旺保祿奏後路應撤應  
歸各卡隘遵照阿桂所籌辦理報 聞又偕旺保祿奏美諾各卡

隘甫經歸併添設恐賊蠶乘閒滋擾防範宜密隨於本月十五日  
在大壩溝口外獲賊番二名係空卡頭人木撒斯派來偷放夾壩  
隨即稟示奏入得 旨褒嘉又偕旺保祿奏附近思巴塞之角寨  
山溝內獲賊匪甲噶爾太舍尙彭二名係小金川羅博寨人去年  
逃入金川經木撒斯派守功噶爾拉並無別情當稟示訖 諭所  
辦尙未的當番人偷放夾壩乃其常技然或由功噶爾拉賊目派  
令潛出滋擾或賊番因地方並無糧食接濟爲飢餓所迫自出偷  
劫其中情節迥不相同若係該番自出竊掠則其窘迫無能可知  
若係賊目教令出外則又不可不嚴爲防備旺保祿等擒獲二犯  
時自應訊究明確分別辦理何得僅以訊無別情一語率行具奏

嗣後遇有續獲賊番務須悉心詳訊確供不得仍前草率又偕旺保祿奏崇德溝地方獲賊番策奈訊係金川頭人木撒斯令哨探路徑往美諾等處偷放夾壩隨梟首訖 諭曰旺保祿等奏拏獲賊番策奈所辦尙好見在大兵偏近賊巢金川勢益窮蹙未必能復有多人四出擾劫且美諾距後路軍營尙遠亦不虞其阻滯但賊番既有探路劫竊之供卽非緊要地方亦當加意巡防又偕旺保祿奏近因思巴塞翁固達營卡弁兵搜獲賊匪臣等不時派兵搜查隨於羅博克山遇賊八九人經官兵槍斃報 聞四十年八月偕旺保祿奏獲逃兵匡中孝請示將軍阿桂卽在美諾正法 諭曰逃兵一經拏獲卽在所獲地方正法定例已久若如旺保祿

等辦法設遇賊打仗時弁兵內有畏怯不前者亦俟請示將軍然後以軍法示眾紀律尙安在乎旺保祿王進泰任提鎮有年不應舛謬若此均著交部嚴加議處部議革任得 旨寬免九月授正藍旗漢軍都統四十一年二月金川平進泰回京三月調鑲白旗漢軍都統四十二年七月兵部題請開復 上從之四十三年六月調正黃旗漢軍都統四十五年七月授杭州將軍四十七年九月署閩浙總督兼署浙江巡撫十月奏查抄王直望貲財抽換抵兌一案底冊所開物件未造者至一百宗原冊所無之物添入者八九十宗非一二人所能弊混經手各員恃有頂帶不旨實供請將衢州府知府王士澣等革職嚴訊 命照所請行十二月進京

陞見畱京供職 命署正黃旗漢軍都統四十八年四月補正白旗漢軍都統四十九年九月 上以進泰年老伊子王炳著調近京之缺授天津鎮總兵五十年正月與十叟宴五十一年十二月部議王進泰署浙江巡撫失察平陽縣知縣黃梅勒派應降二級調用 命從寬畱任旋因年老乞休 諭曰王進泰賞授內大臣原品休致仍給與全俸以養餘年伊子王炳見任天津鎮總兵念王進泰出力有年王炳亦屬勤勉著來京加恩以副都統用俾得就近侍養以示眷注五十二年正月卒 諭曰王進泰宣力多年因係年屆八十三歲曾經降旨授爲內大臣原品休致仍賞給全俸以資頤養將伊子王炳調回侍奉今聞溘逝殊堪憫惜著加恩

賞給銀五百兩治喪以示優卹老臣之至意所有應得卹典該衙門察例具奏 賜諡恭勤子王炳見任湖南提督

右 國史館本傳

王炳

王炳鑲白旗漢軍人父進泰官內大臣自有傳乾隆三十年炳由閒散補鑿儀衛整儀尉三十一年授治儀正三十二年升雲麾使三十三年遷冠軍使四十年補廣東提標左營參將四十三年擢三江協副將四十八年授福建建甯鎮總兵四十九年九月奉上諭天津鎮總兵員缺著王炳調補因伊父王進泰年老是以加恩調補近京之缺五十一年 命暫署長蘆鹽政十二月 諭曰



前因王進泰年老奏請解任已降旨賞授內大臣原品休致伊子  
王炳見任天津鎮總兵該處雖離京不遠但究不若在京供職得  
以朝夕侍奉向來總兵內用多有令在侍衛上行走者念王進泰  
出力有年王炳亦屬勤勉著來京加恩以漢軍副都統用五十二  
年正月丁父憂旋署正紅旗漢軍副都統 諭曰副都統王炳係  
王進泰之子曾任總兵人尙明敏見在閩省總兵調赴臺灣進剿  
賊匪者甚多署缺需員王炳著卽馳驛前往交李侍堯酌量委署  
是年署福建水師提督五十二年署浙江黃巖鎮總兵旋調江南  
壽春鎮總兵五十四年服闋兼署江西提督奏江省水土輒弱能  
挽勁弓者甚少嚴飭各營將備勤加操演務使技藝精純以成勁

旅又飭弁嚴捕洋匪先後獲犯三十七名實請法疏入報 聞五  
十九年擢雲南提督七月入 覲 賞戴花翎六十年八月調江  
南提督嘉慶二年 諭曰湖廣提督一缺管轄苗疆關係緊要王  
炳整飭營伍尙屬奮勉著調補湖廣提督五年苗匪吳流記等焚  
掠保靖縣新寨炳會同綏靖鎮總兵魁保督弁兵捕獲首犯吳流  
記等九名鞠實斬梟餘皆分別辦理如律六年吉步寨丈計耶等  
九處民戶被苗焚劫炳偕總兵魁保飭營弁購躡捕獲首犯吳周  
三梁把二名又諭令良苗緝獻梁和尙等首犯多名鞠實分別正  
法先後奏入報 聞旋偕湖南巡撫祖之望奏言查閱鎮筸營今  
昔情形不同應改撥將弁以資控制查鎮筸所轄前後營各寨苗

情最爲兇悍而右營計長九十餘里照管難周擬自四方并起由青溪哨至錫臘樹止計五十餘里爲右營自錫臘樹迤北之溝田起由曬金塘舊司坪至大林計程四十餘里爲左營移巖門鎮遊擊麻陽守備分駐曬金塘舊司坪其曬金塘原設右營守備移駐青溪哨於兩營緊要隘口設汛防八處黃巖江撥設把總一員曬金塘設外委一員舊司坪等處設額外外委一員又中營遊擊近在鎮城而所管汛地轉遠在前營擬將中前兩營汛地互易並於鳴保峒樂亭等處各添額外外委一名另設小汛五處其巖門汛改爲鎮標中軍後營專設守備一員外委一員添設額外外委一名一轉移閒庶營汛俱歸扼要聲勢益加聯絡奏入得旨下部

議行九年調福建陸路提督十二年因病解任回旗調理十五年  
四月卒

右 國史館本傳

國朝通志卷之四十一

四十一

覺羅豁特

覺羅豁特滿洲正藍旗人 景祖翼皇帝第五子恪恭貝勒塔察篇古之三世孫也父穆成額以軍功授雲騎尉順治三年豁特襲職因近族加騎都尉三遇 恩詔遞加二等輕車都尉世襲罔替尋授佐領累遷護軍參領兵部理事官十七年擢鑲藍旗滿洲副都統康熙三年隨豫親王多鐸進勦蘇尼特叛人騰機思有功加三等輕車都尉九年擢鑲藍旗蒙古都統十三年逆藩吳三桂耿精忠叛分犯江西豁特偕護軍統領郎素等隨安親王岳樂往勦十四年五月大軍克建昌賊將許定國據新城縣豁特偕前鋒統領覺羅舒恕等圍克之生擒定國十六年十二月逆賊朱秦等犯

湖南平江縣豁特迎敗之斬六千餘級擒僞副將二遊擊一守備  
六十七年閏三月勦馬棚賊邱義尙於七家洞擒斬無算又降僞  
總兵朱永昇等俱得 旨嘉獎是年六月豁特卒於軍先是安親  
王旣克建昌欲平附近餘孽檄豁特取石匣村失利安親王疏  
聞 命事平察議二十二年議政王大臣議豁特在石匣交戰未  
收官兵骸骨並失軍礮應革職籍沒家產編入包衣佐領奏入  
諭曰覺羅豁特失誤軍機理應依議但係覺羅編入包衣佐領爲  
奴似屬不便著免其編入尋 命畱豁特父穆成額所立雲騎尉  
世職以豁特從子訥秦襲

右 國史館本傳

武穆篤

武穆篤滿洲鑲黃旗人姓富察氏祖穆哈連世居葉赫天聰時來歸武穆篤初任護軍參領順治十五年從信郡王多尼征明桂王朱由榔由貴州趨雲南擊敗其將李成蛟於涼水井李定國於雙河口進至盧鳴定國列象陣拒戰敗之十六年追至磨盤山又敗之以功授雲騎尉十八年從靖東將軍濟哈什勦山東土寇于七至棲霞縣之錫齒牙山圍其寨敗賊黨俞三呂四奇等于七竄入海康熙八年擢前鋒參領十三年三月逆藩耿精忠據福建反詔以貝子傅拉塔爲甯海將軍武穆篤爲前鋒統領從征師由浙江進十一月至台州賊將曾寶陳理列營黃瑞山欲犯天台武穆



篤偕副都統吉爾塔布提督塞白理奮擊敗之至蒲塘敗僞總兵  
吳臣又敗僞將軍楊德十四年八月大兵至涼篷隘口殺賊伏兵  
幾半賊夜遁武穆篤與副都統關提督段應舉護軍統領費雅思哈  
等追擊於黃土嶺賊潰退據黃巖縣圍其城賊帥會養性遁僞官  
二十兵三千迎降遂復黃巖九月次上塘嶺養性糾僞都督馬士  
玉張廣文等水陸兵三萬拒戰武穆篤統前鋒衝擊大敗之身被  
數創擒斬僞官六十餘員甲械無算復太平樂清青田三縣及大  
荆盤石二衛十五年八月大兵自處州啟行至雲和縣石塘嶺賊  
據險守其地當温州入閩之衝傅拉塔檄副都統沃中總兵陳世  
凱奪其山寨武穆篤與護軍統領費雅思哈四等塔布囊和濟格

爾道員姚啟聖統應援兵乘大霧直擣賊巢十七年七月創發卒於軍喪至京遣領侍衛內大臣奠茶酒十九年八月上以武穆篤效力行閒勞績茂著特命照實授前鋒統領議卹晉騎都尉世職賜祭葬諡襄壯雍正七年入祀昭忠祠子綏色孫富昌遞襲騎都尉乾隆十七年敕查陣亡世職官襲次已完者子孫特予恩騎尉准襲一次以武穆篤曾孫祿全襲職

右 國史館本傳

--	--	--	--	--	--	--	--	--	--

1111

阿賴

阿賴姓莽努特氏世居喀爾喀部 太宗文皇帝時挈家屬來歸  
隸正黃旗蒙古嘗奉使阿祿部長數人率眾俱至 上嘉  
其能 賜號達爾漢優免賦役既而降人復有叛去者外藩蒙古  
諸貝勒追之不及阿賴率兵五百窮追數月斬倡叛者四人盡俘  
逃眾以還又率兵征喀木尼喀部擒其部長葉雷獲戶口牲畜無  
算崇德九年敘功授一等輕車都尉兼一雲騎尉世職加 賜號  
曰庫魯克特爾漢三年授禮部左參政四年擢正黃旗蒙古都統  
六年大軍圍明錦州明總督洪承疇自松山赴援 上親統師征  
之阿賴受 方略設伏杏山路側邀擊敵眾斬殪無算尋攻松山

城承疇以眾迎戰阿賴率兵沿壕擊敵射殪數人大軍並進敵入城不得收降二千餘眾 世祖章皇帝順治元年同都統葉臣等招撫山西郡邑凱旋 賜白金三百兩三年隨豫親王多鐸征叛逃蒙古騰機思等將追及賊眾還戰阿賴先率兵繞出其後俟賊潰遁截擊擒斬甚眾五年同尙書宗室務達海領兵駐防漢中六年正月叛鎮姜瓖黨姚舉等陷忻州阿賴移兵赴援破賊於石嶺關進復忻州追勦賊黨五戰皆捷賊平班師三遇 恩詔晉世職爲二等男九年十月 命領兵駐防西安尋還京以老疾解都統任 聖祖仁皇帝康熙十二年 諭獎久著勞績諸大臣加阿賴太子太保十七年卒 賜祭葬如典禮謚武壯立碑墓道以其弟

之孫高良襲世職

右 國史館本傳

--	--	--	--	--	--	--	--	--	--

國朝耆獻類徵初編卷二百七十二目錄

將帥十二

希爾根

徐大貴

子治都

鄂泰

盧崇耀

愛音塔穆

子公圖

傑殷

布舒庫

莽依圖

畢力克圖

覺羅吉哈禮

額楚

色爾格克

海潮龍



皇清同治元年  
六月二十三日

國朝耆獻類徵初編卷二百七十二

通奉大夫前署江西巡撫江西布政使司布政使湘陰李桓輯  
將帥十二

希爾根

布爾根滿洲正黃旗人姓覺爾察氏世居長白山 太宗文皇帝  
天聰九年二月蒙古巴林部貝勒囊努克背盟劫掠大軍進征攻  
其寨囊努克挾數騎遁希爾根將追及馬蹶易馬突前擊潰敵騎  
太宗遂射殪囊努克自是屢從征討有功授騎都尉世職崇德元  
年大軍征明分克昌平寶坻順義密雲東安文安定興安肅容城  
安州雄縣等邑希爾根任護軍參領擊敗明太監高起潛兵擒其

總兵巢丕昌又助都統譚泰設伏敗三屯營騎兵師還敵躡我後諸將獲輜重先行希爾根獨以軍殿敘功超授一等輕車都尉世職二年四月隨大軍攻克明皮島九月上將行圍選從行者希爾根之父雅賴以佐領與選希爾根因已亦從行啟睿親王多爾袞乞免其父不許乃使人告都統譚泰謂雅賴已免令珠爾堪代之及獵上以珠爾堪不宜與選詰問侍衛索尼奏曰與選者雅賴希爾根紿言已見行故代以琰爾堪遂下法司鞠勘希爾根坐欺罔應革世職罷參領任得旨從寬罰鍰五年隨睿親王圍明錦州我師據山岡列營明兵來攻擊走之復敗松山援兵尋以圍錦州時擅離軍伍及言事不實論罰鍰停止敘功七年大兵入黃

崖口進圍薊州明總兵白騰蛟率兵馳救希爾根逆擊破敵斬馘無算 世祖章皇帝順治二年敘勳舊勞績加一雲騎尉是年隨英親王阿濟格討流賊李自成由綏德州進圍延安府賊攻饒藍旗營希爾根擊卻其眾賊將一隻虎者恃其勇屢犯我營希爾根三戰皆捷遂至西安同前鋒統領席特庫往蹙賊蹤殲賊二隊自成奔湖廣追剿至安陸府賊踞城拒希爾根與護軍統領鼇拜攻克之獲戰艦八十移師武昌擊走賊兵之截我輜重者賊於江濱集艦五百餘將東下都統譚秦督眾往取希爾根先至獲之凱旋敘功晉爵三等男世襲三年隨肅親王豪格征流賊張獻忠與護軍統領哈甯阿阿爾津蘇拜等擊敗賊黨高汝礪武大定等拒戰

兵進擊獻忠於西充別趨涪州勦賊袁韜俘斬無算師還部議擊  
獻忠時哈甯阿被賊圍希爾根弗援妄與阿爾津蘇拜爭功應論  
死得旨從寬罰贖降世職爲三等輕車都尉六年隨巽親王滿  
達海征大同叛鎮姜瓖希爾根圍太谷以礮破其城僞知縣李成  
沛僞都司吳汝器遁追斬之進克大同及長子縣渾源州朔州復  
招降永甯州嵐縣潞安府等城同都統漢岱攻復遼州山西平晉  
秩二等尋訴前鐫秩冤得旨授一等輕車都尉兼一雲騎尉三  
遇恩詔晉爵一等男九年擢護軍統領十年與內大臣額爾克  
戴青等會奏佐領敦達禮岱敏互訐事下法司鞠議削敦達禮世  
職並罰鍰敦達禮訟冤命覆勘得釋因論法司誤勘及會奏諸

臣偏徇罪希爾根降爵三等男尋 予復如故擢列內大臣更追敘戰功晉爵一等男世襲康熙十二年 聖祖仁皇帝念其宣力有年 詔加太子太保十三年三月授定南將軍討逆藩耿精忠師次南昌賊已陷廣信建昌撫州九月希爾根督兵圍撫州賊出城抗拒連敗之復擊走僞都督易明援兵賊待援不至棄城遁僞將軍陳昇連結土賊郭應定等犯贛州希爾根令副都統甘度海參將塞勒等禦戰陣斬僞總兵柯隆李梁追剿至龍泉縣破賊三營又攻取曹林十餘寨十四年擊敗僞將軍邵連登恢復建昌府城移師饒州剿滅餘干浮梁樂平諸邑賊眾先是 上命安親王岳樂爲定遠平寇大將軍統師南昌簡親王喇布爲揚威大將軍

統師江甯至是 諭趣安親王進征湖南安親王請俟希爾根殲滅饒州廣信賊寇乃規取長沙 上以賊渠吳三桂早滅則江西福建之賊不勦自平趣安親王速進 詔簡親王率江甯兵二千赴南昌以希爾根爲副將軍協同鎮守十五年三桂糾賊陷吉安踞之希爾根隨簡親王督師攻圍十六年賊遁城下 詔簡親王鎮吉安希爾根仍駐南昌以年老 召還京十八年五月卒 賜祭葬以其孫尙世特襲爵希爾根之子喀西泰任護軍參領當吳三桂初反時隨前鋒統領穆占進征四川遇賊將王屏藩等於蟠龍山戰方合賊別由水道登岸來犯喀西泰力戰歿於陣

右 國史館本傳

徐大貴 子治都

徐大貴漢軍正白旗人 太宗文皇帝時任佐領兼工部理事官  
崇德五年隨大兵圍錦州屢擊敗松山杏山敵兵是時明總督洪  
承疇駐兵松山遣兵分躡高橋南三臺大貴先眾攻克之既而敵  
兵千餘乘夜犯我營大貴率眾禦擊斬二十餘級七年攻克塔山  
杏山二城並有功 子雲騎尉世職八年隨鄭親王濟爾哈朗征  
明甯遠取中後所前屯衛二城晉世職爲騎都尉 世祖章皇帝  
順治元年正月擢正白旗漢軍副都統七月從征山西取太原追  
勦流賊李自成部眾入陝西境賊眾自延安城內突出大貴領所  
部奮擊大敗之三年隨豫親王多鐸平定河南江南敘功晉三等



輕車都尉三月遷刑部侍郎仍兼副都統七年任駐防杭州左翼副都統九年八月隨平南將軍金鵬移師福建剿海賊時海賊鄭成功踞海澄以眾二十餘萬寇漳州大貴與金鵬督兵進擊殲賊三萬餘進攻海澄賊十萬餘扼隘拒戰且欲劫我紅衣礮大貴擊卻之連破賊壘先是三遇 恩詔晉世職至一等輕車都尉加一雲騎尉十二年敘擊敗海賊功晉爵三等男十三年隨甯海大將軍伊爾德征舟山偽總制陳六御偽英毅伯阮思等率三萬眾戰艦二百餘迎犯我軍大貴統左翼軍擊敗之獲船二十有六軍械槍礮無算賊棄舟山遁十五年引疾乞休 命加太子少保致仕尋敘復舟山功晉爵二等男康熙十八年十一月卒 賜祭葬如

例諡勤果以其孫永泰襲爵子治都別有傳

右 國史館本傳

### 徐治都

徐治都漢軍正白旗人二等男徐大貴之子也初任佐領兼參領  
聖祖仁皇帝康熙七年擢直隸天津總兵八年調湖廣彝陵總兵  
十三年正月逆藩吳三桂陷湖南沅州治都率兵赴援旋以四川  
巡撫羅森總兵譚洪等叛應吳逆治都奉 詔自常德回守彝陵  
三月叛鎮楊來嘉劉之復等擁眾數萬乘舟犯彝陵治都率兵撲  
勦賊眾登岸誘我兵往敵旋以飛棹猝薄城下治都布置嚴密水  
陸爲犄角之勢擊卻賊眾八月楊來嘉糾黨踞南漳各寨分路出

犯治都同襄陽總兵劉成龍率兵合勦斬殺過半 上嘉治都久  
守衝要下部議敘加左都督銜初治都赴援常德其妻許氏聞鄰  
境兵民多從逆權以治都令約鎮標將弁撫慰士卒曉以大義并  
脫簪珥服飾以資犒勞彝陵右瀕江總兵官廨在江濱十五年四  
月賊眾駕船數百來犯治都沿江堵截賊突偪官廨槍礮齊發許  
氏中礮死湖廣總督蔡毓榮提督桑額合疏以 聞具述治都矢  
志忠貞奮不顧家狀十八年三月擢湖廣提督四月僞將軍王鳳  
岐擁賊眾踞巫山 上慮江水泛漲時賊乘虛突犯彝陵荊州  
命治都嚴行堵禦七月疏言彝陵一隅爲楚蜀咽喉今賊踞巫夔  
上游呼吸可至宜速修五板戰艦一百並招募土著水手操練嫻

熟令彝陵鎮臣胡世英統領以備水路防勦臣同襄陽總兵劉成龍前赴歸州興山巴東形勢之地相機進勦事下所司議行 詔治都同四川總督楊茂勳統舟師往夔州重慶十九年正月師至巫山楊來嘉王鳳岐與僞總兵王存仁集賊眾萬餘負險自固我師奮勇奪山隘賊眾奔潰復以數騎突犯治都揮刀力戰敗之楊來嘉棄馬越山而遁王鳳岐就擒陣斬三千餘級復巫山縣城乘勝規取夔州僞將軍劉之衛僞總兵瞿洪陞開關納款遂復夔州府城叛鎮譚洪遣子僞將軍譚天祕率僞總兵譚地晉譚地升繳敕印詣軍門降治都奉 詔還守彝陵荊州諸處九月譚洪譚天祕等復叛瀘州敘州俱陷夔州震動治都同鎮安將軍噶爾漢統

兵溯江而上分軍三隊擊賊陣擒賊總兵易文奇進抵下關城賊  
眾望風膽落棄關而遁追斬甚眾餘賊奔入雲陽二十年進征雲  
陽屢挫賊鋒擒偽總兵向旭暉時譚洪死譚天祕勢窮竄遁萬縣  
梁山忠州悉平敘功晉階四等二十七年湖廣督標裁兵夏逢龍  
糾眾倡亂據武昌城治都赴勦至應城縣遇賊眾擊卻之隨駐軍  
應城賊眾環偪治都分兵內外夾擊賊大潰奔德安逢龍聚賊眾  
齊赴京口以偽總兵楊兆先潛襲我軍後路治都偵知賊情水陸  
嚴戒旣而蒲圻兵縛楊兆先赴軍前降餘賊鼓譟來犯復乘北風  
排巨艦二十順流下水師嚴整不敢近遂泊龍川磯下登岸衝我  
營壘我軍奮勇迎擊晝夜鏖戰斬殺殆盡逢龍勢窮合賊眾駕船

泊鯉魚潦地欲待我軍出敵乘虛犯我綠營治都遣參將鄭興都  
司楊明錦協力防禦自統戰艦沿江施槍礮焚毀賊船賊旋犯我  
陸營復戰卻之斬七百餘級溺水死者無算僞總兵胡耀乾及僞  
文武等官以城降治都入武昌撫軍民逢龍竄黃州會振武將軍  
瓦岱統八旗兵至聞武昌賊潰追至黃州僞總兵趙得等至軍前  
投誠黃岡生員宜畏生擒逢龍以獻磔於市武昌黃州悉平徐治  
都報捷得 旨嘉獎 賜戴孔雀翎敘功 予雲騎尉世職三十  
二年三月入 覲 賜御用冠服三十三年 詔嘉其勞績茂著  
視提督孫思克施琅之例 特授爲鎮平將軍仍管提督事三十  
六年閏三月卒年六十有七 贈太子少保 賜祭葬如典禮諡

襄毅長子永泰先於康熙十九年襲徐大貴二等男次子永平襲  
雲騎尉世職

右 國史館本傳

徐治都奉天人康熙十八年任湖廣提督武昌流賊夏包子肆掠  
將南犯岳澧治都邀擊於夏口破之未旋桃源流賊萬人傑復肆  
掠治都妻孔氏親督兵勦平之事 聞授治都鎮平將軍孔氏一  
品夫人治都在任十八年整飭營伍功績最著卒於官民爲之立  
祠以祀

右傳李元度撰

鄂泰

鄂泰滿洲正白旗人姓瓜勒佳氏世居蘇完地方 國初來歸順  
治四年以兵丁從征百戶所首登城克之敘功授雲騎尉尋晉騎  
都尉七年復以從克江西九江府登城有功晉二等輕車都尉  
賜巴圖魯號九年授盛京禮部理事官緣事革職嗣授參領康熙  
十年授盛京副都統十三年十二月陝西提督王輔臣叛定西大  
將軍貝勒洞鄂奉 命討之 詔鄂泰率盛京兵一千來京備調十  
四年二月 諭曰陝西沿邊有路通山西汾州恐逆賊乘隙來犯  
其授鄂泰爲建威將軍統領自盛京調來兵一千往駐太原防守  
汾州諸處四月 命由太原赴西安參贊軍務其建威將軍印以



副都統吳丹代時輔臣陰通川賊八月鄂泰偕署副都統阿爾瑚  
駐寶雞縣扼棧道十月川賊李冉二姓出棧道犯九龍山鄂泰與  
阿爾瑚督擊盡殪之會偽總兵任德望等率賊眾及猓猓七千餘  
來援至益門鎮屯營七鄂泰等分兵九路衝擊自巳至未盡破賊  
營陣斬賊將徐姓德望以百騎遁驍騎校韓楚漢射中其股降之  
斬獲甚眾十五年三月復搜捕餘賊於紅崖堡 詔旌其功下部  
議敘十八年鄂泰卒二十五年追敘軍功授騎都尉兼一雲騎尉  
世職以其子鄂山襲

右 國史館本傳

盧崇耀

盧崇耀奉天廣甯蔭生康熙十八年任永州鎮總兵善撫士卒討  
平古州蠻復勤恤民瘼歲旱偕有司禱雨輒應

右傳李元度撰

皇朝通志卷之九

九

愛音塔穆 子公圖

愛音塔穆滿洲鑲藍旗人姓戴佳氏一等男穆克坦之長子也

太宗文皇帝天聰六年襲父爵九年以穆克坦舊轄人戶益以壯  
其五十授愛音塔穆爲世管佐領 世祖章皇帝順治九年四月  
隨睿親王多爾袞入山海關擊敗流賊李自成十月豫親王多鐸  
奉 命赴河南討賊愛音塔穆同副都統沙爾瑚達屢破賊兵追  
至潼關賊來犯我師者三愛音塔穆殿後連擊敗之明年大兵旣  
定河南進克江甯愛音塔穆並在事有功六年八月隨鄭親王濟  
爾哈朗征湖廣時明桂王朱由榔據武岡湖南郡邑半附之愛音  
塔穆率兵至寶慶擊走僞總兵馬進忠王進才復其城流賊劉體

純亦附由榔遣其黨袁宗第等列寨於靖州之洪江鎮隔岸拒守  
愛音塔穆與尙書阿哈尼堪督兵渡江連破賊寨賊悉奔潰遂與  
阿哈尼堪駐守沅州十二月賊將王永強犯沅州復與阿哈尼堪  
擊敗其眾十一年僞晉王李定國寇新會時平南王尙可喜等先  
率兵往援定國擁賊四萬餘列象礮據山峪爲戰守計愛音塔穆  
隨靖南將軍珠瑪喇至廣東率兵協勦奮勇衝擊大破賊眾追擊  
二十餘里定國遁走先是愛音塔穆三遇恩詔晉爵至二等子  
至是敘功予騎都尉世職合爲一等子加一雲騎尉康熙十九  
年正月卒賜祭葬如例子公圖襲三十五年隨撫遠大將軍伯  
費揚古征噶爾丹敗賊於昭莫多加一雲騎尉合所襲之爵爲三

等伯三十九年卒子噶敏圖襲

右 國史館本傳

欽定大清會典事例

十一



傑殷

傑殷滿洲正紅旗人其先世居朝鮮有韓明璉者任龜城府使與昌城總兵李适謀逐其國王李侗爲他將所殺子潤與姪義脫走來歸 太祖高皇帝授官有差後并晉職一等輕車都尉傑殷義次子也初任一等待衛順治十六年投護軍參領 聖祖仁皇帝康熙八年擢正紅旗滿洲副都統十一年遷護軍統領十四年四月察哈爾布爾尼叛 命同內大臣佟國綱率兵鎮宣府五月察哈爾平 詔平逆將軍畢力克圖移師赴榆林會剿叛賊朱龍以傑殷參贊軍務六月師次謝村分兵三隊傑殷乘夜先發黎明至河岸賊三千餘踞楊家店渡口我師鳴角渡河擊潰賊眾翌日克



吳堡縣遂趨綏德賊踞虎爾崖山口傑殷率兵仰攻射殪僞遊擊黃文英餘賊敗竄追擒七十餘人獲馬匹器械進克臥牛城遂復米脂延川等縣與署副都統覺和託分兵攻延安傑殷領隊前進擒賊謀二斬之敗僞總兵李士英於宜川復延安城及諸屬縣宜川所屬二十六寨悉平八月會大軍勦叛賊王輔臣於平涼貝勒洞鄂令傑殷領左翼兵爲前隊距城八里許賊萬餘列陣迎戰傑殷督兵衝其中堅自己至未挫賊者三復分兵四路環擊殲賊甚眾十月掘壕南山城內馬步賊兵出犯擊卻之斬百餘級十二月賊黨蔡元自西山來犯傑殷同副都統鄂克濟哈奮擊敗之破其壘十五年二月叛鎮吳之茂欲爲王輔臣外援糾賊萬餘盤踞秦

州城西南三十里鋪及附近諸堡洞鄂令傑殷移師禦勦敗賊於  
谷山崖斬級五十餘與將軍佛尼埒提督王進寶會師秦州議繞  
賊壘後絕其糧運三月傑殷同副都統翁愛率兵先行遇賊二千  
餘出羅家堡抗拒陣斬二百餘級進趨鹽關擊斬護糧賊三百餘  
生擒僞官及兵三千餘人獲馬騾器械焚其餘糧又乘夜由賊壘  
左趨牡丹園賊以二千兵護糧趨三十里鋪傑殷督兵撲勦斬獲  
甚眾四月賊揚言斷關山道截臨鞏路傑殷移師伏羌遣兵敗賊  
於平頭山進圍馬塢攻破二寨斬賊千餘生擒四十三人焚賊糧  
三百餘袋僞總兵陳姓李姓等引賊萬餘陷通渭縣城傑殷率兵  
前進遇賊於十八盤山坡分左右翼擊敗之乘勝奪門復縣城賊

四散奔逸追斬七百餘級獲駝馬器械無算還守秦州截吳之茂  
通平涼路五月大將軍圖海下平涼檄諸將近進吳之茂引賊遁  
傑殿同佛尼埒率兵乘夜追勦及之於牡丹園分兩翼夾擊自午  
至未屢破賊陣遂克祁山堡別有賊三千自西和縣北山迎戰敗  
之於紅山嘴及清陽峽又選輕騎躡追至石牙兒關吳之茂率二  
十人越山遁餘賊潰散先後斬僞官及兵五千餘生擒五百餘人  
獲僞劄百五十有奇槍礮馬騾器械無算禮縣西和俱復賊帥王  
屏藩遁走階州窮追至小川子單家河招撫僞遊擊等五員兵三  
百餘兩兵防守西和傑殿還駐秦州圖海以聞得旨嘉獎下  
部議敘十七年閏三月遣兵克扶風之潼關堡及牛井黎虎諸寨

十九年正月會師進保甯同佛尼埒覺和託等領軍奮擊大敗賊眾追勦三十里陣斬僞將十員兵三百獲僞劄五百餘馬匹器械甚多進復順慶府所屬三州十一縣悉平尋卒於成都軍營 賜祭葬如例追敘前功 子騎都尉世職以其子花色襲弟傑都順治十六年出護軍參領隨安南將軍達素勦海賊鄭成功於廈門賊船六十餘倚踞澄浦嶼傑都領隊擊敗賊兵康熙十三年隨前鋒統領穆占勦四川叛賊吳之茂等由陝西進征擊敗僞總兵石存禮於朝天關遂趨保甯駐營蟠龍山賊帥王屏藩引眾劫掠阻絕我餉運我軍退還傑都殿後力戰歿於陣 賜卹如例 贈騎都尉加一雲騎尉無子以其兄之子韓成龍襲 世宗憲皇帝雍

國史館本傳

正二年以傑都入祀昭忠祠

右 國史館本傳

布舒庫

布舒庫滿洲正黃旗人姓吳魯氏父納爾泰任佐領 世祖章皇  
帝順治六年隨征大同叛鎮姜瓖率其子噶爾琿納什庫力戰歿  
於陣 恩卹如例布舒庫其長子也於順治五年任護軍校隨征  
南大將軍譚泰征江西叛鎮金聲桓攻饒州府先登克其城十五  
年隨征南將軍卓卜特征明桂王朱由榔由廣西進貴州濟師盤  
江敗賊梁瑞津賊眾屯踞山隘我兵環山圍攻布舒庫首衝敵陣  
奮擊斬殪甚眾師至雙河口僞晉王李定國以數萬眾列柵山嶺  
布舒庫先眾踰險而上遂奪其寨定國復列象陣來犯布舒庫率  
眾力戰逐北四十里雲南平凱旋 予雲騎尉世職 聖祖仁皇

帝康熙二年投參領十六年二月擢正黃旗蒙古副都統列議政大臣時逆藩吳三桂賊黨韓大任等據吉安簡親王喇布奉 詔勦賊日久未下 特命布舒庫同都統勒貝護軍統領哈克三參贊軍務韓大任等尋自吉安潰圍遁踞甯都布舒庫率兵至永豐與提督趙賴合師計以三路進兵值大任等來犯布舒庫同趙賴發礮擊之賊退據山寨布舒庫督兵圍攻賊眾由山徑下衝我兵兩路截擊賊敗歸山寨布舒庫緩師以誘之賊弗敢出相持月餘賊夜遁布舒庫率步兵追及之斬賊千餘級擒其僞參將王朝斌僞軍師萬象羅等賊走泰和萬安竄入福建十七年正月布舒庫同哈克三追勦大任擊賊於福建老虎洞鞍子嶺斬賊六千餘級

分遣參將李天桂等由七嶺隘口奪關而進斬僞官五追擊至天  
花山大陂嶺賊窮蹙適康親王傑書遣布政使姚啟聖招撫大任  
乞降布舒庫同哈克三旋師隨簡親王與征南將軍穆占會師於  
湖南互詳哈克三傳七月吳逆犯永興水陸道阻穆占奏遣布舒  
庫率兵攜礮同署副都統尼雅翰駐守永興河岸以禦之賊黨胡  
國柱馬寶等以眾三萬來犯布舒庫擊卻之及賊潰圍解布舒庫  
同穆占進攻耒陽僞將軍吳國貴夏國相等敗遁十八年二月進  
定常甯布舒庫同前鋒侍衛塔勒岱屢擊賊於白水市蔡家店太  
春橋桂山斬馘甚眾進追至翟里橋賊擁眾拒敵我兵衝擊之擒  
其僞參將守備各二距永州四十里與穆占合師進攻永州城賊



夜渡湘江燒浮橋而遁乃分遣總兵蔡元等收復新田甯遠道州  
永明江華東安各城先後招降僞總兵李魁李福管世雄陳邦賢  
等僞官三百餘旋令陳邦賢率所屬兵與參將王國俊攻廣西全  
州擊賊於飛鸞橋克其城進定興安又分遣別將收復灌陽恭城  
富川招撫萬陽山僞總兵郭世隆吳漢興等還定新甯與簡親王  
合軍於武岡州九月鎮南將軍莽依圖規取雲南疏請調兵防守  
廣西 詔簡親王率師駐守桂林仍以布舒庫參贊十九年正月  
調正黃旗滿洲副都統三月降賊馬承廕復叛布舒庫隨簡親王  
與將軍莽依圖總督金光祖分路進剿六月克雒容縣合攻柳州  
府馬承廕降七月布舒庫以疾卒於軍櫬還 上遣大臣迎奠茶

酒 賜祭葬如典禮諡剛壯

右 國史館本傳



莽依圖

莽依圖滿洲鑲白旗人姓兆佳氏父武達禪 太宗文皇帝崇德三年隨睿親王多爾袞征明攻直隸任邱山東濟陽並先登 賜號巴圖魯 予騎都尉加一雲騎尉世職任太原城守尉 世祖章皇帝順治七年武達禪卒莽依圖襲職兩遇 恩詔晉世職至三等輕車都尉十五年隨征南將軍卓卜特征明桂王朱由榔至貴州明年自都勻進師盤江僞晉王李定國據雙河口悉眾爲三十營列象陣拒戰莽依圖率步兵衝擊破之隨大軍定雲南 聖祖仁皇帝康熙二年隨靖西將軍穆哩瑪征湖廣流賊李來亨等賊據茅麓山列寨拒守莽依圖冒矢石進攻毀寨二賊大敗來亨

自經死凱旋授江甯協領十三年逆藩吳三桂陷湖南莽依圖隨  
征南將軍尼雅翰率師進勦岳州用紅衣礮擊沈賊舟敗賊七里  
橋多斬馘十四年三桂遣賊將董重民結廣西叛鎮馬雄犯廣東  
平南王尙可喜上疏請兵 詔尼雅翰率師至廣東莽依圖以署  
副都統駐守肇慶十五年可喜子之信叛降三桂受偽爵倡兵作  
亂三桂賊將范齊韓等偪肇慶總督金光祖降賊事詳光祖傳莽  
依圖率所部兵突圍出且戰且走還駐江西偽將軍黃士標偽總  
兵王割耳糾眾犯信豐莽依圖率兵往援與城內兵奮勇夾勦所  
獲甚多賊遁走入山後追敗之圍遂解十六年三月實授江甯副  
都統時廣東尙爲賊將董重民等所踞 上命莽依圖爲鎮南將

軍率師恢復以副都統額赫訥署副都統穆成額參贊軍務四月  
自南康至南安僞將軍嚴自明以城降遂偕額赫訥穆成額率師  
進征南雄僞將軍宋思政僞總兵郭茂威等迎降尙之信 董  
重民率藩屬歸順莽依圖進韶州五月疏言南安南雄韶州所屬  
文武官弁皆雖迫於賊勢致污僞職今既望風款附若悉事更張  
恐生反側請令暫留原任緩撫殘黎 上特允所請且 諭獎其  
進兵迅速六月 命翰林院侍讀學士顧八代赴軍前傳 諭飭  
勦逆賊擇便而行時賊將胡國柱馬寶糾賊萬餘犯韶州莽依圖  
擊卻之九月賊復據河西斷我水運餉道列營蓮花山以窺城中  
會將軍額楚率江甯兵至與城內軍夾攻破其四營斬獲甚眾賊

敗竄帽峰山我軍乘夜追擊大敗之河西賊亦遁水運遂通十月  
追擊至樂昌賊據風門嶼拒守我軍三路仰攻別令徭兵由閒道  
奮擊擒斬賊二千餘乃撫定仁化仍回駐韶州疏言將軍傅宏烈  
以五千兵獨當西路恐力不支已遣副都統額赫訥赴梧州協剿  
得旨賊犯韶州將軍莽依圖同額楚夾剿既大敗賊眾復追剿  
仁化諸縣指顧悉定可謂智勇兼擅凡爲將者統兵滅賊底定疆  
圉不必一一拱候中旨惟能應機適變盡心乃力斯克副委任莽  
依圖當逆賊甫遁卽遣副都統額赫訥等往援粵西深可嘉尙十  
七年正月三桂遣其孫吳世琮陷桂林馬寶亦由宜章陷平樂  
上命莽依圖赴廣西與傅宏烈會師剿賊二月疏言臣抵平樂圍

其城賊水陸拒阻宏烈所率綠旗兵與戰不勝臣派軍難以久畱  
因退駐中山鎮宏烈亦以莽依圖所率滿洲兵不相應援入奏  
上念擊賊失利因江水泛漲並免罪 諭令和衷協勦逆賊莽依  
圖尋以賊偏賀縣回梧州乞罷將軍任 上切責之仍畱任圖功  
贖罪明年二月吳世琮犯梧州莽依圖同傅宏烈率師拒戰大敗  
棄營遁先是偽將軍馬承廕以南甯降至是賊由梧州敗竄糾眾  
犯南甯六月城中食盡旦夕且陷莽依圖方臥病聞之督師倍道  
援勦賊悉銳聚新村列鹿角西山拒戰額楚額赫訥引前鋒兵擊  
之賊稍卻莽依圖與將軍舒恕麾大軍進而預遣左翼兵潛出山  
後截賊歸路盡殪之吳世琮負重傷以數十騎越山遁南甯圍解



上以廣西底定 命進取雲貴九月莽依圖以馬承廕雖降心懷  
叵測恐爲肘腋患上言湖南大兵在武岡禦賊臣等一軍先向雲  
南恐諸路兵不相應援且廣西新定若無兵駐守恐有他虞請暫  
駐南甯相機進剿 上命簡親王喇布鎮桂林莽依圖俟都統希  
福兵至取路恢復疆土十九年四月授護軍統領五月馬承廕叛  
於柳州莽依圖率師進剿次來賓承廕驅象陣迎戰我軍以勁弩  
射象回奔賊陣亂乘勝力戰賊大敗棄甲走莽依圖自率輕騎追  
擊獲象三斬賊甚眾會簡親王與總督金光祖分路剿賊並捷承  
廕復降柳州平八月莽依圖卒於軍年四十有七二十二年三月  
議政王大臣等追論莽依圖征廣西時自平樂退梧州應坐失機

籍家產半革去 恩詔所得騎都尉 上曰莽依圖在行間頗有勞績且屬下兵民俱稱其善凡所過地方亦不擾害百姓可免籍沒削去恩詔所加世職其原襲之騎都尉又一雲騎尉以其子博和哩襲五十九年入祀廣西名宦 世宗憲皇帝雍正十年入祀賢良祠 今上乾隆元年追諡襲壯

右 國史館本傳

按莽依圖公名一作莽伊圖

莽依圖滿洲鑲白旗人順治七年襲父武達禪雲騎尉世職兩遇恩詔加至二等輕車都尉隨征至雲南僞晉王李定國據險立營莽依圖率所部兵破之康熙三年隨靖西將軍穆里瑪平茅麓山流賊擢駐防江甯協領十三年逆藩吳三桂耿精忠反莽依圖以

署副都統率師分討敗吳逆僞帥吳應麟於岳州十四年隨安南將軍覺羅舒恕入廣東分守肇慶值廣西提督馬雄叛降吳逆率逆黨圍肇慶莽依圖兵寡堅守彌月無外援城中食盡遂率所部士卒突圍出凡九十日經七十餘戰屆江西適逆賊王割耳圍信豐莽依圖率餘兵往援奮勇直前圍遂解十六年實授副都統兼護軍統領加鎮南將軍進攻廣東吳逆僞將軍胡國柱馬寶等率賊萬餘犯韶州渡河至蓮花山薄江甯大兵營統領江甯兵額楚等拒戰莽依圖自城中遣兵夾擊破其四營賊敗走帽峰山潛遁復分兵躡擊之遂復仁化縣韶州既定奉 命赴梧州同巡撫傅宏烈進取廣西十八年逆賊吳世琮犯梧州戰敗之賊棄營遁乘

勝赴橫州絕柳州南甯諸路時南甯爲吳世琮所圍城旦夕且陷  
總督金光祖遣兵往援吳世琮率眾渡江逆戰莽依圖與將軍覺  
羅舒恕等分路撲剿吳世琮負重傷遁遂解南甯圍以疾卒於軍  
莽依圖所至撫恤人民時稱爲仁義將軍粵人思其德繪像祀之  
乾隆元年追諡襄壯

右 國史賢良小傳


1. 1 1 1 1 1

1111

畢力克圖

畢力克圖姓博爾濟吉特氏世居科爾沁 太宗文皇帝時來歸  
隸蒙古正藍旗任豫親王多鐸護衛隨征朝鮮及明錦州屢有斬  
獲 世祖章皇帝順治元年隨豫親王追勦流賊李自成於潼關  
明年定西安移師由河南進拔揚州下江甯畢力克圖署護軍參  
領所至克敵有功四年授騎都尉世職六年擢正藍旗蒙古副都  
統時大同總兵姜瓖叛畢力克圖奉 命率兵駐防平陽偕巴圖  
魯羅多渾勒太平縣賊遇賊黨郭中傑引賊眾寇絳州擊敗之又  
敗賊騎千餘於張湖村七年同西安協領根特等率師圍太平城  
賊負固抗拒逾二旬不下乃因城壕掘地道燃火藥以墮其城師

入叛賊李建泰及賊黨俱伏誅八年正月兼任禮部左侍郎屢遇  
恩詔晉世職至一等輕車都尉十年四月調戶部左侍郎十一年  
六月隨靖南將軍珠瑪喇征廣東時流賊張獻忠餘黨李定國附  
明桂王朱由榔由廣西犯廣東踞新會縣左之山峪畢力克圖同  
護軍統領敦拜擊潰其眾復與副都統鄂拜護軍統領賴塔攻勦  
賊巢賊敗竄溺水死者無算乘勝追至興業縣遇僞都督吳三省  
僞總兵楊成玉三才等率步賊千拒戰殺過半進抵橫州定國渡  
江遠竄凱旋敘功晉爵三等男十三年以員外郎朱世德司權河  
西務虧缺稅銀戶部誤援 恩詔赦免部臣俱坐降革畢力克圖  
罷侍郎任降世職爲二等輕車都尉十七年雲南旣平朱由榔竄

緬甸李定國與其黨白文選等分踞孟良木邦 上命內大臣公  
愛星阿爲定西將軍畢力克圖署護軍統領率師赴雲南同平西  
王吳三桂相機征勦十八年十一月會師木邦定國先奔景線文  
選遁據錫箔江濱聞我兵至毀橋遁畢力克圖與前鋒統領白爾  
赫圖等先至江岸獲其謀者大軍結筏渡江越十日次舊挽坡距  
緬城六十里緬人謀擒獻由榔請大將軍畱駐以百人進蘭鳩江  
濱爲扞衛於是白爾赫圖率前鋒過往畢力克圖率護軍二百隨  
其後緬人以由榔獻乃旋軍時白文選爲總兵馬甯等追及於猛  
養率眾降畢力克圖撫其眾移入邊境 聖祖仁皇帝康熙三年  
敘功晉世職爲一等輕車都尉兼一雲騎尉八年擢正藍旗蒙古



都統列議政大臣十二年五月 詔以畢力克圖屢從征伐著有勞績加太子少師十四年三月授平逆將軍時叛鎮王輔臣附逆藩吳三桂作亂踞平涼肆掠陝西郡邑 上命畢力克圖率師駐大同尋延安綏德皆陷賊 諭進駐榆林畢力克圖既帥師移駐偵知賊眾三千餘屯楊家店渡口乃分兵三隊乘夜疾進黎明鳴角渡河賊不虞我師之至也悉驚駭潰竄遂復吳堡縣城進師虎爾崖口遇賊眾復擊敗之僞遊擊黃文英僞總兵朱龍俱遁綏德平進征延安賊將李士英等棄城遁畢力克圖令副都統覺和託率兵追擊至宜川俘斬無算自駐延安城招撫附近城邑保安安塞宜川延長安定諸縣皆復奉 命移師會揚威將軍阿密達征

平涼將至王輔臣驅賊萬餘迎戰畢力克圖督兵合擊陣斬偽總兵郝天祥及賊眾無算距城數里駐營十五年 上遣大學士圖海爲撫遠大將軍征平涼 命畢力克圖率所部前鋒赴甯夏統轄滿洲蒙古兵防勦圖海至平涼王輔臣降畢力克圖還駐平涼十七年移兵守隴州寶雞諸路賊倚仰天池高山爲巢畢力克圖進兵勦除招降靈臺華亭崇信等縣及偽參將李天秀等三十一員兵三千餘賊復據寶雞縣之蟠龍山分三隊來犯又偽副將胡長骰踞顯義三關山坡列陣拒戰畢力克圖以兵兩路合擊大敗賊眾十八年 上以畢力克圖出師日久年已衰邁 召還京先是圖海議分兵四路取漢中興安令畢力克圖同提督孫思克恢

復略陽至是已進征圖海以奏 上命俟漢中興安恢復撤回畢  
力克圖先取成縣招降偽副將王先生等十九員兵三百六十餘  
名會提督趙良棟已復略陽與將軍王進寶並定漢中圖海亦定  
興安遂班師十九年還 朝仍任都統二十年六月卒年七十有  
三 予祭葬諡恪僖孫常遠襲職二十五年追敘陝西軍功晉二  
等男世襲

右 國史館本傳

覺羅吉哈禮

覺羅吉哈禮滿洲正白旗人武功郡王禮敦第三世孫也 世祖章皇帝順治四年七月錄武功郡王後嗣授吉哈禮佐領尋襲其父阿賚騎都尉世職遇 恩詔晉至二等輕車都尉兼任護軍參領 聖祖仁皇帝康熙八年六月擢鑲黃旗滿洲副都統十二年十二月逆藩吳三桂反奸民楊起隆乘機作亂詐稱朱三太子廣德元年中興官兵以白布裹頭紅布披身爲號約於京城內外放火舉事潛聚鼓樓西街降將周全斌家全斌之子公直首於正黃旗漢軍都統祖永烈永烈與正黃旗滿洲都統圖海偕吉哈禮及佐領鄂克遜等率兵圍之生擒其僞齊肩親王焦三僞護駕指揮

朱尙賢僞閣老張大僞軍師李柱僞總督陳繼志僞提督史國賓  
僞黃門官王鎮邦等送法司鞫實磔於市互詳圖海鄂克遜傳十  
九年九月 命同副都統席布率每旗前鋒三十每佐領下護軍  
一漢軍二驍騎三內府佐領下兵六百赴四川會同鎮安將軍噶  
爾漢勦賊十一月卽軍前擢鑲黃旗蒙古都統時逆孽吳世璠踞  
滇黔其賊將胡國柱夏國相馬寶等分犯瀘州敘州及建昌二十  
年三月 上以宣威將軍鄂克濟哈久駐成都致建昌陷賊令解  
任以吉哈禮代爲宣威將軍統其所部兵馳會勇略將軍雲貴總  
督趙良棟勦賊建昌五月吉哈禮疏言將軍趙良棟統綠旗官兵  
自雅州前進臣盡率所部兵繼其後因見在糧少騎兵止齎二十

日糧步兵止齋十五日糧請 諭趣運送接濟 從之六月吉哈禮  
同趙良棟率兵擊賊大渡河奪賊船濟師胡國柱等聞貴州廣西  
大軍已並進雲南合圍省城引賊眾歸援吉哈禮收復建昌奉  
詔進征雲南互詳趙良棟傳九月吉哈禮行至武定府卒於軍年  
五十有六 賜祭葬如例子吉斯哈襲二等輕車都尉

右 國史館本傳

Vertical text on the right side of the page, possibly a page number or title, written in a non-Latin script.

Vertical text on the right side of the page, possibly a page number or title, written in a non-Latin script.

額楚

額楚滿洲鑲黃旗人先世居薩哈勒察姓烏扎拉氏世祖章皇帝順治二年內大臣和洛輝統師駐防西安道經河南明總兵劉洪起既降復叛據西平縣城和洛輝督兵樹雲梯攻勦護軍昂海先登額楚繼之遂克其城敘功予雲騎尉世職尋授佐領屢遇恩詔晉世職至三等輕車都尉十五年從大軍取貴州明年凱旋隨副都統噶楚哈瑪爾賽至荊門州聞海賊鄭成功犯江甯由大江趨援噶楚哈令額楚爲鑲黃旗營總統江甯駐防兵擊敗賊眾敘功晉世職二等輕車都尉尋授駐防江甯協領擢副都統

聖祖仁皇帝康熙七年授江甯將軍十三年逆藩耿精忠叛應吳三



桂遣賊將由福建陷江西廣信建昌饒州等府徽州及婺源績溪等縣俱從逆額楚奉 詔同署副都統宗室巴爾堪率兵往勦逆賊萬餘於績溪縣西北迎戰額楚督兵奮擊陣斬僞副將一及賊眾三千餘擒從逆把總劉成功斬之復績溪遂復徽州府城賊將踞休甯縣之新嶺倚險立寨額楚分步兵左右擊騎兵由中路進攻破鹿角毀木柵斬賊五百餘乘勝進勦至婺源賊皆潰遁婺源亦復額楚奉 詔征饒州擊賊於樂平縣之段家村斬二千餘級進薄樂平東門前鋒參領巴特瑪樹雲梯登城賊兵五百餘由西南二門出遁額楚遣兵追襲擒斬過半進次鄱陽縣大磯莊賊由雲梯髻峰下來犯額楚遣巴特瑪等列陣奮戰賊敗潰從逆饒州

參將陳九傑時爲僞都督棄城遁入鄱陽湖額楚撫定城中人民賊旋由湖中駕船三百來犯額楚督兵射殪三百餘賊以礮擊毀賊十餘船餘賊俱竄遁十四年四月額楚率兵勦賊萬年縣至石頭街渡口遠望隔岸分布賊營十數處賊船二百餘橫踞渡口額楚令步兵直趨渡口集戰艦發槍礮密令騎兵乘夜由上流潛渡繞出賊營後水陸夾擊殪賊數十盡獲賊船陳九傑就擒伏誅餘賊棄城遁賊之在安仁者皆乘船遁我兵追及之賊以風逆泊船拒戰旋自焚其船棄資械奔竄萬年安仁二縣悉平五月勦賊弋陽賊將蔣得軫等率賊五萬於城北樹木柵十有五又以五千餘賊分踞西岡橋額楚分兵爲二攻毀木柵奪取西岡橋賊卻入城

我兵登城克之擒斬僞遊擊張三奇僞都司張明德胡中申等先  
後擊斬及溺水死者二萬餘賊十五年簡親王喇布自江甯移師  
南昌額楚奉 詔參贊軍務吳三桂賊將高大傑等突陷吉安踞  
之額楚同將軍哈勒哈齊率兵攻克外城與賊相持賊將馬寶韓  
大任引賊數萬來援額楚迎戰於螺子山等處屢失利會安親王  
岳樂自袁州進征湖南圍長沙馬寶聞急趨救吉安賊眾食盡乘  
夜出南門奔逸 上遣侍郎班第察奏螺子山戰敗罪以額楚不  
能舉發首先敗走之人又賊遁不行追擊罪無可誘應罷任革世  
職 命以世職仍領江甯兵立功贖罪率兵赴廣東十六年九月  
賊將胡國柱馬寶率賊萬餘犯韶州額楚師次蓮花山賊偪營額

楚督兵禦擊會將軍莽依圖自城中出兵夾擊大敗賊賊由帽峰山遁追擊至樂昌仁化 詔莽依圖進駐梧州額楚駐韶州十二月 諭曰韶州地屬緊要一切軍務額楚若啟簡親王轉奏恐多遲誤其令額楚以江甯將軍印統轄兵馬事許專奏十七年 詔同都統勒貝率兵進駐梧州參贊莽依圖軍務時廣東總兵祖澤清復叛自高州勾結山海諸賊犯電白額楚奉 詔會剿擊卻賊眾進駐藤縣遇大疫士馬多病斃額楚以 聞 命別擇要地移駐額楚旋疏言吳逆踞鬱林融縣潯州聲言三路來犯藤縣軍營未可動移但士馬缺乏應請增遣以備勦禦 上命其仍駐藤縣諭將軍舒恕於南雄韶州兵內擇有馬者發額楚軍未至賊犯藤

縣額楚同巡撫傅宏烈率兵禦擊失利退保梧州賊陷藤縣十八年二月賊將吳世琮犯梧州額楚同莽依圖傅宏烈擊卻之賊併力犯南甯城中食盡時降鎮馬承蔭守南甯遣人告急額楚與莽依圖舒恕勒貝分兵四路趨援擊賊於新邨西山之巔斬殪無算世琮負創奔逸南甯圍解額楚駐守永清十九年六月額楚奉詔還江甯二十年十月卒於任以兄子格克里之次子富努保襲二等輕車都尉世職富努保尋卒以格克里長子法保襲初格克里於康熙十四年以六品從大軍征廣東勦叛鎮馬雄偽將軍董重民等於電白縣戰歿於陣二十五年議卹子雲騎尉世職以法保併襲合已襲之職爲一等輕車都尉

右 國史館本傳

國月等狀頁及刀扇  
卷三十三  
將帥十二

三二



色爾格克

色爾格克蒙古正白旗人姓博爾濟吉特氏先世居喀喇徹里克部父阿拜岱巴圖魯 太宗文皇帝天聰時率眾來歸 予三等輕車都尉世職既卒色爾格克襲屢從征伐授一等待衛崇德元年隨豫親王多鐸等圍朝鮮國都國王李倬遁南漢山城移師攻之色爾格克奮勇登山身中重創 賞馬二匹五年隨鄭親王濟爾哈朗等征明圍錦州色爾格克率侍衛二十人直前搏戰有歸明蒙古僧格依者素稱梟將色爾格克擊斬之鄭親王遣啟心郎額爾赫圖奏其功明年大兵圍錦州令色爾格克選驍勇前鋒兵四十人伏荒地生擒明將一員王貝勒等嘉其勇敢以所獲鎧甲器



械全給之既而明總督洪承疇自松山來援上命貝勒王大臣設伏高橋色爾格克獨斬敵兵七人賞馬二匹復先眾擊敗松山敵騎我兵鑿壕圍困松山城明兵來犯漢軍所守壕塹色爾格克率護軍三十人應援擊退敵眾七年冬隨饒餘貝勒阿巴泰征明越燕京攻臨城縣進征山東攻青州府俱力戰中創世祖章皇帝順治二年敘錦州松山戰功晉世職二等輕車都尉六年追敘阿拜岱巴圖魯前此率眾來歸舊勳分授其諸子各世職色爾格克晉爵二等男七年九年三遇恩詔晉一等男加一雲騎尉尋裁恩詔所加爵職仍改二等男擢任內大臣聖祖仁皇帝康熙十二年五月諭獎久著勞績諸大臣加色爾格克太子少保

二十年十月卒 賜祭葬如典禮諡勤敏孫錫扎保襲

右 國史館本傳



海潮龍

海潮龍滿洲鑲藍旗人由正白旗改隸初隨吳三桂入雲南隸其藩下康熙十三年三月三桂叛勇略將軍趙良棟率兵進取雲南十九年七月潮龍以偽鶴麗將軍自鹽井衛密約滇西各鎮將效順偕副將李鍾芳等擒斬偽總兵辛敬率領將士首先納款遣其標下副將劉友功等防守北勝以待大兵策應閏八月將軍趙良棟疏報潮龍獻地投誠繳送劄印欲聯絡迤西一帶身任前驅請敕諸路大將速發官兵糧餉以爲接應 諭曰海潮龍感戴國恩率眾獻地先機效順可嘉著授爲懷忠將軍率所部前導破賊九月潮龍至成都鍾芳等亦率官兵踵至將軍趙良棟以潮龍率全

軍遠來歸正官兵應從厚頒賞急爲安插潮龍應請 敕部議敘  
入奏部議如所請尋加潮龍二等先是劉友功等率兵抵北勝防  
守金江聯絡迤西漢土官兵與賊隔江對壘僞將軍趙永甯等拒  
戰嗣逆賊攻陷永甯建昌失守總兵朱衣客援兵自建昌退駐雅  
州潮龍請兵未至劉友功等前後受敵兵力不支僞總兵李發美  
劉芝林等遂籍潮龍家廟父登魁子呈瑞俱被害至是將軍趙良  
棟以潮龍父子家口暨迤西官兵被賊分散者應分別清查安插  
入奏 諭曰海潮龍首先率領官兵傾心投誠著有勞績其父母  
妻子被難可憫著行文各路將軍察明潮龍家口速令完聚二十  
年五月潮龍疏言雲南白大兵雲集日用浩繁楚糧旣不能轉運

而川粵荒殘之後尤難接濟若不安撫百姓聯絡土司萬一相率  
遠避軍糧無從措辦況逆孽蠱誘多方苗蠻最易煽惑臣以爲地  
方安則人心景從軍餉足則兵威遠震此萬難緩於今日者也  
上命大將軍彰泰趙良棟等加意招撫勿令失所六月 諭大將  
軍彰泰等遣詣悉賊情者乘傳詣京師潮龍入都 召見自請疏  
陳要略十月疏言雲南迤東迤西皆有土官迤西多良善而迤東  
土官相繼跳梁流官不能約束相率爲盜比吳逆構亂復拔其子  
弟濫授總兵副將僞職大兵壓境爭先降服復蒙大將軍照僞銜  
給劄今雲南漸次平定請 敕下督撫清查擇忠順有功者量授  
土官佐貳去其武銜務令保境安民部議令督撫議嗣總督蔡毓

榮奏言土司世職武不過宣撫宣慰文不過知府同知應聽流官  
節制其投誠時權照吳逆偽銜所給之劄應請追繳換給土職下  
部議行十一月疏言雲南僻在天末民苗錯處向係流寇盤據生  
聚殷繁吳逆入滇悉用此輩爲鎮協大員今雖革面投誠當因其  
勢而利導之離其穴而分置之如用其將則兵當另遣用其兵則  
將當別調使其不相呼應至投誠兵丁繁多游手游食尤易滋事  
請 敕遴選厚重之人拔補各鎮清理經制約束流亡兵民兩安  
庶無意外之虞 上是其言飭議政王大臣議行又疏言逆藩舊  
轄官兵俱係遼東之人兩都統所轄佐領共五十有三將弁世職  
經制八百有奇甲兵萬六千有奇其餘丁生聚不下數萬皆 皇

上多年養之人吳逆悖亂陷此輩於不義伏乞 聖恩俟克復全滇之日 敕令自首并令督撫清查數目遷入八旗安插俾京畿得資勁旅邊民不致流離部議 從之二十一年正月署雲南鶴麗總兵七月授貴州大定總兵 命下潮龍先以五月卒 賜祭葬如例

右 國史館本傳



Vertical text on the right side of the page, possibly a title or page number.

Vertical text on the right side of the page, possibly a page number.

國朝耆獻類徵初編卷二百七十三目錄

將帥十三

趙應奎

佛尼坤

林桂

周球

賚圖庫

哲爾肯

穆占

錫卜臣

陳昂

許君用

張勇  
子雲翼

王進寶  
子用子

達克薩哈

莽圖  
子濟星

魏拉

耿昭忠  
弟聚忠

166-250

國朝耨獻類徵初編卷二百七十三

通奉大夫前署江西巡撫江西布政使司布政使湘陰李桓輯  
將帥十三

趙應奎

趙應奎河南商邱人順治三年由行伍隨恭順王孔有德征湖南  
六年隨征廣西均有功累遷至湖廣施南副將康熙十三年逆藩  
吳三桂反長沙失守調應奎江西袁州副將時袁州勢偪且棚賊  
句連逆匪應奎以所轄兵少捐募同家丁堵禦擒斬賊渠朱益吾  
李念松等敘功加署都督同知七月由慈化進剿黃塘楚山瑤金  
山上栗市敗賊眾江西總督董衛國請設鎮袁臨卽以應奎爲總

國朝耨獻類徵初編卷二百七十三將帥十三

兵官 從之九月三桂遣賊犯袁州 命同署副都統穆成格力  
守俟大軍會剿 遣將軍尼雅翰率駐防江甯兵及副都統碩塔  
等援之十月僞將軍朱君聘僞總兵黃乃忠合賊數萬自萍鄉來  
犯應奎同副都統幹都海倭黑等敗之西村斬萬五千餘級分趨  
萬載縣賊迎拒敗之斬賊渠邱以祥僞知縣童聖功復其城嗣吳  
逆以僞劄來應奎令長子衍慶出首部議應奎加左都督衍慶以  
署都司僉書用 特旨趙應奎效力巖疆屢次殺賊立功今又出  
首逆劄忠盡茂著應給世職下部議給騎都尉世職十四年正月  
遣遊擊楊正元等剿棚賊於分宜新喻界擒賊甚眾盡焚其巢四  
月僞總兵揭玉卿突犯萬載遣遊擊陳素綸等敗之斬級千餘又

敗之白良六月僞總兵黃立卿復以僞書誘降應奎令三子衍祥  
呈首議加應奎軍功一等衍祥授鴻臚寺少卿十五年四月遣遊  
擊李顯宗等敗賊於鐵山界仙居橋沙溪湖塘諸處賊句瀏陽諸  
賊復陷萬載我兵由三陽橋進剿賊設營四於西門外分擊之賊  
渡河截龍河渡口對岸迎拒我兵亦渡先斬守口賊直入其營賊  
大敗分竄追斬無算再復其城得 旨嘉獎十六年二月分兵剿  
賊於古積嶺黃芽嶺等處擒斬僞遊擊守備等六月敘功授三等  
輕車都尉十七年正月 上以江西底定 詔應奎統本標官兵  
移鎮茶陵攸縣四月疏言自吳逆之叛袁州密邇湖南臣率孤軍  
征剿保城上遊一帶幸獲安全但彼時兵力苦單漕贖臣捐資贍養

親兵或自備馬匹或委以虛銜嗣戶部臣溫岱奏親見臣親丁防禦有益蒙 恩給臣所養健丁千人步戰兵餉令臣量設官管轄兵丁既叨餉餼而所設管轄官未議實授開俸養廉無資難以驅之鋒鏑今臣移駐茶攸僅帶標兵二千六百名見奉征南將軍穆占定南將軍華善調往鄆縣安仁千四百名臣帶防兵少僅有健丁一營隨臣左右既有成效於前復需用命於後仰冀 天恩各予實銜開支實俸於禦寇固疆誠有攸賴下部議 從之八月賊犯永興縣敗之十八年四月隨簡親王喇布復祁陽縣七月復新甯縣八月奉安親王岳樂調剿逆賊於武岡州楓木嶺敗僞將軍吳國柱等十九年正月同貴州提督趙賴攻克龍頭山泡洞口其

屋塘雲霧嶺五子坡諸賊寨賊將馬寶遁追擊之復會同黔陽等縣三月建義將軍馬承廕叛隨簡親王率兵至郴州承廕降二十一年正月奉 旨以提督充廣西左江總兵官敘功加二等輕車都尉疏言臣昔任思南副將深知左江爲滇黔門戶兩粵咽喉接壤交南環以獞猺土司不特反覆最爲緊要鎮標額設四營其兵三千有餘多從逆歸命者官則已玷官箴兵則習成驕悍臣標健丁一營半係親屬經臣數載鼓勵成效請帶赴新任以資鈐壓部議不准 諭左江地方緊要應否照趙應奎所題著再議 從之八月以病乞休 諭照舊供職踰日復請 上仍慰留之時衍祥由鴻臚寺少卿遷督捕理事官奉 旨前吳三桂叛逆時各處乘



勢震動趙應奎以一副將孤身堅守眾心始定袁州係緊要城池  
儻或失陷江西全省恐亦難保此人功績甚大朕聞其病勢危篤  
深爲憫惻著伊子督捕理事官趙衍祥馳驛往省其父以見朕優  
恤至意衍祥未至而應奎已於是月卒兩廣總督吳興祚以聞  
奉旨趙應奎歷鎮巖疆效力年久勞績茂著遽爾奄逝深可憫  
惻著贈太子少保子祭葬如例諡襄壯其二等輕車都尉世職  
以應奎第二子衍禧之子宏謨襲

右 國史館本傳

## 佛尼埒

佛尼埒滿州鑲紅旗人姓科奇理氏世居瓦爾喀父索勒和諾少孤其兄瑚里納撫之成立瑚里納爲仇所害索勒和諾手刃其仇祭兄墓 太宗文皇帝崇德三年來歸任驍騎校七年隨饒餘貝勒阿巴泰證明攻河間府索勒和諾首緣雲梯登城戰歿 子騎都尉世職以佛尼埒襲 世祖章皇帝順治五年授佛尼埒西安駐防佐領時流賊李自成餘黨竄踞陝西湖北錯壤山谷佛尼埒屢隨大軍征勦委署營總尋擢授協領兩遇 恩詔晉世職至二等輕車都尉 聖祖仁皇帝康熙八年擢西安副都統十三年正月 命佛尼埒同西安將軍瓦爾喀由四川進討逆藩吳三桂師

行至棧道聞四川郡邑皆附賊叛鎮譚洪據陽平關佛尼埒同瓦爾喀及前鋒統領穆占等率兵自野狐嶺進征斬賊三千餘賊棄關遁繼敗賊將石存禮於朝天關追至沙河驛僞總兵彭時亨以舟師逆戰擊之潰奪其戰艦四遂進征保甯叛鎮吳之茂糾賊抗拒我軍鑿壕塹與相持尋以糧艘爲賊所劫饑不繼移師還駐漢中賊復於中途邀阻佛尼埒同與安總兵王懷忠擊走之又敗賊於槐樹驛小郿嶺十二月陝西提督王輔臣叛於甯羌據平涼秦州十四年佛尼埒擢任西安將軍加振武將軍銜隨貝勒洞鄂進征賊將高鼎聚眾四千於關山河岸立寨拒守佛尼埒同穆占等整列接戰自巳至午斬獲甚眾遂破賊寨乘勢追擊復破賊於渭

河橋進薄秦州賊伺我師壁壘未定猝從城內衝出冀掩我不備佛尼埒率兵遮擊賊不能犯旋攻克東西二關有夜犯正黃旗營者禦擊殲之賊以眾數千掠仙逸關佛尼埒分兵赴援賊聞我軍至卽踰山遁佛尼埒追躡之搜剽略盡因令參領嵩祝畱守仙逸關而自率兵趨隴州賊縱火山澤聞佛尼埒曰賊謀欲燒絕我軍進路耳若不增兵策應則軍食難以輓運因駐兵隴州防賊黨窺伺時大兵攻秦州數月不下賊之在四川及平涼者挾其眾萬餘來援城中賊與應者亦八千餘佛尼埒之師還自隴州與大兵合擊擒斬僞總兵李國棟胡茂白光永王元等殪賊三千餘遂復秦州下禮縣西河清水伏羌諸邑上命佛尼埒領兵開棧道援將

軍錫卜臣於漢中賊於長甯驛滴水崖及尖插屏嶺屢抗我師擊之皆潰竄招撫陷賊村寨居民三千餘十五年二月吳之茂糾賊萬餘犯秦州佛尼埒同提督王進寶督兵禦戰斬級二千餘生擒僞總兵徐大仁獲器械輜重無算三月偵賊由成縣禮縣運糧因遣兵邀擊於鹽關及羅家堡牡丹園擒斬護糧賊眾獲馬騾焚其糧尋擊敗僞總兵李國良等於清水縣復靜甯州六月復擊敗吳之茂於牡丹園進剿至西河北山之茂僅以十餘騎竄遁十六年四月追論前次自保甯退歸漢中諸將罪降佛尼埒世職爲騎都尉削振武將軍銜仍署西安將軍事十七年閏三月同副都統吳丹等連敗賊眾於牛頭山香泉等處七月引兵駐守寶雞防棧道

諸險要賊窺棧道之益門鎮擊卻之十八年九月隨撫遠大將軍  
圖海進征興安偵賊在梁河關佛尼埒領隊先驅至火神崖擊走  
僞總兵王遇隆遂渡乾玉河拔梁河關復興安城尋會王進寶軍  
於保甯十九年正月同總兵王朝海招降潼川府城及鹽亭中江  
射洪諸縣又敗賊於豹子山諸處賊渡江遁遂復瀘州冬逆賊吳  
世璠使其黨胡國柱等糾賊踞敘州陷永甯 詔授佛尼埒建威  
將軍調遣永甯一路兵剿賊二十年春賊眾二萬餘犯寶壩大溪  
口諸處佛尼埒率兵進擊敗之乘勝恢復馬湖府賊將宋國輔陸  
道清等詣軍門獻永甯府降胡國柱亦棄敘州遁佛尼埒奉 命  
駐守敘州八月 命統西安駐防滿洲兵之征四川者還鎮漢中

國朝通志卷之二十三  
二十一  
二十一年九月卒於官雍正十年入祀賢良祠乾隆元年追諡恭  
靖第三子托琉襲世職官至黑龍江將軍次子額棱特別有傳

右 國史館本傳

佛尼埒滿洲鑲紅旗人初襲父索爾和諾佐領職駐防西安累擢  
至副都統康熙十三年逆藩吳三桂反雲南佛尼埒同西安將軍  
瓦爾喀由四川進剿平叛鎮譚洪解陽平關圍破僞總兵石存禮  
於朝天關追至沙河賊以舟師逆戰敗之獲其戰艦由盤龍山還  
擊僞將軍吳之茂隨敗僞將軍王屏藩於槐樹驛十四年授西安  
將軍時平涼提督王輔臣叛陷秦州貝勒董額統諸將往征師至  
隴州僞總兵高鼎等聚眾據關山關河岸拒守佛尼埒同前鋒統

領穆占等整陣力戰賊敗遁晉號振武將軍大軍圍攻秦州四川  
及平涼賊來援佛尼埒率所部破之直抵城下大小數十戰擒斬  
僞總兵李國棟等秦州平禮清水伏羌西河諸縣相繼復旋同副  
都統德業立開棧道援漢中擊賊於滴水崖殲之招撫黃牛堡安  
坡山諸寨從賊居民數千人與將軍張勇等會師剿賊西河縣三  
戰三敗之十五年復同提督王進寶剿北山賊擒僞總兵一人斬  
僞弁二百餘人三月僞總兵李國良由靜甯復犯秦州擊卻之復  
靜甯旋擊賊於清水秦州樂門皆捷又敗之於牡丹園及西河縣  
北山十七年隨撫遠大將軍圖海進取漢中興安大敗賊於牛頭  
山香泉十八年又敗賊於益門鎮同圖海分路進剿至火神崖破



偽總兵王遇隆遂渡乾玉河奪梁河關復興安等縣十九年復成  
都府及鹽亭瀘川中江別遣將攻射洪取之又克瀘州復其城援  
永甯敗賊於托川劄改授建威將軍二十年偽將軍胡國柱犯寶  
壩大溪口擊破之復馬湖府招降偽將軍宋國輔陸道清等遂復  
永甯尋還鎮漢中二十一年卒於軍佛尼埒自從征凡八十餘戰  
戰皆有功統兵七年紀律嚴明所至秋毫無犯陝人思其德祠祀  
之乾隆元年追諡恭靖

右 國史賢良小傳

林桂

林公諱桂字斐日廣州番禺人也祖夢兆字應祥考起鳳字集梧俱  
皇贈驃騎將軍上護軍公少食貧多膂力爲人操舟磊砢負奇氣  
及從征伐智深而勇沈所向輒有功然恥自言人罕知者順治十  
一年李定國破高雷廉平藩標下副將李武等與戰於石城青頭  
營失利公率同舟數十人挾柁櫓堵遏之授百夫長定國入高州  
眾號二十萬十月圍新會知縣黃之正以蠟書募公等三人潛水  
中出請救十二月將軍朱馬喇合平靖兩藩援至圍解轉千戶隨  
用左翼鎮總兵官王忠孝薦擢都司康熙十九年十一月從平南  
將軍賴塔征滇南升左營遊擊時福建廣西諸將軍固山鎮協俱

隸塔麾下塔命公副忠孝爲前鋒師次西隆州阻大河公與忠孝  
夜伐木造橋以濟值大風雪裹餒兼道晚駐萬人壩賊屯石門關  
相距十餘里明年正月乙卯朔塔命分道進攻廣西固山劉與總  
鎮蘇定國等擣其左福建將軍馬與韶鎮李高揚等搗其右公與  
忠孝及兩廣督標嚴梅等中路薄敵壘賊將方元勇亦三路出接  
戰我軍失利公白塔令諸將分據要害夜半與忠孝選驍勇數十  
腰纏徒跣從北山亂石上越嶺懸巨礮挾盾操短兵馳突下殲賊  
過半元勇以五百騎遁公欲乘勝蹂之遣人報塔入關與忠孝兩  
路追躡賊出不意果大亂獲降卒二千馬二千芻糧輜重無算黎  
明沿途告捷自是倚公與忠孝如左右手去石門關五十里曰馬

斃河賊面河結大砦塔度大將軍貝子章泰大兵將至而河流如  
駛又偪賊砦計無所出公偵下流里許沙淺可涉岸石險惡中有  
閒道可達賊營請自領千五百人乘夜度河鑿石取道忠孝領兵  
二千協勦福建軍馬揚旗列炬鼓角趨上流公與忠孝繞其後大  
破之賊棄砦走隨迎大軍過河壓其壘賊將長孫德擁勁旅壁黃  
草壩馬將軍劉固山請往擊公謂黃草壩去此八十里我軍甫至  
險易未悉且德素號機警毋遽進二將慮粵兵功多固請往公謂  
忠孝曰志驕必敗吾不忍坐視敵人之挫吾銳也相與請兵護其  
後出二十里命速具食秣馬倍芻未四鼓謀報前營火光我軍散  
亂馬劉二將陷圍中公與忠孝悉銳馳突引之出賊知有援遂解

去二將負媿詣公謝公曰此兵家之常耳當爲君雪之乃請獨騎  
往偵道經青秀山遇偉少年關顯與語大悅因引公徧視賊壘凡  
出沒情僞強弱虛實靡不洞悉於山北五里許得地曰困兵谷公  
喜曰此天之設險以助順討逆也歸請塔詣勘部署既定翌日偕  
顯率眾誘戰德空壁出迎公與顯且戰且卻德追躡入谷聞礮聲  
谷外王忠孝張文盛管仲貴林必選等伏兵皆起公回馬轉向內  
外夾擊呼聲殷數里外塔卓龍旗據山巔執枹鼓自午至申屍徧  
崖谷仲貴中流矢德突圍奔顯射德中腰負創走公復引滿斃其  
馬德步走將踰嶺顯下馬追及之與手搏捽之墮山斬其級是役  
七獲降卒二千五百人馬二千八百匹糧米一萬五千斛第功以

公最公言斬德者顯也因述得顯時徧踴敵壘事塔召顯給守備  
仍屬公部下是日上疏奏捷奉 旨乘勝進兵於是度蚩尤關歷  
關索嶺磴道崎嶇風沙晦冥日行三十里賊聞風膽落皆棄屯堡  
委器械焚浮橋遁二月十九日癸卯抵昆明駐師滇城東歸化寺  
章泰貝子由楚度交水河駐滇城西北碧雞關軍聲益振吳逆遣  
僞護國將軍馬三保背城砦約二十八日決戰塔詣貝子營定議  
傳忠孝與公諭方略屆期雞甫鳴我軍未盡食賊擁火象數十直  
薄營柵命強弩射之賊熱象尾益衝突不可禦公與忠孝橫突斷  
賊陣林必選張鳳祥向應龍蕭國賢陳義斌關顯等亦領眾疾驅  
呼譟縱擊烟燄四塞天旣明猶不辨旗幟失忠孝所在公提刀突

圍斷賊先鋒高虎臂忠孝望見公曠目呼曰大兵至矣眾益力三保舞槩直取公公射之墮馬忽飛礮碎公馬首傷左股必選等悉力堵殺顯下馬掖公血流至踵忠孝跳盪來援爲賊將李大成刺背透鎧公復裹創上馬殺大成挾忠孝并馬左右射潰圍出會貝子軍繼至遂大捷拔其砦三保走楚雄府參領賊國泰李培益等追北至小西天三保降檻送京師忠孝旣負重傷次日卒公亦七日不飲食貝子與塔聯疏奏捷并言王林兩先鋒事 上優詔批荅贈忠孝都督同知加公左翼鎮副將遣內閣學士禮部侍郎額爾克圖齋人淺戰袍上尊喇嘛酒并 御書著問褒勉顯掖公謝恩時五月八日庚申也城西南杏花鋪與紅白二廟相犄角爲賊

饒道其北銀錠山扼之可盡滇城形勢公謂駐軍既久非奪此三隘城終不可下并請率游兵覘動靜貝子塔皆謂公瘡痍未瘳令別將圍進取賊守將馬三成三保弟也與僞參軍洪文達定議迎敵我軍三市堅壁不爲動俄白旗一麾杏花鋪紅白廟兩砦矢石迸發我軍進退失據折眾千餘公料三成恃勇輕脫既獲勝明日必復來先令設伏東山以待詰朝果至公佯與決戰望東而逃三成追北十餘里見長林疑有伏然架入不可回彭祖輝馬九旺李春薛報國諸伏出其背夾擊之斬首二千級文達馳鐵騎數百來翼三成逸去貝子塔欲饗軍公曰未也兵不厭速當令廣西先鋒趙永年左營張士舉右營李茂芳福建先鋒彭祖輝左營黃文選



右營周德仁分伏諸路以絕賊援韶鎮李高陽左營張文盛領兵先焚杏花鋪必選仲貴顏興郭進忠等領兵各持束芻伏紅白二廟公自領三千扼中路請塔出部內兵爲遊騎往來搏擊鼓三下杏花鋪火燄燭天賊猝不及措遂虜文達三成從紅白廟望之大驚督勁赴援爲公中道遮殺必選等旣縱火趣兵躡其後將軍部兵及銀錠山爲伏所拒不得出三成欲西走遇高揚文盛還師縱擊所向受敵被殊創死次日卽所焚地立屯堡沿瀕城築長圍困之貝子方欲就塔議取銀錠山忽傳塔病亟公遽入見塔曰此行大小數十戰非將軍及王將軍不至此吾一旦先朝露兩人勲績誰知之者言已淚下越三日平南將軍賴塔薨貝子命公權本帥

印務公請護柩歸京師貝子曰君於賴公恩誼固篤然豈宜以私  
恩廢公義乎公不得已從之翌日貝子召諸將議取銀錠山將軍  
希佛部下楊彪請往兵未交而潰賊梟其首置山前公謂此山巖  
絕猿鳥莫度非兵力所能制勝庶幾伺閒出奇一戰可捷也頃之  
郊遊見行者數十甚惶遽問之皆言城中乏食畏揆括而逃者公  
曰奈四門嚴守何曰昨銀錠山將軍白國柱殺敗官兵今在城賀  
功飲酒並料民財產因得越城逃出耳公白貝子立傳令分勒部  
署漏下二十刻親率顯等精銳三百人著帕首衣短後操刃持炬  
緣壁上值天大風草具益熾賊守兵皆錯愕被俘城內猶聞絃管  
聲俄火光徹城堞白國柱始驚悟出遇必選勝龍鳳祥仲貴等夾

城相拒廣西福建兵出山側躡賊後飛矢雨集國柱性狡銳揮戈  
突圍左右辟易諸將多爲所傷公引顯等馳下奪敵馬與苦戰眾  
負創益奮國柱兵殆盡猶手刃百數十人公射殺之遲明洒埽燼  
燄迎貝子登山大饗軍徧賞賚公部下林必選管仲貴夏勝龍張  
鳳祥李春薛報國馬九旺郭進忠顏興蕭國賢俱授守備關顯加  
牛彖額眞並賜名大顯大顯少失父母依姑夫習騎射隸平西王  
部下平西有逆志長孫德諧戮其姑家十餘人顯以他事出獲免  
道遇公蓋相資以成功名者越數日攻城城中食盡皆畔進克子  
城世璠自剄死三桂壻郭壯圖自焚僞相方國琛及夏國相巴養  
元李本深趙國佐等伏誅餘黨悉降雲南平時十月二十八日丁

未也越日貝子令歸順官各仍舊職留京師兵守城各省先行奏  
凱乃謂公曰本欲畱君鎮守騰越控制土司苗夷然久役思歸人  
情不免若疏聞得 旨可速來也公頓首謝十一月十一日庚申  
啟行 朝命仍假道粵西再歷數千里不毛之地二十一年二月  
抵廣州大吏委權韶州左翼鎮帶管左營事五月章泰貝子班師  
至交水河薨當是時中朝權貴人多不欲嶺徼偏裨居上功又以  
主兵者皆歿無可據令司勳姑闕焉故遷除不及七月牛鈕出爲  
廣東左翼副都統甫入境知公在韶州徑造公謂曰鈕聞黃草壩  
諸役公勳烈博六詔意謂鳴鐘鼎食今猶屈居都尉耶因徧詢征  
滇始末公爲備述之鈕默然良久曰吁其有攘之者矣旣抵任亟

語將軍王永譽晉公左翼鎮總兵官都督僉事亡何公以長子太學生其昌懿子次子縣學生其璧璞子俱病歿而庶子其俊澤君其佐致君其位尙君皆幼乃託年老求解任部議總兵官都督僉事林桂征戰有功理宜在任養老念曾經重傷準以原品休致仍帶餘功十二月部文下鈕意鞅鞅謂偉績薄償何以激厲雄駿出萬死不顧一生之力爲 朝廷蹈險難哉每過從輒爲公不平次年鈕陟學士 封廣順伯遂疏言公功請投雲南提督將軍王永譽數趣公公詣府力辭永譽不得已爲疏覆並走書牛學士代辭免學士得書歎曰世皆急功近名而林都督矢志若此向戍辭城免餘讓卿吾見其人矣三十五年學士子某任虎門協鎮嘗遣使

通問時公年近八十猶健在云

凌揚藻曰余少聞長老說林都督事輒欲考見其爲人而省郡縣志至佚其名氏則以後裔式微修志者采訪之不及抑亦鄉先達不切意表揚之過也嘉慶辛酉授徒公之故里公元孫美章示公手著夢錄一卷蟲蠹鼠齧盈一萬八千言雖不雅馴然事蹟歲月有可徵者亟芟其蕪爲之傳俟後之良史或有取焉

右傳凌揚藻撰

月  
耳  
之  
月  
其  
不  
才  
清  
國  
又  
二  
日  
一  
三

一  
四

166-278

周球

周球江南來安人順治十二年武進士初授廣州衛守備升署南  
贛營都司管遊擊事康熙十三年六月逆藩耿精忠之僞都督賈  
振魯曾若干等陷石城犯甯都總兵劉寶遣球赴援屢擊敗迎戰  
賊眾賊繞甯都城數日球與屯墾都督許貞合兵奮擊敗之追勦  
至石城縣擒斬數百人獲器械無算餘賊竄歸閩境遂復石城八  
月賊困興國球同許貞赴援擊賊敗走復追殲之蠟石寨尋勦南  
安土賊攻克崇義之半江寨長岡桐峒葫蘆諸岡及上猶縣界之  
三寨僞將軍易明以逆書來誘球執其使械送南昌巡撫董衛國  
疏聞下部議敘並敘石城戰功實授遊擊十二月閩賊犯會昌



分屯城南北同遊擊李天柱援勦先於水西水東斷賊歸路李天柱趨城南球趨城北與城守兵并力夾擊大敗賊眾追北五十餘里未幾賊復糾眾犯會昌界球擊敗之於湖城斬獲甚眾十四年正月叛鎮陳昇結連僞都督郭應輔僞總兵黃士標李勇陷龍泉球與李天柱統兵破賊於黃土關乘勝追逐至縣城賊棄城遁復龍泉偵知郭應輔踞三溪陳昇踞草林乃分兵三隊一由橫嶺一由松山寺一由白玉嶺沿路搜剿俱會於三溪大破賊燬其巢郭應輔遁走陳昇引賊出草林口兩路分偏我營先以數騎誘戰官軍入山口賊伏起銃礮如雨球督眾奮擊大破賊追至草林斬僞參將廖鵬拔賊寨陳昇退踞左安口賊猶萬餘礮聲四震球率兵

從鳥道崎嶇中入擊斬僞參將鍾宏捷等陳昇中礮死梟其首黃  
士標李勇敢走追及湖南界突有千餘賊拒敵復擊敗之斬僞參  
將范良等十人殲殪甚眾餘賊逃入桂東境乃收兵九月賊犯贛  
縣球破之白石老君庵擒僞總兵凌子亮十五年五月吳逆僞將  
軍韓大任高大傑投逆書僞劄球以送將軍舒恕七月贛州增前  
右兩營兵二千增城守兵四百設副將一員統領之球以署參將  
管城守副將事八月實授參將十月黃士標偕其黨王割耳等擁  
二萬眾犯信豐入小河堡運木山上築柵欲斷通贛北道球率兵  
擊之毀其柵絕賊糧道賊乏食夜遁球恐賊退入水西壩及小河  
堡老巢難取勝乘夜分兵三路追及水西壩復追及小河堡連敗

賊眾及旦追奔六十餘里至廣東草嶺界而還悉焚燬各賊巢十  
二月郭應輔連結吉安賊眾復陷龍泉踞黃土關設排柵抗拒球  
統兵往剿焚其排柵賊逃回城下官軍三面夾擊賊竄奔追至龍  
虎潭洋觀灘溺水仆溝者甚眾遂復龍泉逆黨韓大任之陷吉安  
也瑞金會昌相繼陷贛州孤懸一城郵傳皆絕球捐貲置甲械募  
兵千餘部議加副將 上以所議尙輕令再議加署都督僉事十  
六年正月同李天柱剿賊於會昌之五里排口斬獲甚眾僞總兵  
楊夢月等率眾降六月彙敘軍功加授都督僉事十二月韓大任  
自黃塘犯甯都球擊敗之鷓鴣寨又敗之三十大峒美坑口十七  
年正月復追至老虎洞大任窮蹙走汀州乞降球與遊擊唐光耀

率兵防衛降眾至福州乃還江西三月簡親王喇布檄球統兵二千隨征湖南防守安仁會永興告急球往援立營城外雞公山與賊對壘屢戰敗之十月錄鷓鴣寨老虎洞殺賊功加都督十八年正月擢太原總兵晉左都督十九年十二月移鎮漢中二十一年五月調真定總兵二十二年以病乞罷 溫旨慰畱五月卒於任得 旨周球效力行開著有勞績贈太子少保 賜祭葬如例

右 國史館本傳


## 賚圖庫

賚圖庫姓顏扎世居葉赫父安達哩於太祖高皇帝時來歸予騎都尉世職隸滿洲正黃旗屢從太宗文皇帝征明積功至三等輕車都尉及太宗升遐安達哩號呼累日以殉世祖章皇帝時予三等男爵世襲罔替以其子賚圖庫襲賚圖庫初任侍衛天聰五年從太宗征明圍大凌河城同佐領尼塔哈略錦州城內突出兵五千餘搏戰賚圖庫擊敗之復同尼塔哈破明監軍道張春兵崇德元年從征朝鮮途遇朝鮮騎兵千餘偕眾擊卻之三年隨貝勒岳託征明至通州遇明兵臨河列營同佐領瑚彌色擊敗其眾進兵山東至濟南府敵兵五百迎戰賚圖庫率護軍

奮擊斬二十餘級獲馬十六師旋復破敵營於臨清城西六年從  
征松山明總督洪承疇引兵十餘萬拒戰我軍旣擊敗之其總兵  
曹變蛟使潰卒乘夜突犯 御營賚圖庫奮力捍禦手斬一人餘  
眾遂遁竄尋隨鄭親王濟爾哈朗敗明杏山兵斬馘甚眾又設伏  
於高橋敵乘夜來犯擊卻之斬騎兵二人射殪五人生擒二人順  
治元年隨大軍入山海關擊敗流賊李自成敘功並屢遇 恩詔  
晉爵至一等子九年正月 世祖追念賚圖庫之父安達哩忠悃  
久著 特命立碑墓道三月以賚圖庫列議政大臣尋擢內大臣  
兼佐領 聖祖仁皇帝康熙十二年 諭獎久著勞績諸大臣加  
賚圖庫太子少保二十二年十月卒 賜祭葬如例孫錫喇襲

右 國史館本傳

國史館本傳



國朝書局刻經初集 卷一百七十三 禮部 考

哲爾肯

哲爾肯漢軍鑲紅旗人由佐領授刑部員外郎康熙十一年遷中城御史時吳逆倡亂十三年六月隨大軍出征江西十四年授都督僉事任南贛總兵十五年八月敘舉首僞將軍高得捷等逆書功加都督同知十一月敗賊於九渡水等處擒斬僞總兵副將等又敗之南康縣復潭鋪斬首千餘十二月廣東從逆提督嚴自明總兵張星耀等偪南康縣哲爾肯與將軍舒恕等斬賊萬餘破其營十七賊遁南安均得 旨獎敘十六年四月 上以大軍攻圍長沙吳逆窮蹙欲征衡州慮其侵犯贛州吉安等處分我兵勢命哲爾肯與總督董衛國等分布防禦偵賊情形不時奏聞十七

年正月與舒恕遣官於江廣交界九鄉地方招撫偽總兵賴榮等十七員兵萬餘又遣遊擊楊以松等敗賊於鷓鴣寨擒獲偽副將等十餘斬馘六千有奇敘功加左都督十八年二月兩廣總督金光祖疏請復設廣西提督上命哲爾肯任之八月疏言臣駐潯州三合營彈壓兩江接應大兵但慶遠太平思恩三府偏交陞接雲南爲粵西藩籬今逆賊苗蠻嘯聚負固臣請統兵先往南甯會同將軍莽依圖相機剿撫上可其奏並諭令原駐之三合營儻屬緊要可發兵駐汛防守十月疏報泗城土知府岑繼祿向化歸誠下部知之十一月疏言提標設兵舊制馬一步九今廣西餘孽未靖需戰馬甚多請改爲步八馬二從之十九年因與逆藩

尙之信結婚部議革職得 旨從寬畱任戴罪圖功二十一年疏  
言懷集營兵業經奉 旨裁汰但僻處深山必得官兵彈壓今酌  
撥潯協守備一兵三百布防歸潯州副將兼轄下部議行二十二  
年卒於官 賜祭葬如例題請入祀江西名宦祠

右 國史館本傳

西華大書局代印  
卷之二十三

三

穆占

穆占滿洲正黃旗人姓納喇氏先是爲葉赫部長天命四年 太祖高皇帝征葉赫招降其貝勒錦台什之子德勒格爾授佐領予三等男爵及卒子南楚襲任護軍統領以罪削爵弟索勒和襲穆占爲南楚之子初任侍衛兼佐領順治十六年署前鋒參領隨都統卓洛前鋒統領白勒赫圖駐防雲南時元江土司那嵩作亂大軍剿滅之穆占預有功 予三等輕車都尉世職擢正黃旗滿洲副都統康熙十二年冬逆藩吳三桂反 聖祖仁皇帝命安西將軍赫業副將軍瑚哩布由陝西四川進討以穆占署前鋒統領參贊軍務十三年二月至陝西聞四川郡邑皆附賊叛鎮譚洪據

陽平關穆占同西安將軍瓦爾喀率兵先驅擊潰賊眾於野狐嶺  
攻克陽平關及七盤關又敗偽總兵石存禮於朝天關陣擒偽遊  
擊王道成斬獲無算六月進征保甯叛鎮吳之茂率賊數萬迎拒  
我軍鑿壕列營與賊相持賊數來犯穆占輒擊敗之十月賊劫我  
糧艘於略陽又阻截運道於槐樹驛及郿嶺穆占率兵通道屢擊  
敗賊眾以餉不繼同諸將還駐漢中值陝西提督王輔臣叛於甯  
羌據秦州平涼與吳之茂譚洪等聯結爲寇穆占隨大將軍貝勒  
洞鄂還西安十四年二月 詔洞鄂征秦州平涼以穆占代赫業  
爲安西將軍率兵並進僞總兵高鼎聚賊四千於隴州河岸立寨  
拒守穆占整陣搏戰殲賊甚眾連破賊寨遂趨秦州薄城攻圍賊

屢出城抗拒皆督兵戰敗之復擊卻平涼赴援賊眾城中困蹙僞  
總兵陳萬策以城降穆占率兵往助提督張勇圍鞏昌遣陳萬策  
入城曉諭僞總兵陳科亦率眾迎降乃還會大軍征平涼十五年  
正月 上以洞鄂統師圍平涼日久未下 遣撫遠大將軍圖海  
代之六月王輔臣降穆占分剿餘賊於西河清水成縣禮縣收復  
城邑僞總兵周養民王好問等以慶陽府降九月 召入覲授都  
統品級佩征南將軍印率兵征湖南十六年正月至荊州時順承  
郡王勒克德渾守荊州貝勒尙善圍岳州安親王岳樂園長沙簡  
親王喇布守吉安穆占奉 詔由岳州助攻長沙疏請移江南沙  
船百餘爲水陸夾攻之用 詔如所請七月 詔移兵會簡親王



規取衡州永州值吳三桂分遣賊將掠江西穆占移兵袁州秣馬  
踰月擊卻賊眾之由永新犯吉安者遂進征茶陵逐賊至攸縣陣  
斬四千餘級生擒百餘人茶陵攸縣安仁酃縣永甯俱復十七年  
閏三月攻克郴州桂陽招降桂東興甯宜章臨武藍山嘉禾永興  
穆占自駐郴州以都統宜里布守永興四月賊犯永興穆占遣護  
軍統領哈克三前鋒統領碩岱等援之時簡親王尙駐吉安穆占  
請旨越其進征簡親王奏言穆占撤茶陵攸縣安仁之兵還郴  
州恐賊由永興占踞要路江西可虞請 敕穆占先滅永興之賊  
穆占疏辨茶陵等處之兵未撤永興已遣兵赴援郴州實爲要地  
請 敕簡親王遣將來守臣乃可擊賊永興 上命穆占仍守郴

州 諭趣簡親王進征簡親王乃移駐茶陵穆占疏請調江西提督趙賴隨簡親王部下將軍華善等率兵分守攸縣安仁等處得旨自穆占至荊州後所奏調遣守禦事宜無不允行今破賊收疆穆占是賴其俱如所請六月賊將馬寶胡國柱并力犯永興我兵戰失利宜理布哈克三皆歿於陣賊遂連劫我營碩岱退入城副都統托岱等引兵還郴州 上以穆占分兵防守閒地致永興兵單 諭責厚集兵力立功贖罪時簡親王遣前鋒統領薩喀察由安仁援永興既入城以賊勢猖獗牒請益兵穆占辭以永興軍事簡親王主之薩喀察遣人馳告簡親王遂以入奏 上諭責穆占曰凡因茶陵永興諸處軍事所降諭旨皆署穆占名於簡親王之

前今穆占牒稱永興爲簡親王之地謬戾實甚自今以往毋分彼此合力剿滅逆賊八月賊將馬寶等聞吳三桂死焚永興賊壘引賊眾還衡州穆占自郴州遣兵敗賊於耒陽十八年二月率兵擊敗賊將郭應甫於常甯招降僞總兵李魁等追擊賊將吳國貴於永州俘斬甚眾復永州道州常甯新田永明江華東安進定廣西復全州灌陽興安恭城時桂林平樂南甯等府已爲將軍莽依圖傅宏烈等收復穆占奉 詔還定湖南八月攻復新甯十一月上命貝子彰泰爲定遠平寇大將軍以穆占參贊軍務十九年二月督兵擊敗賊將吳應麒等復沅州進征貴州十月至鎮遠賊將張足法楊應選宵遁復府城進剿逆賊復偏橋興隆二衛進定平

越貴陽並遣兵收復安順石阡都勻等府二十年正月賊將高起隆夏國相王會王永清張足法楊應選等擁眾二萬餘於平遠西南倚山立寨穆占同提督趙賴率兵衝擊高起隆等敗竄王會率所部降遂復平遠分遣副都統莽奕祿遊擊王成功等追剿逸賊擒斬僞巡撫張維堅復大定府楊應選率眾降穆占隨彰泰進征雲南 上以貴州苗蠻雜處疆土新復 命穆占旋師鎮守尋因彰泰請仍 命隨征雲南十月合廣西四川兩路兵攻雲南城三桂孫世璠自殺僞將軍線絨等出降彰泰令穆占同都統馬齊入城籍賊黨屬擒僞大學士方光琛等磔於軍門雲南平凱旋授正黃旗蒙古都統列議政大臣二十二年三月議政王大臣等追論

穆占征保甯時奏軍事不實征平涼時不臨陣指揮後在郴州推  
諉不救永興應處絞籍沒奏入得 旨穆占雖有罪其勞績亦多  
罷任革世職餘罪寬免是年疾卒年五十有六

右 國史館本傳

錫卜臣

錫卜臣滿洲鑲白旗人姓瓜爾佳氏費英東弟郎格之孫也 太  
宗文皇帝天聰五年授前鋒侍衛崇德元年從 上征朝鮮三年  
隨睿親王多爾袞征明由青山口毀邊牆入至通州明太監高起  
潛率兵來戰錫卜臣同前鋒參領素爾德擊敗之五年七月大軍  
圍明錦州敵騎自杏山來援錫卜臣同前鋒統領烏拜擊敗其眾  
錦州馬步兵出城刈草又屢敗之六年復圍錦州擊敗明總督洪  
承疇三營步兵敵千騎自甯遠來窺錫卜臣與前鋒統領努山追  
擊至連山斬獲無算 世祖章皇帝順治元年隨大軍擊流賊李  
自成敗賊將唐通於一片石追敗自成於安肅望都後進征山西

敗賊於太原二年隨英親王阿濟格征陝西錫卜臣同兵部理事官鄂摩克圖擊敗賊眾自成走湖廣又同前鋒參領席特庫追至安陸擊敗賊眾是年擢前鋒參領敘功 子雲騎尉世職三年隨肅親王豪格征流賊張獻忠師至陝西擊敗叛鎮賀珍於漢中遂進四川屢戰皆捷獻忠既滅還京改護軍參領五年冬大同總兵姜瓖叛錫卜臣同護軍統領素拜往討屢敗賊復隨端重親王博洛擊敗賊黨劉遷解代州圍屢遇 恩詔並敘四川大同戰功晉世職至二等輕車都尉十一年擢護軍統領十二年 命同都統卓洛等率兵駐防荊州時張獻忠遺黨孫可望掠湖南據辰州十三年錫卜臣同卓洛由澧州常德進征賊聞大兵至棄城遁追破

之於瀘溪賊竄入山谷遂復辰州十六年海賊鄭成功犯江甯錫  
卜臣同安南將軍明安達哩自荊州赴援破僞都督楊文英等於  
揚子江斬獲無算 聖祖仁皇帝康熙九年擢鑲白旗蒙古都統  
十二年 諭獎久著勞績諸大臣加錫卜臣太子少傅十三年四  
巡撫羅森提督鄭蛟麟總兵譚洪吳之茂等叛應逆藩吳三桂  
上命錫卜臣爲鎮西將軍率兵鎮守陝西是年冬錫卜臣同都統  
赫業等征四川賊踞保甯我分營於蟠龍山爲賊所劫復阻截餉  
道錫卜臣還漢中值陝西提督王輔臣叛於甯羌賊黨分踞棧道  
錫卜臣駐漢中餉運久阻食不繼十四年八月還西安疏言自本  
年二月兵糧匱竭取食賊麥以至七月食已罄盡計欲保全大軍



乃自漢中出沿途擊賊馬匹器械俱盡 上命陝西督撫給帑買馬人各一匹並整頓器械鎮守西安十九年還京仍任都統二十二年四月議政王大臣追論蟠龍山戰敗罪應罷任革世職籍沒得 旨錫卹臣尙著勞績免其籍沒尋卒於家

右 國史館本傳

陳昂

公姓陳氏諱昂泉州人世居高浦國初遷濱海居民徙灌口父  
兄相繼歿以母寡艱生計遂廢書買海上屢瀕死往來東西洋盡  
識其風潮土俗地形險易康熙癸亥上命閩浙總督姚啟聖經  
略臺灣遣靖海伯施琅統諸軍進戰求習於海道者公入見時制  
府以水戰宜乘上風公獨謂北風剽勁非人力可挽船不得成艖  
不若南風解散可按隊而進施意合遂參機密將至澎湖北風大  
厲氛霧冥冥晝面不相覩三日軍中恟疑公進曰此殺氣也將軍  
毋以父兄之仇欲效楚伍員倒行而逆施乎將軍曰然則吾誓天  
公手案以進誓畢風反日暉遂克澎湖歸疾病痍傷者於臺灣其

吏卒大憲鄭氏遂歸命兵不血刃策勳授蘇州城守一調再遷而至碣石總兵官擢廣東副都統皆濱海地也嘗奏請西洋治象數者宜定員選母多畱其畱者勿使布其教於四方自開海洋登萊江淮閒海船至菽粟布帛卽騰踊僉曰內地年登而穀貴職此之由久之語上聞命盡閉海洋公聞之獨曰南洋非此倫也吾少歷諸番皆習耕稼無資於中國或海壩毀饑商船尙以諸番之米至今槩絕之則土貨滯積而濱海之民半失作業欲上言會疾作將終命其子以遺疏進眾皆疑焉叩之閩人則曰斯言也其信公之子倫炯介吾友楊君干木請銘余旣竒公之迹又其言宜者信於後乃受其請而譜之公歷官皆能其職有遺施在人卒年六

十有八父諱健前母許氏母王氏自曾祖以下皆受一品 賜命  
夫人林氏子三人長倫炯次芳次倫焜以某年月日葬公於某鄉  
某原銘曰

迫爲生海之涯備諸艱危榮遇亦由茲志願無餘安以反其居

右墓誌銘方苞撰

--	--	--	--	--	--	--	--	--	--

1941  
1942  
1943  
1944  
1945  
1946  
1947  
1948  
1949  
1950  
1951  
1952  
1953  
1954  
1955  
1956  
1957  
1958  
1959  
1960  
1961  
1962  
1963  
1964  
1965  
1966  
1967  
1968  
1969  
1970  
1971  
1972  
1973  
1974  
1975  
1976  
1977  
1978  
1979  
1980  
1981  
1982  
1983  
1984  
1985  
1986  
1987  
1988  
1989  
1990  
1991  
1992  
1993  
1994  
1995  
1996  
1997  
1998  
1999  
2000  
2001  
2002  
2003  
2004  
2005  
2006  
2007  
2008  
2009  
2010  
2011  
2012  
2013  
2014  
2015  
2016  
2017  
2018  
2019  
2020  
2021  
2022  
2023  
2024  
2025

許君用

許君用字贊可湖南湘陰人母汪氏夢虎踞臥榻驚而覺遂生君  
用年十二勇力絕人順治中從雲南總督麻勒吉軍征土寇積功  
授督標都司後以平吳三桂功擢辰州鎮總兵致仕歸卒

右傳李元度撰



張勇 子雲翼

張勇字非熊陝西咸甯人幼孤落拓不羈善騎射 國初謁英親王阿濟格於楚俾懷輯江左得鎮將以下七百餘人王奇之歸隸總督孟喬芳麾下巨盜賀珍圍西安城勇率兵擊之圍解轉戰南北山閒有功以散官守耀州有馬蘭戍將潛通賊勇招與飲卽席斬之疾馳擒賊渠順治五年從喬芳平河西叛回復臨洮蘭州平涼甘肅諸衛率先登授甘肅總兵駐甘六載威信大行羌人畏憚十二年從經略洪承疇規取滇黔授右標提督以前部破賊於十萬谿賊焚鐵橋逸去斂馬勒更作之渡全師遂拔雞公背寨康熙元年晉雲南提督二年復調甘肅諸羌戀大草灘水草之饒乞住



牧 聖祖遺廷臣就議可否勇曰羌性貪漸不可啟比往會境上  
議弗決勇從旁呵殿而出來使詢譯者知爲勇蒲伏請曰惟公命  
勇責之曰大草灘內地爾安得請 國家卽無所惜吾邊臣尺寸  
之士敢棄乎諸羌謝過事遂已更設永固協營築入寨守禦益嚴  
十二年吳三桂以雲南叛蔓延關涼閒謀頻至勇悉縛致 闕下  
十四年河東亂勇帥師敗之蘭州城下偪圍之加靖逆將軍尋晉  
侯爵河洮諸羌乘亂侵軼勇分兵圍蘭州親赴臨洮逐羌出口復  
河州檄土官楊朝樸結以恩信使取洮州又遣兵赴鞏昌賊逆戰  
熱羊城大破之隨率後軍至城下圍旣合因分徇漳甯諸縣而令  
朝樸圍岷州有 詔稱勇忠誠善謀聽一切便宜從事部覆母中

制勇聞 命益奮擊昌固急勇計賊必突門走豫設伏待之詰旦賊果出斬俘幾盡餘就撫岷州亦降其冬惠安兵變勇亟請趙良棟移駐於甯十五年正月勇率師赴之至中衛聞川賊出秦州乃畱兵爲聲援急趨鞏昌駐伏羌時西河通渭諸縣盡沒勇發兵四應獨以麾下數百騎禦賊王屏藩於樂門相持數月三敗賊奪其營平涼悉定以收復全秦功授一等侯由少保晉少傅兼太子太傅十六年准襲侯十世晉太子太師五月祝囊犯塞勇旋甘驅出之遂駐甘彈歷二十三年卒 賜祭葬 贈少師諡襄壯勇身經大小數百戰拔郡城五州縣城數十擒僞王一人斬獲僞將軍以下數百人每臨敵若無事智計橫出以寡擊眾率先士卒紀律嚴

明將吏皆畏之子弟僮僕雖遠在數千里外咸稟約束其所拔用  
由卒伍建功名爲大將軍者往往而有居恆恂恂退讓賓禮文士  
有古儒將風

右 國史賢良小傳

乾隆四十七年五月庚子 諭朕恭閱 皇祖實錄所載掃除吳  
逆平定川陝事蹟因取張勇趙良棟王進寶三人國史列傳詳加  
披覽其功績實有不可沒者當吳逆煽亂川陝兩省提督王輔臣  
吳之茂等相率從賊維時西陲告警張勇以雲南提督調回甘肅  
投爲靖逆將軍勇躬履行間殫心籌畫攻取平涼底定秦隴其閒  
收復洮河諸郡及舉發僞劄執斬來使諸事居然有古名將風而

趙良棟之投爲甯夏提督卽係張勇所薦又王進寶亦曾隸勇麾下兩人提兵轉戰同心效力趙良棟首先建議直取成都王進寶戡定保甯殲渠帥其削平恢復之勳亦不可泯厥後張勇封侯梁棟王進寶僅得子爵蓋緣兩人各懷私忿互相攻訐較之張勇之勤勞懋著始終無過者實遜然兩人之功究足以掩其過今百年論定睠念成勞趙良棟王進寶宜量加追敘前於乾隆三十二年特降恩旨令張勇等子孫世襲罔替張勇本侯爵其元孫張承勳承襲罔曠班革去散秩大臣在三等待衛上行走茲特加恩復還散秩大臣照舊供職至進取雲南恢復成都趙良棟之功爲最原封一等子著晉封爲一等伯王進寶原封三等子著晉封爲一

國朝武功鑠千古而將才輩出亦頗隨地脈爲轉移從龍諸佐蔚起關外及康熙平三藩後則漢臣名將西北爲獨多如提督侯爵張勇及子提督雲翼提督男爵梁化鳳及子閩浙總督勳提督子爵王郡及子總兵守乾提督陳福及子提督大用廣東提督殷化

子孫送部引見候朕酌量錄用以示優眷夫兵可百年不用不可一日不備國家承平日久每溯前勳爰思將帥如張勇趙良棟王進寶諸人將材武略獨出冠時名炳旂常賞延苗裔凡在戎行者尙其益勵起桓以副干城腹心之寄將此通諭中外知之

右東華錄王先謙編

行貴州提督楊不縱提督副將軍董芳皆陝西人雲南提督伯爵  
趙良棟及子廣東總督宏燦巡撫加總督銜宏燮提督將軍王進  
寶及子總兵用子提督岳昇龍及弟提督超龍子威信公大將軍  
鍾琪提督鍾璜孫巡撫溶提督馬際伯與弟提督見伯總兵覲伯  
副將顯伯提督潘育龍與姪孫提督元善提督韓良輔與子提督  
勳總兵師帝寶與子提督懿德提督樊廷與子總兵經文又兄弟  
總兵康泰康海總兵圖形紫光閣高天喜皆甘肅人及三省教匪  
靖而蜀將競興東南海賊弭而閩帥繼起至於粵匪盪平凡著名  
將帥盡隸湖南剿捻之役參以皖將二百餘年來以一省人才備  
五等封爵者前惟四川嘉慶中十七省提鎮四川居十之九後惟福建近年來則楚

才獨盛矣總觀前事地脈遷變理或有之然苟非一二命世大人  
提倡忠義物色英雄訓練而羈縻之恐穰吳頗牧之材沈淪草澤  
或反桀鰲爲鄉里患者豈少也哉

右紀聞陳康祺撰

張雲翼

張雲翼字鵬扶漢軍人襲侯爵累官江南松江提督

袁枚隨園詩話松江提督張雲翼以公侯世家而嚴灘一首獨出  
新裁其詞云漫整荷衣拜逸民灘聲猶自動星辰富春近日誰漁  
父天子當年有故人名到先生纔是隱賢如光武不稱臣只因曾  
作梅家壻外氏家風愛隱淪嚴先生爲梅福之壻事見逸史又有

句云明月到樓忘是夜桃花無水不成春俱有逸致

右 熙朝雅頌集鐵保錄



同治丁未年庚子月

卷之三十一

三

王進寶 子用子

王進寶甘肅靖遠人初隨陝西總督孟喬芳平河西叛回授守備隸甘肅總兵張勇標下順治十一年張勇調經略右標總兵進寶隨往湖南十五年進征貴州師次十萬谿懸崖千仞僞安西王李定國使僞都督羅大順扼據險要進寶率眾攀崖直上搗其巢賊眾潰以功遷經略右標中營遊擊康熙二年張勇任甘肅提督奏授提標左營遊擊尋隨張勇討平西羌授本營參將時羌人乞駐牧大草灘張勇用進寶議持不可於是卽單于城故址建永固城以進寶爲副將駐之十二年擢西甯總兵明年冬陝西提督王輔臣叛應逆藩吳三桂陷蘭州斷浮橋以阻我師王進寶率師進討

十四年二月師次黃河進寶以革囊結筏自蔡灣夜渡抵皋蘭龍尾山大破賊眾擒僞遊擊李廷玉等乘勝東拔金縣安定復西攻臨洮會大雪偵賊無備遂襲破之輔臣遣使持吳逆僞劄來招進寶以奏得 旨嘉獎加銜左都督四月進攻蘭州賊兵千五百人出東門迎戰進寶率眾奮擊自辰至午擒斬過半別遣兵分路剿殺賊退保不敢出我兵環圍之斷賊糧運六月賊造筏百餘謀潛遁進寶分兵沿河伺擊賊勢窮蹙進寶乃遣人招諭僞總兵趙士昇等率眾降遂復蘭州十五年正月 詔嘉進寶素著勞績克殫忠誠授陝西提督兼西甯總兵暫駐秦州時僞將軍王屏藩吳之茂互爲聲援窺伺秦州二月吳之茂率賊眾進踞北山絕我餉道

進寶會將軍佛尼埒進勦大敗之生擒僞總兵徐大仁復遣兵馳  
擊敗賊眾於羅家堡又敗之鹽關賊復集潰眾萬餘築壘排椿據  
鐵葉峽紅山堡潛出賊兵接運糧芻進寶遣兵撲滅大敗賊眾於  
牡丹園擒斬僞官獲糧械無算五月撫遠大將軍圖海統兵進攻  
平涼王輔臣窮蹙引四川叛鎮譚洪爲援連兵犯通渭進寶指揮  
將士急擊破之降其僞官復靜甯州城輔臣尋詣圖海軍前降六  
月進寶率兵次樂門甫駐營吳之茂遣賊眾來犯進寶統兵環擊  
擒其僞總兵遊擊等斬之復與將軍佛尼埒合兵攻勦屢戰克捷  
吳之茂僅以十餘騎踰北山遁走平原固原悉定大將軍圖海奏  
陝西提督原駐平涼固原與平原密邇據秦省形勝宜令進寶駐

鎮 詔進寶移駐固原兼攝固原總兵事八月敘功議授二等男  
諭曰王進寶宿將重臣矢心報國兼以訓練士卒忠義素孚故能  
身先行陣所向克捷朕甚嘉之於軍功議敘之外從優加一等男  
授奮武將軍仍兼提督平涼諸路軍務十七年四月進寶復慶陽  
斬偽總兵袁本秀及賊眾二百餘人十八年十月進寶與提督趙  
良棟等分兵四路規復漢中進寶偕總兵費雅達由棧道進先是  
進寶奏請令子用子率兵往勦俾練習戰陣 上允其奏遂授用  
子副將進寶復疏言臣父子均在秦中例應回避 詔曰王進寶  
父子統率官兵誅勦賊寇保守封疆著有勞績王用子仍畱與伊  
父王進寶同守秦中要地至是從征寶難進寶遣用子擊賊紅花

鋪大敗之復鳳縣兩當縣進軍武關令用子率偏師繞出關後而  
自以大軍當其前賊腹背受敵皆潰走擒僞總兵羅朝興等奪雞  
頭關直抵漢中王屏藩率賊眾自青石關走廣元進寶復遣兵躡  
擊賊眾奔竄降其僞將軍楊永祚僞總兵孫啟耀遂盡復漢中地  
得 旨褒獎時趙良棟亦恢復略陽 命進寶與趙良棟進定四  
川并 敕將軍吳丹鄂克濟哈率海州大兵分繼其後進寶自青  
石關至神宣驛聞賊踞朝天關督兵躍馬直前賊驚走疾馳至  
廣元斬賊無算遂復其城十九年三月分兵三路趨保甯距城二  
十里當孔道而軍賊眾二萬來犯進寶率兵奮擊大破之追至錦  
屏山連拔賊壘奪浮橋薄保甯城用子斬門突入進寶麾兵繼進

王屏藩計窮與僞將軍陳君極皆自縊吳之茂及僞將軍張起龍  
僞總兵郭天眷等十七員並就擒保甯平別遣兵克復昭化劍州  
蒼溪蓬州廣安合州西充岳池等州縣時趙良棟已復成都授雲  
貴總督 詔進寶駐守四川擢用于松潘總兵進寶尋以疾再疏  
乞休 命回固原就醫以用于駐保甯暫代管標下兵尋改用于  
爲固原總兵趙良棟以進征黔滇奏調川陝各營兵隨征固原兵  
亦多檄調進寶以本標兵宜畱鎮守奏停撥遣 詔允之未幾賊  
將胡國柱夏國相等由黔入川諱洪彭時亨復叛永甯建昌相繼  
失守良棟劾進寶擁兵不救進寶以臥疾固原疏辨且言建昌之  
陷咎在良棟 詔進寶馳赴保甯於是進寶復統固原兵駐保甯

是年冬敘功進寶晉三等子用予加左都督授雲騎尉世職明年賊將馬寶犯敘州用予擊敗賊眾恢復納溪江安仁懷合江等城降其偽將軍何德成等馬寶竄雲南用予駐敘州尋奉命率所部兵馳赴永甯駐守二十一年滇黔既平上詔進寶及趙良棟至京命王大臣發還前此互訐奏章宣諭二臣功績並茂欲矜全保護之其不諳大體私忿攻訐槩不究問事詳趙良棟傳賜服物仍還鎮二十三年五月疾甚再請休時用予已調太原總兵命馳驛偕太醫視疾且調用予甘肅總兵二十四年八月卒年六十得旨王進寶性篤忠貞威望素重率先征勦賊寇勇略兼優邊防戎務籌畫周詳勳猷茂著忽聞溘逝深爲軫惻下所司優卹



尋 贈太子太保 賜祭葬如典禮諡忠勇 世宗憲皇帝雍正  
十年入祀賢良祠初次襲爵者卽用予合其軍功議敘並雲騎尉  
爲二等子後再襲仍爲三等子 今上乾隆三十三年 詔予世  
襲罔替

右 國史館本傳

王進寶字顯吾陝西靖遠人少而驍勇精騎射順治七年從總督  
孟喬芳討平河西叛回授守備僞安西王李定國竊據滇黔十二  
年從提督張勇進剿師次十萬溪懸崖千仞進寶攀援直上擣其  
巢賊眾奔潰以功遷遊擊康熙初西羌不靖復從張勇擊敗之升  
洪水參將羌人輸款乞住牧大草灘地進寶贊張勇力持不可語

載張勇傳於是卽單于城故址建永固城以進寶爲副總兵駐之  
聖祖詔入覲詢以邊情嘉其才授西甯總兵十三年平涼提督王  
輔臣叛附逆藩陷蘭州進寶誓師黃河以革囊結筏從蔡灣夜渡  
抵皋蘭龍尾山大破賊眾乘勢拔安定復金縣時方大雪偵賊無  
備遂襲臨洮破之進攻蘭州敗賊於東門降僞將軍趙士誠等升  
陝西平涼提督鎮秦州州爲關隴要隘賊渠王屏藩僞將軍吳之  
茂等互爲聲援窺伺關陝進寶屢擊走之遂復通渭靜甯隴右底  
定投奮威將軍十八年賊犯寶雞進寶遣子用于潛襲利橋進拔  
鳳縣抵武關又令用于繞出關後而自以大軍當其前賊腹背受  
敵關破擒僞總兵羅興朝等追賊入雞頭關復漢中府明年正月

與趙良棟等會師分三路擊賊進寶奪朝天關取廣元昭化追賊至錦屏山連拔四營奪浮橋直偏保甯城用予斬門突入進寶麾兵繼進屏藩勢窮與僞將軍陳君極皆自縊生擒僞將軍吳之茂張起龍等保甯平是時趙良棟已復成都全川悉定 聖祖遣官錫以彤弓駿馬授三等子世職擢用予松潘總兵值進寶病返固原川賊復叛因力疾馳赴保甯賊旋平還鎮以疾卒 予祭葬贈太子太保諡忠勇 御製碑文以紀厥功用予歷官甘肅總兵左都督

右 國史賢良小傳

國家丑寅之交逆藩煽亂三孽相挺滇黔地連秦蜀爲害尤劇賴

我 皇上指授廟謨推誠委任將帥效命克底蕩平惟時矯矯虎  
臣敵王所愾義不反顧竭力盡能以奏膚功而靖大患如奮威將  
軍忠勇王公者天實生之以保乂 主家奠安區夏非偶而已也  
當吳逆之叛也公方奉 命鎮西甯受事未幾倉卒聞變繼而逆  
提王輔臣復叛時賊勢猖獗三秦震驚公計全陝繫天下安危於  
是拜表星馳率兵直進方次莊浪而蘭州已失守矣公抵黃河默  
禱河神昏暮以皮袋濟師深入八十里次日抵皋蘭營於龍尾山  
賊兵更番衝擊公身先士卒轉戰而前賊辟易無敢當者遂拔安  
定復金縣乘雪夜以破臨洮而蘭州之外援絕賊搜城固守公引  
兵急攻之窮蹙請降未幾天水南安次第收復於是定西大將軍

多羅貝勒與靖逆侯張公會議請移駐公秦州以當要害時逆提  
尙踞平涼而川逆王屏藩吳之茂進寇秦州連營數十里相爲聲  
援公提軍橫塞其衝推鋒陷陣設奇擣虛屢戰克捷賊眾數萬坏  
散瓦解 上嘉公功 特授陝西平涼提督公方欲進勦平涼會  
通渭告急公選輕騎千餘救之遂定通渭復靜甯斷逆提臂指之  
勢而平涼迺下是時逆孽復聚樂門公進兵疾擊賊大潰奔漢中  
而慶陽環縣諸寇無不撲滅隴右悉平公蓋全隴右以全秦而卽  
捍秦以捍天下百二山河隻手撐拄使賊不得軼出以窺關中公  
之功也捷 聞 特晉奮威將軍阿思哈尼哈番之秩公旣平隴  
右遂謀復漢興適賊犯寶雞公命長君總鎮公潛襲利橋拔賊營

二處乃山連雲縣出鳳縣復夾攻之連破賊七營直抵武關公偪  
關下寨牽制賊勢潛以皮筏渡江攻其前命長君帥精卒出武曲  
鋪以攻其後賊腹背受敵夜半破關乘勢直趨漢中賊帥王屏藩  
等望風宵遁更策應興安悉降城固西鄉石泉漢陰諸縣賊遂復  
漢興 上益嘉公功親灑 宸翰遣內閣大臣馳 賜之復 命  
公會兵收取保甯公率眾鼓勇進奪朝天關取廣元拔昭化命慶  
陽副將楊宗道由左道取劍州劍門長君由右道直抄保甯錦屏  
山後縱火焚賊營公率大軍繼之並力合擊軍聲大振賊方倚山  
據江與我軍相持公從瓦子灘渡江直偪西南立寨斷賊餉道賊  
悉眾出戰我兵三路迎敵公同長君次君率輕騎往來策應左右

衝突賊眾抄靡追至錦屏山連拔四營公親奪浮橋直偪保甯城  
下長君斬門而入賊潰不支王屏藩窘急自縊生擒吳之茂以下  
僞將二十餘人尋遣次君及諸部將分道四出西取潼川東取渝  
城諸州縣而全蜀底定是役也公每戰輒令長君爲前驅以當勍  
敵而長君能奮勇決戰故所向有功 上聞而特授爲松潘總鎮  
並遣內大臣至軍中 賜公彤弓駿馬旋加授世襲精奇尼哈番  
及長君齋奏入 覲 上勞問再三 賜賚稠疊 陛辭時復解  
御刀授之曰此朕所佩者今以賜爾父殺賊會公疾作奉 旨暫  
回固原調理改長君爲固原總鎮率師進征而蜀寇譚洪彭時享  
乘機復叛 上亟命公鎮守巴蜀公力疾馳赴保甯開示方略分

兵勦捕賊黨悉平公以單軍蔽遮險要保秦蜀以蹙滇黔遂使凶渠授首羣孽埽除厥功懋焉班師凱旋奉 詔馳驛陛見甫近京欽使郊迎及入 覲 溫綸獎勞謁 陵後晨夕入朝 上親臨賜宴笑語極歡 太皇太后及 皇太子俱賜宴內廷令近侍勸將軍醉 陛辭日 命列公名於內大臣之班又遣內閣大臣設供帳祖道都門外公之奇功偉績冠絕一時而 皇上之篤念功臣殊恩異數亦近今所未有也凡公之陳師鞠旅所向無前者大約立心以忠臨敵以勇而制勝以奇越嶺浮河裹氈縛筏捲甲霧朝銜枚雪夜其出兵之日馬首是視萬騎無聲往往乘敵人所不覺及覺而已魂驚氣奪扣鞍擊地以爲將軍從天而下也方事之



殷也三叛連衡如燎原之不可嚮邇封疆大臣建高牙擁大纛者  
往往臨難回易俯張無措其閒首鼠兩端陰陽觀望者亦閒有其  
人賴 皇上聖度優容記功忘過保全始終亦云幸矣惟公奮不  
顧身以赴 國家之急誓心天地必不與賊俱生其精忠義勇足  
貫日月而格幽明古所謂熊羆之將不二心之臣惟公足以當之  
且父子僇力身親百戰總鎮公兄弟英姿壯略並有父風陷陣攻  
堅冠出諸將如李西平之有愨聽曹武惠之有璨璋代著勳庸爲  
國屏翰 皇上嘉公之績念公之忠所以厚其子孫者甯有涯哉  
公生而瓌異長身鐵面鷲勇絕倫精騎射諳韜略弱冠從軍隨征  
河西叛回有功題敘守備洎從經略右標提督張公討巨寇李定

國破賊兵於十萬谿擢經略右標中營遊擊後張公提督全滇改授公爲提標右營遊擊康熙二年西夾海魯狂逞張公奉命提督甘肅以公素諳邊情特題爲甘肅提標左營遊擊值魯眾墮突公出師大創之狼狽遁去總督莫公疏薦擢洪水營參將洪水偪近魯巢自公莅任不敢復擾邊境乃叩京輸款乞住牧大草灘地上遣親臣往視形勢且命督撫提鎮詳議行止公力持不可事得寢因城永固新城擢公副總兵駐守彈壓焉明年詔公入朝既見條奏邊事甚悉上大悅特授爲西甯總兵官公銜命出都甫至湟中而滇黔之變作遂以芟除逆亂建立殊勳蓋禦侮折衝急公赴難天資忠孝鬱而大發其素所蓄積然也公諱進寶

字顯吾固原人繫籍靖遠衛先世皆不仕有隱德以公貴 贈三  
代皆如其官妣以上俱 贈一品夫人公之 陛見而歸也以病  
乞休 上遣御醫診視並 諭長君自晉陽歸省旋移鎮甘肅  
特授公次子爲侍衛乙丑八月公以疾薨 上爲之震悼加 贈  
太子太保諡忠勇祭葬優恤備禮有加公生於前丙寅薨於康熙  
乙丑年六十元配孫氏 誥封一品夫人子五人長用予鎮守甘  
肅總兵官右都督世襲拖沙喇哈番次用賓 御前侍衛次用佐  
用卿用相俱幼女二人余自公癸丑 陛見識公於 朝見其姿  
貌雄偉歎爲不凡公立功秦蜀余適備位中樞運籌決策之奇戰  
勝攻取之略羽書告捷知之最詳公之歿也兩嗣君寓書於余以

隧道之碑爲請嗚呼余何敢辭爲之銘曰

於皇聖代武功蔑加聿生俊傑爲國爪牙桓桓將軍萬人之敵  
西賊膽寒宣威沙磧滇黔首蠢煽動三方惟秦與蜀若彼沸羹將  
軍威奮義形於色誓提一旅戢此反側如雷如霆如虎如熊迅掃  
隴右疾擊閩中豈無擁兵中懷瞻顧公獨毅然捲甲急赴螳臂旣  
斷鳩巢復傾執訊獲醜獻諸闕廷乃奠雍梁乃靖巴夔帝曰  
懋哉惟爾之績宸章特賁勳爵是崇弓矢車馬用錫殊庸晝日  
三接笑語式燕湛露蓼蕭以覺報宴將軍有子克濟厥美舉旗斬  
關功出儕比出專閫外入侍旄頭誰其似之絳侯條侯何天不弔  
龍蛇歲禍井鬼之墟將星忽墮訃音上奏愴悼輟朝褻終備禮卹

國朝通志卷之三十三  
聖  
典孔昭樂樂豕君金革無避籲天陳情得申禮制行號泣血見星  
恩恩家聲勿替曰孝曰忠猗歟將軍功在社稷銘於太常載諸方  
策豐碑嶙峋宰木傑虎深刻大書用垂信史

右神道碑王吉武代某撰

惠定宇精華注載王奮威進寶之下保甯賊將據邑不降公披襟  
曰何不射我賊眾愕然公因說以順逆賊人開關延入井里不驚  
曰此仁義將軍也近閱唐書馬北平之下長春宮賊亦引弓不射  
王知有降意因令其西拜朝廷賊人因斬李懷光以降古今名將  
之相同也若此

右錄宗室昭榘撰

康熙初陝西提督王進寶保奏其子王用子材武可勝副將嗣大軍進恢漢中進寶遣用子前驅繞出武關後與大軍夾攻奪險而前所向無敵遂抵保甯擒渠殲敵 詔擢用子松潘鎮總兵父子同建節鉞雍正元年雲南總兵趙坤擢貴州提督 陛辭日請以其子候補參將趙秉鐸補貴州提標參將 上允所請三年冬調湖廣提督四年二月復 特命坤子秉鐸調湖廣提標參將此固由 兩聖人度外用人推心置腹而進寶坤以一介武夫公忠質懇儼有祁奚舉子之風宜其起家卒伍卓立邊功也

右紀聞陳康祺撰

日本書紀卷之三十一

三十一

達克薩哈

達克薩哈姓賽密勒氏世居黑龍江會祖塔馨塔 太祖高皇帝時來歸隸滿洲鑲白旗達克薩哈初爲護軍校隨征明錦州甯遠有功擢前鋒侍衛 世祖章皇帝順治六年睿親王多爾袞討叛鎮姜瓖以紅衣礮攻渾源州城達克薩哈乘城毀處先登克之十五年隨信郡王多尼征貴州明桂王朱由榔使其將李定國白文選祁三省擁眾萬餘自雞公背迎戰敗潰達克薩哈率本旗前鋒乘勝追擊至畢節縣蹙之響水河橋斬級甚眾進攻七星關敗白文選拒戰兵十六年大軍克雲南城朱由榔遁永昌分軍追勦達克薩哈先驅至普洱挫賊眾生擒十一人抵玉龍關復擊敗白文



選兵李定國潛設伏於磨盤山犯我後軍達克薩哈返軍力戰敗之又同前鋒統領白爾赫圖破賊木柵擒斬竇名望捷 聞賚白金裘馬十八年隨定西將軍愛星阿進剿朱由榔至緬甸緬人執由榔以獻師旋敘功 予騎都尉世職 聖祖仁皇帝康熙十年授護軍參領旋調前鋒參領十三年隨信郡王鄂扎征察哈爾布爾尼師至達祿布爾尼伏兵二百從山谷間突出犯我師達克薩哈禦戰卻賊布爾尼旋整眾三千餘迎戰達克薩哈率入旗前鋒擊敗其中隊布爾尼復收合潰兵踞山岡列火器以拒達克薩哈奮勇衝擊賊潰遁敘功晉世職三等輕車都尉二十年擢鑲白旗蒙古副都統二十二年調本旗滿洲副都統尋以年老致仕二十

四年卒 賜祭葬如典禮子達賴襲職

右 國史館本傳

同身者从共省不米

三

恭圖 子濟星 魏拉

恭圖滿洲正藍旗人姓兆佳氏康熙四年由閒散授世管佐領六年補安親王府長史九年授參領十二年擢本旗蒙古副都統十四年大兵勦吳三桂 詔恭圖統領蒙古兵駐防河南尋 命率師至荊州十五年三月隨鎮安將軍噶爾漢攻南漳縣之靈機寨焚賊營賊三千餘迎敵擊敗之得 旨嘉獎十六年十月同征南將軍穆占率兵赴安親王岳樂軍於長沙十八年隨征武岡州賊帥吳國貴馬寶擁兵二萬四千踞隘口恭圖偕副都統伊巴漢等攻之三晝夜礮斃吳國貴追至楓木嶺之木瓜橋賊眾悉潰十九年調滿洲副都統二十年隨大將軍貝子彰泰進兵雲貴時僞將

軍線絨據廣西州遇我兵奮擊賊潰遁恭圖追至蠟茄坡再戰復  
敗之恢復新興所普安州二城復隨大軍敗賊將胡國柄於歸化  
寺雲南平還京二十三年議政王大臣遵 旨甄別都統副都統  
等官以恭圖不能彈壓所屬議革職得 旨恭圖前曾奏請休致  
不可列眾人中黜退可仍畱原任二十四年因病解任尋卒於家  
賜祭葬如例次子濟星由筆帖式擢頭等侍衛康熙三十一年授  
參領坐兄託合齊罪革職五十九年授佐領雍正元年授散騎郎  
三年正月遷正藍旗漢軍副都統二月遷鑲白旗護軍統領四月  
署正藍旗滿洲都統四年正月卒四子魏拉初由佐領遷參領雍  
正五年擢正藍旗漢軍副都統六年遷護軍統領八年署正白旗

漢軍都統九年遷正白旗蒙古都統十一年坐不能約束其子佐  
領那泰貪婪革職乾隆四年五月卒

右 國史館本傳

國朝三才圖會卷之三十三

三

耿昭忠 弟聚忠

耿昭忠漢軍正黃旗人耿繼茂次子幼隨父於鎮所順治十一年繼茂奏遣長子精忠偕昭忠入侍並授爵一等子命以饒餘親王阿巴泰女孫妻昭忠封多羅額駙復晉秩視和碩額駙加太子太保康熙十三年精忠據福建反詔拘禁昭忠及其弟聚忠十四年上念昭忠聚忠未與精忠同謀贖之復秩如舊十五年精忠歸順隨大軍勦海賊詔授昭忠鎮平將軍駐福州代精忠理藩務十六年藩下參領徐鴻弼等首精忠歸順後尙蓄逆謀昭忠據以聞並指劾助逆會養性十餘人上畱疏於中十七年精忠還福州昭忠遵旨攜其祖父骸骨歸葬蓋平十九年八月



昭忠疏劾精忠謂前此徐鴻弼等首告罪狀皆實乞 敕法司勘  
治疏下廷議如所請逮訊精忠磔死籍沒昭忠聚忠應連坐以其  
曾疏劾精忠 予免議二十五年正月昭忠卒 諭部議卹 賜  
祭葬如內大臣例諡曰勤僖聚忠者繼茂第三子順治十三年繼  
茂奏遣人侍尙公主 封和碩額駙加太子太保康熙十四年奉  
命招精忠降精忠拒不納仍齋 敕以歸後與昭忠同時疏劾精  
忠其略曰逆賊耿精忠背 恩反叛臣等同氣法應連坐蒙 念  
及臣祖仲明臣父繼茂兩世微勞 特予寬貰 遣臣齋 敕招  
撫精忠豈知其頑負固抗逆不悛臣疾首痛心恨弗食其肉幸  
天威赫濯大兵入閩精忠力竭勢窮復戕害總督范承謨既其親

屬數十人委積屍骸道路慘目當此魂遊釜底猶然肆毒不休若  
使一隙可爲更不知若何螳逞尙邀 皇仁矜宥復爵如初願蒙  
面偷生擁兵觀望泣思臣祖臣父及精忠荷 三朝厚恩世受王  
爵雖捐糜頂踵難酬萬一乃精忠逆天肆志糾眾反戈臣母周氏  
哭阻不從致偪殞命且誣臣祖與逆賊吳三桂在山海關時曾有  
成約是不獨貽禍手足所弗顧卽祖父亦視若仇讐忍心賊陷臣  
念及此義不俱生今精忠將至 闕下乞 賜顯戮播告中外以  
爲亂臣賊子戒疏入下法司議行尋 命聚忠赴福州密籌遷移  
藩兵事聚忠至福州以藩兵皆可遷移覆奏得 旨遂奉 詔攜  
精忠家屬還京二十年同昭忠奏言家屬眾多艱於養贍請如漢

軍例披甲食糧部議如所請編爲五佐領隸正黃旗漢軍二十六  
年二月聚忠卒 諭部議卹與昭忠同諡曰愨敏

右 國史館本傳

漢制殿陛之下執戟而衛者以千數所謂三署郎也分領之司雖  
有五官左右中郎將而實總於光祿勳一人故九卿皆處外朝而  
光祿勳獨以中朝稱蓋因其職在殿中特優之爾 本朝侍衛之  
設彷彿三署郎之制然有差等而無統屬其事爲稍異耿公以異  
姓諸王子之貴加之額駙之親自順治十一年入侍 闕廷洊膺  
世祖章皇帝暨 今上皇帝寵遇之厚賞賚頻數而公奉職尤勤  
慎威儀進止皆有常度卽一等公侯大臣亦相與則而效之以是

恩澤子弟中聲籍甚不幸家門構逆閩方煽亂公自分當死日與弟姪輩泥首闕下伏地請舉謂亂臣賊子出臣同產從坐之律所不敢辭上素知公忠謹無他僅令頌繫於家以需後命既而蒙恩寬宥盡復其官比王師屢捷構逆者懼而思戢廷議急遣一人入收藩下軍上念逆臣背叛久失軍心而兩王恩澤在人非親子弟莫可將者爰命公爲鎮平將軍兼參贊大將軍機務廷賜貂蟒諸御服而遣之太皇太后以戚屬故又內出白金酒醪畀公爲諸軍賜公馳驛南發旣至宣上所以寬貸諸吏士之意並頒所賜物以撫之一時懼聲雷動莫不幸公之來而復恨見公之晚也公察將吏無異心申約束歸各省難民子女以數萬計

其他息境安民諸政次第修舉時劉進忠據潮州韓大任寇吉安樂燦亦擁眾數萬跳梁宜黃山中其地皆與閩接首鼠觀望未肯下公設法招徠諭以朝廷威德不數月望風送款鄰境悉平獨海氛未戢由海澄直犯泉州羽書日數至而會城精銳四出絕無可應之者公曰泉與興爲福州屏蔽無泉是無會城也吾甯可坐視耶亟簡藩下餘丁數百人授以資糧器甲俾親將陳紀統之而前賊見公旗號輒駭愕遁去泉賴以全事聞上壯公甚願不欲久暴公於外驛書召還方公之頌繫也以前先王兆域在閩慮底定之日或不能無侵越之者所乞垂恤舊勳保全返葬上憐而許之至是始得奉兩世遺骸歸窀穸於蓋平云公技勇猷略超

邁絕倫又雅擅文章工藝事所居圖書鼎彝照耀几席鑒別不爽  
銖黍與人言依於名理疊疊終日不倦客有引古而誤者未嘗遽  
正之必婉轉議論誦成文以相質使人心折旁及書法繪事琴奕  
箏筑篪筮捕博之類往往精詣至於敦念故舊虛己下賢拯困救  
難汲汲如不及卽千金列駟贈之不惜也自閩歸 上念公兄弟  
家口眾多或不能給爲拔置佐領五人以統之俾得資其祿入以  
自養蓋尤異數云公諱昭忠字信公號在良由多羅額駙加太子  
少保和碩額駙品級晉太子少師再晉太子太保授光祿大夫世  
籍山東後徙遼東蓋州祖諱仲明自癸酉歸 朝 封懷順王入  
關改 封靖南王考諱繼茂有文武才嗣 封靖南王平西粵功

最薨諡忠敏妣周氏 封靖南王妃王氏 贈靖南王夫人公生  
於崇德庚辰二月卒於康熙丙寅正月得年四十有七公之疾也  
上特遣侍臣將御醫就家製珍藥所以救之者百方及訃 聞震  
悼雪涕侍衛大臣奉 命賻酌者再至既殯 諭祭易名有加常  
等元配多羅縣主 世祖章皇帝所賜昏也秉性淑慎先公二十  
三年卒繼配喻氏 封一品夫人子嘉祚候補某官明年嘉祚將  
啟縣主西山妙峯之寔奉公柩合葬於唐縣金蓋山新阡先期屬  
叔父額駙公請銘於余銘曰

山出器車河馬圖盛世所產皆璠璣猗嗟靖南起東隅翊戴 聖  
人清坤輿碧梧翠竹滿庭除時值偃武敦詩書進以恭恪嚴周虛

退則揖讓友士夫擇言而發揮地趨郭晞李愿洵其徒彼弄兵者  
膏王鉄公壽未老名不渝丸丸松柏映繩趺千秋忠孝垂令模

右墓誌銘徐乾學撰



巨野書院新刊宋本國朝名臣言行錄

三

國朝書獻類徵初編卷二百七十四目錄

將帥十四

塔勒岱

伊巴罕

瑚圖

沙納哈

坤

宏世祿

賽喀納

趙國祚子珙

侯襲爵

石調聲

噶爾漢

瑪哈達

楊捷

覺羅武默納

萬正色

沃申

補錄

楊捷



國朝耆獻類徵初編卷二百七十四

通奉大夫前署江西巡撫江西布政使司布政使湘陰李桓輯  
將帥十四

塔勒岱

塔勒岱滿洲鑲白旗人姓博和哩氏先世居黑龍江祖額徵古

太宗文皇帝天聰時來歸塔勒岱初任前鋒校 聖祖仁皇帝康

熙元年隨定西將軍愛星阿由雲南入緬甸追擒明桂王朱由榔  
在事有功十年授前鋒侍衛十三年逆藩吳三桂之黨譚洪吳之  
茂王屏藩等踞四川塔勒岱隨前鋒統領穆占勦賊於野狐嶺賊  
以千餘眾伏林箐出步騎百餘誘戰塔勒岱先眾迎擊敗賊盡發

其伏分隊撲勦賊俱竄走復擊敗僞總兵葉某於陽平關進征保甯僞總兵鄭歪嘴吳應龍韓天福等先後率眾水陸來犯咸擊卻之自蟠龍山還至郿嶺及龍潭驛兩遇賊眾並邀擊之潰遁敘功予雲騎尉世職值陝西提督王輔臣叛討秦州平涼塔勒岱隨穆占征勦敗僞總兵高鼎於隴州進圍秦州擊賊兵之自平涼保甯來援者秦州既下遂趨平涼屢擊敗迎戰賊眾十五年王輔臣降吳三桂尙踞湖南穆占奉 詔爲征南將軍移師湖南塔勒岱率兵隨十七年駐師攸縣賊將王國佐屢率眾犯城塔勒岱戰卻之復敗僞總兵黃士彪裘萬寶於鄒縣桂陽州諸處十八年敗賊將吳國貴吳應麒等於永州沅州凱旋授護軍參領二十年調前鋒

參領二十三年擢前鋒統領二十四年擢鑲白旗蒙古都統彙敘  
陝西湖南軍功晉世職爲騎都尉兼一雲騎尉二十五年七月卒  
賜祭葬如典禮諡勇壯子奇蘭布襲職

右 國史館本傳

圖書集成  
卷一百一十五

## 伊巴罕

伊巴罕滿洲正白旗人姓格濟勒氏世居雅蘭其伯父舒珠於天聰八年隨副都統薩木什喀巴奇蘭征黑龍江有功 予騎都尉世職卒無子以伊巴罕襲伊巴罕初授三等侍衛旋任刑部郎中兼佐領順治七年九月三遇 恩詔晉世職至二等輕車都尉十八年署參領隨定西將軍愛星阿征明桂王朱由榔至緬甸緬人執由榔以獻康熙十四年在護軍參領隨定南將軍希爾根討逆藩耿精忠至江西偽都督易天錫據建昌府城伊巴罕率兵進攻大敗賊旣而撫州賊悉趨援建昌伊巴罕奮戰卻賊復擊敗偽將軍邵連登偽總兵李茂珠等拒戰賊眾尋與護軍統領桑額攻復



新昌縣擒斬僞總兵朱一典及賊黨無算十五年擢正白旗蒙古  
都統隨安親王岳樂討逆藩吳三桂擊敗其僞將軍夏國相等復  
葺鄉縣十八年隨征南將軍穆占討三桂孫世璠自衡州進征武  
岡賊將胡國柱以二萬眾踞楓木嶺拒戰伊巴罕率本旗兵奮擊  
大破之十九年擢前鋒統領二十二年遷盛京將軍二十四年  
召還仍授前鋒統領二十五年敘前隨征江西湖廣軍功晉世職  
爲一等輕車都尉兼一雲騎尉後以年老乞休尋卒子蘇克住改  
襲三等輕車都尉

右 國史館本傳

瑚圖

瑚圖滿洲鑲白旗人姓洪鄂氏順治十二年以護軍校隨甯南靖寇大將軍陳泰出師湖南敗明桂王將盧明臣馮雙禮於岳州武昌十七年隨安南將軍洛託赴福建敗海賊鄭成功於廈門康熙二年授駐防江甯協領八年擢江甯副都統十三年逆藩耿精忠叛上命瑚圖同副都統瑪哈達率所部赴杭州與將軍圖喇計兵事尋以賴塔爲平南將軍瑚圖參其軍務八年僞將軍馬九玉遣其將胡錦等犯衢州至石梁瑚圖與副將王廷梅李承恩分路迎擊賊潰奔崖山進圍之擒錦時賊黨小林別駐大溝源乘勝進擊大敗之十月僞將馬四等率賊眾一由江山至錢塘一由處州

至林山謀犯衢州瑚圖分兵東西夾攻陣斬僞將范安國王太頂等已而僞將周列桑明率眾三萬屯焦園紅橋等處分路擊之連破賊眾斬萬餘級十四年三月九玉擁眾屯衢州西南夜渡水犯我營賴塔令瑚圖廷梅往擊之敗諸杭埠斬殺甚眾餘賊多溺死八月九玉遣其將李廷桂率賊七千營於衢州北元口村設木城絕官軍糧道並據東西山爲聲援瑚圖分兵擊敗兩山賊夜衝賊營焚其木城賊敗遁十五年八月官兵破賊於大溪灘復江山縣九玉走常山瑚圖追之賊拒戰又敗之進圍常山賊夜開西門遁追至江西玉山界賊大潰斬獲無算復常山縣進克仙霞界拔浦城精忠窮蹙詣康親王傑書軍門降瑚圖隨軍駐福州十一月海

逆鄭錦將徐耀率眾三萬至烏龍江南營於小門直鳳諸山謀犯福州康親王傑書遣瑚圖同總兵董大來夾擊破賊營十四賊遁追四十餘里尋以瑚圖防守泉州十六年三月泉州城內外土賊四起瑚圖遣將領水陸分剿盡殪之十月南安縣賊陳式陳角等樹旗揚言欲犯泉州瑚圖令營長張廷輔副將朱起龍分擊敗之斬陳角先是漳泉多寇南安賊首李復貴同安賊首朱寅各據高山句海逆乘機剽掠康親王傑書令提督段應舉同瑚圖分路進剿擒復貴及寅之僞軍師林日向等至是寅復犯陽坑小黃山瑚圖與三等台吉查渾副都統鄔爾根追擊之三戰皆捷殺賊千餘斬僞將謝良楊德瑚圖尋駐漳州十七年二月海逆陷石瑪偪海

澄瑚圖同海澄公黃芳世副都統孟安應援敗賊於彎腰樹奪金門山進至觀音山賊陳福陳仁來拒擊敗之賊奔下澗追之斬偽將洪結賊收餘黨於石瑪築壘拒官軍三月賊船二百餘乘潮至壘中賊復出列相表裏瑚圖與芳世安營令海澄總兵官黃藍潛師夾攻陣斬偽將朱成高榮等十一人沈賊船九賊仍遁入壘海澄圍解時官兵俱屯海澄石瑪漳州兵少瑚圖同總督郎廷相晝夜防守忽海逆連船數百乘虛突犯入東關擊以礮賊敗退復益船擁眾至且旬山賊蔡寅由天寶山斷我糧道瑚圖親督戰焚其船賊仍不退閏三月芳世自海澄以兵來援大破賊眾寅始遁去時海逆劉國軒吳淑等復破海澄陷長泰糧道復阻賴塔令瑚圖

帶甲八百防守要路九月淑率賊萬餘徧漳城國軒營對河爲犄角城內兵少適副都統沃申率兵千餘來援瑚圖隨賴塔分路剿至蔗林遇伏我兵小卻斬退者三人我兵奮進遂破賊陣連拔其營十六殺賊過半賊退據長泰謀犯南靖我兵分二隊近城列營蜈蚣山瑚圖沃申力戰自辰至未賊大敗棄營走斬賊將鄭英何觀及賊眾四千餘復長泰城賊退據江東橋橋爲漳泉往來要道十月賴塔營橋西令瑚圖同沃申提督石調聲取橋東岸乃由長泰繞道越朝天嶺過龍江口深入賊巢賊以礮迎敵瑚圖等奮勇衝擊賊棄寨奔船據橋口急擊之賊奔出江遂通漳泉路十八年二月賊設伏四山來誘我戰瑚圖同副都統雅達里分兵突至山

下伏盡起瑚圖等力戰不退賊大敗奔據玉洲觀音山各寨十月  
賊屯鼇頭山規江東橋欲斷我路我兵四路迎勦瑚圖與副都統  
瑪思文爲一路擊敗之十九年三月我兵分路勦賊瑚圖攻克玉  
洲各寨賊戰敗竄廈門遂復海澄四月賊江欽等糾黨連舩竄踞  
廣東達濠島瑚圖隨賴塔至潮州沿海督勦水陸並進賊退乘勝  
取磊石門賊來爭復擊敗之又遇我水師夾攻賊大潰遁出外大  
洋尋聞粵平定瑚圖回江甯任二十三年十一月 上南巡 駐  
蹕江甯 賜瑚圖蟒袍一十二月擢杭州將軍二十六年三月卒  
於官得一 旨瑚圖才品優長殫心盡職效力行閒勞績茂著及授  
杭州將軍復能和輯兵民不干預地方事務行止清慎克盡厥職

著從優議卹尋議祭葬如例 特旨加祭一次諡敏恪

右 國史館本傳

清國史館本傳 卷一百一十四 將帥十四



國朝文獻通考卷二百一十四

沙納哈

沙納哈滿洲正黃旗人伊爾根覺羅氏 世祖章皇帝順治六年  
由閒散隨敬謹親王尼堪討大同叛鎮姜瓖攻克左衛城先登功  
第一 賜號巴圖魯 予騎都尉世職九年遇 恩詔加一雲騎  
尉十三年署參領隨甯海大將軍伊爾德征浙江舟山至定海縣  
同副都統根特擊敗僞英毅伯阮思等僞總制陳六御率眾來犯  
沙納哈同副都統柯永綦擊卻之追至衡水洋斬六御等遂取舟  
山十四年九月敘功晉世職三等輕車都尉十六年海賊鄭成功  
犯江甯沙納哈隨安南將軍達素等往征比至賊已遁移師福建  
十七年由同安剿賊於廈門沙納哈仍署參領率兵爲前隊乘船

進勦失利面項中三矢退回尋還京 聖祖仁皇帝康熙元年論  
廈門水戰捨舟登陸罪應革巴圖魯號及三等輕車都尉以受傷  
重免籍沒鞭責得 旨給還騎都尉四年授駐防西安佐領九年  
三月尙書科爾擴岱侍郎達哈塔等奉 命閱大草灘邊界至西  
安沙納哈呈告自十六歲披甲十九歲從征大同得功後屢署參  
領因獲罪降職不得照原品補用乞代請回京遇出征之處效力  
科爾擴岱等以奏下部議准令還京十年二月授參領十三年三  
月逆藩耿精忠叛應吳三桂沙納哈時隨大軍駐防克州 詔移  
軍江西沙納哈兼署前鋒參領七月耿逆僞都督易明引賊四萬  
餘犯撫州沙納哈領右翼前鋒兵合諸軍擊之斬賊二千有奇九

月賊自建昌府來犯定南將軍蘇爾根令率前鋒兵百會兩藍旗兵擊賊斬獲甚多十月叛鎮楊富之弟僞將軍楊三盤踞許灣之僞總兵李茂著合賊萬餘掠撫州平寇將軍哈爾噶齊令沙納哈領八旗前鋒兵同護軍統領瓦岱等進攻斬級四千餘楊三李茂著俱中箭溺水死十四年正月隨安親王岳樂進兵瑞州時賊陷上高賊眾萬五千距瑞州之會浦沙納哈率領隊兵同護軍統領桑額奮擊之追奔二十餘里生擒僞官十餘賊兵百餘斬僞總兵朱一典謝以泰及僞軍師李姓滕姓等恢復上高僞都督阮國棟率二萬餘賊距新昌縣北山沙納哈同諸將進剿斬賊四千擒僞副將參將各一千總三及賊兵五十餘新昌亦平十五年二月安

親王勦吳三桂之僞將軍夏國相李良棟等於袁州之萍鄉縣賊距城東來龍山高阜立寨十掘壕築壘以待大兵分四隊環攻賊潰敗沙納哈率前鋒兵截殺之賊兵一萬三千得脫者僅四百國相等尋棄印割軍械而遁十八年二月進兵湖南湘潭縣賊望風卻走復其城三月遷正黃旗蒙古副都統七月擢前鋒統領八月夏國相偕賊黨吳國貴王永清王宏勳等踞武岡州之雙井堡僞將軍馬寶張祖法等擁賊二萬四千與大軍相距沙納哈領前鋒兵三百進擊賊勢披靡追勦至楓木嶺賊皆遠竄二十年擊走僞將軍線絨於盤江西坡進征雲南駐營歸化寺逆孽吳世璠遣僞將軍劉元龍胡國柄等驅賊兵列象陣相抗沙納哈偕諸軍擊敗

之追至城下陣斬胡國柄劉玘龍及僞總兵九員生擒六百餘人  
是年雲南平隨大軍凱旋二十三年五月調護軍統領十二月擢  
正黃旗蒙古都統尋列議政大臣二十六年正月因病解任四月  
卒 賜祭葬如例子尙德襲騎都尉

右 國史館本傳

國朝書目類編卷一百一十四

十

坤

坤姓那木都魯氏先世居瓦爾喀之綏芬父伊訥克當 太宗文  
皇帝征瓦爾喀時先眾迎降遂挈家來歸隸滿洲正黃旗天聰八  
年授雲騎尉世職尋卒坤襲之洊擢一等侍衛兼管佐領事崇德  
六年從 上征錦州圍松山城明總兵曹變蛟集眾乘夜犯 御  
營突衝正黃旗營門諸侍衛及親軍等皆散列門左右坤獨立門  
中力戰卻敵 上嘉其勇敢 賜號巴圖魯 賚白金四百兩超  
晉一等輕車都尉世職 世祖章皇帝順治二年敘錄 太宗眷  
顧諸臣各予世職加坤一雲騎尉嗣屢遇 恩詔晉爵一等男兼  
一雲騎尉十年 上以坤嘗奉遣祭 昭陵辭不往扈 蹕南臺



不入直又擅取 賜配有屬之女子爲妻下內大臣鼐拜等議罪  
應死籍沒 詔從寬罷任仍畱一等男爵復一等侍衛十一年隨  
靖南將軍珠瑪喇征廣東署都統事時流賊張獻忠遺黨李定國  
附明桂王朱由榔自廣西犯廣東踞新會縣左之山谷坤率兵與  
諸軍合擊大破之追勦至橫州江岸斬賊無算敘功加一雲騎尉  
十五年授散秩大臣尋擢內大臣 聖祖仁皇帝康熙十二年  
諭獎久著勞績諸大臣加坤太子太保是年冬逆藩吳三桂反明  
年九月 詔以河南南地廣兵少恐奸黨乘閒竊發授坤振武將軍  
率兵駐防汝甯十二月陝西提督王輔臣叛於甯羗踞秦州 詔  
坤移兵赴西安十四年正月 詔同副都統翁愛等進守漢中先

是定西大將軍貝勒洞鄂由漢中進勦保甯聞王輔臣叛還西安  
令將軍席卜臣等率兵二千守漢中至是輔臣糾叛黨毀鳳縣之  
偏橋阻我餉運復截踞棧道斷漢中聲援坤以疏聞諭趣開  
棧道以援漢中軍進次寶雞因道阻駐兵詔罷坤將軍任以內  
大臣畱貝勒洞鄂軍供調遣六月大軍復秦州坤同將軍佛尼埒  
追勦賊眾連戰皆捷遂復禮縣清水伏羌西河等城時席卜臣等  
因漢中乏餉不能守率兵乘閒還西安十七年詔趣大軍規復  
漢中以坤同副都統馬一豹等守潼關十八年因坤年老召還  
京二十三年議政王大臣等追論坤奉命援漢中頓兵不進雖  
有勞績未足抵罪應罷黜官爵及加銜並削巴圖魯號上曰巴

圖魯號 太宗文皇帝所賜其勿削並留一等輕車都尉世職二十  
十四年 上念坤宣力有年雖軍中獲罪事非由己起授散秩大  
臣並 諭以年已衰邁如不能入朝聽其家居二十六年卒 賜  
祭葬如例孫顯圖襲世職

右 國史館本傳

宏世祿

宏世祿滿洲鑲紅旗人姓瓜爾佳氏世居瓦爾喀祖噶錫屯 太祖時率族眾來歸管佐領順治十一年十一月宏世祿由佐領授護軍參領十八年隨定西將軍愛星阿出征雲南獲明桂王朱由榔於緬甸阿瓦城康熙三年二月敘功授雲騎尉十二年二月擢鑲紅旗蒙古副都統十四年三月撫遠大將軍信郡王鄂札副將軍圖海等勦察哈爾布爾尼 命宏世祿偕護軍統領哈克山副都統烏丹參贊軍務四月大軍薄達祿賊壘布爾尼設伏山谷擁眾三千餘拒戰宏世祿率右翼兵與哈克山烏丹等進攻伏發銳卒繼至我師合擊殲之布爾尼悉眾出列火器拒戰宏世祿等縱

兵分擊大敗之賊復收潰眾拒山岡我軍射卻之分路掩殺無算  
布爾尼以三十騎遁師還敘功加三等輕車都尉十五年三月調  
滿洲副都統十九年三月逆擊吳世璠踞雲貴同都統瑪奇趙璉  
副都統祖植椿率兵往廣西參贊大將軍賴塔軍務二十年正月  
僞將軍何繼祖擁賊眾萬餘距安籠所三十里堅據石門坎賴塔  
令都統勒貝等率兵前進宏世祿與副都統赫埒布總督金光祖  
分兵二隊繼之大敗賊眾奪石門坎隘口恢復安籠所城二月僞  
將軍詹養王有功張光先等九人據黃草壩我師分隊進擊宏世  
祿率頭隊兵直進自卯至未擒斬賊千二百有奇乘勝自由靖迅  
馳恢復馬龍州易龍所楊林城時有賊屯板橋之渾水塘及嵩明

州城相爲犄角宏世祿遣營總顧塔幹都海等率兵往攻嵩明州克之渾水塘賊聞風棄營夜遁進軍歸化寺十一月世璠自殺雲南平軍旋復管佐領二十三年八月議政大臣等遵 旨甄別八旗大員以宏世祿庸劣不能彈壓下人請革職 上以宏世祿年老免其黜退尋以老病乞休 允之二十七年正月卒 賜祭葬如例子龍科襲職孫佛保由佐領署火器營總隨大軍平定西藏雍正二年 優敘給雲騎尉

右 國史館本傳

國朝通志卷一百七十四

志

賽喀納

賽喀納滿洲鑲白旗人姓布賽初任典儀 世祖章皇帝順治十四年授二等待衛尋擢一等待衛 聖祖仁皇帝康熙九年二月授護軍參領十四年三月察哈爾布爾尼叛 上命信郡王鄂扎爲撫遠大將軍大學士圖海爲副將軍討之賽喀納隨征師次達祿聞布爾尼以兵三千屯踞山後大兵緣山谷而進賊兵二百伏山溝突出衝犯賽喀納奮勇擊敗之遂進擊屯聚賊眾布爾尼散卻旋收集潰卒千餘排列烏槍接戰賽喀納擊敗其前隊賊遁踞山巔大軍分路並進賽喀納領隊扼其要隘斬獲甚多布爾尼逃奔扎魯特境之貴勒蘇台山後爲科爾沁右翼總管沙津射殪斬



首馳獻大軍凱旋敘功。子賽喀納雲騎尉世職二十一年十一月授鑲白旗蒙古副都統二十二年九月調鑲白旗滿洲副都統二十七年五月卒次子薩木齊喀襲職長子納齊喀初官內閣中書康熙四十五年十月隨大學士席哈納往湖南鞫訊容美土司田舜年私鑄擅殺罪狀還京轉典籍四十九年遷刑部主事五十二年遷本部員外郎時皇太子允礽護衛德麟獲罪其父阿哈占任福陵總管上命其自行拘禁德麟詐自縊死潛逃竄奉天將軍塘保住以奏上命選才幹司員賞給納齊喀員外郎舒琳往膠州捕獲之德麟伏誅納齊喀議敘卽升尋授兵部郎中五十四年辦事密本房五十七年任揚州權關監督期滿派往烏爾台養贖

歸附之烏梁海厄魯特事竣回兵部任兼佐領六十一年十月授山西布政使 世宗憲皇帝雍正元年正月擢湖北巡撫二年十二月疏言湖北州縣全食淮鹽近因生齒浩繁正慮食鹽不敷巴東縣與四川夔州府之巫山縣連界山峻路險商販罕至今縣北紙涪溪山中忽涌鹽泉試令煎熬日得鹽二千斤有奇計每歲可得七十萬餘斤請 敕部酌照淮鹽川鹽設引起課於 國計民生均有裨益事下部議令會同兩淮巡鹽御史詳酌以行三年二月疏言康熙二十九年截畱漕米六萬石分發近水州縣貯倉備賑已閱五載紅朽堪虞請於青黃不接時平糶以裕民食俟秋成後計所糶米一石可易穀二石如歲豐穀賤尙有贏餘一併還倉

積貯庶可經久疏上得 旨納齊喀奏請湖北各州縣所貯米石  
易穀存倉以爲經久之計具見實心辦事殊爲可嘉尋以疾奏請  
解任 詔總督楊宗仁暫署巡撫納齊喀給假調養俟疾痊任事  
遣太醫診視齋 賜珍藥及葠四斤五月卒年六十遺疏上得

旨納齊喀簡任巡撫敬慎自持實心任事忽聞溘逝朕心深爲軫  
惻下所司議卹部議納齊喀任巡撫未滿三年以致祭一次可否  
給半葬請 上命給全葬並 予諡勤恪

右 國史館本傳

趙國祚 子珙

趙國祚滿軍鑲紅旗人父一鶴 太祖高皇帝時來歸 太宗文  
皇帝天聰八年追敘各官投誠功 子三等輕車都尉世職尋卒  
國祚兄國正承襲崇德四年國祚管佐領事率漢軍屯田義州八  
年三月同護軍統領阿爾津等征黑龍江師還 賜貂皮白金九  
月隨鄭親王濟爾哈朗征明取前屯衛中後所二城 世祖章皇帝  
順治元年敘功 子雲騎尉世職尋管參領事隨豫親王多鐸  
南征攻克揚州府及嘉興府江陰縣敘功晉世職騎都尉八年授  
戶部理事官由參領擢鑲紅旗漢軍副都統尋遷都統屢遇 恩  
詔晉世職至二等輕車都尉十二年九月調鑲白旗漢軍都統十

二月授平南將軍駐防浙江十五年任浙江總督十六年二月海賊鄭成功犯温州國祚以督兵擊敗獲船九十餘疏報復言遣兵分勦永嘉泰順青田等縣土賊斬獲甚多尋又疏報鄭逆率眾十餘萬水路分踞盤石及樂清之沙園蒲岐官兵奮勇往勦賊乘船數千泛海遁城池全復行閒勞績應察明請敘得 旨覽所奏各官塘報賊船自遁止畱空城並無對敵實跡趙國祚輒稱城池全復希功請敘殊不合理下部察議降三級畱任五月疏報鄭逆率馬步賊兵由定關直逼甯波府城副都統夏景梅水師總兵常進功等率兵轉戰大捷賊船遠遁請 敕部敘功得 旨凡管兵各官報捷必臨陣斬獲若干獲馬匹器械若干攻克城池營壘若干

確實有據始可言功若泛言斬獲或城池失守賊去卽稱恢復皆係飾詞鋪張深爲可惡常見明末行間奏報輒云殺死無數獲器械無算掩敗爲功相爲欺罔以致誤國今乃仍踵陋習每多希功請敘儻沿習不改必致貽誤封疆著通行嚴飭以後再有此等奏報者定治以罔上冒功之罪不貸是月鄭成功寇江南旋陷鎮江犯江甯大兵禦擊月餘賊乃敗遁於是部議江浙管兵大員玩寇罪並追論國祚任駐防及任總督先後被賊陷平陽瑞安樂清太平等縣城防禦多疏應革任 詔從寬罰俸一年戴罪圖功自贖十八年六月奏請以台州温州甯波之道府廳及臨海永嘉鄞縣官並照邊例升轉 從之九月調山東總督十月調山西 聖祖

仁皇帝康熙元年甄別直省督撫國祚以過多功少解任十三年  
逆藩吳三桂反國祚請出征效力起爲江西提督駐九江尋以賊  
犯江西 上諭副都統根特率南昌駐防兵赴袁州國祚率兵移  
駐南昌時逆藩耿精忠叛應吳三桂遣賊黨犯江西陷廣信府及  
建昌國祚同定南將軍希爾根平寇將軍哈爾哈齊率兵征剿僞  
都督易明白建昌率賊萬餘迎戰大兵分道擊敗追剿七十餘里  
遂復撫州國祚同哈爾哈齊駐守易明復糾賊萬餘來犯國祚同  
前鋒統領沙納哈署護軍統領互岱等奮擊之殲賊四千有奇十  
四年大將軍安親王岳樂以趙國祚久歷行閒熟悉軍務疏請隨  
征 上允之十五年進兵長沙吳逆合眾來犯國祚擊卻之尋以

茶陵新復亟需重兵 詔國祚移兵駐茶陵安親王疏言長沙要地賊鋒難遏國祚未可遽離遂仍畱駐守十八年長沙賊平隨安親王赴寶慶敗賊於紫陽河賊將吳國貴踞武岡聞大兵至率眾二萬餘扼雙井堡隘口拒戰國祚同建義將軍林興珠大敗之國貴中礮死餘眾宵遁追至武岡州賊棄城遠竄國祚尋以創發乞休 允還京致仕二十七年九月卒年八十 賜祭葬如典禮諡敏壯子珙襲職三十四年由廣東駐防協領授鑲紅旗漢軍副都統三十五年 上親征噶爾丹 命珙率本旗火器營以從三十八年任京口右翼副都統四十四年擢正紅旗漢軍都統四十七年二月卒 賜祭葬如例珙所襲父職部議減去 恩詔晉加者改



爲騎都尉以珣之子世昂襲 上念趙國祚當征勦吳逆時著有  
勞績 命仍襲三等輕車都尉

右 國史館本傳

侯襲爵

侯襲爵漢軍鑲紅旗人順治六年七月管佐領八年閏二月授刑部理事官十年十二月擢廣東肇慶總兵官十二年正月總督李率泰以襲爵勇敢有爲約兵愛民疏請移駐德慶州要地兼轄羅定東安西甯三州縣十三年六月襲爵疏言鎮標左右兩營馬步兵原備征勦之用刀槍弓箭皆各營自備日久腐朽且所轄羅定東安西甯等州縣并肇慶城守水師營馬兵俱缺盜甲器械粵中山寇海氛不時竊發請一律制造以裨戰守又言向來各城守將備與有司官往往因小嫌互訐激成事端請 敕下撫按嚴加申飭並得 旨允行九月遣守備蔡忠光會勦懷集縣賊克松岡巢

國朝通志卷一百一十四  
寨生擒賊八人招撫僞崇陽王朱蘊鈴及賊渠李盛功等十一月  
羅定州賊羅成基與其黨蕭鼎李仲倫等踞州屬之雲致峒襲爵  
率標兵三千抵其巢連破三柵五寨成基創斃擒其僞中軍賴洪  
恩等鼎仲倫相繼就撫餘黨悉平十二月因病解任康熙四年七  
月補京口左路水師總兵官十六年十二月調廣東高雷總兵官  
十七年四月擢廣東提督七月海逆鄭錦犯泉州 上命靖南王  
耿精忠督餉侍郎達都等自潮州率兵赴閩解泉州圍襲爵與副  
都統尙之璋總兵馬三奇固守潮州十月疏言潮州密邇閩疆偏  
臨大海自經變亂水師船隻燬失兼以達濠南澳井洲諸島逆賊  
停泊爲巢與潮陽等處相隔帶水竄伺已非一日邇來寇犯福泉

各島句連眈眈思逞潮屬營汛多環山枕海道路寥闊鎮標額設  
兩營除派防要汛外在城兵僅三百餘名汛險兵單請復設潮州  
鎮標中營官兵五百餘員名大埔營官兵六百餘員名潮州水師  
總兵一員左右二營官兵一千餘員名以資彈壓 上允其請十  
二月海賊百餘艘突犯潮州之鋪前礮臺襲爵遣遊擊秦可京等  
水陸夾攻陣斬僞參將都司等五人首級二百餘生擒三十四人  
燬賊船二十八年二月海賊楊金目等犯山頭仔海岸襲爵遣  
副將蔡茂植等迎擊斬級千餘燬賊船三十賊奔潰茂植躍舟偪  
攻斬僞翼將賴武楊雄及賊黨二百餘生擒僞副將郭鳳杜開等  
九月疏報井洲島逆恃海爲險臣與鎮臣馬三奇議水陸夾剿秦

可京等由東路登井洲海岸分兵直衝賊寨破賊城二斬級五百餘焚賊巢七蔡茂植等率水師由西路抵井洲海面賊截港拒戰官兵奮擊沈賊船十二陣斬偽副將李棟林雄偽參將周武斬級五百餘乘勝登岸連燬賊營九賊敗遁適南澳海山等賊擁眾來援遂與秦可京等合師截殺焚賊船十四沈死者甚眾餘賊悉遁十月疏言臣標官兵原設馬二步八康熙十四年改爲馬一步九粵省幅員遼闊枕臨西粵密邇閩漳標兵有援剿四應之責況值海逆流寇互相出沒分頭策應非藉馬力曷克星馳撲剿請照督標例復爲馬二步八俟事平日議減下部議行時平南將軍賴塔等奏調廣東潮州碣石兩鎮舟師會剿海逆恢取廈門已得請十

二月襲爵疏言舟師會勦廈門不便有四閩省大船三百餘配兵  
三萬餘以當一路潮碣兩鎮額船共止船艚趕督十五可以出洋  
其餘皆係舳舻每船僅可配兵二十餘名均非駕駛出洋之船水  
軍又係新募未經操演何能獨當一路船小兵單勢難遠出閩海  
一也閩粵東西相距風信不同非比陸路可計日會合儻風濤阻  
滯彼此懸隔難以定期夾勦二也且達濠南澳諸逆密邇潮疆時  
竊窺伺門庭之寇未盡根株難以遠出會勦三也卽如達濠諸逆  
可期一鼓盪平而沿海逆賊尙有謝昌李積鳳等狂逞於廣肇高  
雷等處連舩飄忽與鄭逆聲氣聯絡儻乘虛突犯何憑堵禦難保  
必無他虞四也但今奉有 成命除已咨催兩鎮整理船兵外臣

目睹形勢若不據實披陳恐致貽誤得旨侯襲爵既言潮碣戰船難以出洋汛兵尙患不足宜停其調發可仍分撥舟師作進攻狀以分賊勢十九年四月疏報將軍賴塔統兵駐潮與臣會商進剿達濠海寇分撥滿漢官兵前至馬窖夾擊臣與賴塔親臨海口水陸齊進徑奔達濠海面賊首江欽邱輝等率船百餘出磊石門拒敵我舟師奮勇直前礮石如雨賊死命拒戰我陸路兵自後山衝下夾擊左右翼滿漢官兵飛馳接應擊敗逆賊沈賊船八奪賊船五生擒僞宣尉使洪磊及賊徒三十二名陣斬僞副將二賊勢披靡我兵奪取磊石門賊復糾船二百餘拒敵我兵轉戰愈力賊且戰且退將至馬窖海面水師總兵劉顯芳等督兵放礮夾攻又

擊沈賊船五淹死賊徒甚眾奪賊船三並器械等物餘賊遁出外洋救護難民一千三百餘名口五月疏報達濠既平南澳遊魂膽落臣與副都統張夢吉總兵劉顯芳領各標官兵水陸並進直抵南澳島口僞將軍李榮等賊艘六十餘自深澳出蜂擁迎敵我兵鼓勇直前矢石交下遊擊周琬身先士卒斬僞副將一奪賊船官兵前後夾擊又斬僞副將二翼將一逆徒五百餘奪船四賊眾燒死落水死者無數追擊至海山口餘賊四散我兵回擣山巢拆毀礮臺三焚賊巢五計屋二千七百餘間積寇巢穴掃除淨盡並得旨嘉獎二十一年十二月調貴州提督先是滇黔底定廷議裁兵雲貴總督蔡毓榮以恢復未久請俟三年後裁汰並大定鎮缺兵



國朝通志卷一百一十四  
三  
急需募補兩疏皆經部駁至是襲爵疏言裁兵之議已久但貴州  
東粵西蜀南滇北楚爲四省咽喉且在萬山中苗蠻繁多性嗜劫  
殺又向被吳逆潛踞今恢復未久人懷疑懼非重兵不足彈壓計  
通省經制兵二萬六千有奇防隘護糧各營每以汛廣兵單告今  
畱兵二萬外裁兵六千六百有餘并家口不下萬人一旦驟減兵  
非土著無家可歸兼之旱災頻仍資生乏策勢必相聚爲匪乞將  
各鎮應裁之兵酌撥撫標及大定鎮充補缺額無容另募其餘俟  
三年後照數裁完下部議 從之二十七年十二月卒於官年六  
十有二子居廣由廕生官山東布政使

右 國史館本傳

石調聲

石調聲漢軍鑲黃旗人初任佐領順治十一年隨靖南將軍珠瑪喇征廣東破流賊張獻忠餘黨李定國於珊洲以功授雲騎尉遷參領駐防福建尋調蘇州協領康熙四年撤蘇州駐防回京仍補參領十年七月授杭州副都統十三年四月逆藩耿精忠叛時調聲同副都統沃申守江山縣爲賊將馬九玉所陷退保衢州康親王傑書檄守金華九月賊將陳重結土寇據金華之鄭店調聲同副都統瑪哈達副將陳世凱擊賊乘賊渡水夾擊之大獲燬賊巢三十餘十月凌霞渚奸民朱毛頭聚眾叛受僞職調聲同沃申擊散賊眾斬首千餘賊將葉鐘蔣魁陳遙等分據浦江義烏肆掠調

聲同世凱及總兵李榮先後勦擒其黨凌汝經又同瑪哈達擊賊於朱磯頭斬賊將朱陳梅和尙擒獲無算十一月同台吉察渾敗賊將申時尚趙大玉於竹園村擒其黨徐瑞十四年十一月擢浙江提督十五年五月賊犯定關守備方俊密獻城約賊三路來攻謀洩調聲擒斬之同水師提督常進功固守定關六月賊陷象山縣據石門西溪二嶺調聲進敗賊於缸窰追至黃墩分兵奪石門西溪復象山十月遣遊擊柳星沿海設伏破賊於太清澳斬僞官楊家益會康親王大兵已拔江山常山進攻福建精忠門降調聲招撫沿海僞官張鴻翼林衝楊四等百餘人浙江平十七年五月海賊鄭錦遣其將劉國軒吳淑急犯海澄康親王疏令調聲選

兵三千往援 詔趣之未至而海澄陷康親王令調聲守惠安七月賊圍同安副都統雅大力棄城走賊遂圍泉州調聲退兵興化惠安亦陷八月調聲同參贊大臣副都統禪布援泉州由風停大路攻賊巢復惠安追敗賊於洛陽橋賊遁泉州圍解十一月同沃申攻江東橋破賊寨賊敗走調聲因督修浮橋通漳泉路十八年五月劉國軒等復奪江東橋柳山寨斷我糧道將軍賴塔檄調聲等逆擊於太平寨敗之十一日賊復自鼇頭山窺江東橋調聲同福建提督楊捷迎擊賊遁十九年大軍復海澄賴塔令調聲同楊捷乘勢復廈門金門賊遁出大洋康親王班師調聲回浙江任二十一年追議調聲前失陷江山惠安未收官兵骸骨罪革提督及

國朝通志卷一百一十四

雲騎尉二十七年卒

右 國史館本傳

噶爾漢

噶爾漢滿洲正紅旗人姓納喇氏兵部尙書噶達渾之子順治十四年襲父一等輕車都尉世職初爲王府長史 聖祖仁皇帝康熙九年授正紅旗滿洲副都統八年授本旗蒙古都統十四年七月授鎮安將軍駐守河南十月奉 詔移師襄陽禦勦叛鎮楊來嘉等十五年三月率兵擊敗賊眾於南漳縣之靈棧寨焚毀賊營賊眾遠遁四月四川叛鎮潭洪糾眾由上津鄖西侵犯鄖陽以巨艦數十偪城復踞城東之陡嶺阻我糧道噶爾漢同湖廣提督佟國瑤列營武陽峒前防禦復督師由江中並南北兩岸三路進勦水陸齊擊賊眾披靡獲槍礮器械甚多得 旨下部議敘作三等

軍功十八年四月爲總兵謝泗劉魁等劫掠竹山竹谿等處盤踞山險近偪鄖城與興安諸賊聲勢聯絡上命噶爾漢同總督楊茂勳等率兵撲滅乘機規復興安六月疏言鄖西山高路狹草木叢塞時多淫雨山水暴下師行阻滯前後不能相顧輓運亦難俟木落水涸進征十一月諭責噶爾漢不卽規復興安下部嚴察銷去前功事定後議罪十九年十月疏報副都統塞恪恢復巫山又報自巫山進取夔州賊奔潰並敗譚洪之兵於錯開峽十年正月率兵敗賊眾於雲陽擒僞總兵向旭輝等恢復縣城譚洪已死其子譚天祕震懼焚巢遁萬縣開縣建始梁山忠州悉平得旨嘉獎二十二年三月授荊州將軍四月議政大臣等議噶爾漢於

十七年二月聞楊來嘉賊眾在房縣不能救援例應革職籍沒有  
功可抵請革將軍免籍沒 上曰噶爾漢原因其人堪用簡授將  
軍著降五級仍畱任二十七年六月湖廣裁兵夏逢龍作亂聚眾  
劫掠黃陂雲夢等縣噶爾漢自荊州赴安陸遣協領穆禮瑪等率  
兵進剿擒斬偽副將二偽守備三偽把總一賊眾復偪應城噶爾  
漢領兵擊退賊眾賊趨武昌噶爾漢駐應城疏糧餉不敷戰船未  
備不能剋期前進 上命調回爲正紅旗蒙古都統以都統巴渾  
德代之別遣振武將軍瓦岱統八旗兵往會提督徐治都等剿擒  
逢龍磔於市十一月部議噶爾漢於武昌兵變時率兵進剿不卽  
行撲滅藉稱糧餉不敷戰船未備退縮不前應革職鞭責籍家產



皇朝通志卷三百一十一 列傳一百一十一 王

詔從寬免其籍沒後卒於家

右 國史館本傳

瑪哈達

瑪哈達滿洲正白旗人姓佟佳氏禮部承政巴都哩之孫也康熙  
七年由參領擢正白旗滿洲副都統十二年冬吳三桂反 上以  
兗州地當衝要 命瑪哈達率兵駐防以備調遣十三年正月  
詔所轄兵及右翼察哈爾兵移駐安慶三月耿精忠叛 詔瑪哈  
達移師杭州四月 命參贊平南將軍賚塔軍務七月精忠僞都  
督閻標等率賊萬餘自温州處州犯金華瑪哈達同都統石調聲  
等禦擊於山村口追擊至鄭家店三戰皆捷斬馘四千餘俘獲甚  
眾十月僞都督葉鐘陳遙僞總兵周彪尹福等分犯浦江蘭溪義  
烏等縣瑪哈達俱遣兵擊敗之十一月僞都督徐尙朝率賊五萬

犯金華距城十二里結寨瑪哈達與台吉察渾都統巴雅爾總兵李榮等分隊夾擊陣斬僞遊擊吳榮先等及賊兵萬餘時僞總兵張元兆率賊二萬踞壽溪瑪哈達與巴雅爾李榮移兵進剿破賊營十有八斬元兆及賊兵三千餘十二月徐尙朝偕僞總兵馮公輔踞積道山瑪哈達與總兵陳世凱等乘霧進剿破其木柵賊皆潰竄招撫僞官百餘暨脅從之眾數千十四年正月督兵擊敗僞總兵沙有祥等於桃花嶺復處州府城三月僞總兵連登雲偕徐尙朝沙有祥自温州窺處州距城五里列寨瑪哈達與察琿李榮陳世凱分兵往剿賊敗潰復奮兵追擊斬僞參將陳亮郭美才等獲旗幟軍械無算十五年八月擢杭州將軍是月康親王傑書統

師進征福建瑪哈達與平南將軍賚塔由衢州率兵先驅敗僞將  
軍馬九玉等於大溪灘復江山縣遂驅仙霞關僞守將金應虎率  
眾降大軍進復建甯延平耿精忠歸順瑪哈達還駐杭州敘功  
予三等輕車都尉世職二十三年 召還京授正白旗滿洲都統  
二十六年以咨補旗員徇情滋弊罷任革世職遣往黑龍江效力  
贖罪二十八年九月卒

右 國史館本傳



楊捷

楊捷先世家揚州以軍籍爲義州人捷初爲明裨將世祖章皇帝順治元年率眾投誠授山西撫標中軍遊擊二年討嵐州土賊高九英等聚眾剽掠捷奉巡撫馬國柱檄擒斬賊眾毀其巢國柱既任山西總督請以捷爲中軍參將尋擢副將四年大兵既定廣東詔捷率宣化大同兵三千移鎮五年二月次池州值江西總兵金聲桓廣東總兵李成棟相繼叛征南大將軍譚秦請以捷駐防九江會勦聲桓上允所請授捷爲九江總兵官旋率兵復都昌獲僞官余應柱等斬之江西平敘功子雲騎尉世職十年隨靖南將軍喀喀穆勦滅廣東叛鎮郝尙久復潮州十一年改陝西

興安總兵官經略洪承疇疏畱原鎮是年冬加右都督銜充福建  
隨征右路總兵官十二年敘復潮州功晉左都督時海賊鄭成功  
肆擾福建郡邑捷請剋期增修漳浦城垣以固守禦嘗勦賊雲霄  
銅山諸處所向克捷十六年擢江南提督會鄭成功突陷鎮江窺  
江甯 特加捷太子太保充江南隨征左路總兵官統江西將校  
及兵三千防剿十七年奉 旨駐揚州防江北要汛十八年署廬  
鳳提督尋調山東提督駐青州土賊于七敗竄入海捷緝其黨五  
十餘人皆伏誅 聖祖仁皇帝康熙四年併山東總督於直隸移  
提督駐濟南七年河南提督許天寵以裁缺改山東 命捷候缺  
九年許天寵遷鑾儀使仍以捷補授十二年調江南提督十五年

海賊鄭錦犯乍浦捷遣參將白可受等往剿獲其船俘斬無算十七年鄭錦犯漳州陷海澄上以捷謀勇兼優成效素著調福建提督兼轄水陸特晉少保兼太子太保並諭捷攜綠旗兵之願往者隨征捷因疏言臣前隨征福建剿賊雲霄銅山閒深知閩中士兵弗自力戰用命臣自任江南提督召募材健至松江訓練百年堪資戰守挑選三千名並擇遊擊守備數員以備任用上允之捷至福州聞賊犯泉州卽統兵趨惠安賊不敢抗皆潰遁遂復惠安城僞總統劉國軒見我師甚盛因斷洛陽橋畱賊數千及船百餘拒守而自集海船爲遁計又以賊三千餘踞陳山壩阻我師捷遣遊擊李璉等襲破陳山壩而令總兵黃大來與副都統禪



布等會師洛陽橋南兩路夾賊以礮破其船賊大敗遁去泉州平時賊將王一鵬復窺惠安捷令總兵張韜往剿捕斬略盡餘黨葉明紀朝佐等出沒德化永春間僞總兵蕭武等聚艘泊湄州窺興化捷復遣將防守策應而自移師赴漳州同副都統吉爾塔布等敗國軒於江東橋又分屯駐柯坑山鳳山萬松關諸險隘別遣將守樞山寨以扼衝要先是捷甫莅任卽請別設水師提督使已得盡力陸路專心勦禦至是得旨楊捷自簡任以來著有勞績授爲昭武將軍管福建陸路提督事十八年國軒以賊眾劫樞山寨並欲奪江東橋捷會平南將軍賚塔等分兵爲兩翼左右夾擊大敗之於下坑山及毆溪頭斬賊千餘獲甲仗無算十九年國軒糾

賊屯獅子山又聯絡遠近賊寨以爲聲援捷親率精銳勦平烏嶼諸寨復以高浦與廈門相對爲海濱要地駐營設兵畱標將防禦斷賊歸路而自與總督姚啟聖總兵黃大來等分下玉洲三汊石碼等處十九寨復統兵進攻海澄僞總兵蘇侃以城降遂乘勝取廈門賊聚艦迎敵我師以巨礮毀其艦奮兵疾擊賊溺死者無算餘黨相率投誠金門廈門悉平國軒自銅山竄入臺灣捷疏請回駐泉州待 旨俞允於是年九月以老病求罷 命仍任江南提督 諭曰卿效力巖疆功績茂著以閩地溼熱與卿病體不宜調爲江南提督不必求罷明年敘復海澄功晉世職三等輕車都尉准襲四次捷駐松江年久以病乞休者再俱奉 溫旨慰畱二十

九年卒於官年七十有四 贈太傅諡敏壯孫鑄襲職入籍揚州  
衛

右 國史館本傳

昭武將軍少保兼太子太保提督江南楊公以康熙二十九年十月甲申卒於位年七十有四訃聞 天子震悼命所司議卹議諡既上 詔加贈少傅兼太子太傅易名敏壯祭葬如制而碑版之文 特命翰林院掌院事桐城張公撰進榮恩備禮踰於常格何其渥也惟公自束髮承祖父之烈從軍旅當 世祖章皇帝入關定鼎公年未三十卽以武略知名於時歷官四十餘年身經數十戰所向輒克比爲大帥而威望益重以功名終非才與福并不克

有此嗚呼豈偶然之故哉楊之先世居揚州之寶應縣崇儉鄉勝國時有以軍功授後屯衛指揮使者遂爲義州人公諱捷字元凱曾祖諱子隆祖諱應元皆襲世職父諱國棟以軍功歷升義州城守參將加副總兵母趙氏義州圍急自經死曾祖以下皆 贈少保如公官妣皆 贈夫人而公之叔父國楨國柱兄振並用邊將立功國柱振又先後死事稱名臣此公之世次也公明末依洪文襄爲偏將國初以材勇擢山東撫標遊擊歷宣大督標中軍副將九江總兵加右都督以平嶺南功晉左都督平江西加太子少保調山東江南福建加少保兼太子太保昭武將軍授三等阿達哈哈番復調江南此公之官秩也方順治五年春公以副將統精銳

赴粵會金聲桓叛兩江騷動公留軍討逆與固山額真譚公泰會師恢復彭澤湖口九江南康諸郡諸大帥見公驍勇大奇之遂題鎮九江明年逆賊授首江西平至十年秋復統九江鎮兵入粵克潮州十一年冬征閩駐師漳浦其城爲賊毀修築之十六年春奉命提督江西是夏海寇犯江甯 詔公同江南左路兵相機撲勦事平仍駐瓜洲轄廬鳳遊揚諸汛康熙元年正月移節山東會于七構亂登萊幾不守公偕禁旅撿募賊黨又以登沂二鎮分轄諸路兵黃地戍防羣盜始戢駐東省凡十二年 詔移江南甫受事而三逆變作浙温台陷勢張甚有議設蒙古兵於松江者公不可曰閩逆易與耳不日卽成擒矣至十六年閩逆已殄而海氛肆

虐者尙熾 特命公入閩提督水陸軍務公至簡閱士卒疾救漳  
泉屬邑之被賊者察諸鎮中惟黃福甯大來敢戰可任乃親帥鎮  
兵會禁旅合攻惠安拔其城賊踞洛陽橋北斷橋以拒官軍公陰  
遣奇兵襲毀賊營出橋南賊腹背受敵遂潰泉州圍解而水師鎮  
協又先奉公密令於外洋牽賊勢至是犁沈賊舟殲勦甚眾漳州  
賊請撫眾議持兩端公登赤嶺望賊壘整暇謂此款我師也決計  
進軍皆敗走公以水陸勢難兼顧屢控辭水師至十八年始拜昭  
武將軍命專提陸師勦逆十九年賊屯漸山立十九寨公以計建  
七營擊破之遂復海澄自是僞將接踵歸附卽遣爲鄉導用三路  
攻克廈門雖臺灣未下而賊豎已膽落不復支矣公在行閒兩載

觸冒瘴霧抗疏乞身而廟堂深悉閩地蒸溼與公病非宜已先有  
還鎮江表之 命公既至雲間念舟山猶被賊踞爲江浙隱憂咨  
制府于清端公同浙兵會擣賊巢略定其地於是設鎮置縣弛海  
禁焉公之遠謀制勝多在籌海而閩海既清則吳越千餘里帖然  
無復燧燧之警故公之功平閩爲尤烈也歲當甲子 天子修時  
巡之典自岱宗達於江淮公迎 駕淮北 恩禮殊異越五載  
乘輿再狩公迎 覲如初而 慰勞之殷 賚予之盛視昔有加  
時余亦忝扈從嘗與公並騎行竊覩公顧盼矍鑠冠劍甚偉及沿  
江而下公獨乘小艇攜兩健卒晏坐於驚風白浪之中一時豐鎬  
舊勳咸指目歎羨余因舉昔人詩所云精神如破貝州時者謂公

庶幾似之乃甫閱一載而公遽逝足可哀也已公之既疾革也召諸孫侍側口授遺疏惓惓以修海塘築寶山城復邊海沙船及派支軍食爲言蓋公所至之地有利必興有弊必革兵民無歧視而尤務施德澤於民易簣之頃志存體國語不及私以視古大臣之用心甯有媿哉公內行淳備撫孤嫠振貧困事至周悉載余前撰柏夫人誌中茲不備書夫人塔山參將諱永培女公元配也累封一品夫人子三人皆以廕起家懋緒陝西布政使司參議分守潼關道次懋紹雲南武定府知府柏夫人出次懋綸河南按察司僉事分巡大名道先公兩月卒側室黃出娶皆右族孫六人長鑄次文鐸俱國學生次錡次文孫懋紹出次鉞國學生次鎮俱懋綸



出孫女七人曾孫女二人懋緒懋紹將奉公喪以康熙三十一年九月辛巳葬六合縣某山之麓以余知公深屬爲誌特纂公行事之大者而敘錄之如此銘曰

穆如其容大河喬嶽淵然其器金鎔玉琢手提鵠印口畫軍機若騰解結如犀燭微繁昔東南天戈所指兩江百粵覩公遺壘閩嶠欲虐長鯨鬚張津剪羣醜用綏海疆迄還舊履作屏江表貔貅桓桓虎臣矯矯南巡迎謁帝親勞軍蕃錫燕飲式渥且殷吁嗟老成允倚坐鎮將星儵隕殊恩弗靳天章崇獎賜塋巋然貽厥子孫世澤永綿

右墓誌銘張玉書撰

覺羅武默納

覺羅武默納滿洲正黃旗人 景祖翼皇帝第二兄索長阿之元孫也順治四年七月授雲騎尉屢遇 恩詔游擊三等輕車都尉任二等待衛康熙三年遷一等待衛六年五月擢內大臣九年二月管佐領十六年四月 命同侍衛費耀色塞護禮索爾瞻視長白山 諭曰長白山係本朝 祖宗發祥之地爾等前赴吉林選取識路之人瞻視明白酌議行禮並巡視甯古塔等處可於大暑以前馳驛速往五月四日己卯武默納發京師己丑至盛京辛卯東行戊戌抵吉林詢無知長白山路者得舊居額赫納殷地獵戶岱穆布魯言其父曾獵長白山麓負鹿歸道經三宿似離額赫納

殷不遠自吉林至額赫納殷陸行十日舟行幾倍之於是甯古塔將軍巴海運米十七艘於額赫納殷六月丁未武默納等攜三月糧與協領薩布素由陸行經溫德亨河庫埒訥嶺奇爾薩河布爾堪河納丹弗埒城輝發江法河卓隆鄂河抵納殷江運米亦至乃乘小舟與薩布素分路行由納殷江逆流上丙寅會於額赫納殷一望深林無路薩布素領眾前行伐木開道遣人回告行三十里至一山頂緣木而望長白山乃在百餘里外片片白光見之甚明越二日戊辰武默納前行次日遇薩布素於林中十七日壬申黎明雲霧迷漫莫辨山在何處忽聞鶴鳴六七聲尋聲前適遇鹿蹊循至山麓見一處周圍密林中平坦而圓有草無木前臨水林盡

處有木華白宛如栽植者於是移駐步林外仍迷霧無所見跪誦  
敕旨禮拜畢雲霧開散山歷歷分明有路可躋遙望山形長闊近  
觀則中圓平若臺基向所見白光積冰雪也山高約百餘里頂有  
池五峰環繞臨水而立正南一峰稍低宛如門路池廣袤約三四  
十里山閒處處有水由左流者爲松花江右流者爲大小納殷河  
繞山皆平武默納等禮拜而下峰頭有鹿羣奔逸仆其七若有壅  
墜者時上山七人方乏食乃謝山靈所賜退行二三十步倏然雲  
霧癸酉回至前望處終不復見山光矣庚辰至恰庫河馬疲甚甲  
申自恰庫河乘舟回經色克騰圖伯赫噶爾漢噶達渾薩穆薩克  
什法克什多琿諸河至松花江七月丁丑回吉林巡視甯古塔各

地方八月己丑還京疏聞諭曰長白山奇蹟甚多山靈宜加封號永著祀典以昭國家茂膺神貺之意於是禮臣同內閣議上詔封長白山之神秩祀如五嶽十七年正月命武默納齊敕往封歲時望祭如典禮十九年召武默納入養心殿命工繪其像以賜諭曰將此像給爾子孫世世供享以昭加恩之意二十九年卒

右 國史館本傳

萬正色

萬正色福建晉江人由行伍起家康熙三年以招撫海賊陳燦等  
有功授陝西興安遊擊十二年逆藩吳三桂反四川叛應之正色  
隨西安將軍瓦爾喀進征叛賊譚洪等據陽平關遣賊黨拒戰正  
色率兵擊敗之於野狐嶺攻克陽平關擢山西平魯路參將尋授  
岳州水師總兵官時岳州久爲三桂所踞立椿木於洞庭之套河  
峽阻我進剿十七年三月正色率舟師乘夜入亂葦中盡拔其椿  
木屢擊卻賊眾旣而賊將江義巴養元杜輝等駕船二百餘犯柳  
林嘴正色偕遊擊唐善等擊毀賊船殲賊無算是年三桂死於衡  
州正色爲反間計遣千總魏士曾齎書分致賊將十有四人於岳

州城爲僞總統吳應麒所得士會遇害應麒旋殺賊將之爲所致  
書者數人賊眾內潰僞總兵陳華李超王度冲來降應麒遁大軍  
遂復岳州正色爲魏士會請卹得 旨魏士會心存報國直抵賊  
營離間賊黨身被殺害殊可憫惻下部優卹 贈守備廕子衛干  
總十八年正色以追敘恢復陽平關功加銜左都督時康親王傑  
書征福建逆藩耿精忠降而海賊鄭錦猶踞金門廈門陷海澄正  
色自以閩人素悉海上情形陳水陸戰守機宜言閩地負山枕海  
賊蹤出沒無常今宜擇官兵習於陸路者分布要害使賊不得登  
岸精於水戰者率戰艦自萬安鎮諸處順流攻擊直抵金門塞海  
澄以斷其歸路賊自廈門來援者則從金門掩擊更請 敕文武

請臣獨除沿海邊地雜派差役使民安居樂業不致窮而投賊又設法招撫善爲安置則投誠日多賊黨日散疏入 詔曰萬正色躬寇洞庭著有勞績今岳州長沙諸處悉經恢復無煩水師且萬正色閩人稔知水性茲勦滅海寇之際從優加太子少保調爲福建水師總兵率所部官兵剋期速赴閩中至日卽以所條奏事宜與大將軍康親王等會議酌行是年擢水師提督時議調船荷蘭國進取廈門正色疏言荷蘭船遲速莫必轉盼二三月間南風一作卽難前進今新舊烏船俱集臣與撫臣吳興祚決計進討臣率水師直攻海壇興祚率陸兵爲聲援 上是之十九年正月正色進征海壇分前鋒爲六隊親統巨艦繼之又以輕舟繞出其左右



井力夾攻以礮擊沈戰艦溺水死者三千餘人遂取海壇僞將軍  
朱天貴等遁南日湄州諸澳正色追躡至平海澳天貴聞風遁崇  
武正色自平海南下賊迎戰正色率兵掩擊大敗之斬僞總兵吳  
丙僞副將林勳等會將軍拉哈達總督姚啟聖巡撫吳興祚提督  
楊捷等並力夾攻遂取廈門天貴來降鄭錦竄臺灣三月正色疏  
言海島澄清實借風潮利順相傳莆田縣林愿之女自宋時肇顯  
靈異明永樂中建廟龍江封爲天妃列在祀典邇者臣率舟師渡  
海虔申禱告方征崇武時賊恃南風揚帆直逼忽風從西發我師  
歡呼奮進遂以敗賊是固 國家之福亦由明神默佑乞 賜敕  
封以隆昭報疏下部議如永樂七年封天妃故事遣禮部官祭告

四月正色疏請分兵鎮守濱海要地 上命兵部侍郎溫岱前往  
會議尋 詔銅山廈門諸處量設總兵以下等官畱水師二萬人  
分鎮之初海壇既克有 旨下部議敘溫岱至福州總督姚啟聖  
與言海壇之役正色先遣人與朱天貴密約投誠乃進兵取彼空  
地無攻擊殪賊之事及溫岱還京兵部奏正色冒功不應議敘  
上曰萬正色志靖海氛不俟荷蘭國船領水師先行出洋驅逐海  
逆克奏膚功遵前旨議敘於是部議 予騎都尉世職二十年六  
月改福建陸路提督二十五年調雲南提督二十六年十月鶴慶  
總兵王珍劾正色縱幕客家人借軍政造冊名索各營將弁銀數  
千兩正色亦劾珍侵挪捐造甲冑銀二千餘兩 詔正色與珍馳

驛至京質問雲南總督范承勳復劾正色婪取財賄侵蝕兵糧諸款上遣侍郎多奇傅拉塔往雲南察取眾證下部定讞王珍侵挪事辨釋別以誣良爲盜擬徒收贖正色納賄侵蝕事鞠實論絞得旨萬正色久歷行陣勞績甚多從寬免死著革去提督仍畱世職三十年四月卒子吉祥襲職

右 國史館本傳

沃申

沃申滿洲正紅旗人姓鈕祜祿氏崇德五年以前鋒從大兵征明圍錦州克松山順治元年隨睿親王多爾袞入山海關破流賊李自成於保定復隨都統葉臣徇下直隸諸郡進征山西四年隨將軍喇哈達征陝西擊賊帥王雲祥於蒲城縣先登九年以功授騎都尉世職 賜號巴圖魯十二年補參領十三年隨甯海大將軍宜爾德征舟山屢敗僞總制陳六御等十四年敘功加一雲騎尉康熙元年授協領十三年六月擢杭州副都統以逆藩耿精忠叛浙東告警總督李之芳令沃申同副都統雅達里石調聲固守衢州尋調守金華府七月耿逆僞都督闞標自溫處來犯沃申擊其

先鋒徐君美敗之復偪府城迎擊大敗之生擒標斬獲無算十月  
僞都督葉鐘犯浦江縣沃申城守令都司陳夢陽由蘭谿迎擊追  
至石塘園斬僞將金春焚其壘而還時凌霞諸上寇從賊受僞職  
聚眾滋擾沃申同調聲勦之斬千餘級潰其眾尋奉康親王傑書  
檄往會員子傅拉塔勦台州賊行至義烏縣遇僞都尉趙明卿迎  
戰擊走之十四年二月同副都統伯穆赫林攻取仙居縣城白水  
洋僞將林冲陳啟秀率眾萬餘連營十三來拒沃申分兵二隊各  
分左右翼令營總薩木哈領頭隊當賊左六營令侍衛卦塔領二  
隊當賊右七營戰移時賊不退沃申直前擊之連破二營乘勢追  
斬三千餘時僞都督朱富屯太平縣聞我兵至復從叛鎮會養性

乞兵守招之不降沃申伏兵城西而以雲梯攻其東南北三面賊果開西門遁伏兵起擒富進勦城內餘黨遂屯仙居縣會台州賊踞險我兵隔江不能攻聞仙居有路通黃巖可襲賊後傅拉塔令沃申鑿石伐木夜步進八月師次半山嶺僞都督劉拜仁率賊分兩路來沃申身先士卒大破之進次梁蓬隘口復擊斬僞將王仲祿等降僞官二十餘兵民三萬六千餘養性及僞將軍祖宏勳遁福建十五年三月養性等糾瑞安石塘賊分八路來犯沃申同副都統吉爾塔布先後擊敗之斬僞都督孫可得等三百餘殲二萬五月傅拉塔奉 詔由處州進征福建沃申從八月耿逆遣其將連登雲據浦城縣之石塘阻我入閩兵沃申同副將陳世凱擊連

破九營進復雲和縣會康親王大兵已拔江山常山等縣復建甯  
延平二府耿精忠詣軍門降召回養性宏勳王令沃申同穆赫林  
守延平十二月海賊鄭錦遣僞都督吳淑取邵武尋犯延平營於  
木城新屯渡別遣其弟潛據浦塘隘口沃申率守兵擊敗潛乘勝  
渡河攻木城賊潰追之遇僞將楊德來援又敗之小河岸斬首萬  
餘生擒僞總兵阮信降僞將彭世勳等邵武汀州相繼復海寇聞  
風竄泰甯建甯甯化長汀清流歸化連城諸僞官相率迎降會賊  
首朱寅寇泉州爲官兵所敗遁入海中石井寨十六年十月我兵  
分三路進剿沃申同副都統孟安由東路遇賊將何祐以舟屯清  
寺別營江西岸塔岡山拒我師沃申等擊破其營克清寺十七年

九月沃申援漳州大破賊於龍虎山斬僞將鄭英吳潛等賊棄寨登船據江東橋十一月復同浙江提督石調聲奪江東橋通漳泉路十八年十月賊遣僞都督林盛屯東石東石近泉州爲金門廈門門戶甯海將軍喇哈達令沃申取之沃申造雲梯進取靈水東石三面皆海賊嬰城固守沃申精選前鋒架雲梯候潮落齊進親薄壕指揮遂拔之斬僞將林英生擒僞總兵陳深俘獲甚眾石井白沙諸城皆望風遁燬其營十九年二月賊遣僞都督林深與我水師相拒復遣其將張志於大定小定募水師梗我船道適泉州無船沃申奉喇哈達令從店頭陸路進至大定海岸乘潮退急擊奪賊中寨追至小定賊士船遁斬僞將陳飛龍等降其眾渡難民



二千五百餘時官兵已復海澄沃申乘勝渡海取尾高溪與漳州  
兵夾攻廈門金門克之招降僞官三十餘賊遁出大洋六月康親  
王班師奏沃申防守泉州二十一年追議沃申前在江山縣失守  
戰死者未收骸在金華違速取温州軍令在台州未能勦滅小梁  
山寇功不敵罪盡奪其職三十年五月卒

右 國史館本傳

國朝耆獻類徵初編卷二百七十四補錄

將帥十四

楊捷

漳浦北關內有懷德書院者自順治之十有三年祀故昭武將軍提督楊公者也當是時鄭逆猖獗海氛方熾公來鎮茲土修城郭禦寇敵綏眾靖民厥功甚鉅士民感公之德遂構祠而肖公像以祀之始名楊公祠後公提師入漳行部過浦士民喜公之再臨也又重新之更今名百年於茲矣歷時既久漸就傾頽今年春邑侯徐君尙忠謀葺治之民樂趨事不逾時而廟貌煥然適余請急歸省而囚余誌之余惟公之勳績在國史德澤洽民心固無俟於余

文而余文亦豈足以重公者雖然吾浦人甘棠之遺愛也其何敢  
辭公諱捷字元凱先世隸籍維揚遠祖於勝國時仕遼因家焉遂  
世爲義州人其祖父伯叔皆以門閥技勇起家一時家聲籍甚公  
年十六卽能挽強命中結納英豪不事家人產維時內外交訌制  
院洪文襄公循地望擢爲偏裨我世祖章皇帝入關翦逆定鼎  
以材勇異等除授山西撫標中軍遊擊繼任宣大副將援勦兩廣  
遂擢九江總戎恢復江西郡縣會師廣東恢復潮城隨征福建江  
南提督山東凡歷數省皆有勦禦寇賊底定邊疆之功是公之勞  
績半天下非特一邑一郡之爲烈也而我浦人願獨有私於公者  
則何以故蓋公兩次入漳在前甲午之冬以左都督充福建右路

總兵官仗鉞以前戰無不克遂抵漳浦海逆雖皆奔竄而郡邑名城率多拆毀無險可恃狂狡不難乘機豕突公至卽相舊陞計工程課徵楨幹具版築而月之閒垣墉雉堞言言屹屹爲他邑先浦人賴之若防之制水恃以無恐是公之大有造於浦也粵康熙戊午海逆復煽據廈爲巢繼掠漳泉屬邑所至不守斯時也浦民望公若望歲焉日夜以幾公復奉 命督師入閩時制院姚公在漳羽書接踵請援公相緩急機宜以爲非先安泉而卽援漳將有腹背受敵之虞故旣復惠安解泉圍而後疾驅至漳與姚公商破敵策是冬卽會兵克復江東橋萬松關己未春賊踞險立巢以防我公絕其掠食要道勢窮益猖獗公帥師逆擊之遂潰又遣將焚毀

其舟生擒僞將賊勢益蹙庚申二月賊分據扼要立十九寨以拒我師復聯絡重地以壯聲援公用計出奇破其所恃令首尾牽制難以四應乃會師攻復海澄賊遂大窘隨乘勝飛咨督撫鎮將訂期三路進攻廈門擊破賊踪敵淹死無算數十年逋寇逆窟一朝頓清是公之大有造於漳卽更有造於浦者也此浦人之所以沒世不忘也閩逆旣平 天子以公年老有疾仍調選提督江南以便調攝公在江南前後十五年尤多異績不具詳公少際亂離書知姓名未能竟讀而用兵暗合孫吳生平馭兵威而有惠於民瘼尤加體恤所以士樂用命而所至謳思自公去後 國家承平無事文教誕敷公子孫繼繼承承敷歷中外而皆以文事世其家今

年夏公曾孫景素適來觀察是邦因巡屬邑至浦瞻拜祠下徘徊  
久之喜浦人之不忘舊勳而能念公之德於不衰也浦民亦焚香  
載道樂公之有後將世修其德而重有造於吾浦也是又觀察君  
與我民維繫無窮之心也夫因并記之

右碑記蔡新撰

卷之三十一 雜錄

十一

國朝耆獻類徵初編卷二百七十五目錄

將帥十五

沃赫

子傅爾丹  
孫哈達哈

沃內

劉承孟

趙賴

瑪拉

瓦岱

諾敏

根特

劉詔

許貞

郎坦



166-456

166-456

國朝耆獻類徵初編卷二百七十五

通奉大夫前署江西巡撫江西布政使司布政使湘陰李桓輯  
將帥十五

沃赫 子傅爾丹 孫哈達哈

沃赫滿洲鑲黃旗人費英東之孫也崇德八年襲父察喀尼三等  
子爵順治七年九月兩遇 恩詔游晉一等子十五年授散秩大  
臣十六年三月 世祖章皇帝追念費英東爲開勅功臣 予三  
等公世襲罔替旋擢內大臣康熙八年內大臣鼇拜獲罪拘禁沃  
赫因與同族部議革職 聖祖仁皇帝命畱三等公爵在驍騎營  
行走十三年六月逆藩吳三桂耿精忠遣賊黨分寇掠江西沃赫

同富喀禪子穆成額俱奉 命署副都統領兗州駐防兵赴定南  
將軍希爾根軍協力防剿十月沃赫同副都統幹都海總兵官趙  
應奎等破耿逆僞總兵任宗邦之兵於分宜擒斬甚眾十一月吳  
逆僞將軍朱君聘僞總兵黃乃忠合兵數萬自萍鄉來犯袁州沃  
赫同幹都海穆成額趙應奎等擊敗於西村又登山斬賊五千餘  
級時賊黨踞安福沃赫防守分宜議令穆成額分兵先往而遣護  
軍一半擊之大敗賊眾用雲梯攻城復安福縣十四年四月剿賊  
鷲石嶺白水口等處擒斬無算十五年正月遇 恩詔加太子太  
保二月隨大將軍安親王岳樂進征萍鄉破賊十二寨僞將軍夏  
國相等敗遁遂復萍鄉縣三月隨安親王至長沙吳逆賊黨五千

餘人迎戰沃赫同副都統阿進泰擊卻之十六年安親王令沃赫率兵赴茶陵駐守十七年將軍穆占疏言茶陵攸縣等處與賊偏近且吳三桂盤踞衡州江之東岸有僞將軍馬寶等立營獨令沃赫駐守兵力單弱 上因命趙應奎標兵赴茶陵又 諭簡親王喇布分兵隸定南將軍華善率赴茶陵與沃赫協力鎮守既簡親王由江西赴湖南進師茶陵沃赫分守攸縣十八年湖南既平沃赫隨大將軍貝子彰泰進征雲貴十九年十二月授鑲黃旗蒙古副都統旋調滿洲副都統二十年十月雲南平凱旋二十一年六月擢鑲黃旗蒙古都統二十二年三月議政大臣等追論沃赫於十六年三月在長沙擊賊時既抵鹿角挨牌仍退回罪應革職籍

家產其江西勦賊復城屢奉 旨議敘又隨大軍平定雲南功罪相抵請革去世爵免其籍沒 上曰沃赫爲人尙優所襲公爵原係其祖之職卽革去亦應子弟承襲著從寬畱其都統公爵革去太子太保二十三年遷領侍衛內大臣二十八年仍改授鑲黃旗蒙古都統三十年六月卒年五十有二 賜祭葬如例子傅爾丹襲爵官至都統將軍別有傳

右 國史館本傳

傅爾丹

傅爾丹滿洲鑲黃旗人追贈信勇公費英東之曾孫父沃赫襲公爵官都統有傳康熙二十年傅爾丹襲三等公兼佐領三十八年

授散秩大臣四十二年扈 駕西巡駐蹕祁縣鄭家莊 上於行  
宮前閱太原城守兵騎射有卒馬驚突近 御仗傅爾丹前止其  
馬擒之下 諭曰馬驚逸漸近御仗諸年少大臣俱效年老大臣  
旁觀不動惟爾直前勒止之可謂繼武前人矣特賜爾貂皮褂一  
領嗣後益加勉力毋以身爲大臣而不思奮力向前也四十三年  
授正藍旗蒙古都統四十七年調正白旗蒙古都統四十八年授  
領侍衛內大臣五十四年三月以託疾革領侍衛內大臣職七月  
命率土默特兵千赴烏蘭固木等處屯田五十六年正月復授領  
侍衛內大臣奏請增購農具於本年未播種前送軍前竝增遣效  
力廢員佐屯務議政大臣議如所請三月 命爲振武將軍率北

路大軍由阿爾台襲擊準噶爾五十七年疏請與西路靖逆將軍富甯安分路進剿 諭議定師期傅爾丹尋請選兵萬二千偕征西將軍祁里德齋百一十日糧於五月啟行富甯安請以兵七千齋四十日糧於閏八月啟行議政大臣等以師期不符合令另議傅爾丹奏言由布魯爾直抵額爾齊斯河與富甯安俱定於七月進剿廷議準噶爾見遣使來青海已令傳 諭策妄阿喇布坦應暫停俟回奏仍飭兩路繕兵防守先是奉 旨於烏蘭固木及科布多築城衛喀爾喀游牧 上以傅爾丹等駐北路久稔地形 敕相度具奏其設驛與遣往之員外郎保住會同詳議五十八年正月疏言鄂勒齊圖郭勒土肥寒暑與內地同宜築城貯糧保住已

從殺虎口至彼詳視宜設站三十六 諭曰鄂勒齊圖郭勒居喀爾喀游牧地方之中與大兵駐劄處相隔千里今欲護衛喀爾喀應於阿爾台科布多等處築城遠立哨兵方是傅爾丹等既奏鄂勒齊圖郭勒應築城貯糧或於科布多另築一城駐兵看管充發人等耕種著同保住及喀爾喀王貝勒公等會議尋覆奏科布多隔大河水漲輒阻材木難致近科布多有察罕度爾水草俱距鄂勒齊圖郭勒千里兩地宜各築城一城置屋二千間自鄂勒齊圖郭勒至察罕度爾設十一站 允之四月 命卽軍中自授章京等官五十九年六月率兵八千由布拉罕進剿九月疏報大兵抵格爾額爾格準噶爾棄帳械驚潰臣等分兵追擊之斬二百餘級



擒宰桑貝坤等百餘盡降其眾又偵烏蘭呼濟爾爲彼屯耕所贖  
殆盡焚其糧草整隊而還報 聞雍正元年 命撥兵赴巴里坤  
以傅爾丹兼統祁里德軍三年率京兵進授內大臣四年授黑龍  
江將軍五年五月疏言墨爾根城舊有額兵九百竝無鎗礮船隻  
請增選漢軍兵百名合爲一千置舟楫操演下議政王大臣議行  
十一月 諭曰傅爾丹乃勳舊大臣之裔伊在阿爾台一路將軍  
任內效力有年因辦理錢糧事務不清以致應賠銀兩甚多此乃  
管辦錢糧人員不妥故爲所累傅爾丹自署理黑龍江將軍事務  
以來竭誠辦事效力勤勞伊名下應賠各銀兩俱從寬免六年授  
吏部尙書 賜雙眼孔雀翎七年勦噶爾丹策凌 詔以傅爾丹

爲靖邊大將軍由北路出師 賜 御用朝珠及黃帶紫轡銀五千兩尋加少保八年三月噶爾丹策凌奉表請獻叛賊羅卜藏丹津 諭傅爾丹暫緩進兵同西路甯遠大將軍岳鍾琪來京會籌軍務十二月還軍營九年二月疏言北路遵 旨築城科布多地勢接布魯爾與庫列圖近爲進兵孔道請仍於此築城大學士等入議如所請六月奏言臣統大軍抵科布多據守卡侍衛巴爾善等擒準噶爾一人曰塔蘇爾海丹巴詢之云噶爾丹策凌發兵三萬令大策凌敦多卜小策凌敦多卜等分領由阿爾台山奇蘭犯我北路今小策凌敦多卜已至察罕哈達而大策凌敦多卜因噶爾丹策凌妹夫羅卜藏策凌向駐阿里嗎圖沙喇擊勒防哈薩克

今與噶爾丹策凌隙率三千餘戶來投追者爲所敗以是大策凌  
敦多卜尙未至臣思賊兵未集當乘其不備襲之選兵一萬輕裝  
由科布多河西分二隊於六月初九日進勦前鋒統領定壽等領  
第一隊參贊馬爾薩等領第二隊臣以大兵繼進掩擊令都統袁  
泰等以兵七千三百築城都統侯陳泰等以兵五千駐科布多河  
東扼通奇蘭要路又奏定壽等擒賊巴爾喀等十二人於雅克賽  
河據云距察罕哈達止三日程準噶爾兵不過千人尙未立營臣  
卽乘夜往襲奏入報 聞七月奏言臣等於六月十七日獲準噶  
爾偵者云博克托嶺有賊二千駝馬萬餘臣遣參贊蘇圖副都統  
岱豪等以兵三千往勦十八日遣定壽以兵千五百名與賊戰於

庫列圖嶺斬四百餘級賊驢駝馬踰嶺遁十九日定壽蘇圖等與  
臣合二十日賊二萬餘從高阜衝我營督戰殺千餘賊副都統塔  
爾岱馬爾齊以兵二千奪西山二十一日因賊據險我軍移營於  
和通呼爾哈諾爾定壽蘇圖及參贊覺羅海蘭副都統常祿西彌  
賴據山梁之東塔爾岱馬爾齊據其西副都統承保居中策應參  
贊馬爾薩由東路公達瀟岱豪在前副都統舒楞額土默特公沙  
津達賴等護後營甫移賊犯山梁東西兩軍定壽等力戰殺賊忽  
大風雨雹被圍臣遣兵救出塔爾岱又遣承保援定壽等會日暮  
未解二十二日海蘭突圍出定壽蘇圖馬爾齊自盡常祿陣沒西  
彌賴令索倫兵馳援定壽軍潰亦自盡二十三日賊連犯大營臣

督軍力戰斬賊五百餘沙津達賴等及察哈爾兵皆潰惟滿洲兵四千不動二十四日隨印侍郎永圖及海蘭岱豪俱自盡臣等以步兵退方設營護輜重令塔爾岱舒楞額殿承保統右翼馬爾薩統左翼臣與副將軍巴賽查弼納往來巡軍副都統德祿捧敕印行賊眾三萬蜂集我軍且戰且退殺賊千餘達福歿於陣二十八日渡哈爾噶納河賊猶追衝左翼復擊斬五百餘七月朔日臣等還科布多築城處我兵陸續歸營者二千餘臣遣迎未歸諸將惟塔爾岱負創至巴賽查弼納馬爾薩舒楞額皆陣歿臣輕舉妄動以致敗績請立正典刑奏入 諭曰此舉損兵敗績雖屬有罪朕因爾等之竭蹙力戰寬恕其罪痛惻難忍不覺淚下將朕親東之

帶賜與傳爾丹繫之爾等忿激之下意思報復恐又妄動賊人雖  
來不可輕進追擊但能相機堅守卽爾等之功科布多地地方若難  
固守可回至察罕度爾駐劄今已授馬爾賽爲撫遠大將軍領兵  
前來到時爾等公同商酌辦理八月奏言臣世受 國恩復蒙授  
大將軍重任不能遵奉 聖諭妄舉損兵非惟國法不可緩死卽  
臣心亦難以偷生 皇上不卽加誅降 旨慰諭復加 賞賜實從  
古未有之 鴻慈臣此次進軍失利弁兵被傷於時若不鼓勵將  
士收軍而回轉使賊人得計乃籌議力衛餘軍轉戰而出至建城  
處臣安置哨站竝傳諭喀爾喀副將軍等運糧固壘乞 皇上速  
遣賢將統率大軍將臣譔回與妻子一併正法 諭曰朕從前諭

旨甚明朕之處事豈肯不持大義以定是非而聊爲目前慰勉之  
理惟輕信賊言冒險深入中賊詭計是爾之罪至不肯輕生自殺  
力戰全歸此爾能辨別輕重之處事定之後朕自有辦理之道爾  
若念慮紛擾以致血氣消耗不能報讐雪恥上損國威下玷家聲  
罪尤甚焉爾其勉勵勇氣安心靜攝計圖遠大以答朕恩九月奏  
偵大策凌敦多卜在華額爾齊斯謀必由濟諒蒙古游牧其地與  
巴里坤甚近 詔西路嚴備又言賊犯黃甲舒魯克距科布多城  
五十餘里臣已將馬匹牲畜收入城固守仍相機擊之 命振武  
將軍順承郡王錫保傳諭傅爾丹撤兵同駐察罕度爾十月 諭  
傅爾丹曰爾等在科布多地方恃勇輕進墮賊詭計致失地利損

兵折將軍前獲罪我朝例所不貸本應執法究治但傅爾丹整頓  
餘兵回至科布多固守城池賊眾并力來犯復能列陣以待賊人  
遠遁隨即遣兵各處截殺奪回被掠馬駝此次擊賊可贖爾等前  
罪今朕已盡行寬免嗣後須黽勉效力朕自格外加恩是月傅爾  
丹至察罕度爾軍營 命以錫保爲靖邊大將軍傅爾丹仍掌振  
武將軍印協辦軍務 諭大學士等曰爾等可傳諭傅爾丹伊原  
與順承親王不合王諸事竝無過失近日傅爾丹輕進以致虧損  
官兵若大將軍印務仍命管理非但眾心不服卽傅爾丹心亦不  
安伊旣失蒙古等之心卽綠旗兵丁亦未必孚信伊所恃者惟數  
索倫兵耳豈知首先潰敗幾致伊於危殆者非索倫乎順承親王



諸事遵朕指示領大兵在察罕度爾賊夷懼其聲威不敢侵擾旋  
卽敗遁朕今令傅爾丹爲王協理以贖前愆至殲賊立功惟王是  
賴傅爾丹宜悉心盡力以圖報效若仍執前見妄存私意與王不  
和不但無益國家傅爾丹恐益增罪戾矣十年七月順承親王錫  
保奏賊來侵烏遜珠勒傅爾丹等接戰數次敗賊前隊及賊後隊  
全至衝突我師失利還歸大營 諭曰傅爾丹領兵萬餘旣已敗  
賊前隊則後隊自宜敗去如何我師遂被衝散回營用兵失機罪  
在不赦去歲傅爾丹冒昧進剿損傷官兵迨回科布多時尙能整  
頓軍旅截住賊眾是以特恩寬免其罪理應竭力報效冀雪前恥  
何以又致債事儻因賊眾我寡恐有疏失相機回營尙屬可原若

係輕躁懦弱以致失機卽應革職嚴加議處著順承親王秉公詳查據實陳奏八月錫保奏傅爾丹竝不預籌堵禦輒輕調兵進擊以致有誤軍機 詔革領侍衛內大臣振武將軍及公爵十一年二月錫保續參傅爾丹於烏遜珠勒遇賊竝未身先督戰致士卒怯走軍機大臣議覆應付三法司定擬時 上詢知烏遜珠勒之役錫保奏稱撥兵一萬而所到之兵實僅三千且畱傅爾丹於軍營致賊越克爾森齊老遇額駙策凌兵始敗走 諭曰烏遜珠勒對壘情形朕曾細問額駙策凌傅爾丹情罪尙有可原著從寬免其治罪畱軍營效力贖罪十二年四月北路副將軍額駙策凌入覲傅爾丹隨大將軍平郡王福彭赴科布多總統弁兵十三年八

月辦理糧餉額外侍郎伊都立及軍營辦事侍讀學士蘇晉侵蝕分肥事覺詞連傅爾丹婪虐等款 命侍郎海望拏解來京竝追論和通呼爾哈諾爾及烏遜珠勒失機罪九月 今上御極 諭曰傅爾丹除貪婪等輕罪外第一是和通呼爾哈諾爾所犯之罪甚大伊身係統轄兵丁之大將軍乃既不能收拾眾心復與大臣等不睦且不能約束以致失機將官兵損折皆傅爾丹之罪與岳鍾琪無異著將伊監禁俟該部奏請時再派大臣等審訊十月王大臣等覆鞫依律擬斬得 旨傅爾丹等失誤軍機負恩欺罔之罪不可勝數本應卽正典刑以彰國法但我 皇考從前未卽降旨今朕仰體 皇考遲回降旨之意著改爲斬監候乾隆四年與

岳鍾琪均蒙 恩釋放十三年四月 特授內大臣護軍統領馳  
赴金川軍營竝 命其孫哈甯阿隨往一體馳驛八月署川陝總  
督同岳鍾琪辦理軍務 諭曰川省自瞻對用兵而後繼以金川  
之役慶復疎縱於前張廣泗怠弛於後曠日持久師老無功朕特  
起爾等於廢棄之中委以軍機重任今訥親張廣泗俱已召取回  
京軍中事務聽汝二人辦理事權歸一當合兩人爲一人合兩心  
爲一心汝二人自思曩受 皇考異數殊恩歷膺重寄其後干犯  
重辟者何事卽釋放家居而敗辱之名終身不能湔洗今棄瑕錄  
用予以自新之路當如何感激奮勉如何竭力報稱如果能克  
速奏蕩平豈但收之桑榆前恥可雪 皇考厚恩向所未能報效

者亦足仰酬萬一顯爵厚祿朕何吝焉是惟汝二人之福如其彼  
此各存意見不能鼓舞軍心以致公事不能就緒不獨軍法難追  
將併前罪一體追問非慶復張廣泗可比汝二人當日同獲重罪  
今又同在一方勝則同其功負則同其咎務期協力和衷同心籌  
畫迅奏膚功以稱委任十月奏請增調滿漢官兵竝言破險摧礮  
全資利器臣前在北路軍營見滿兵俱用絲綿長甲抵禦鎗子頗  
覺有益又糶粃拉烏鎗質輕形短能致遠於山林密菁中背負亦  
便請多置應用軍機大臣議行時大學士傅恆奉 命爲經略奏  
傅爾丹年近七旬精力就衰惟熟於管理滿兵請令專辦營盤諸  
務十四年正月 命爲參贊會金川酋莎羅奔郎卡乞降傅爾丹

辦理納降及班師事宜四月授黑龍江將軍十七年卒 諭曰傅爾丹宣力有年今聞溘逝朕心深爲憫惻著加恩賞銀一千兩辦理喪事應得卹典該部察例具奏尋 賜祭葬如例諡溫愨子二長兆德次哈達哈相繼襲公爵哈達哈別有傳

右 國史館本傳

哈達哈

哈達哈滿洲鑲黃旗人黑龍江將軍傅爾丹次子康熙五十九年授藍翎侍衛六十一年改治儀正果遷冠軍使兼公中佐領雍正九年遷頭等待衛十年二月授蒙古鑲藍旗副都統閏五月調漢軍正藍旗副都統十一年遷蒙古正藍旗都統十一年 命率兵

千往駐洪郭爾鄂隆十二年授領侍衛內大臣留軍營十三年北路軍撤調赴呼倫貝爾駐防乾隆元年九月還京授勳舊佐領十月二月襲其高祖費英東所遺信勇公爵四年五月授漢軍鑲白旗都統十月調滿洲鑲紅旗都統五年授工部尙書議政大臣兼都統如故六年署步軍統領七年命爲御前大臣尋晉太子少保十年兼鑿儀衛事十一年以後護謨班詔解領侍衛內大臣御前大臣十三年四月兼管光祿寺事五月因辦理孝賢皇后冊寶不慎議革職得旨從寬畱任十二月署兵部尙書及步軍統領十四年奏訪獲糾竊積匪及窩家七十餘名分別枷責發遣報聞十八年疏劾鄭家莊城守尉長春保侵扣兵餉官租鞠實

論罪如律十九年 命赴北路軍營授參贊大臣二十年二月將  
軍班第統大軍勦達瓦齊哈達哈奏以喀爾喀扎薩克台吉根敦  
等畱防各汛並管理新舊烏梁海牧接收降眾竝統兵繼進六月  
達瓦齊就擒軍還阿睦爾撒納叛遁 命哈達哈遣員往諭哈薩  
克汗阿布賚擒獻九月復授參贊大臣同定邊左副將軍達爾黨  
阿進勦十月請率索倫喀爾喀兵千餘先進 上獎其奮勉尋  
詔定西將軍策楞由西路進勦以達爾黨阿爲參贊哈達哈授定  
邊左副將軍畱屯北路形勢地爲聲援十二月奏言臣現駐兵布  
延圖派滿洲察哈爾兵各五百還駐烏理雅蘇臺察哈爾兵二千  
駐劄卜堪其索倫喀爾喀和托輝特兵七千餘南自伊克斯淖爾



北至烏哈爾喀碩分布防守又布延圖科布多多卜克爾齊拉罕  
距烏理雅蘇臺各千餘里兵丁往領錢糧馬力易疲請將直隸山  
東所運米徑送各處酌加運價毋概貯烏里雅蘇臺 上報可二  
十一年正月 詔由阿爾台進兵四月達爾黨阿代策楞爲將軍  
諭曰策楞領兵擒拏阿睦爾撒納事事外謬全無籌畫今西路專  
任達爾黨阿北路專任哈達哈伊二人尙屬勇往著卽領兵前赴  
哈薩克務期擒獻時北路烏梁海叛遁 諭查緝事竣馳會西路  
兵毋觀望五月 申諭趣之六月特楞古特宰桑敦多克及固爾  
班和卓和克沁等各攜屬潛約烏梁海同遁途遇北路大軍詭乞  
降哈達哈察其詐斬敦多克擒固爾班和卓等盡戮賊眾 諭集

其奮勇投領侍衛內大臣 賜戴雙眼孔雀翎七月大軍至嵩哈  
薩拉克山偵哈薩克賊千餘由巴顏山西行擊敗之復遣副都統  
銜瑚爾起總管鄂博什侍衛奇徹布等往追斬百餘級獲馬二百  
匹是役也哈薩克汗阿布賚實親領隊至既敗乃遁去而阿睦爾  
撒納亦爲達爾黨阿擊敗潛遁去兩路軍兵合九月遵 旨撤兵  
閏九月 上以哈達哈既遇阿布賚不勒兵窮追致脫走飭繳還  
前所賞雙眼翎不准戴用十月軍還在參贊大臣上行走十一月  
召來京二十二年正月 命往駐科布多仍授參贊二月論疎縱  
阿布賚罪 詔革公爵及領侍衛內大臣降調兵部侍郎畱駐科  
布多三月調烏里雅蘇臺辦事會副都統扎爾杭阿訐哈達哈前

擒固爾班和卓時獲珍珠等物匿不奏事下參贊大臣舒赫德查訊屬虛 諭曰此明係扎爾杭阿與哈達哈素不相能爲此傾陷之計朕辦理庶務一本至公豈肯以空言而卽治人之罪且哈達哈之罪並不在此伊身爲將軍帶領大軍任意遲延以致阿布賚脫逃是其罪有應得扎爾杭阿不以此具奏而反以全無影響之事有意傾軋此風斷不可長著革職八月 諭曰去歲擒剿逆賊阿睦爾撒納進兵至哈薩克西路以達爾黨阿爲將軍北路以哈達哈爲將軍旣未能擒獲阿睦爾撒納又致阿布賚脫逃本應治罪朕意伊等未必有心僨事不過爲賊所愚路遠遲誤之所致是以從寬免其處分後經詢問自軍營回之侍衛官員則咸稱達爾

黨阿追阿睦爾撒納時相距僅一二里逆賊不及馱載及遣人託爲哈薩克本欲擒獻阿睦爾撒納惟待其汗阿布賚至即便送來達爾黨阿墮其計中專候擒獻並不督兵追捕且下令不許眾兵前進直至逆賊捆載脫逃後方遣兵追逐哈達哈則路遇阿布賚既經後隊官兵呈報並不勒兵追捕至阿布賚逃去始尾追一次以塞其責眾奏僉同是達爾黨阿哈達哈之怠玩債事顯然可見因將伊等公爵革去降秩示譴今訊問拏獲阿逆之姪達什策凌等供稱阿睦爾撒納於去歲九月下旬自敗走地方潛回又據尼瑪供稱去歲大兵追及阿睦爾撒納我催促進勒將軍等候阿布賚擒獻以致脫逃再阿布賚對面安營我兵亦並不迎敵直至逃

去始行追逐旋即撤兵與侍衛等所奏昭合觀此伊二人不能用  
朕奮勇之官兵且爲逆賊等所輕視矣達爾黨阿哈達哈俱勳舊  
子孫受恩襲爵乃身爲將軍專任討賊而因循觀望坐失事機若  
此實出情理之外且去歲撤兵時伊等奏稱我兵距逆賊逃竄之  
地速行亦需月餘今於九月初撤兵自葉什勒椿集行五十餘日  
至巴顏鄂拉南之哈薩拉克地方今據達什策凌所供阿睦爾撒  
納聞大兵旣撤於九月下旬回至葉什勒椿集行二十餘日至巴  
顏鄂拉又十五日抵哈薩拉克東之額布根塔爾琿地方共五十  
餘日至巴顏鄂拉南之哈薩拉克地方設果如伊等所奏有月餘  
程途則阿逆復回必須兩三月且逆賊必確知撤兵之信方敢起

程果與我相去有月餘往返探聽又必三四月矣乃我兵則於九月初撤回行五十餘日始至哈薩拉克而逆賊卽自九月盡起程至額布根塔爾琿亦祇五十餘日何以如此之速耶則其被賊所欺愈爲顯著觀阿逆今春卽到額琳哈畢爾噶此卽伊等因循推諉之明證也况今歲阿布賚遇我兵三十餘人一戰卽降則去歲若稍肯奮勉阿布賚早已投誠將逆賊擒獻矣又伊等擁兵觀望之明證也再兩路官兵會合後自應聯爲一體乃伊等竟於相見之次日卽分營行走第三日卽議及撤兵有是理乎伊等卽協力追勦尙未知獲賊與否况復自分彼此安能集事且如逆賊兔脫時伊等俱係將軍若肯親行豈不勝如參贊大臣乃伊二人並不

前往止遣阿里衮一人領兵追逐不知將軍所司何事達爾黨阿哈達哈如此種種貽誤若不加罪譴則國家之賞罰何在本當以軍法從事但達爾黨阿本一糊塗無能之人致爲賊所愚而哈達哈每圖安逸遇事因循尙非出於有心且係勳舊子孫似此坐失機宜玷辱滿洲更何顏覲列班聯達爾黨阿哈達哈俱著革職發往熱河披甲效力二十三年十一月 詔宥前罪授三等侍衛十二年二月率西安駐防兵千赴西路軍營二十四年率兵追捕沙喇斯瑪呼斯逸賊二月大軍勦回酋霍集占 上以哈達哈及達爾黨阿歷練 諭由巴里坤送馬至阿克蘇八月定邊左副將軍富德等大敗霍集占於阿爾楚爾及伊西洱庫爾淖爾哈達哈均在事

有功 詔授二等侍衛十月卒於軍營子哈甯阿於乾隆二年授  
藍翎侍衛累遷頭等侍衛十九年率綏遠城右衛兵二千餘赴北  
路軍營尋授甯夏副都統二十年 命爲西路領隊大臣二十一  
年四月隨定西將軍達爾黨阿進兵哈薩克索叛賊阿陸爾撒納  
授參贊大臣八月赴伊犁協同定邊右副將軍兆惠辦事十一月  
降酋噶爾藏多爾濟叛哈甯阿隨兆惠由濟爾哈朗擊賊力戰突  
圍出事 聞 恩賞三等輕車都尉世職二十二年二月隨兆惠  
偵擊叛賊巴雅爾及扎哈沁牧於木壘烏蘭烏蘇科舍圖 賜玉  
韞荷包鼻烟壺各一六月督理額琳哈畢爾噶臺站十月赴珠勒  
都斯接應都統滿福及巴里坤辦事大臣阿里袞之兵同剿沙喇



斯瑪呼斯賊眾尋助總管端濟布勦扎哈沁賊哈勒拜等十一月  
調漢軍正藍旗副都統仍督理台站奏言軍營所需馬由碩琳阿  
畢爾噶一路解送地氣較寒多霜雪乏水草不若由烏魯木齊至  
吐魯番霜雪少水草佳遠近亦相等臣已行知巴里坤大臣及送  
馬之員改由此路得旨嘉允十二月襲信勇公爵擢漢軍鑲黃  
旗都統二十三年正月靖逆將軍雅爾哈善統大軍勦逆回霍集  
占哈甫阿授參贊大臣六月圍庫車擊敗援賊二千餘霍集占糾  
眾親至我軍分路擊大敗之斬級千餘霍集占負傷走捷奏至  
諭部議敘旣而疏報霍集占走入越城七日忽開西門渡鄂根河  
而遁副都統順德納實疎縱之應治罪上以此次縱賊雖由順

德納然雅爾哈善哈甯阿身爲將軍及參贊大臣果所司何事  
詔均革職以兵丁效力尋拏解來京二十四年二月 諭曰哈甯  
阿以軍行失律解京鞫訊據供詞與雅爾哈善相符且將雅爾哈  
善種種謬戾乖張失機債事情節指陳如繪夫雅爾哈善旣爲將  
軍而哈甯阿卽其參贊以將軍罪狀如此爲參贊者當以軍國之  
計爲重據實參奏乃隱忍貽誤又從而附和之滿洲世僕豈宜出  
此且哈甯阿又非他人可比自伊父哈達哈獲罪經朕加恩矜宥  
並予以自效之途伊苟具有人心念及伊父亦將倍加感奮矧軍  
旅重寄三軍之命繫焉顧因循玩視可乎覈哈甯阿之罪正與雅  
爾哈善等應卽正典刑以肅軍紀第以參贊究屬相助爲理之人

前哈甯阿曾隨將軍兆惠由濟爾哈朗力戰而出雖見在所犯情  
罪斷難稍貸仍念伊前勞暫緩正法著監候秋後處決以示寬典  
十一月 諭曰用兵爲國家要務賞罰必期明允爲將軍者於一  
切軍務果能奮往直前身親戰陣何事不可成就此內卽稍有見  
識未到者朕亦必加曲諒若如雅爾哈善等在庫車圍困霍集占  
如伊等嚴加防守逆賊安能出走且早已竣事乃伊等並不親臨  
嚴飭轉似特開一路令其脫逃有此情理乎故將雅爾哈善等問  
卽行正法參贊大臣乃協同將軍辦事之人將軍思慮所未及參  
贊卽應指陳不見聽卽應參奏哈甯阿爲雅爾哈善之參贊解到  
時亦應正法但參贊職任較將軍究屬有閒是以將伊擬斬監候

揆之以理此次秋審卽宜予旬因念伊父哈達哈見在軍前若有分外效力之處尙可稍從寬宥昨富德等領兵至巴達克山交界遣使索取霍集占當遣額爾登額時達爾黨阿哈達哈豈不宜告請前往與其遣額爾登額何如伊等一行之爲愈哉况伊等皆獲罪之人朕加恩復用爲侍衛遣往效力不但當感激朕恩卽伊自計亦當奮勉乃竟以侍衛自居與眾爲伍不知媿恥實出意料之外此等大關係處俱未計及哈甯阿豈尙可曲宥耶但朕念費英東不忍將伊孫同眾犯棄市特加恩令哈甯阿自盡著曉諭哈達哈及軍營大臣官兵等知之

右 國史館本傳

同治三年庚子不詳

一八

沃內

沃內滿洲正黃旗人姓性佳氏世居貝勒山沁地祖福瑚 太祖  
高皇帝時來歸 太宗文皇帝崇德三年沃內隨睿親王多爾袞  
證明毀董家口邊牆進師越燕京攻定州沃內先登克城 賜號  
巴圖魯 子騎都尉兼一雲騎尉世職尋授參領 世祖章皇帝  
順治三年隨端重親王博洛證明唐王朱聿鍵師至福建僞總兵  
姜正希率兵二萬迎戰沃內先眾擊敗之六年隨大軍討叛鎮姜  
瓌敗賊於甯武關賊據左衛城以馬步兵萬餘拒敵沃內率所部  
擊卻其眾復於遼州擊賊連戰皆捷還攻左衛城沃內乘頽垣先  
登克之敘功復遇 恩詔晉世職至一等輕車都尉兼一雲騎尉

聖祖仁皇帝康熙八年遷正黃旗滿洲副都統十二月擢盛京將軍奏請增設每旗防禦各一員得旨允行十四年察哈爾布爾尼叛沃內以其事疏報上命甯古塔將軍巴海同沃內固守盛京以信郡王鄂扎爲撫遠大將軍統師往討平之十七年上以沃內當布爾尼叛時未立軍功命解將軍任三十年卒賜祭葬如例以其子赫英襲世職

右 國史館本傳

劉承孟

劉承孟字春翁湖南新化人 國初入漢陽營爲字識嘗隨帥巡  
徼驟遇賊同行三人斬敵首七級其二人死於賊惟承孟獨上功  
由此知名吳逆之變從 王師奮勇進擊所至克捷滇平積功授  
永順協副將終陝西涼州大靖營總兵承孟鎮永順最久經滇逆  
蹂躪新附之後拊循綏輯兵安於伍民安於野而終之以謙讓仁  
惠爲時所稱旣卒官遂家於涼晚歲命其子持四代 誥軸歸供  
於家廟而別出二百金置田以奉祀事

右傳李元度撰





趙賴

趙賴漢軍正藍旗人父趙夢彩天聰八年授佐領後以監修福陵在事勤慎 予三等輕車都尉世職 世祖章皇帝順治元年趙賴襲父職六年以署參領隨謙郡王瓦克達討叛鎮姜瓖有功 遇 恩詔晉一等輕車都尉又一雲騎尉康熙三年擢正藍旗漢軍副都統十三年 命隨順承郡王勒爾錦征逆藩吳三桂擢貴州提督值貴州湖南俱陷賊 命畱駐九江就近募兵設四營將校統以防勦尋擊敗賊眾於都昌縣之土塘山及鄱陽縣之大灣十五年四月改授江西提督時三桂之僞將軍韓大任糾賊眾陷吉安踞之簡親王喇布督師進征趙賴同將軍哈爾哈齊率兵攻

克東關斬偽副將楊玉等進師圍城屢敗迎戰賊眾十六年三月  
韓大任乘夜突圍奔竄趙賴追之不及引兵還殲其餘黨吉安平  
尋遣兵勦平賊黨於泰和等縣又與副都統尼滿等敗賊於大嶺  
斬賊五千餘復樂安縣十七年調湖南提督十八年隨簡親王敗  
賊於衡山縣復衡州府旋偕副都統雅哈喇復耒陽祁陽等縣時  
三桂已死賊黨胡國柱吳國貴吳應麟等嫌隙漸生趙賴偵其情  
以聞請乘渙散之會指名招徠上可其奏尋同將軍林興珠  
提督趙國祚等擊敗吳國貴等賊眾復武岡州是年以大兵將進  
取貴州仍命趙賴爲貴州提督尋奉諭詳議勦賊事宜因疏  
言武岡楓木嶺爲入雲貴大路其西爲蓮花山東爲蓼溪司峒口

黃茅嶺各有小路可通雖皆峻嶺崎嶇然彼可來我亦可往計賊  
僅能當路掘壕設礮石拒守耳宜分布將士刻期並進使逆賊不  
能久延喙息 上以其疏示在事大臣協謀定議以行十九年大  
將軍貝子彰泰將軍蔡毓榮統師由楓木嶺進趙賴同總兵趙應  
奎等由蓼溪司進攻克龍頭山泡洞山瓦屋塘雲霧嶺五子坡諸  
賊寨賊將馬寶竄走趙賴遣遊擊甘文煌追擊敗之洪山恢復黔  
陽縣旋由沅州趨鎮遠屢敗賊眾復黎平銅仁思州思南等府二  
十年同將軍穆占敗賊將高啟隆夏國相等復平遠府大軍之自  
湖南進者並隨貝子彰泰與廣西四川兩路大軍會期征雲南趙  
賴奉 詔率所部畱鎮貴州二十一年擢正藍旗漢軍都統二十

六年以老乞休三十一年六月卒子述汴襲職

右 國史館本傳

瑪拉

瑪拉滿洲鑲白旗人姓納喇氏尙書尼堪從子也尼堪卒無子瑪拉與叔阿穆爾圖阿錫圖及其弟兆資分襲尼堪二等子爵瑪拉襲三等輕車都尉初任理藩院筆帖式世祖章皇帝順治五年逆鎮姜瓖叛英親王阿濟格帥師圍大同令瑪拉調蒙古兵隨征七年任戶部副理事官累遷理藩院郎中康熙十四年察哈爾布爾尼叛聖祖仁皇帝命信郡王鄂扎帥師討之瑪拉自陳久任理藩院習知蒙古情形願赴軍前效力遂奉命與員外郎色稜赴科爾沁翁牛特巴林敖漢喀喇沁土默特扎魯特諸部選調兵馬協勦凱旋擢通政使十五年遷禮部侍郎十六年擢工部尙書

十七年同內大臣喀岱往科爾沁諸外藩宣諭禁令先是瑪拉甫任尙書上誠以工部弊端甚多宜盡心整剔十九年四月詔添給陵寢匠作雇直令工部議行議自奉詔之日始支給新定雇直上詰瑪拉何不於議行奉旨日瑪拉謂已牒工所添給未便追扣上以情節朦混下吏部都察院察議應降一級調用諭責瑪拉不能清整弊端回奏復巧飾命降五級從寬畱任二十年三月因喪殿器用修造疎忽革尙書仍畱世職二十二年四月上以鄂羅斯數犯邊界擾害索倫及斐雅喀諸部命集兵黑龍江爲進征計遣瑪拉往索倫預備儲軍實並支部帑四千兩量買貨物攜赴軍前市易糧米牛羊瑪拉尋疏言索倫

總管博克等所獲鄂羅斯人及軍前招降者皆迫於大兵始投誠  
索倫密邇鄂羅斯不宜久畱應移之內地事下部議行二十三年  
五月疏言雅克薩尼布楚二城久爲鄂羅斯所據臣密詢情形雅  
克薩惟耕種自給尼布楚人歲捕貂與喀爾喀貿易資養贍請

敕喀爾喀車臣汗禁止所部與尼布楚貿易並 敕黑龍江將軍  
水陸並進作攻取雅克薩狀因刈其田禾則鄂羅斯不久自困

上是其言卽以瑪拉所奏檄知喀爾喀並以大兵將次進勦傳示  
鄂羅斯二十四年正月 詔遣都統朋春等帥師往黑龍江策議  
進兵又 念瑪拉自遣用以來甚爲奮勉且頗知雅克薩諸地形  
勢 特授副都統銜參贊軍務三月瑪拉遣蒙古三十人往雅克



薩城生擒鄂羅斯七人得城中設備及遣人乞援各部狀逮送至京六月朋春等收復雅克薩城大兵告捷瑪拉在事有功二十五年黑龍江佐領鄂色以耕牛多斃農器損壞時近東作奏請儲備命瑪拉往黑龍江督理農務 諭曰農事關係兵餉須令合力播種收穫豐稔懋著成效二十七年授護軍統領二十九年 上以噶爾丹肆掠喀爾喀 命瑪拉同都統額赫納前鋒統領碩鼐等率喀爾喀兵往征噶爾丹 賜內廐馬以行未幾噶爾丹掠烏朱穆沁 上命裕親王福全等分統大兵協力會剿噶爾丹敗遁師旋三十年正月噶爾丹復犯我喀爾喀至阿爾哈賚地無所掠而遁時以土謝圖汗車臣汗率眾來歸 駕幸喀爾喀撫綏之瑪拉

扈從五月 駕回鑿 命瑪拉同都統瓦岱等率兵赴圖拉偵軍  
事七月抵克魯倫河聞噶爾丹遠遁遂旋師九月 上以瑪拉才  
能素著於蒙古事亦諳練 特授西安將軍三十一年三月準噶  
爾和碩特部吉巴圖爾額爾克濟農來降 上因其人未可深信  
諭瑪拉概徙入內地毋致復逸瑪拉疏言巴圖爾額爾克濟農率  
所屬二千二百餘口窮乏來歸揆其情形不復逸矣遂遣員弁護  
送巴圖爾額爾克濟農及其子育木春來朝 上優賚遣之九月  
瑪拉以疾卒於任年六十有一 賜祭葬如典禮諡敏恪子瑪哈  
達襲三等輕車都尉世職

右 國史館本傳



瓦岱

瓦岱滿洲鑲黃旗人姓鈕祜祿氏額亦都之孫也父敖德 太宗  
文皇帝天聰八年分額亦都舊轄人戶益以新附瑚爾哈部眾授  
敖德世管佐領尋兼任參領屢從征有功 世祖章皇帝順治二  
年敘功 予騎都尉世職遇 恩詔洊晉二等輕車都尉十四年  
卒長子謨爾琿襲瓦岱敖德第三子也初任侍衛尋授護軍統領  
聖祖仁皇帝康熙十三年逆藩耿精忠叛應吳三桂由福建掠江  
西瓦岱署護軍統領隨安親王岳樂往討十四年三月擊賊於撫  
州鍾家嶺面中創仍率兵擊退賊眾之乘夜犯營者偽都督易明  
偽總兵李茂桂分路來犯俱戰卻之又敗賊眾於瑞州府北山招

降東鄉縣賊城既復移兵征建昌僞將軍邵連登率賊數百水陸迎戰瓦岱與定南將軍希爾根分兵列陣山下賊踞山以拒瓦岱從山左鳴角仰攻擒斬無算連登中矢殪餘賊潰奔截其歸路獲賊船六十餘復建昌城乘勝圍新城縣率兵樹雲梯先登克之十五年三月隨安親王討吳三桂逆黨夏國相以萬餘眾踞萍鄉縣之來龍山瓦岱偕諸將分道進擊賊敗遁遂復縣城進征湖南屢敗賊眾十八年大軍復長沙衡州寶慶並規復武岡渡紫陽河賊營分踞渡口諸軍直前攻戰瓦岱引兵繞出賊營後夾擊賊潰遁追斬二百餘級獲僞都司一復連敗賊眾於雙井鋪及楓木嶺湖南郡邑相繼底定瓦岱隨安親王還京授護軍統領敘功 予雲

騎尉世職二十一年授江甯將軍二十三年 駕幸江甯 賜御  
用袍並銀千兩二十四年十月授鑲黃旗滿洲都統以博霽代爲  
將軍 上諭之曰前此將軍副都統與地方官各不相能自遣互  
岱爲將軍眾志克諧彼此和協爾當效之互岱旣至京列議政大  
臣二十七年二月 命爲振武將軍統兵赴湖北剿叛賊夏逢龍  
等師至黃州僞總兵趙得等出城降黃岡生員宜畏生以逢龍獻  
磔於軍前賊平班師三十年十月 命爲定北將軍率兵出張家  
口赴圖拉追剿噶爾丹至克魯倫河偵賊眾遠去乃還三十一年  
二月 上允理藩院請於邊外達勒鄂莫瑚爾鄂莫諸處墾種派  
內務府各莊屯及八旗諸王莊屯丁壯往耕 命互岱同都統班

達爾沙等管理 諭以善爲經營及時廣播油麥大麥糜黍諸種  
深耕勸耨俾多收穫十月以督耕不勤田禾無收部議降一級遂  
罷任削去雲騎尉尋卒於家

右 國史館本傳

諾敏

公諱諾敏姓馬佳氏世籍滿洲人太子太傅都統公吏部尙書中  
和殿大學士文襄圖公之子也母覺羅氏繼母祜祿氏 贈封俱  
一品夫人祖諱穆哈達曾祖諱噶哈納皆以文襄公貴 贈如其  
官妣皆 贈夫人公生而器宇凝重外莊而內和稍長秉文襄公  
教練習庶務具有經緯筮仕三等待衛歷晉一等爲壯大又爲宜  
都額真夙夜在公克勤職業康熙十三年滇逆煽亂 王師四征  
不庭公以署副都統偕大軍入楚進取滇黔在行閒凡八載至二  
十年滇逆平班師在道會文襄公自漢中師旋以疾卒於京師里  
第 上念公父子皆勤王事而文襄大功甫就遽爾殞逝又遲公



不卽至爲軫惻者久之乃特詔公乘傳遄反公聞命見星而奔比屆窀穸之期達於喪次黽勉營葬盡禮盡哀旣襄事補散秩大臣是年襲封三等公仍管佐領適護軍統領員缺又命公兼領其事於時中外輯甯干戈載戢惟公通達治理助流聖天子德化遂以二十三年夏拜公刑部尙書獄無小大悉準情傳律期於允協一時論讞稱平閱二載調禮部尙書以修明禮制興起文教爲務諸所設施皆崇尙惇大勿事苛細論者謂得政體二十六年兵部以蒙古都統缺請上以職任至重難其人命公卸部務理之公任都統七載恭謹律身寬容御下所屬咸敬服廟堂倚毗方切忽遭危疾竟不起時康熙三十二年四月初三日也距生

順治二年三月六日享年四十有九訃聞 上爲震悼 詔所司  
予恤如制配李氏 贈一品夫人繼配王氏 封一品夫人子五  
人長馬爾賽襲三等公管佐領次馬爾濟馬禮德馬林阿馬禮善  
將以公卒之明年二月某日葬公於某原而屬余銘公墓石余不  
敢辭當文襄公在政府余方爲史官辱知獨深嘗以文字見屬及  
待罪爲學士始識公後承乏禮刑二部未得與公共事而皆承公  
之後每覩公在部時行事輒奉以爲模楷夫國家累葉作人股肱  
心膂之佐炳耀於史冊而父子相繼爲宗臣者亦不可多覩惟文  
襄公順治中爲司寇素著直聲而公復以司寇稱平允文襄公爲  
都統以德望威容服物而公復以久任都統克紹前人之休詩有

之式是百辟績戎祖考又曰君子有穀貽厥子孫其公之謂與謹序次官爵政績而系之銘曰

粵若豐芑挺生人英桓桓文襄腹心干城翳公象賢矢竭忠蓋宿衛禁廬乃心祇慎誓師而出鷲擊隼翔張皇天討綏靖我疆錫命上公益據偉略煦如春陽蘇彼甲拆皋陶淑問伯夷寅清明刑典禮蔚聞駿聲既歷上卿還統禁旅克贊謨謀兼資文武方叔顯允召虎旬宣出入將相惟公比肩年甫及艾忽罹凶問芝草朝萎台星夜隕前徽丕紹後緒允貽矧有令嗣世德日滋鬱鬱松楸嶽嶽馬鬣銘無媿辭永畱奕葉

右墓誌銘張玉書撰

根特

根特姓瓜爾佳氏世居尼馬察父伊努 太祖高皇帝時與其兄  
尼唐阿率眾來歸均任佐領隸滿洲鑲藍旗 太宗文皇帝嘉尼  
努能事授騎都尉世職天聰八年隨副都統巴奇蘭征黑龍江虎  
爾哈部有功加一雲騎尉旋軍時有蒙古兵弗戒於火尼努被兵  
焚死根特襲職尋任刑部理事官 世祖章皇帝順治元年春親  
王多爾袞統師入山海關討流賊李自成根特署前鋒參領敗賊  
將唐通於一片石追勦自成至望都復同前鋒參領阿爾布尼勦  
撫馬勝口土賊敘功晉世職三等輕車都尉四年授協領駐防西  
安時叛賊王光泰據鄖陽 詔侍郎喀喀木率禁旅自河南進征

並調西安駐防兵會勦根特率兵破賊黨甄以鍾等於房縣旋師  
復敗賊方國成於谷口六年叛鎮姜瓖踞大同其黨虞允白璋張  
萬全等陷平陽蒲州及臨晉猗氏河津諸邑根特隨總督孟喬芳  
侍郎額色統軍渡河勦賊復蒲州臨晉河津進征平陽白璋糾步  
騎六千至榮河迎戰根特同副將趙光瑞等奮擊大破之斬二千  
餘級復逐賊至黃河賊未及濟我師薄之溺水死者無算遂斬白  
璋餘賊竄入孫吉鎮悉殲焉移師趨猗氏偽監軍衛登芳依山結  
寨與張萬全爲犄角以抗根特分兵擊斬萬全殲其眾移兵轉戰  
生擒登芳陣斬偽將王國興等三十員復勦聞喜賊偽都督郭中  
傑兵於候馬驛追奔三十里斬獲無算仍還駐西安九年還京授

參領三遇 恩詔晉世職一等輕車都尉兼一雲騎尉十年僞秦  
王孫可望與其黨馮雙禮白文選馬進忠等踞武岡寶慶根特隨  
貝勒屯齊征之自永州趨寶慶賊眾十餘萬扼險隘抗拒根特鼓  
勵將士分路截擊以驍騎衝陣賊眾遂亂時正黃正紅二旗兵方  
與賊戰根特復躍馬往夾擊之賊大敗進征武岡有牧馬賊千餘  
來犯又敗之十一年九月從甯海大將軍伊爾德往浙江剿舟山  
賊以右翼兵擊僞伯阮思及賊將陳六御兵獲其戰艦及紅衣礮  
復舟山十二年敘功晉爵三等男署鑲藍旗滿洲副都統十四年  
敘復舟山功晉一等男十五年授鑲藍旗蒙古副都統康熙十六  
年三月擢本旗滿洲都統列議政大臣二十三年四月以老病乞

休三十二年卒 賜祭葬如典禮諡襄壯子格圖肯襲爵

右 國史館本傳

根特滿洲鑲藍旗人姓瓜爾佳氏世居尼馬察地襲父伊努佐領世職順治元年從大兵入山海關勦流賊至一片石敗賊帥唐通追至慶都斬殺甚眾又敗土賊於馬勝口二年加世職爲三等參領六年任刑部理事官山西流寇虞允作亂陷蒲州及臨晉諸縣根特從陝西總督孟喬芳往征之渡河直趨蒲州破賊復其城臨晉諸縣悉平偕副將趙光瑞趨平陽擊偽帥白璋破其眾六千追至黃河斬璋餘賊盡殲遂引兵趨倚氏偽監軍道衛登芳與賊帥張萬全拒我兵倚角根特分兵奮擊陣斬萬全生擒登芳斬賊將

三十餘人賊兵七千餘人由猗氏趨聞喜賊帥郭中傑以萬餘人  
逆戰亦破走之斬首八千獲器械馬騾無算三遇 恩詔加世職  
至一等輕車都尉又兼一雲騎尉十年偕侍郎哈哈木破鄖陽賊  
甄以鍾等於房縣駐防西安又敗賊渠房國成於谷口從貝勒屯  
齊征湖南趨寶慶遇孫可望等兵十萬同覺羅莽嘉擊破之至武  
岡州再破賊眾以功加三等男十一年從征浙江剿舟山遺孽僞  
總制陳六御率其眾三萬船二百餘來犯擊敗之獲賊艘二十有  
七遂平舟山敘功加世職爲一等男十五年授蒙古副都統康熙  
十六年授本旗滿洲都統任議政大臣三十二年卒 賜祭葬諡  
襄壯



國史言行錄

右 國史賢良小傳

三三

劉詔

劉詔山西朔州人由行伍洊授浙江温州鎮標守備康熙十四年八月逆藩耿精忠僞都督劉邦仁糾眾萬餘陷黃巖詔隨副都統吉勒塔布等自仙居進剿遇賊半山嶺擊之斬首二千餘級十月復擊敗僞都督曾養性於温州及所屬上塘斬賊二萬餘乘勝克復黃巖太平樂清青田四縣捷聞得旨嘉獎下部議敘十五年遷黃巖鎮標中營遊擊尋養性糾眾水陸來犯貝子傅喇塔分路迎擊陣斬賊黨孫可德等及眾萬餘養性敗遁詔在事有功加右都督遷福建督標前營參將十九年大軍潛由山東埭萬人洞橫塘灣腰樹江東橋及江東橋水路分七路剿海賊鄭錦於廈門詔

隨總督姚啟聖等連破陳洲馬洲灣腰山觀音山展旗豐門澳頭  
果堂太平石瑪三人河王洲等十九寨斬賊四千餘大軍會攻遂  
取廈門錦遁臺灣 上獎其功下部議敘二十年授雲騎尉世職  
加左都督遷廣東惠州協副將二十二年追敘半山嶺上塘等處  
擊賊功加授三等輕車都尉准襲四次二十五年擢廣東順德鎮  
總兵三十三年卒子任子定國襲世職

右 國史館本傳

許貞

許貞福建海澄人初爲海賊鄭錦僞靖海將軍康熙三年三月率僞官七十餘兵六百赴漳州投誠投左都督五年令攜所轄兵駐九江八年廷議以荒地分給投誠兵耕種移貞駐贛縣爲屯墾都督十三年六月逆藩耿精忠叛黨賈振魯曾若干糾眾陷石城犯甯都貞率遊擊周球等赴援敗賊於黃地馳至甯都城下賊方繞城數市進擊之斬千餘級獲礮幟器械賊敗走追及石城之新田又大敗之復石城八月賊犯興國貞擊潰賊眾復馳援蠟石寨斬賊百餘九月敗賊零都之天華山李芬江長樂里進克橋頭寨十月克零都之五仙白奇田產三寨及興國之江背峒十二月克興

國之江頭上龍二寨十四年二月招降贛州之寶石寨丁口萬餘  
巡撫白色純以貞督率不食餉屯丁屢擣賊寨勦撫著勞入奏  
諭嘉貞下部議敘加太子少保四月江西總督董衛國以撫州建  
昌廣信三府賊未靖請增設總兵轄兵二千駐建昌兼轄撫州廣  
信且言貞備餉給屯丁奮勇勦賊半載餘貲財罄竭力膺斯任卽  
以隨征兵充營額疏下部議行授貞江西撫建廣總兵六月會勦  
賊眾於宜黃擊敗之追至崇仁樂安賊遁遂復三縣十二月耿逆  
黨耿繼善窺伺建昌使其黨楊玉太李懋珠樂燦分踞界山麻姑  
山貞率遊擊王朝功敗之斬千餘級復擊賊之由麻姑山犯建昌  
南關者斬級數百十五年正月以前此耿逆兩次誘叛並擒其使

以逆書獻部議左都督之上無級可加應記功 上以貞屢次剿賊出首逆書勞績茂著 命部優敘 予雲騎尉世職二月由揚華山剿賊麻姑山賊掘壕築土列木馬官軍緣崖登斬偽總兵揭重信等三千餘眾盡洗賊巢六月進剿蕭家鑑二聖山賊棄營遁焚其營四千餘賊由杉關新城二路走追斬千餘級八月剿賊南豐至揭家嶺奪隘賊竄走追至廣昌吳氏岡降偽總兵揭斯進遂復南豐廣昌九月剿瀘溪賊瀘溪地在萬山中偽總兵楊益茂林鎮等糾眾四萬負嶠跳梁勢猖甚貞進剿於佛合嶺奇南嶺賊眾踞隘立柵官軍援而上盡燬其巢復瀘溪十一月懋珠糾三萬眾寇南豐貞率兵馳援進擊楊梅巖前後夾攻斬偽總兵王大耀等

四干餘級燬賊營十餘十二月偽總兵王霖副將何承統踞新城縣蹂躪鄉村貞會師進勦復新城追至黃土關杉關降偽副將劉相等十六年五月懋珠玉太並踞樂安縣副都統尼滿提督趙賴由中路進勦貞出西路至白石嶺擊賊賊潰逃復樂安玉太窮蹙繳偽印劄率偽總兵徐虎及所部六千餘人降十七年正月勦廣昌賊克籐市楓樹二寨五月敘前功晉騎都尉七月擢撫建廣饒南吉六府提督時廣信土賊江機楊一豹聚眾數萬踞封禁山江潁山倚險立木城爲巢八月貞與總督董衛國統兵分兩路勦之克頭關二關三關擣外中裏三村賊退入雞公山猴子嶺又敗入封禁山復竄黃柏村何家寨官軍追斬萬六千餘級墮崖澗死者

無算機一豹攜殘孽遁入江潁山十八年四月貞率兵由弋陽雙  
港進攻洪山詹源屢挫賊別遣兵閒道截擊獲糧百餘石復分三  
路掩擊斬一豹之弟一虎偽官二十五賊兵二千四百餘機走閩  
界一豹走貴溪嶺西五月饒州偽將軍陳璧流突弋陽之北鄉貞  
馳兵征勦斬偽參將王文斌追至大源橫港擒璧誅之十一月  
詔江西全省俱令貞統轄十九年正月率兵勦一豹由江潁山火  
燒關進復分兵要截一豹勢窮走福建與機偕降於康親王傑書  
軍二十一年九月自陳乞罷 諭嘉勦禦賊寇安靖地方勤勞茂  
著令供職如舊十二月調廣東提督二十四年二月入 覲 諭  
日爾在江西著有戰功朕嘉爾勞故簡任提督近聞廣東盜賊未



靖爾宜加意緝捕以安民生貞奏曰廣東多溪水盜賊出沒其中最難捕治臣今造小船設水塘晝夜巡哨庶盜賊可息 上曰加竟綏輯使兵民兩安斯無負職掌是年敘江潁山殺賊功加雲騎尉三十四年三月卒於任 贈少傅 賜祭葬如例其騎都尉兼一雲騎尉世職註入贛州衛子鳳朝孫克寬作哲遞襲三次循例停止乾隆三十二年十月以綠旗軍功襲滿 恩予貞裔恩騎尉世襲罔替

右 國史館本傳

余自少讀史傳見古名將戰攻奇績未嘗不慷慨太息想見其爲人至如遷史之敘田單韓信班書之傳李陵陳湯范書述光武之

戰昆陽耿身之平張步其文精采倍常至今凜凜有生氣是知戰  
功待文以傳而文亦藉戰功以奇也頃在史館嘗恨明代將帥功  
績載於狀誌碑傳者都不詳惟唐荆川爲沈希儀敘廣右戰功曲  
折明盡如畫据以立傳便可比美前史故知當世不乏奇功特載  
筆者聞見有不及耳若今少保許公之鎮江右其戰功可得而述  
焉公諱貞字蓋臣閩之海澄人初爲鄭氏將康熙初年以左都督  
統所部歸朝 詔仍其官駐九江已而移屯贛縣居久之滇黔變  
作湖湘諸郡皆陷而耿精忠反閩中出兵杉關廣信建昌撫州諸  
山賊蜂起應之州縣大半破沒其所遣驍將賈振魯者規取贛州  
以通楚寇陷石城圍甯都勢張甚虔人震恐公在屯聞發憤嘆曰

鼠輩猖狂乃至是乎大丈夫立功名報國家此其時矣遂以十三年五月二十四日起兵赴援時公閒居久部曲多散去衣甲器械不完而公常教人舞藤牌用挑刀人多練習乃椎牛醢酒集屯丁諭以忠義大節聞者皆感奮得選卒四百率之行賊眾數萬營於黃坊所過無敢撓鋒見公偏師前不爲意公大呼突陣跳盪無前藤牌軍一躍數丈人馬辟易搏戰數十合賊眾大潰斬首數千獲甲幟蔽矢無算於是軍容始可觀乘勝解甯都之圍進復石城斬首三千八月賊圍興國急公馳救之立解剗雩都瑞金盡平天華長樂伍遷白奇諸砦招降李婆紅旗石寶諸砦賊眾數萬出難民三萬餘人屬有司加意拊循督撫交章上其功加太子少保時公

威名日盛閩寇畏之潛遣辨士以高爵誘公他寇亦多遣人致書進說公一不啟書械其使以聞顧遣閩人饒元結僞總兵張存歸朝存踞順昌以牽制延汀耿擊大患苦之於是天子知公赤心可大用擢公總兵轄湖東三郡駐節建昌以十四年六月視事未逾月復宜黃崇仁樂安三城建昌先爲賊踞安親王復而守之顧環城四十里皆賊賊營於麻姑山蕭家鑪楊華芙蓉諸山砦者無慮三四十萬偪城而軍眈眈下瞰親王以爲憂公徐白王曰賊雖多易與耳請破彼一砦以爲驗王尙未知公之善用兵也姑應曰諾公出賊不意以夜二鼓疾馳勦蕭家坪冒險突上黎明破之王晨召公不至聞其出勦也大驚惟恐失之已而公還獻捷王乃大

喜賜食慰勞於是王知公果良將可屬大事遂以建昌委公而身  
率師自袁州進攻長沙畱滿兵五百公部卒僅二千賊聞王軍西  
行度城守益單以十二月二十八日并力攻城一軍駐城東之沙  
坪一軍駐城東南從姑山一軍薄南門城東多民居沙坪平坦他  
將請攻之公不可分遣裨將守南門而自將銳卒衝從姑山山高  
賊渠屯焉不虞我軍猝至蒼黃迎戰大敗遁走而賊之攻南門者  
方鴟張公自山馳下掩出其後賊大驚表裏夾擊盡殲其眾盱江  
爲之赤自是賊膽落不敢復議攻城矣捕得生賊言賊度官軍必  
攻沙坪則出兵縻我而從姑山之眾下焚民居官軍不得還城卽  
破矣今驟攻從姑則沙坪之眾弗能救也諸將乃大服麻姑山最

高賊眾數萬踞其上環而砦者數十里一急百應公默計方春水發溝澗皆成河諸砦隔絕乃可破也於是按兵休士顧就麻姑山麓平敞處時時引兵操演賊見兵來以爲將攻己也擐甲執戈以待公操罷徐回久之賊益懈不爲備春水暴漲賊爲浮橋相聯絡公密具舟積薪其中十五年十月晦公復引兵出操士卒皆不知將攻麻姑也抵山麓忽引而上直突賊營賊分眾掠糧於外畱砦者不意大軍猝至惶駭不知所爲而別校分駕薪舟燒絕浮橋他賊不能相救一日破六十餘砦積屍滿谷煙燄塞天於是南山之賊皆盡而城東二聖山閩寇耿二營焉其餘沙坪紅門梓木嶺諸賊蜂屯蟻聚不可勝數公計賊眾且有備故爲緩攻以懈之五月

五日當競渡眾謂賊在近請已之公故縱龍舟往來盱江置酒張  
樂會諸將聚觀賊熟視不敢出聲息公益知賊虛實遂以六月六  
日進剿二聖山直衝中堅賊所恃礮火弓弩我軍肉薄而上藤牌  
蔽身矢石不能傷長刀一揮甲札皆徹賊大敗耿二踉蹌遁去連  
破四十營斬馘無算餘盡走入杉關自王師西行建昌危於累  
卵公獨守孤城者七月以饑疲之兵二千當方張之賊數十萬而  
胸有成算整暇從容卒能以少擊眾以弱摧強盡殲羣寇安簡二  
親王屢致諭書褒美文武大吏倚公如長城焉七月復金谿南豐  
八月復廣昌九月復瀘溪累功授世職十月破賊蓮塘十一月援  
南豐十二月復新城追賊至杉關於是湖東三郡無賊而吉安寇

韓大任者驍勇有智數號小淮陰與官軍久相持不下糧盡出走以十六年五月入樂安簡親王度攻大任非公不可檄公提師擊之遇於跌水嶺大任所將多邊關勁卒垂死猶反鬪公與之一日八戰彼此疲極坐睡少頃輒起復鬪我兵益奮寇不能支奔甯都眾猶二萬屯於都湖立木城畫塹而守公攻圍兩月寇出挑戰輒不利乃棄城潛遁公星馳追躡蹙之於永豐又蹙之於黃塘虎峒其眾死亡略盡乃投閩康親王軍前乞降以公窮追力戰故也十七年正月平廣昌之簾弔楓樹二砦諭降僞將饒大武等五十餘人兵民五千餘二砦舊稱天險四面懸崖攀藤猿挂而上頂寬平可容數千家有池不竭粟支數年公乃營於對面永安山多製火



器會天大風發礮焚其廬賊升屋救火遙縱火筒擲之不得上須  
與灰燼賊窮乃乞降先是麻姑二聖之賊既滅公念餘黨不足窮  
捕遣人四出招撫僞總兵揭斯進等僞將軍楊玉太等僞都督余  
雄等先後受撫者三十餘輩凡將吏千餘人兵卒數萬其或不聽  
命亦不遽加兵徐徐曉諭之初過廣昌僞將軍劉汝桂等不就撫  
而潛遣人入營探聽公引令徧行營中曰我軍虛實恣汝觀之歸  
語汝將欲降則降不降善守汝砦吾今未加兵俟軍還仍不降攻  
汝必矣宜固守某險要不能守而破者玉石俱焚毋悔廣昌民欲  
薙髮公曰徐之吾未能畱兵去賊復至必僂汝吾歸滅賊汝薙髮  
未晚也民皆感激泣下汝桂等服公威信亦率其眾出降公仁而

有度皆此類也諸山砦初或恃險不卽降及藤弔楓樹平相顧詫  
曰二砦猶破吾等向若不降無噍類矣是年七月 優詔褒獎晉  
公提督兼轄饒州南昌吉安凡六郡其冬 命提督江西全省軍  
務所部將領俾自擇補用不拘成例以公熟識其才得收指臂之  
效也劇賊江機楊一豹者踞江潁山爲巢四出剽掠公會師勦之  
自錢村入賊立木城爲三關深溝堅壁兵不能進砦後有高山公  
遣人閒道攀援至山頂下瞰賊巢第苦乏水饑疲不復能鬪乃命  
截竹爲筒盛斗水人負一筒裹乾飯宵行黎明至山顛恣飲飽餐  
以待賊望見上山迎鬪我兵乘高擊之賊披靡墜崖谷死乘勢至  
砦後鳴角聲礮賊守關者聞之謂官軍已入砦後散走大軍長驅

而進盡犁其巢賊首走雞公山猴子嶺封禁山皆絕險人跡不到  
輒躡其後襲破之又走洪山山有黃巢殿自昔官軍無至者公又  
破之十八年四月追賊至江濟山卽賊巢爲營賊謀夜劫營公訶  
得之令鑿地三尺以其土壘垣三尺城塹立就士露刃植立垣下  
戒賊至毋得出聲而別遣將伏林中賊果夜至忽見垣塹斬然大  
驚發火見垣內白刃如林惶怖反走伏兵出賊狂竄相蹂躪死進  
破詹源老巢江楊等亡入閩歸款論功復加一世職二十二年二  
月 命移鎮廣東公自起兵至是首尾九年凡遷官四加銜一加  
級五 予世職三大功奏聞者二十餘次其餘小小戰績不可勝  
紀惟 天子嘉公忠勇召入陛見褒勞再三公叩首言 國家洪

福 主上天威小臣何功之有 上問在某處某處殺賊幾何公  
又叩首言臣逢賊便殺不記多少 上笑而頷之知公樸誠益重  
公公爲人廉謹和易謙退不伐平居左圖右書接對士大夫恂恂  
儒雅不知其爲元功宿將也持軍嚴整禁部下勿掠勿淫勿殺降  
勿俘良每出軍以郡縣僚吏偕行破賊得難民婦女輒帷置別室  
屬吏謹視之遣還其家破砦得積穀令軍民隨力負取軍敢奪民  
僇以徇凡收復城邑他將有議攻山砦者公曰方亂民結砦自保  
不皆賊也止勿攻所全活不可勝計以故江右人深德公家祠戶  
祝迄今思慕弗衰云嗟乎自三藩倡亂東西交訐潭岳撫信之賊  
中相隔闕者虔州一綫地耳公崛起屯閒扼其喉而不得進使賊

連雞之勢不成遂乃偏師橫鶩霆擊風驅令麻姑玉笥之閒空無  
賊巢 王師得以開長沙埽滇孽而粵閩二寇縮爪鈐牙坐困井  
底同歸殄滅公之功在社稷不細矣而 天子重公尤在矢心報  
國丹誠不渝蓋嘗論將帥如公忠壯者無幾人余從左右史之後  
謹據功狀論而次之俾異日傳功臣者有考焉

右江右戰功記潘耒撰

郎坦

郎坦滿洲正白旗人姓瓜爾佳氏內大臣烏拜之子也年十四任三等侍衛 世祖章皇帝順治六年遷二等侍衛隨端重親王博洛征叛鎮姜瓖師次渾源州城圍之賊渡濠來犯郎坦射其酋貫心而殪遂敗賊眾師還擢一等侍衛八年以烏拜附和內大臣洛什等造言搆釁獲罪並革郎坦任九年 恩授三等侍衛尋復一等侍衛 聖祖仁皇帝康熙二年代父管佐領遷護軍參領隨定西將軍圖海征流賊李來亨等於湖廣茅麓山同護軍參領葉楚赫深入賊巢擒僞官十一人四年襲父一等子爵仍任一等待衛十二年京城有邪教陳三道等設壇惑眾郎坦率諸侍衛逮繫之

十三年奉 命行邊捕獲逃盜張飛駸等於板城十九年擢正白旗蒙古副都統明年調本旗滿洲副都統二十一年八月 上以鄂羅斯屢擾黑龍江邊境久踞雅克薩城 命郎坦同副都統朋春率兵沿黑龍江行獵覘雅克薩情形相度水陸往來遠近十二月疏言鄂羅斯久踞雅克薩恃有木城若發兵三千攜紅衣礮二十具即可攻取陸行自興安嶺以往雖無險山而林木叢雜途徑仄隘冬雪之時沙結冰堅夏日遇雨泥深淤阻惟輕裝可行水程自雅克薩還至愛濬城於黑龍江順流行船僅需半月觀兩岸悉可緯挽若逆流行船約須三月視從陸倍期於運糧餉軍器輜重爲便覓有大船四十小船二十六宜增造小船五十餘奏入 詔

甯古塔將軍巴海等造船備礮擇要地駐守暫緩進兵二十二年  
二月擢郎坦前鋒統領九月 命往會黑龍江將軍薩卜素酌議  
駐兵額素哩事宜還奏額素哩今年七月卽經霜雪來年宜乘春  
和時以甯古塔諸處兵分爲三班更番往駐 上以更番戍守非  
久長策不允行二十三年甄別八旗管兵官員之弗勝任者罷郎  
坦前鋒統領以子爵隨旗行走二十四年正月都統朋春同臺灣  
投誠左都督何祐率兵征雅克薩副都統班達爾沙護軍統領佟  
寶爲參贊郎坦以副都統銜隨征師旣行 上遣侍衛往 諭朋  
春曰朕以仁治天下素不嗜殺爾其嚴諭將士毋違朕旨以我兵  
馬精強器械堅利鄂羅斯勢不能敵必獻地歸誠爾時勿殺一人



俾還故土宣朕柔遠至意五月師薄雅克薩城朋春班達爾沙等軍其城南何祐等集戰船於城東南潛進紅衣礮於城北與副都統溫岱等將夾攻之先集柴城下爲焚城狀其城長額里克舍乞降卽坦宣 恩 諭其罪額里克舍稽顙謝引六百餘人徙去其願來內附者巴什里等四十五人挈妻子及前此被掠之索倫達呼爾戶口百餘俱隨大軍還奉 詔安插內地毀其木城卽坦與議政王大臣等會議鎮守事宜議於墨爾根築城駐兵是年冬鄂羅斯復踞雅克薩築城明年二月 命同班達爾沙攜礮率籐牌兵百往會黑龍江將軍薩卜素進征旋奉 詔以卽坦諳悉地形卽令參贊軍務六月師薄其城鑿壕築壘四面列圍賊出拒阻擊

敗之斬額里克舍尋以鄂羅斯察罕汗遣使詣關謝罪請釋雅克薩圍上命以別遣使來議地界詔釋圍退駐查克丹待之尋還駐甯古塔明年擢郎坦正白旗蒙古都統二十八年鄂羅斯議界使人費耀多囉等至尼布楚上遣領侍衛內大臣索額圖等同郎坦往議以格爾必齊河及額爾因納河爲界毀雅克薩城令其人徙去是年調正白旗滿洲都統二十九年古北口外突聚羣盜劫掠屯莊郎坦奉命偕侍衛赫濟爾亨等督石匣城古北口官兵捕勦出喜峰口追及之龍鬚門盜以烏鎗抗拒逃踞山頂擲石拒阻傷害綠旗兵三人從役一人赫濟爾亨率兵發矢殪十餘盜復分兵山坡繞後截擊斬四十餘盜無一脫者郎坦還奏羣

盜逞兇傷害兵丁侍衛及眾官兵奮勇擊斬狀下部議卹 賞紀  
錄有差三十年正月 上以噶爾丹肆掠喀爾喀偪我邊境授郎  
坦安北將軍駐防大同二月疏請出邊駐喀喇穆倫以偵賊情申  
嚴邊備 詔暫駐歸化城七月 命同副都統碩鼐參領素丹等  
勘閱甯夏延綏西甯沿邊進兵道路以 閏三十一年擢領侍衛  
內大臣兼火器營總管列議政大臣三十二年授昭武將軍率兵  
駐甘州八月擒獲哈密回人之輸稅厄魯特者訊知噶爾丹所在  
請於來春率兵進剿疏下王大臣等議以噶爾丹已遣使乞宥罪  
止之三十二年三月 上以甯夏近賀蘭山爲邊隘要地 諭郎  
坦率兵移駐與甘肅提督孫思克分偵噶爾丹及其姪策妄阿喇

布坦構事遇有邊警會商禦勦七月 上聞噶爾丹將備圖拉  
諭郎坦熟練邊情移兵圖拉禦勦尋以圖拉無警還京仍任領侍  
衛內大臣預議政三十四年五月 命往盛京察視邊隘至入殺  
虎口疾劇 遣太醫往視六月卒年六十有二櫬至通州 遣侍  
衛四人奠茶酒 賜祭葬如例子拉忻襲爵

右 國史館本傳

國朝書庫對復不錄

卷三十三

臣

國朝耆獻類徵初編卷二百七十六目錄

將帥十六

瑪奇 子常賚

尙之孝

施琅 子世驥

趙良棟



國朝耆獻類徵初編卷二百七十六

通奉大夫前署江西巡撫江西布政使司布政使湘陰李桓輯

將帥十六

瑪奇 子常賚

瑪奇滿洲鑲白旗人姓納喇氏 國初有哈達萬汗之族素巴海率二百人來歸爲世管佐領瑪奇其曾孫也初由顯親王府護衛遷長史旋擢護軍統領康熙十八年十二月遷鑲白旗滿洲都統列議政大臣十九年三月 上念廣西進征大兵勞苦日久宜番休 命瑪奇偕都統趙璉副都統宏世祿統兵赴廣西更代師次柳州降僞將王宗孝等三千餘人十月征南大將軍賴塔由南甯



進取雲貴 命瑪奇率兵急進十二月隨賴塔至西隆州率前隊  
兵進抵石門坎僞將軍何繼祖王宏勳等糾眾萬餘踞險固守二  
十年正月瑪奇同都統勒貝等率前鋒急先奪隘口後軍繼進合  
擊自午至酉前隊綠旗兵礮矢俱盡引退賊四路伏發犯我軍前  
鋒護軍分隊立俟賊近夾擊大敗之盡得其險隘分兵固守次早  
率得勝兵疾馳安籠所復其城復領右翼兵擊繼祖及僞將詹養  
等於黃草壩破之奪營二十二進軍曲靖連復馬龍州易龍所及  
楊林城賊踞渾水塘立營與嵩明州遙應分遣兵趨嵩明州乘賊  
不備攻破東門賊逸出西門追斬僞遊擊守備等渾水塘賊盡遁  
於是會員子彰泰大軍直趨雲南省城營歸化寺吳世璠遣其黨

胡國柄劉起龍等出犯瑪奇率頭隊同諸將奮擊陣斬國柄起龍  
遂圍城十月偕勒貝等奪城西北銀錠山賊列礮抗拒瑪奇等挺  
立當礮衝督兵掘壕築壘壘成俯瞰城中縱礮賊不能支內亂世  
璠自殺克雲南城瑪奇同都統穆占先入城撫民籍賊黨屬尋授  
鎮安將軍駐防雲南瑪奇偕彰泰等奏畱每佐領兵十名駐省時  
帝福追剿叛黨胡國柱於建川州所率兵有年久者應於駐省兵  
內派換瑪奇疏言滇省初平土司猥獯甚多情性無定又新設官  
兵散處各地皆須防範若派換則需撥每佐領四名所餘畱兵僅  
五百名有奇未免單弱建川州距省千里山高路險遣兵換兵刻  
期難到卽到後馬力疲乏亦難追寇若再需休養又恐坐失事機

希福見帶之兵足以辦賊事竣卽率回京請將駐省兵停其往換以固守禦下議政王大臣議從之二十三年八月甄別八旗大臣瑪奇以才力不及革職尋諭曰雲南兵丁屯駐日久今地方底定可乘此冬撤回十月瑪奇統滿兵回京三十五年卒子常賚雍正元年授工部員外郎遷郎中二年調戶部郎中三年正月任通州坐糧廳十月授廣東布政使四年十二月擢福建巡撫時廣東巡撫楊文乾請假葬親命常賚署理五年七月疏言廣東近水田畝每苦夏秋潦漲廣州肇慶二府所屬受衝爲最請以廣州通判兼管南海三水隄工肇慶通判兼管高要高明四會隄工冬閒督率隄長按戶派工務期修築堅固定賞罰法保固至三四年

者紀錄加級五年者卽升銜決者鐫秩有差至於修物料請仍征魚芻鴨埠等稅以充公用 詔允所請八月赴閩十一月疏言直隸河南山東山西陝西廣東六省流犯例發福建安插臣抵閩三月各屬流犯脫逃接踵皆因立法不嚴是以獲逃補配者什無二三請嗣後流犯配後脫逃地方官逾限不獲該管同兼轄官罰俸一年主守之保甲杖革如逃回原籍族鄰容隱按不應重律擬杖獲犯補配日先枷責以正逃罪再加徒役三年庶流犯畏法不敢逃地方官畏處分不敢不嚴緝矣部議兼轄官罰俸六月餘如所請行六年正月調雲南巡撫先是常賚署廣東撫篆盜失摺匣鑰匙令匠役私造將軍標兵窩盜獲贓徇庇不究龍門汛盜劫兵械

四庫全書 卷二百一十一  
三  
電白山賊劫人割耳從化山賊劫人勒贖並匿不奏又與將軍石  
禮哈署督阿克敦布政使官達訐奏楊文乾六月 諭曰常賚本  
朕藩邸微員因其平日謹慎安靜是以擢至巡撫望其不忍欺隱  
也乃署撫任以盜失鑰匙潛匿不奏尙得謂無欺隱乎且與石禮  
哈等黨同伐異其罪不容貸著革職赴廣東質訊 命通政使畱  
保工部郎中喀爾吉善往粵偕總督孔毓珣會鞫各案常賚坐私  
造摺匣鑰匙擬斬七年十一月 諭曰原任都統瑪奇征剿吳逆  
著有勞績伊子常賚居官尙無贓款祇因與石禮哈阿克敦官達  
等傾陷楊文乾又奏事不實以致罹於重譴今朕念伊父之功特  
赦其罪候旨另行簡用尋 命隨兵部尙書查弼納往陝甘總查

軍需諸務八年五月擢刑部右侍郎十二月署甯夏將軍九年二月  
月 特授鎮安將軍統領肅甘涼兵五千自爲一隊以備應援五  
月率兵駐西安八月授西路副將軍十年正月準噶爾賊兵侵偏  
哈密常賚偕都統良敦總兵張存孝率滿漢兵三千二百名前赴  
無克克嶺備禦三月投內大臣仍畱軍營七月隨大將軍岳鍾琪  
統兵一萬二千移駐穆壘九月自穆壘移駐巴里坤十一年十月  
署大將軍查郎阿奏冬雪深積請分別大臣駐劄以慎防守副將  
軍張廣泗統兵一萬二百五十駐北山常賚統兵九千駐南山十  
三年閏四月 命統綠旗兵一萬畱駐巴里坤提督顏清如尙書  
馬會伯爲副嗣準噶爾乞和乾隆元年六月撤巴里坤兵與畱駐

國朝三才類傳卷一百一十二

哈密之提督樊廷總兵米國正管轄還京任內大臣五年九月因疾乞罷 命以原官致仕子半俸十一年八月卒 賜祭葬如例

右 國史館本傳

## 尚之孝

尚之孝漢軍鑲藍旗人尚可喜次子幼隨父於鎮所康熙十三年任藩下都統值逆藩吳三桂耿精忠反潮州總兵劉進忠應之踞城叛可喜令之孝率兵討進忠先是可喜欲以長子之信襲其平南王爵至是惡之信酗酒殺因疏陳之孝律已端慎馭下寬厚堪嗣職 聖祖仁皇帝命之孝襲封平南王之孝畏之信啟巡撫劉秉衡爲之奏辭部議令可喜如舊理事俟賊平以之孝襲時普甯爲進忠黨劉斌所踞知縣段藻閉門絕賊我兵奮擊敗賊斌竄走之孝復之孝誘斌出城迎戰藻閉門絕賊我兵奮擊敗賊斌竄走之孝復普甯進征潮州進忠糾眾抗拒我兵三戰皆捷陣斬偽副將陳璉



及賊兵千餘又攻克東津筆架山洗馬橋賊營十四年 詔授之  
孝平南大將軍之孝圍潮州歲餘進忠求援於海賊鄭錦錦遣僞  
總統劉國軒引賊萬餘助進忠我兵戰失利之孝退駐惠州十五  
年可喜以疾劇入奏 上命之孝還廣州視疾代理藩務之孝未  
聞 命之信已降三桂脅之孝撤兵棄惠州之孝弗與抗解兵柄  
侍可喜疾及可喜卒仍閒居廣州十六年之信歸順襲父爵之孝  
還京 命列內大臣之孝疏言臣詣 闕待罪分當誅戮乃蒙  
恩寬宥願募兵三千備軍械剿賊自效廷議如所請俟募兵數足  
分爲三營設將校給以俸祿赴簡親王喇布軍供調遣於是 詔  
授之孝宣義將軍十七年之孝率兵至江西時三桂餘黨猶分踞

吉安贛州山寨之孝與總兵許盛會師進剿多斬獲十八年招降  
僞總兵林興隆僞副將王國贊等三十餘員兵六千餘僞將軍楊  
一豹江機由廣信寇掠建甯邵武之孝奉 詔赴福建會剿師至  
汀州一豹等降於康親王傑書軍之孝還江西十九年江西平  
命之孝還京以所募兵畱充江西綠旗營伍是年九月之信以悖  
逆 賜死廣州法司議之孝應連坐 詔免之仍隨內大臣班入  
直二十年五月請迎其父骸骨於廣州歸葬海城得 旨俞允二  
十二年議政王大臣等追論之孝當之信叛時不能討賊邇者藉  
詞葬父久畱海城又奏請欲守 陵寢計圖宴逸應革職銜與其  
子弟並籍入內務府 詔從寬止削其職三十五年正月卒年五

十有七子崇坦官至鑲紅旗漢軍副都統

右 國史館本傳

施琅 子世驍

施琅福建晉江人初爲明總兵鄭芝龍部下左衝鋒 世祖章皇帝  
順治二年十一月大軍定福建琅隨鄭芝龍投誠遂隨大軍征  
廣東勦平順德東莞三水新甯等縣鄭芝龍歸京師其子成功竄  
踞海島屢誘琅助已剽掠琅不從其父大宣弟顯及子一姪一皆  
爲成功戕害十三年琅隨定遠大將軍世子濟度擊敗鄭成功賊  
眾於福州授同安副將尋遷總兵官仍駐同安 聖祖仁皇帝康  
熙元年擢水師提督時鄭成功已死其子錦糾眾窺伺海澄二年  
八月琅遣守備汪明等勦擊賊船於海門斬賊將林維獲其船及  
器械十月靖南王耿繼茂總督李率泰等攻克廈門賊眾乘船遁

琅率所募荷蘭國夾板船邀擊之斃賊千餘乘勝克浯嶼金門二  
島敘功加右都督三年加授靖海將軍七年琅密陳鄭逆負嶠海  
上雖戢翼斂跡未敢突犯而沿海不甯 朝廷兩次招撫尙梗頑  
如故若恣其生聚是養癰也宜急剿之疏上 召至京面詢方略  
琅言賊兵不滿數萬戰船不過數百鄭錦智勇俱無各偽鎮亦皆  
碌碌若先取澎湖以扼其吭賊勢立絀儻復負固則重師泊臺灣  
港口而別以奇兵分襲南路打狗港及北路文港海翁堀賊分則  
力薄合則勢蹙臺灣計日可平事下部議以風濤莫測難必制勝  
寢其奏於是裁水師提督授琅內大臣隸鑲黃旗漢軍二十年七  
月內閣學士李光地奏鄭錦已死子克塽幼部下爭權征之必克

因薦琅素習海上情形 上遂授琅福建水師提督加太子太保  
諭之曰海寇一日不靖則民生一日不甯爾當相機進取以副委  
任琅至軍疏言賊船久泊澎湖悉力固守冬春之際颶風時發我  
舟驟難過洋臣見在練習水師又遣間諜通臣舊時部曲使爲內  
應一俟風便可獲全勝二十一年四月給事中孫蕙疏言征臺灣  
宜緩七月彗星見 詔臣工指陳時務戶部尙書梁清標謂天下  
太平凡事不宜開端當以安靜爲主 上因命暫停進剿臺灣九  
月琅疏言臣於水師營中已簡精兵二萬餘戰船三百足破滅海  
寇請令督撫趣辦糧餉給臣軍而獨任臣以討賊無拘時日但遇  
風利卽可進兵 詔如所請行琅旋復請調陸路官兵隨征並

從之時鄭克塽雖仍其祖父僞爵稱延平王凡事皆決之僞武平侯劉國軒僞忠誠伯馮錫範共恃海道險阻致書總督姚啟聖言克塽願稱臣入貢不雉髮登岸如琉球高麗例啟聖以奏上不許趣琅進師二十二年六月琅由桐山攻克花嶼貓嶼草嶼乘南風進泊八罩國軒踞澎湖凡緣岸可登處築短牆置腰銃環二十餘里爲壁壘琅遣署遊擊藍理以烏船進攻賊船乘潮四合琅乘樓船衝突賊陣流矢傷目以帕漬血督戰益力總兵吳英繼之斬賊將及賊兵三千餘人克虎井桶盤二嶼旋以百船分別東西遣總兵陳蟒魏明董義康玉率兵東指雞籠嶼四角山西指牛心灣以分賊勢琅自督五十六船分八隊以八十船繼後揚帆直擣賊

悉眾來拒我師聯絡齊進總兵林賢朱天貴突入賊陣八隊踊躍奮呼東西兩路夾攻波濤騰沸自辰至申焚賊船百餘斃賊將及兵卒萬餘人遂取澎湖國軒乘小船遁歸臺灣與克塽及馮錫範等震懼無措乃遣使乞降琅爲奏請 上許之八月琅統兵自澎湖入鹿耳門至臺灣克塽率其屬薙髮迎於水次繳僞延平王金印臺灣平 上諭吏兵二部曰向來海寇竄踞臺灣出沒島嶼窺伺內地擾害生民雖屢經剿撫餘孽猶存沿海地方烽煙時警邇者滇黔底定逆賊削平惟海外一隅尙梗王化爰以進剿方略咨詢廷議咸謂海洋險遠風濤莫測馳驅制勝難計萬全朕念海氛不靖則沿海兵民弗獲休息特簡施琅爲福建水師提督前往相



度機宜整兵進征施琅忠勇性成韜鈴夙裕兼能洞悉海外形勢  
力任剋期可奏蕩平遂訓練水師整頓戰艦揚帆冒險直抵澎湖  
鏖戰立功大敗賊眾克取要地立奏膚功餘眾潰遁臺灣懾服兵  
威乞降請命已經納土登岸聽候安插自明朝以來逋誅賊寇始  
克殄除瀕海遠疆自茲甯謐此皆施琅矢心報國大展壯猷籌畫  
周詳布置允當建茲偉伐宜霽殊恩施琅著加授靖海將軍封爲  
靖海侯世襲罔替以示酬庸 遣侍衛齎 御用袍及諸服物  
賜之琅疏言臣蒙 特簡征剿海賊受 命之初竊意藉此可雪  
父弟子姪仇恨迨審量賊中情形要當服其心又不敢因私仇而  
致多傷生命幸仗 聖主威德克成厥功且大海風濤尤賴各鎮

臣吳英林賢等及協營將弁同心鏖戰臣又何敢貪爲己力茲荷  
恩加授靖海將軍爲榮已極乃錫封侯爵世襲罔替則不惟分  
所難當深恐武夫福薄弗克庇及子孫前此在內大臣之列蒙  
賜戴翎自離闕下夢想時榮伏乞皇上收回靖海侯世襲之  
成命仍恩賜戴翎俾有生之年雖遠在萬里猶如侍從班行日  
覲天顏臣願足矣疏上諭勿辭餘下部議部臣言在外將軍  
提鎮無議准給翎之例上特旨賜帶孔雀翎遣侍郎蘇拜往  
福建與督撫及琅議善後事宜時有議遷其人棄其地者十二月  
琅疏言明季設澎水標於金門出汛至澎湖而止臺灣原屬化外  
土番雜處未入版圖然其時中國之民潛往生聚於其間已不下

萬人鄭芝龍爲海寇時以爲巢穴及崇禎元年鄭芝龍就撫借與紅毛爲互市之所紅毛遂聯結土番招納內地民成一海外之國漸作邊患至順治十八年海逆鄭成功攻破之盤踞其地糾集亡命脅誘土番荼毒海疆窺伺南北侵犯江浙傳及其孫克塽積數十年一旦畏天威懷聖德納土歸命此誠天佑皇上以未闢之方與資東南之保障永絕海濱之禍患豈人力所能致善後之計尤宜周詳若棄其地遷其人以有限之船渡無限之民非閱數年難以報竣儻渡載不盡竄匿山谷所謂藉寇兵而齎盜糧也且此地原爲紅毛所有無時不在垂涎乘隙復踞必竊窺內地鼓惑人心重以夾板船之精堅海外無敵沿海諸省斷難晏然無

虞至時復勤師遠征恐未易見效如僅守澎湖則孤懸汪洋之中土地單薄遠隔金門廈門豈不受制於彼而能一朝居哉部臣蘇拜撫臣金鉉等以未履其地莫敢擔承臣伏思海氛旣靖汰內地溢設之官兵分防兩處臺灣設總兵一員水師副將一員陸營參將二員兵八千名澎湖設水師副將一員兵二千名初無添兵增餉之費已足以固守其總副參遊等官定以三年或二年轉升內地誰不勉力竭忠其地正賦雜糧暫行蠲免見在一萬之兵仍給全餉三年後開徵濟用卽不盡資內地轉輸蓋籌天下之形勢必期萬全臺灣雖在外島實關四省要害無論彼中耕種猶少資兵食固當議畱卽不爲紅毛荒壤必藉內地輓運亦斷斷乎其不可

國朝通志卷之三十一  
二  
棄我朝兵力比於前代何等強盛昔年封疆大臣無經國遠猷  
矢志圖賊狃於目前苟安盡還五省邊地以避寇患致賊勢愈熾  
而民生顛沛往事不臧致延禍及今重遺宵旰之憂臣荷恩  
高厚年六十有餘頻慮報稱無由熟審其地形勢若今日不言後  
來儻或滋蔓難圖皇上必責臣緘默臣罪又何能自追竊謂棄  
之必釀成大禍畱之誠永固邊隅會議之際難盡其辭不避冒瀆  
自行詳細披陳並繪臺灣地圖恭呈御覽事關封疆重大伏祈  
乾斷施行疏入下議政王大臣等會議仍未卽決上召詢廷臣  
大學士李蔚奏應如琅請尋侍郎蘇拜與總督姚啟聖等亦從琅  
議請設總兵等官及水陸兵並設三縣一府一巡道上允行琅

又同蘇拜等疏言納土歸誠之鄭克塽應攜族屬劉國軒馮錫範應攜家口同明裔朱恆等俱令赴京僞武職一千六百有奇僞文職四百有奇應候部議降兵四萬餘人或入伍或歸農各聽其便詔授鄭克塽公銜劉國軒馮錫範伯銜俱隸上三旗其餘僞官及明裔朱恆等命於附近各省安插墾荒二十四年三月琅疏言慮事必計其久遠防患在圖於未然邇者海禁既開設關差定稅額沿海商民增造多船飄洋貿易捕採紛紛水師汛防無從稽察據中軍參將張旺報稱劉仕明縮船出口給有官票往呂宋經紀載貨無多附搭人數一百三十三名一船如此餘槩可知弗爲設法立規節次搭載而往恐內地貧乏人民俱爲引去以臺灣難民

尚荷 皇上德意移入內地安插今內地之人反聽其相引而之  
外國殊非善固邦本之法卽觀外國進貢之船人數有限豈肯遺  
畱一人在我中土更攷歷代以來備防外國甚爲嚴密今雖許其  
貿易亦須有制不可過縱況新造貿易之船皆輕快牢固礮械全  
備倍於水師戰艦儻或奸徒竊發借其舟楫攘其資本恐致蔓延  
蓋天下東南之形勢在海而不在陸陸地之爲患也有形海外之  
藏奸也莫測且臺灣澎湖新闢遠隔汪洋雖有汛守官兵一遭阻  
截聲息難通其時必復議禁止貿易採捕甯惟負我 皇上子養  
億兆之德意將東南環海地方不又仰塵 宸衷顧慮哉 皇朝  
定鼎四十餘年偶有梗化之區精騎一到莫不降服獨此海氛積

年負抗調發勞費動關億萬幸蒙  睿斷航海征勦甫爾蕩定而  
四省盡弛海禁出入無忌臣在閩言閩當此未然深知情弊伏乞  
敕部行令督撫各將通省之內凡可興販外國各港門議定船數  
每船酌定人數其採捕漁船亦設法使互相稽察以杜泛逸海外  
則禍患不萌疆隅永以甯謐矣疏上會監督閩海稅務郎中伍什  
巴請令防守海口官員稽察各船有關口照票者放行無則拏報  
上命左都御史達哈塔往會琅確議旋議令關口稽覈船數人數  
仍歸督撫提鎮責成汛員防範是年琅疏請卹賞進勦澎湖傷亡  
及受傷兵丁部議令地方官再行察覈  上曰此等貧兵早給一  
日卹賞使得早受一日實惠此後一槩速行議給二十七年七月



琅入覲。賜朝服。先是二十三年七月內閣學士錫住奉使福  
建還。上詢及陸路提督萬正色品行若何。錫住以忠厚和平對  
上曰。萬正色前督水師時。奏臺灣斷不可取。朕見其不能濟事故  
將施琅替換。令其勉力進剿。一戰而克。二人今相睦否。錫住奏曰。  
二人陽爲和好。陰相嫉妬。上曰。施琅居官如何。錫住奏善用兵  
但行事微覺好勝。至是。上諭施琅曰。爾前爲內大臣十有三年。  
當時因爾閩人尙有輕爾者。惟朕深知爾待爾甚厚。其後三逆反  
叛。虐我赤子。旋經次第平定。惟有海寇游魂。潛據臺灣。尙爲閩害。  
欲除此寇。非爾不可。爰斷自朕衷。特加擢用。爾果能竭力盡心。  
不負任使。舉六十年難靖之寇。殄滅無餘。誠爾之功也。邇來或有言

爾恃功驕傲者朕亦頗聞之今爾來京又有言當畱爾勿遣者朕思寇亂之際尙用爾勿疑況天下已平反疑爾勿遣耶今命爾復任自此宜益加敬慎以保功名從來功高者往往不克保全終始皆由未能敬慎之故爾其勉之更須和輯兵民使地方安靜以副朕愛兵恤民並保全功臣之意施琅奏曰臣年力已衰封疆重大恐精神不堪 上曰爲將尙智不尙力朕用爾亦智耳豈在手足之力乎三十五年三月卒於官年七十有六 贈太子少傅 賜祭葬如典禮諡襄壯子世綸仕至漕運總督世驃仕至福建提督世范襲三等侯 世宗憲皇帝雍正十年以施琅入祀賢良祠

右 國史館本傳

施琅字尊侯漢軍鑲黃旗人世居福建晉江琅少有識度膂力絕人通陣法尤善水戰諳海中風候順治十三年海賊鄭成功圍福州定遠大將軍世子濟度知琅能命爲前部揚旗鳴鼓循海邊北至閩安賊聞琅至解圍走以功授副總兵守同安與廈門賊壘相對前後擒獲招降無算加都督僉事充同安總兵成功據臺灣故紅毛番地成功逐紅毛而據之益肆爲患康熙元年擢琅福建水師提督琅密陳金門廈門諸島可取狀鼓勵將士乘輕艦搏戰所向皆克降萬八千人晉右都督明年成功死子錦襲僞號琅請就閩省選銳卒先取澎湖必可蕩定廷議難之撤水師提督以琅爲內大臣十三年耿精忠叛海氛復熾已而鄭錦死子克塽幼其黨

爭權不相下人有離心 聖祖欲討之 詔琅問計琅具對曰願假  
臣專征權必埽除逋孽以報二十年復授琅水師提督至閩治舟  
楫練兵士二十二年六月師由銅山進奪苗嶼次八罩灣賊帥劉  
國軒據澎湖拒守琅使署遊擊藍理等以七舟衝賊堅南湖正發  
爲疾流所壓賊舩四合琅親率師衝其圍流矢中目戰不輟總兵  
官吳英繼之殺賊將七十賊兵三千餘遂取虎井桶盤嶼旋以百  
舟列東西各五十東指雞籠山西指牛心灣爲奇兵以分賊勢琅  
親督五十六舟分八隊進以八十舟爲後援賊悉眾迎戰礮矢雨  
集煙燄蔽天我師奮呼用命聲撼波濤總兵官林賢先陷陣八隊  
齊進東西兩路繼至夾擊焚賊舟百九十餘賊兵將多被擒殺精

銳殆盡劉國軒僅以身免克塽懼遂降先是琅父及弟俱爲成功所害人謂琅必執仇琅曰絕島新附一有誅戮恐反側子不安吾所以銜恤茹痛者爲國事重不敢顧私也論功授靖海將軍封靖海侯世襲臺灣既定 聖祖遣大臣至閩議棄畱孰便琅疏言其地北通吳會南接粵嶠乃東南之保障且野沃土肥居人稠密若抑令內徙人情安土重遷必至逋逃竄匿恐滋他虞今海氛旣靖臺灣澎湖兩處分內地溢設之兵得萬人足以固守無庸增設雖地當初闢正賦雜餉宜在蠲豁三年後開徵亦自足供軍食並無煩內地轉輸不宜棄遂置郡縣琅帥閩十五年三十五年卒 贈太子少傅 予祭葬諡襄壯

右 國史賢良小傳

公諱琅字尊侯一字琢公晉江人也曾祖祖父俱如公勳階官爵  
追 贈父諱大宣生三子公其仲也將誕母洪太夫人夢天神以  
鼓樂迎寶鏡授之寤而生公姿宇駿異里有定光庵公幼時從伯  
姊入庵賽神彷彿見旁泥象隨之拜起由是自負稍長識度湛厚  
膂力絕人見明季所在多竊發遂學萬人敵精曉五花陣法以居  
濱海尤善於水師海洋中風雲氣候講之甚悉初從戎伍討山寇  
頻有功授遊擊唐王之建號福州以爲左衝鋒嘗從大學士黃公  
道周出仙霞關以策干黃公奇之而不能用知事不可爲心謝黃  
公去明亡鄭芝龍子成功竊用永祿年號逋逃島上邀公入海用

爲左先鋒弟顯爲援剿左鎮公威名日盛鄭氏麾下皆歸仰成功  
寢生猜忌久益甚會有標弁犯法當死逃之成功所爲親校意揚  
揚無所憚公不能忍執而誅之成功大怒期滅公家羈贈公及弟  
顯禁公舟中贈公潛使人謂曰子胥并命終無益也速自爲計公  
給守者脫身走抵其故將諸故將感義一心并力脫公於難乘輕  
舟歸命 本朝家皆遇害成功後悔之常歎息曰楚國之患其在  
子胥矣順治十三年成功從海道圍福州定遠大將軍知公勇略  
遣領兵往救公曰賊聞吾至當自退走無事於戰也揚旗鳴鼓循  
海邊北上至閩安賊果解圍先遁以功爲同安副將同安與廈門  
切近屢擒其驍將降萬餘人升總兵官康熙元年授水師提督密

陳金廈可取狀鼓厲將士乘輕艦直擣其島俱克之僞帥逃歸臺灣降萬八千人策功授右都督挂靖海將軍印其年成功死子經襲僞藩名號公屢密陳征臺灣之計有旨召至京師面詢方略先是提督馬得功泛海東征遭風覆沒北方將帥不習舟楫行兵者多失利廷議懲於既往僉謂臺灣懸絕海外鹿耳天險可撫而決不可征於是撤水師提督以公爲內大臣封伯爵奉朝請時康熙七年也逮十三年耿精忠叛鄭經乘勢竊兩島踞泉漳諸郡十六年復諸郡十九年收兩島鄭經復遁歸臺灣二十年三逆胥定宇內廓清獨臺灣時出沒爲閩南患時安溪李文貞公光地方爲內閣學士奏言臺灣未平閩南夜不安寢不可以鱗介衣裳



之論爲比近鄭經死僞總制陳永華爲臺灣所信者亦死經子克  
瑛幼諸將帥權不相能果於殺戮兵民離心若以大師征之必克  
機不可失 上曰爾言是朕計決矣然孰可將者李公對曰必閩  
人熟習海中事而有智算威望者惟內大臣施琅可若任以專征  
臣保其功必成 上可其奏 召公問大計公奏言鄭氏擾亂東  
南歷四世盈五紀罪惡已稔數窮理極今日事勢征之必克在  
皇上天衷獨斷假臣專征之權軍機遲速得以自主必當掃除逋  
孽紆 九重南顧憂 上意益決復授水師提督加太子少保其  
年五月至軍簡兵士整舟楫泊平海衛衛設有井久廢涸公拜禱  
甘泉立沸命之曰師泉治軍歲餘舟楫完堅兵士練習二十二年

定期東征以六月興師大書將弁姓名揭於桅竿以別功臯由銅山乘南風進發泊於八罩灣八罩之水溢數尺舟艦安穩賊帥劉國軒守澎湖據險要爲壁壘凡緣岸可登處築短牆置腰銃環二十餘里爲固守計公筮日進討以十有六日丁亥選前鋒署遊擊監理等舟七隻直入賊艖奮呼力戰會南潮發爲亟流所壓賊舟四合公親駕帥艦衝其圍總兵官吳英繼之殺賊將大小七十賊兵二千餘會日暮泊西嶼戊子復歸八罩申軍令明賞罰己丑取虎井桶盤嶼庚寅駕小舟詳度形勢癸巳督師大舉重申軍令誓於眾曰今日之行期在必勝分布戰艦用五十隻從東指雞籠山爲奇兵五十隻從西指牛心灣爲疑兵以分賊勢五十六隻分爲

八股股七隻分三疊公居中爲一股左四右三八十隻爲後援分  
布有序鼓螺交響賊每舟用紅衣大礮一重至四五千斤鹿銃二  
百悉眾來拒總兵官林賢率先陷陣八股齊進東西兩路繼至夾  
攻海洋中礮火交加響震如雷子落如雨氣蒸如雲我師踊躍用  
命呼聲撼波濤用火桶火罐飛擲賊舟自辰加申焚賊舟百餘艘  
其將三百餘兵萬二千有奇賊精銳悉殲舟楫殆盡劉國軒乘小  
舟遁歸臺灣海洋占候之法雲合而風生雷鳴而風息將戰時黑  
雲乍起狂飈將作劉國軒命開筵以賀忽聞殷雷震動驚愕變色  
推翻筵俎失聲歎詫曰天之所助不可敵也今敗矣公旣報捷疏  
乃安撫澎湖居民所獲賊卒飢者給質糧病者畀醫藥曰皆吾人

也不願充伍者悉放歸以示寬大有請遂擣臺灣者公曰此時風信亦未利且俟之國軒既遁歸鄭克塽童駭其餘將帥震讐無措兵民解體回首內向遂遣使乞降公爲疏請乃於八月統大兵至臺灣入鹿耳門潮驟漲四尺餘大小舟聯翩而進鄭克塽率其屬迎於水次人謂鄭氏公深仇也將快意焉公曰義不共戴甯忍忘之願絕島新附有一誅殘恐上下疑阻人情反側吾所以銜恤茹痛者爲 國家事重不敢顧私也宣布 朝廷德意令其主臣束裝待命綏輯兵民市肆不改耕耘如故疏報至京適值中秋 上覽奏大悅卽解所御龍袍御製詩章敘述功勳並馳以 賜加授靖海將軍靖海侯世襲罔替公將出師時李文貞公請假旋里雨

甚憇城外旅店公造焉李公曰公出師在此月然眾皆言南風不利公必犯之何也公曰此庸夫之論也夫北風猛急夜則更甚今往攻澎湖未能一戰克也附近島嶼皆爲賊踞泊舟之所拒賊稍遠中途暴風忽起入夜不休大洋之中不可拋旋各舟從風星散非二三日不能集也惟夏至前後二十餘日風微浪靜夜可泊洋聚而觀釁不過七日舉之必矣然節候月離旬日間當有颶風亦偶閒歲不起此則天意非人慮所及又賊將劉國軒者爲彼魁傑設以他將守澎湖雖敗未服也臺灣必以兵取今聞國軒爲守然非吾敵也或死或敗則力竭膽喪臺灣可不戰而下李公喜曰寇平矣公笑曰何相信之深也李公曰夫爲將者必識天時利害地

理向背較將之智勇公兼之矣能無平乎至是悉如所料蓋當其  
初督水師時前後兩疏備陳討賊機宜越十餘年其言無一不售  
胥有成算不自茲日始也臺灣既降 上遣大臣至閩與督撫及  
公議棄畱之計公上疏言此地北通吳會南接粵嶠乃東南之保  
障明天啟閒鄭芝龍以爲巢穴後爲紅毛互市之所聯絡土番招  
納內地奸民漸作邊患順治十八年爲鄭成功所攻破盤踞其地  
糾集亡命招誘番人窺伺南北侵犯江浙傅子及孫積六十餘年  
無時不仰塵 睿慮臣親歷其地備見野沃土腴物產利溥耕桑  
並盛魚鹽充足滿山茂樹徧處修竹硫磺水簾鮑蔗鹿皮一切日  
用之需無所不有實肥饒之區險阻之域今納土歸命旣入版圖

善後之計尤宜周詳若棄爲荒陬置之度外則今人居稠密四民樂生安土重徙失業流離況以有限船徒無限之人使渡載不盡則深山窮谷竊伏潛匿者和同土番從而嘯聚假以內地奸民急而走險糾黨爲祟剽掠濱海勢所必至又紅毛原爲住處無時不在涎貪乘隙以圖一爲所有彼性桀黠善能鼓惑人心重以夾板船精壯堅大海外所不敵旣得此千餘里之膏腴必合黨夥竊窺邊場迫近門庭沿海諸省斷難晏然如僅守澎湖而棄臺灣澎湖孤懸汪洋之中土地單薄近界臺灣遠距金廈豈不受制於彼而能一朝居哉伏思 皇上建極以來聲靈遠播日月所照莫不臣服以斯方拓之士奚難設守以爲東南數省之藩籬今海氛旣靖

內地溢設之兵可以陸續汰減卽以此分防臺灣澎湖兩處臺灣設總兵一員水師副將一員陸路參將二員兵八千名澎湖設副將一員兵二千名通計一萬之兵足以固守初無添兵增餉之費其防守官員定以二三年升轉內地無令久任又此地初闢正賦雜餉宜在蠲豁三年後開徵可以佐需無庸盡資內地之轉輸也臣仰荷高厚知而不言至於後來萬或滋蔓難圖緘默之罪安所自這竊以爲棄之必釀成後禍留之則永固邊圉疏奏適契上意遂屏羣議悉從公言置郡縣焉時議欲徙投誠者移駐他省公疏言從前移駐投誠者慮有反側也自康熙十三年以後槩遷徒今海外霑化人心已安革面傾誠不若就本省安插尤見皇上



推心置腹使各遂其生之厚恩也又疏言鄭氏僭稱一國重科其民今既爲天朝赤子宜沛格外之澤減其舊額使海外諸國慕義引領皆奉旨報可自順治十八年徙瀕海居民入內地鄭氏無所劫掠勢大窘然黎庶棄業蕩析離居至是盡歸故土井里相望禾麻魚鱉之出有倍於前閩南土狹人稠從昔以來多以販洋爲生一舶之利待以舉火者不可勝數鄭氏爲閩患久海禁嚴切至是設關通商風檣所指凡數十國遠者逾萬里百貨流通又泉漳戶口蕃滋田疇所出雖豐歲不供臺灣墾闢日廣稻穀叢生地多霧露不憂旱熯歲歲大稔內地大資其益所謂民到於今受其賜者與二十七年入覲京師上命宗室額駙侍衛禮部諸大

臣設供帳三迎途次 陛見暢春園復 召對乾清宮 溫旨慰  
勞問地方事甚悉三十二年復入 覲時七十有三 上顧其步  
履稍艱 命侍臣持掖拜起 賜坐奏對因懇年力衰邁不任海  
疆重寄願乞身依 闕下 上溫諭再三謂朕用卿之心不在手  
足更二十年當如所請公拜 命回任 上他日謂侍臣曰如施  
琅者立如此奇勳必令永秉節鉞榮華以終其身也公愛文敬士  
值寢瀛清泰桑梓安樂老成鎮靜坐以無事日啟鈴閣招致同里  
士大夫敷俎陳尊選伶徵歌相與歡詠臺平於是十有四年三十  
五年三月以疾薨於位遺疏奏 上爲震悼 詔贈太子少傅  
賜諡襄壯 給全葬加祭二次有廟在廈門禱者輒應英靈不泯

也公爲將紀律嚴明所到之處雞犬無驚熟習洋務閩人精水師者無出其右經其指授皆赫然有聲所用部曲家將及爲帥艦舵工水手自立績效擁旌旄者前後相屬若渾馬之奔走於汾陽也有子八人次世綸漕運總督六世騾水師提督八世范襲侯爵贊曰先師李文貞公嘗言鄭芝龍朝京師過龍虎山有異人焉爲決未來事語甚隱意若跨土稱孤者末云金雞唱龍種消公辛酉生其專征又以辛酉年龍種者芝龍子孫也有命 帝廷前定之矣余從李公最久凡傳中所紀有與其家舊傳相出入者皆聞之於李公李公嘗值公於禮部侍郎富鴻基公所從容竟日因論曩日江南兵事公雄略奇氣發越於詞辨之表李公所由知公而信

之深也李公博聞善記其言往事有徵蓋其家子姓有不及知者故具述焉

右家傳陳萬策撰

施將軍名琅閩之晉江人值明亂少而從戎曾隨大學士黃公道周出僊霞關知事不可爲輒以偏裨有所建陳公報之曰君言是也顧吾大臣仗義守死而已儻有他奇變可以佐時君輩行矣勉之遂謝黃公去明亡寄食海上鄭氏嫉害公不相容囚公艙中欲殺之公以計遁脫鄭遂殺其父若弟公歸 本朝用戰功數年間至大帥佩將軍印 召入爲內大臣列伯爵余素未深知公一夕就公燭下話道及順治己亥年事余曰社稷之靈也令賊不頓兵

城下驅而徑前者是誠可危公笑曰宜何向余曰循山而東柰何公曰南北步馬不相若久矣眾寡勞逸又殊所在雖響應作聲勢實觀望不能爲之助也纔涉北地與官軍交賊立盡耳徐又曰向彼舍短用長委堅城沂江而上所過不畱直趨荆襄呼召滇粵三逆藩與之連結搖動江以南以撓官軍則禍甚於今日矣棄舟楫之便而敝攻圍故知賊無能爲也余以是知公能明年 天子以海患久未熄復起公提督水師專平海事越二年余請急家居邂逅公小店中雨甚稍憩余曰公出師在此月然眾皆言南風不利公必犯之何也公曰賈豎之言也夫北風日夜猛夜則更甚自此至澎湖舟戴星行就能魚貫相尾幸而不散然島嶼悉賊踞到彼

未能一戰奪之舟無泊處坐與行殊風浪飄拍軍不能合也將何以戰夏至前後二十餘日風微夜靜海水平如練可以拋舟泊洋聚而觀變不過七日舉之必矣用北風者徒幸萬一南風則十全之算也然節候月離旬日間當有颶風亦偶閒歲不起此則天意非人慮所及又賊將劉者爲彼魁傑設以他將守澎湖雖敗未服也必用再戰如守澎者劉或死或敗則勢盡膽喪矣臺灣可不戰而下余喜曰寇平矣公笑曰何相信也余曰聞爲將者必識天時利害地理向背較將之智力公兼之矣能無平平公以六月十四日舟發銅山十六日至澎湖二十二日剋勝果在七日中戰之日東南角微雲起劉方調遣拒敵望見喜甚須臾雷聲殷殷動劉推

翻食案歎曰天命矣海行占風者以雲起爲風兆聞雷則散云劉  
敗後乘小舟走至臺灣憂沮無復戰意率先納土悉如公料先是  
明季鄭之祖芝龍海大寇也歸誠後貴顯嘗朝京師過龍虎山有  
異人爲決未來事語甚隱然意若跨土稱孤爭衡南面者末云金  
雞唱龍種消公辛酉生其專征又以辛酉年龍種者芝龍子孫也  
余十五六時便聞斯語後二十餘年而驗

贊曰此余所聞見於公者雖其子若孫不知也公以功晉封侯爵  
及後裔史臣當有傳故紀其逸事云爾

右逸事李光地撰

康熙間福建提督施琅平定臺灣功第一 詔封琅靖海侯世襲

罔替琅疏辭侯爵懇照前此在內大臣之列 賜戴花翎部臣議  
在外將軍提督無給翎例 聖祖特旨賜戴以開疆海外削平僭  
偽之元勳 賞翎弗及以澤延後世巍巍五等之崇封願易一翎  
而格於廷議當時之重花翎如此

右紀聞陳康祺撰

施世驥

施世驥漢軍鑲黃旗人靖海侯施琅第六子 聖祖仁皇帝康熙  
二十二年隨其父剿海賊鄭克塽委署守備取澎湖及臺灣敘功  
加左都督銜三十年授山東濟南城守營參將三十五年二月  
上親征噶爾丹天津總兵岳昇龍奏薦世驥隨征 召試騎射



命護糧運卽至奎素地復隨大將軍馬斯喀追賊至巴顏烏蘭地  
凱旋仍任濟南參將乞歸福建葬父得旨施琅久在海疆功績  
懋著其子施世驃頃隨軍進剿亦效力勤勞准給假葬親事畢卽  
回任三十七年遷臨清副將四十年擢浙江定海總兵四十二年  
四月上南巡御書彰信敦禮匾賜之時海中多盜世驃累  
出洋巡緝先遣裨將假商船以餌盜擒獲甚眾斬盜首江崙四十  
六年上南巡詢及擒斬海盜事溫諭嘉獎賜戴孔雀翎  
四十七年擢廣東提督五十一年調福建水師提督六十年四月  
奸民朱一貴自稱明裔僞號中興王下大員帥聚眾倡亂於鳳山  
縣之姜園地害臺灣總兵歐陽凱副將許雲參將羅萬倉遊擊游

崇功等遂陷臺灣府治五月丙寅世驃聞報卽率所部進扼澎湖  
總督滿保檄南澳總兵藍廷珍等以師會眾議三路進攻世驃謂  
南路打狗港在臺灣正南南風正盛不可泊北路之清風隙去府  
百餘里餉運頗艱度賊必屯聚中路宜直擣鹿耳門時臺灣文武  
官相率退回澎湖惟北路淡水營守備陳策堅守汛地世驃遣遊  
擊張賊等赴援而自統師詣中路選勁卒乘兩小舟載旗幟先伏  
於南北港六月丙午抵鹿耳門外洋賊踞臺灣拒阻世驃登樓船  
督戰擊鼓發礮中賊貯火藥器火大熾賊驚潰眾軍齊進兩港悉  
樹我軍旗幟賊不敢犯遂揚帆直渡鯤身鯤身者海沙也大舟不  
能過是日海水驟漲八尺戰艦乘風迅達遂復安平鎮明日破賊

四于於二鯤身辛亥賊率眾八千來犯復擊敗之王子遣守備林亮等由西港進遊擊朱文謝希賢林秀等越七鯤身由鹽埕大井頭諸路奮登岸並趨府城世驃身先將士指揮布陣賊俱敗潰朱一貴竄遁遂復府治復遣參將林政等分路勦撫閩六月丙寅諸羅縣溝尾莊民人楊旭等誘擒朱一貴及其黨翁飛虎王玉全張阿三李勇陳印等以迎參將林秀縛送世驃軍前賊黨抗拒者先後擒斬略盡餘眾就撫臺灣南北兩路悉平 上詔部臣優敘有功將士 賜世驃東珠帽黃帶四團龍補服九月世驃卒於臺灣軍營遺疏言臣父琅昔日蒙 恩葬閩今臣骸骨願得與父相依並畱臣幼子隨臣妻守塋近因勦賊借藩庫銀一萬兩容臣長子

雲南知府士岡次子廣東遊擊廷勇變產交完疏入得 旨施世  
驟效力年久勞績懋著沿海水師營務極爲諳練簡任提督實心  
盡職當臺灣匪類竊發卽調遣官兵親渡海洋屢次大敗賊眾七  
日內克復臺灣擒獲賊首朱一貴等俾地方甯謐深爲可嘉海疆  
要地正資料理忽聞將星隕落朕心深爲悼念著贈太子太保察  
例賜卹所借藩庫銀一萬兩免其償還其安葬福建及妻子畱住  
之處并照所請行 賜祭葬如典禮諡勇果 世宗憲皇帝雍正  
元年八月兵部議敘克復臺灣功以應否給世職請得 旨臺灣  
地方自古未屬中國 皇考以聖略神威取之載入版圖逆賊朱  
一貴等倡亂占據臺地 皇考籌畫周詳指授地方官員調遣官

兵七日之內勦滅數萬賊眾克復全臺 皇考當春秋高邁威揚  
海外功德峻偉官兵感戴 皇考教養之恩奮勇攻取甚屬可嘉  
固不必援引前例後亦不得爲例茲仰副 皇考從優議敘之旨  
官員見行議功敘加之外著槩行各加一等提督施世驃統領大  
兵徑渡海洋鼓勵將士屢經大戰擊敗賊眾七日之內克復臺灣  
著給予一等輕車都尉世職尋以其子廷蓂襲

右 國史館本傳

公諱世驃字文秉一字怡園靖海將軍靖海侯福建水師提督  
贈太子少傅襄壯公諱琅第六子襄壯公久歷滄波周知海中諸  
島嶼形勢又善占視風雲氣候計算不差時刻閩中習水軍者稱

爲第一曾爲其舵工水手者皆將帥材也公幼而沈靖有大志年十五六時襄壯公征澎湖練舟師公侍舟中盡以其法傳授耳聞目覩備得款要澎湖之戰卽能輕艦直前衝冒煙火血關不休觀者感歎曰真將種也策勳授左都督始仕爲濟南城守參將以家傳陣法治軍襄壯公朝 觀過濟南公率部伍列於道左襄壯公熟視笑曰果得吾法矣康熙三十四年 聖祖仁皇帝親征朔漠請從軍過北斗之下涉瀚海隨大軍逐北至四十三臺乃回師會丁襄壯公及嫡母王太夫人憂乞假回閩襄事未幾升臨清副將在任三載遂爲定海總兵官時海氛之靖已二十年戰艦閒泊於海濱將士安坐無事公曰太平不忘備豫古之制也況此地爲浙

海北門大洋中保無竄伏耶乃帥弁兵至沈家門以水操法先用小舟親教之進退攻擊之方然後用大舟至外洋分行而進鳴鼓吹螺以旗色爲號令礮聲爲威武將士皆習熟勇敢越數歲果有海賊江崙剽於洋公曰此積年巨盜非我親往不可得遂揚帆而出遇之北洋賊死命拒戰自晨至暮家將奮力持火又一躍而過眾軍畢登斬江崙於舟中擒其徒黨無遺又遣施大英乘商舶以餌賊賊追至則旗揭鼓鳴賊驚愕失措盡舉而俘之自此賊兵莫敢犯其界 鑿輿南巡 聖祖親詢其事嘉歎再三錫賚有加焉聞江南洋面有賊舟出沒公曰江浙鄰也不可以疆界爲辭復遣施大英往殲其魁黨焚其舟而返丁生母張太夫人憂請終制有

旨以海疆重地慰留焉旋升廣東提督先是南澳守備潘成龍追賊被害公至則廣張邏緝果獲二賊於潮陽訊之具服因得其黨輩姓名居址掩捕之無漏網時海豐亦獲兩盜所供扳悉以行第綽號捕捉風影株累平人公移文告督撫曰正盜已得矣此誣也盡釋之粵之山海俱爲盜藪曲江英德以剽掠聞公親率騎步巡察山峒時總督趙公宏燦方遣參將李世邦捕賊於英德賊據險力拒公訪其出入徑路遣遊擊徐進才從後躡之賊進退蒼黃殲於陣接於山靖其根株詔人以甯福建水師提督威略將軍吳公英卒公曰此先將軍樹勳故地也 上以我名將子必將用我令家人戒裝以俟 命下果然公至閩則先約飭子弟僮僕毋陵犯



粉梓躬領五營兵船出港口外以襄壯陣法練之乃簡精銳汰羸弱以家貲增鳥槍一千整鎧三千艨艟旗幟爲之改色廈門及澎湖臺灣戰船奏定各編字號隊伍不雜號令嚴明於廈門海濱要地增築礮臺造營房措置周密時海禁方嚴公請前去人得附回舟及番舶以返獲歸者數千人康熙六十年夏知臺灣有虐政閩里胥怨無賴者乘閒大譁擁朱一貴妄稱遺裔以惑眾潮人杜君英亦率潮之奸人以倡亂勢驟張遂據府城建偽號公聞報曰澎湖爲臺灣門戶吾當往扼其吭俟諸軍集而進乃謂家人曰今日無以家爲也盡出其家財以賞士且開召募之科凡無賴敢死者善沒水者能攀岸緣壁爲竊者皆厚賞鉤致之公始至自造哨船

二十隻及是皆以配軍士器械胥具聞總督覺羅公滿保將至廈  
公曰重地有託吾可以行矣乃告於襄壯公廟曰臺灣公所定  
天子命兒繼世爲帥今不速平生負 國恩死無以見先人於地  
下虧忠與孝隕其家聲惟公英靈尙默相之禡牙祭海遂載旆東  
指抵澎湖登岸營新城下散糧以食澎人每日遣小舟四出哨邏  
獲一舟有陷賊把總吳良賊將劉好稱逃歸願以齋檄招賊自效  
公曰來而求往必覘者也醉之酒誘其言果覘者也械而致諸廈  
嗣知上淡水守備陳策尙據一隅孤軍自守亟遣遊擊張賊往助  
爲聲勢乃蒐軍實練士卒上疏告師期命洪選洪就駕小舟先發  
樹青白兩旗於南北港以爲標識命守備林亮等爲左先鋒遊擊

林秀等爲右先鋒俱以勁兵相續而進公自將當其中申軍令毋  
犯民間一草木毋阻降者帆檣蔽海而東風微浪偃六月丙午抵  
鹿耳外洋賊屯聚礮臺據險立籬條列礮拒守小舟先至南北港  
兩旗旣豎左右先鋒競進南澳總兵官藍廷珍繼之礮聲震海公  
登敵樓伐鼓趣戰礮中其火藥桶火大發賊遂遁時海水驟漲八  
尺餘大小船越沙綫並帆而入乘勝長驅奪安平鎮焚賊舟數十  
遂遣兵扼鯤身公總大軍泊港內丁未賊眾四千犯安平林秀等  
勒兵二鯤身擊之公駕小舟率諸將傍岸橫擊賊大敗鯤身者海  
沙也不可鑿井甘泉忽涌軍中以濟己酉賊八千復犯安平參將  
王萬化拒於四鯤身擊卻之庚戌遣林亮等由西港仔進辛亥藍

廷珍暨王萬化繼之遣遊擊朱文謝希賢等由鹽埕大井頭諸路  
進遣林秀及功加左都督林崇由七鯤身衝瀨口並指府城公自  
帥大軍吹螺響礮山鳴海涌兵士奮勇登岸水陸交攻賊大潰遂  
復府城朱一貴遁走西港仔諸路之兵破賊五千於蘇厝甲會軍  
城下駐營北教場撫安居人拜疏告捷先是總督牽於羣議定三  
路進兵之計公曰吾思之熟矣南路之打狗在臺灣正南此時南  
風正盛不可泊也北路之清風隙離府百有餘里輓餉維艱賊之  
大眾盡在中路度其嘯聚烏合之眾非官軍敵也直擣鹿耳門破  
之必矣成功且速果七日而奏捷云遣林秀等追朱一貴眾尙數  
千力戰敗之一貴逃匿荒野遣王萬化等平定南路復鳳山遣朱

文復諸羅通北淡水之路時諸將窮追朱一貴公曰兵革之後人情未定大軍所至邨落驚惶計其釜底游魂重賞購募必有縛而至者使民安衽席而罪魁斯得不亦善乎未幾賊黨楊旭果繫朱一貴張阿山翁飛虎王玉全以獻諸賊渠次第就擒再疏告全郡悉平時舊弁多殉難營成空缺乃分遣行間諸將署各營事分兵布置汛守宣播 朝廷德意蠲除弊政臺人歌舞相慶前後兩疏上 聖祖大悅 命從優議敘 賜黃帶東珠帽五爪龍袍四圍龍外套均異數也馳疏者三人俱授把總銀各五十兩公自行師以來日夜籌畫未嘗一夕安寢八月甲戌夜二鼓暴雨猛風揭瓦飛幕至於海中之舟悉飄上岸公徹夜立風雨中以鎮軍心不恤

泥瀟跪拜爲兵民請命黎明風雨乃止自是得疾頭痛不可忍兵  
民奔走禱祈靡神不告皆願減己算以延公年病源已深九月癸  
卯薨小大哀號如失慈父遺疏 聞 聖祖爲之震悼卹典從厚  
贈太子少保敘功疏上恭遇 皇上纘登大寶 賜諡勇果 給  
全葬 予祭世襲一等阿達哈哈番公和易謙雅敬愛士大夫竟  
日鈴閣緩帶從容治軍事之外卽席觴詠丰度悠然及乎東征之  
日修器械備糗糧不動聲息而軍需畢具臨陣安閒謀定而後動  
故舉出萬全有古名將之風格焉

贊曰自古勳臣之子世濟其美若李西平曹武惠尙矣然揆後嗣  
之績業猶未匹先人也公紹襄壯公提督水師皆力戰於鯨波之

中綏靖絕島襄壯公克澎湖而臺灣自服公據澎湖以攻復臺灣  
難易之勢均也襄壯公平海衛水涌於廢井公亦鯤身沸於積沙  
襄壯公之攻澎湖潮漲多四尺公之入鹿耳亦潮漲八尺餘皆自  
六月十有六日至二十有二日七日而功成而癸亥辛丑兩歲六  
月皆有閏相去四十年閒天時人事若合符節烏虜異哉繼厥家  
聲相映於雲臺麟閣之上無媿色矣

右家傳陳萬策撰

## 趙良棟

趙良棟甘肅甯夏人 世祖章皇帝順治二年大兵定陝西良棟應募隸總督孟喬芳標下署潼關守備隨征秦州鞏昌擊走叛將賀珍武大定授甯夏屯田水利都司五年隨征河西叛回擒其渠丁國棟敘功擢高臺遊擊十三年以經略洪承疇薦隨征貴州雲南任督標中軍副將 聖祖仁皇帝康熙元年擢雲南廣羅總兵先後剿平馬乃隴納水西諸苗猓有功四年調貴州平遠總兵尋以憂去任八年起爲大同總兵十一年調天津十五年甘肅提督張勇薦良棟才略過人堪鎮甯夏 詔授良棟爲甯夏提督先是逆藩吳三桂反叛鎮吳之茂王輔臣等應之分踞固原慶陽平涼



諸郡陝西提督陳福領甯夏兵征固原中途兵變遇害 上命總督哈占等察其事未得實至是良棟入 覲請畱家口居京師自簡精兵百人疾馳赴鎮又謂甯夏亂兵宜誅首惡宥脅從 上可其奏良棟既之鎮宣 恩諭撫慰旋察知害陳福者平羅營兵閻國賢陳進忠倡亂者把總劉德而參將熊虎與其謀乃先以調遣散其黨羽旋逮熊虎劉德閻國賢陳進忠聲其罪請 旨斬之是時大將軍圖海督師圍平涼王輔臣降慶陽固原俱下 上命圖海飭將士守陝西勦撫餘賊分兵助征湖南暫停進取四川良棟與將軍王進寶並聽圖海檄調屢移兵防勦秦州西和禮縣諸處十八年四月良棟疏言甯夏兵舊習驕縱臣三年訓練漸遵紀律

並嚴禁侵剋額餉眾志和協咸思奮勉敵愾臣年漸老弗乘時努力有虛簡任今湖南底定宜取漢中興安以圖四川臣願精選所屬步騎五千獨當一路上嘉許之下圖海議行圖海請俟棧道益門鎮諸處賊壘削平分四路進取既而涼州提督孫思克言綠旗兵皆不强壯未可用請俟來春多調守邊滿洲兵並進奉

旨切責乃以十月定師期圖海與將軍佛尼勒征興安孫思克與將軍畢力克圖征略陽王進寶與總兵朱雅達征鳳洋良棟獨率甯夏兵征徽縣於是良棟進師密樹關先襲黃渚關以分賊勢遂大破賊復徽縣時孫思克甫至階州良棟遂趨略陽擊走吳之茂復略陽城遣兵取陽平關沔縣王進寶亦復鳳縣定漢中府良

棟會之於甯羌各奏捷 詔授良棟勇略將軍仍管甯夏提督事  
十九年正月良棟與王進寶分道進師連挫賊眾於白水壩石峽  
溝青箐山招降龍安府渡明月江過縣竹縣賊驚潰偽將軍汪文  
元僞巡撫張文德等降遂復成都得 旨嘉獎擢雲貴總督加兵  
部尙書銜仍管將軍事良棟聞 命謂甯夏提督有代者則鎮兵  
不能隨征因疏辭雲貴總督 上弗許會部議甯夏宜如舊制設  
總兵 詔卽以良棟子廕生宏燦任之率鎮兵隨征時王進寶亦  
復保甯與建威將軍吳丹等規復順慶重慶及遵義良棟分遣遊  
擊治國用等西徇雅州復象嶺建昌諸衛東徇敘州復納溪永甯  
等縣疏請 諭趣湖廣兵速取貴州廣西兵速取雲南並 敕陝

西四川重臣合籌通餉濟軍剋期進剿一自保甯出永甯達雲南  
霑益州一自成都出建昌達雲南武定府 旨是其言以疏示在  
事大臣令協謀定議而行尋議湖廣廣西四川諸路兵約期並進  
吳丹出永甯良棟出建昌會逆賊吳世璠遣其黨胡國柱夏國相  
等陷永甯犯瀘州敘州復聚寇建昌良棟檄總兵朱衣客率兵八  
千援建昌朱衣客既至與賊戰弗勝退駐雅州我兵之在建昌城  
者食盡亦棄城還良棟疏劾吳丹擁兵不進致永甯陷賊復劾朱  
衣客退遁罪狀 詔吳丹解將軍任以佛尼勒代之朱衣客革職  
逮訊二十年良棟遣宏燦與總兵李芳述偏圖等破賊於鳳凰村  
觀音崖賊之在敘州瀘州永甯者皆遁良棟遂會師夾江由雅州

進征復建昌渡金沙江達武定時大將軍貝子彰泰統湖廣廣西諸路兵圍雲南城於城東歸化寺列營西互碧雞關賊負固抗拒數月不下良棟至奪橋蒲城彰泰令諸軍分進良棟攻南壩連破賊壘奪土橋新橋至得勝橋先薄城諸軍繼之賊不能抗吳世璠自殺賊眾降雲南平二十一年良棟奉 詔還京初朱衣客之逮訊也具疏辨謂良棟與兵少後應又不至是以退還時王進寶亦上疏謂建昌之陷咎在良棟良棟因復劾朱衣客欺飾狡辨且謂其辨疏由進寶所爲 上以軍旅方殷 命俟事平時察議至是諭曰當逆賊竊據漢中領兵諸將咸以恢復爲難獨趙良棟首先倡議進剿與王進寶同取漢中嗣因意見不同嫌隙漸生遂分路

進兵直取成都而王進寶亦取保甯若成都不下保甯未易卽拔  
保甯弗定成都難以保守二人功績俱著封疆使能公爾忘私和  
衷共濟則乘勝長驅滇黔賊眾可卽殄滅何復遷延歲月耶是時  
賊眾入川抗拒中路空虛故大兵得乘機進取沅州鎮遠貴陽等  
處而川中賊勢復張已恢之疆土幾至再陷此皆由不能和衷之  
所致也二人賦性鹵莽不諳大體各懷私忿互相攻訐朕洞悉情  
事念其功績並茂惟欲保全所有互訐奏章俱行發還槩不究問  
其遲於救援有關軍機仍察議如例於是部議失陷永甯建昌罪  
朱衣客論斬吳丹論革職籍沒良棟論革職並得 旨從寬朱衣  
客給本主爲奴吳丹免籍沒改授良棟鑾儀衛鑾儀使二十二年

四月良棟疏述雲南四川戰功請 敕部察議事下王大臣等覈議謂良棟失機建昌應以功抵罪止錄敘隨征將士時宏燦任川北總兵與李芳述偏圖並加左都督銜十月良棟以病乞歸甯夏允之二十五年四月 上念良棟於雲南凱旋時能恪守法紀廉潔自持 優詔嘉獎復將軍總督原銜二十七年入朝自訴戰功並隨征將士多屈抑奉 諭歸里後牒部具奏明年奏入得 旨趙良棟首倡進取四川又直抵雲南省城奮勇克取得勝橋等要地逼近城郭二營勞績茂著所屬官員亦俱同心效力其並與議敘於是授良棟騎都尉世職三十年噶爾丹侵擾邊境 詔西安將軍尼雅翰等赴甯夏防禦凡軍事與良棟酌議以行三十二年

三月以甯夏總兵馮德昌赴甘州軍營 命良棟暫管甯夏鎮兵  
十月良棟疏劾德昌剋減軍糧營馬多斃德昌坐罷任調登州總  
兵王化行代鎮甯夏三十三年六月 命良棟率甯夏火器營兵  
二百赴土喇防禦噶爾丹旋因土喇無警 召良棟入朝三十四  
年三月良棟復自訴其功績甚多爲大將軍圖海彰泰所隱蔽且  
追咎大學士明珠弗爲奏請優敘 上責其器量褊隘還其疏仍  
敕部優敘部議授爵三等子 詔晉爲一等良棟願畱京乞 賜  
田宅御史龔翔麟劾其驕縱矜功越例乞請當議罪 上鑒其年  
老家貧宜 諭原宥 賚白金二千兩令歸里三十六年正月奉  
詔曰頃尙書馬齊自甯夏回奏卿臥病不能動履深軫朕懷特賜



人獲鹿尾馳示存問尙其善加調攝俾夙疾頓痊副朕眷注三月  
良棟卒年七十有七時 上親征噶爾丹次榆林 諭迎駕諸臣  
曰趙良棟偉男子也行閒著有勞績但性躁心窄每與人不合有  
時奏事朕前亦言語麤率朕保全功臣終優容之彼所奏無不准  
行嘗賜藥餌望其疾愈今聞奄逝殊爲惻然宜爲其妻子區處使  
之安生 駕至甯夏 命皇長子臨其喪 賜祭葬如例諡襄忠  
次子宏燮襲爵 世宗憲皇帝時良棟入祀賢良祠乾隆三十二  
年 上念良棟征剿吳逆時茂建勳績其一等子爵 特予世襲  
罔替

右 國史館本傳

趙良棟字擎宇陝西甯夏人先世居榆林順治初良棟官甯夏都司遂隸籍焉河西回亂良棟從總督孟喬芳剿之單騎擒偽帥以獻擢高臺遊擊康熙元年以督標從大兵征滇積功升廣羅總兵調貴州比喇鎮進討水西寇平之丁父艱服闋補大同總兵尋移鎮天津十三年吳三桂叛平涼兵變命良棟爲甯夏提督馳傳鎮撫誅首惡數人餘釋不問隴右輯甯良棟念滇逆未除漢南巴蜀阻聲教請繇川蜀出師獨當一面許之十九年破密樹關取徽縣復略陽特授勇略將軍良棟分遣偏裨趨陽平自臨白水壩浮馬渡江賊驚潰追擊於青川大敗之不浹旬偏成都所過秋毫無犯民爭出迎王師賊窮乞降會奮威將軍王進寶克保甯同

收復東西川捷 聞晉兵部尙書總督雲貴軍務擢長子宏燦甯  
夏總兵率師齊進時賊帥胡國柱復陷瀘雅等州建昌路梗良棟  
自將赴朝天關令宏燦出馬湖繞賊背夾攻之連戰皆克奪象嶺  
要隘長驅入滇是時滇粵諸師已圍雲南城數月賊拒守甚堅良  
棟至周視壁壘謂結營遼遠賊得番息請移軍偪之躬率銳師搏  
戰賊扼守新橋潛從上流濟師晝夜力攻七日拔之逆孽吳世璠  
自殺旣奏凱請 陛見除鑾儀衛使以疾歸里三十四年 聖祖  
征噶爾丹起良棟參謀軍事追敘前功畀一等子世職踰一載卒  
年七十七 御製碑文給祭葬諡襄忠良棟早歲從戎大小百餘  
戰馭兵嚴而有恩皆樂爲之用故所向有功

右 國史賢良小傳

康熙三十六年三月四日光祿大夫勇略將軍趙公以疾薨於甯夏里第時 車駕方西征聞奏震悼比從橫城口濟河下 諭內閣部院諸臣勇略將軍趙良棟爲國家宣力奮庸厥功甚茂倏以疾逝朕深憫焉茲師抵朔方道經其門欲令皇子臨視奠醊可集議以聞於是臣玉書偕諸臣言皇子親臨臣下之喪曠代希有將軍臣良棟膺茲異數豈獨一家之私榮凡百臣工無不感激隕涕明日次甯夏皇子臨喪舉哀賜奠如禮閏月復 頒諭祭文遣大臣致祭其子道臣宏燮中書臣宏煜先後詣行在謝 恩 上皆召見撫慰之又數月 允禮臣請以例 予祭葬 賜諡襄忠嗣總

戎宏燦歸自黃巖乃卜冬十二月日葬公於城西二十里某原而  
乞銘墓石於余余辱交公久素悉公歷官制軍忠勇大節與其生  
平慷慨質直強毅不撓之氣嘗私竊嘆羨以爲古名將所不及而  
聖天子推心置腹眷倚之重以及自始迄終 恩禮之隆尤足以  
獎勵功勳爲勞臣白首效忠者之勸余雖不敏敢不據所見聞撫  
拾其梗槩而敘次之公字擎之號西華先世自陝西綏德衛遷居  
安邊逮公官甯夏因家焉故今爲甯夏鎮人曾祖某祖某父某官  
海州參將皆 贈如公官曾祖妣某氏祖妣某氏妣某氏皆 贈  
一品夫人公少工舉子業顧倜儻有大志不屑束縛章句遂仗策  
從戎順治二年隨和碩英親王師入關中受知於制府孟公喬芳

署潼關守備從征賀珍武大定等賊又從定甯夏叛兵之變因署其地屯田水利都司四年領兵平河西回亂又單騎擒肅州僞總兵丁國棟擢補高臺遊擊十三年 王師入滇以雲貴督標副將從征隴納諸苗康熙元年積功授都督僉事充雲南廣羅總兵官是時吳三桂專制滇南所補用官吏 詔部臣不得掣肘於是三桂調公貴州比喇鎮令進勦水西公方丁外艱力辭不許四年水西平乃聽終制三桂中藏叵測以牢籠人才爲務惟公先幾之哲不爲所用云八年補大同左都督十一年調天津明年冬滇逆變作四方叛賊蠶起甯夏亂兵劫殺其主帥勢甚猖獗十五年春特命公提督甯夏馳傳往鎮撫之公見 上詞氣激慷請移家口

居京師得一意辦賊 上壯其言隨 命賜第公至鎮集將佐宣  
布 德意捕斬首亂四人餘不問邊境遂安公駐朔方四載念關  
中粗定而漢南巴蜀猶阻聲教自請率部卒五千獨當一路進取  
漢興恢復蜀地 詔下軍前諸大臣集議僉言大軍宜分興安棧  
道入堵山小川子四路並進需兵五萬人公曰兵貴精不貴多也  
自將五千人指入堵山徑入十月破密樹關進取徽縣復略陽分  
遣裨將趨陽平關覘賊虛實仍條上調兵運餉事宜請兩路收川  
報 可 特授公勇略將軍十九年正月朔公師臨白水壩與賊  
夾江而陣江流湍涌無舟楫將士有難色公怒誓於軍曰視我馬  
策所指敢後者斬授甲躍馬浮江而渡一軍皆泣賊駭愕奔潰追

擊之於青山石碇溝歷舊州明月江屢戰屢捷甫十日遂抵成都  
先鋒奪門入公下令毋剽掠整軍登陴市肆晏如在城僞官及逆  
兵數千人疑懼不自安公悉以迎降奏釋眾皆感悅越數日奮威  
將軍王公進寶亦報保甯之捷東西川以次收復事 聞 天子  
降溫旨勞軍以 御書題額及弓矢橐鞬名馬之屬先後 頒賜  
甚渥是時湖南粵西方并力進師規取雲南 上念巖疆綏靖制  
府需人非得謀勇素著操履潔清兼資文武大略者不克勝任遂  
授公兵部尚書兼都察院副都御史總督雲貴將軍如故而以公  
之子宏燦爲甯夏總兵官隨軍進剿自收蜀以後苞孽尙繁公經  
營一載反側者始定二十年三月追剿逆渠胡國柱於觀音巖十



丈孔五月破關山象嶺渡瀘江七月復取建昌乘勝渡金沙江九月乃入滇時楚粵之兵已圍滇省城數月顧持久不能拔公周視壁壘謂結營遼遠賊得番息法當移軍偏之選入川精銳五千親冒矢石取玉皇閣進偏新橋賊方據橋扼守復以計從上流濟師晝夜力攻凡八日而城下逆賊踞滇日久私斂充牣一時諸將雲集多志在攘掠惟公飭所部卒勿以一騎入城既奏凱卽懇請陛見移師曲靖以待 命嗣後黷貨者纍纍致敗而公獨矚然無滓其遺識確守卓然有古大臣風烈焉公於時已年踰六十 上念公久勞於外特允入朝二十一年冬授鑾儀衛使踰年請疾歸里二十七年以 國恤會葬詣闕下三十年厄魯特噶爾丹蠢動

邊塞大軍駐朔方 詔公以在籍老臣預議軍事三十三年禁旅  
出塞公偕行指畫地勢兼以私財佐軍既還復 詔入朝明年追  
論前功特加一等精奇尼哈番世襲是年秋就醫江南 賜御舟  
給驛三十五年復 召入朝時 上決策統師北征諮邊事甚悉  
公因疾不果從比及師旋遂 賜歸明年西征 上方欲就詢公  
於里第而公竟不及待嗚呼是可悲也公結髮事戎行五十餘年  
大小戰數百未嘗敗衄御下嚴而有恩觸法者雖小必罰有才略  
堪任者抗疏引薦常自偏裨積至大帥軍中甘苦與共一飲食不  
以自私入蜀之役裹糧陟險轉戰七千餘里而士卒咸樂爲盡死  
無一怨言其能結士心如此故所向有功性抗直同事多不相下

功成以後慕閒者日眾惟上知公深嘗格眾議曲賜維護自  
蕩平三逆以來閱十五年矣復廕詔旨鋪陳本末於平蜀嘉倡  
進之謀於克滇獎廉潔之操於是公之勞績久而益明而其行履  
卓犖無疵亦得較然備著於國史是公之得全其身與得全其  
名皆上恩也百世而下聞之猶爲感奮太息而況於公平而況  
公之子若孫乎是用備書以示來裔公生於明天啟元年十月距  
薨得年七十有七配郭氏繼配李氏白氏贈封俱一品夫人子  
五長宏燦以左都督充浙江黃巖等處總兵官次宏燮御史宏煜  
內閣中書宏煒宏熿尚幼女三長適庚子舉人強振猷次適候推  
副將郁起雋次適一等侯江南提督張雲翼孫六公治家如治軍

闔門嚴肅儼若公府諸子屏息侍立無敢有跛倚之容以是總戎  
憲副所至有政聲中書亦明敏練達皆仰荷 宸眷云銘曰  
天胡景運篤生人傑桓桓趙公威武維烈早歲杖策從王於征手  
執螯弧目無堅城爰制中權爰總戎律嚴明有威卒伍整密三秦  
叛亂將驕卒狂風馳颯驅迅埽檣槍巴蜀如焚滇黔如燄獨提孤  
軍鼓行而南銜枚宵濟莫敢齟齬直入蜀郛前歌後舞蠶叢既定  
揚旌渡瀘環城三帀拉朽摧枯賊首朝投降幡夜豎氛祲盪滌復  
我疆土凡此大功 帝曰爾庸事紀簡冊銘勒鼎鐘大官授膳尙  
衣賜服彤弓盧矢驂駟駟駟公之來朝 天子燕喜公之旣歸  
天子拊髀國有大事爰詢爰謀公徐一言等於圖球公之材武如

熙如虎公之智略如風如雨公之精誠如火弗滅公之勁直如鐵  
靡折持其孤忠以報一人白首不挫厥聲斷斷惟 天子明獎乃  
勳勞生有殊恩歿有厚褒以勞定國以死勤事 主聖臣忠近古  
莫二歷觀載籍如公不朽納銘幽宮垂示永久

右墓誌銘張玉書撰

康熙三十六年三月特進光祿大夫勇略將軍趙公以疾薨於甯  
夏之里第時 天子西巡朔方聞訃震悼 特命 皇長子親臨  
其喪 諭扈從諸大臣赴弔聞三月六日 御製祭文遣大學士  
張某 賜祭如禮其孤子宏燦宏煜等先後赴 行在所謝 恩  
上復召見慰撫所以褒崇寵錫之甚厚於是宏燦等撰事狀以隧

道之石請銘於余先是十五年春公以甯夏提督奉命朝京師  
余時官翰林始識公之爲人後公凡四入朝余待罪政府與公  
相周旋悉知公忠勇大節歷官制軍勝敵之略與其生平慷慨質  
直強毅不撓之氣未嘗不景仰歎慕以爲古之名將所不及而  
聖天子褒崇寵錫推心置腹眷注之重與夫自初及終卹賚之  
隆尤足以獎勵勞臣爲國家宣力效忠者之勸故於燦等之請輒  
條次其梗槩不敢以不文辭按狀公諱良棟字擎之別字西華先  
世自陝西綏德衛遷居安邊及公官甯夏因家焉故今爲甯夏人  
公少倜儻有大志讀書不事章句好觀古人忠孝節俠事嘗慨然  
曰大丈夫當爲國家出死力定禍亂安用儒生佔畢爲遂以順治

二年從英王入關制軍孟公喬芳署潼關守備時賀珍武大定等  
構亂秦鞏從都督劉芳名討平之又從定甯夏署甯夏屯田水利  
都司四年帥師征河西克之單騎縛偽總兵丁國棟以功補高臺  
遊擊十三年經略洪公承疇薦投雲貴制府中權從征隴納水西  
諸苗猓山谷峻險糧運不給諸軍多失律公獨號令嚴整所向克  
捷所俘獲悉頒諸麾下無私畱者積功升雲南廣羅鎮總兵官

今上御極之元年也鎮府初設軍旅草創公振肅綱紀仁威並行  
伐叛柔服動合機要故能建威消萌烽火不警吳三桂專制滇南  
調公爲貴州總兵官勒令進攻水西時公已丁外艱力辭不允墨  
纒卽戎水西平乃聽終制再丁內艱服除八年補大同鎮總兵官

加左都督考覈軍政嚴而不私積弊爲之盡革十一年調天津鎮  
總兵官天津素稱盜藪旗丁鹽販通行囊橐白晝大都攫人而奪  
之金吏莫敢訶問公至則申法制立程約張設耳目窮治根柢務  
在鋤強暴以惠孤弱於是姦宄屏跡部告無事十五年奉 旨以  
提督撫安甯夏入 朝陛辭當是時三逆煽亂遠近響應甯夏叛  
兵戕殺主帥勢益猖獗公見 上詞語慷慨忠義激發請以家口  
移居京師使得專意擊賊 上爲之動容 特賜第宅銀米貂裘  
鞍馬弓矢之屬公卽日就道直抵延綏西路之定邊謀報賊兵由  
甜水河來劫餉左右請少卻公叱之晨夜兼趨搶入橫城賊不意  
公卒至遂宵遁公厲兵秣馬修器械屯餼糧訓練士卒以勇以義



購倡亂者熊虎劉得問國賢陳國忠四人請 旨正法軍中肅然  
無敢譁者在任三載威信大行關中已略定矣公念漢南巴蜀未  
入版圖 天兵稽誅民罹湯火十八年上言臣願以所部練卒五  
千獨當一面規取漢興恢復川蜀 上下公卿議議者謂由興安  
棧道入堵山小川子四路前進須滿漢兵五萬人前後接應輜重  
不與公曰兵貴精不貴多遂率甯夏本操漢兵五千自齋行糧由  
入堵山徑進遂破密樹關取徽縣復略陽分遣裨將急趨陽平關  
覘賊虛實十九年正月兵至白水壩與賊夾江而陣江水暴漲波  
濤沸天岸無舟楫賊矢石如雨將士皆懼公誓於眾曰此臣子報  
國之日也視我鞭所向敢退者斬於是軍皆奮呼聲震山谷遂

擐甲浮江而渡江流爲平賊錯愕奔潰師乘勝逐北過壽川大敗之於石夾溝再過青菁山舊州明月江屢戰屢捷勢如風雨不十日而抵成都先鋒奪門無有阻者遂入城城中人不虞我兵之從天而降也先是 上以公老於兵事 詔問公收川事宜公條奏兵調發若何糧輸輓若何勦撫大勢若何經畫詳明言極剴切

上是公悉從公議是役也兵雖兩道入而諸將方略悉公所預定公旣入城卽下令禁剽掠市價不變男女不聳赦脅從撫降附開誠示公宣布威德於是東西川及天全諸土司烏斯番族等皆傾心向化民樂更生焉捷 聞授公勇略將軍仍管甯夏提督事會雲貴總督缺人 上曰趙某謀勇懋著操守清廉雖係武員通曉

文義其改爲總督遂以勇略將軍授兵部尙書兼都察院右副都御史總督雲南貴州等處地方兼理糧餉時雲貴尙阻兵也公在蜀聞命以年老疏辭不許卽自蜀入滇二十年三月追剿胡國柱於觀音崖五月破關山象嶺渡瀘江七月復建昌九月抵雲南時湖廣廣西兵已圍城數月矣公閱視壁壘謂營陣太遠賊得休息故久而不下恐師老糧匱法當移營以偪之乃自帥五千人急攻親冒矢石諸將益用命凡八日城下蓋公爲將善料敵識地勢勇氣感發不避險難其教士悉用紀律信賞必罰臨陣對敵勸以大義故士卒皆樂爲之盡死所向有功平滇平蜀皆以此也是時公年已六十餘矣海宇蕩平囊弓歸馬天子念公久勞於外特

准入朝掌鑾儀衛鑾儀使事優老臣褒舊勳也公結髮從戎四十餘年大小之戰數十百功勞最莫與爲比 聖主深知其忠特加一等精奇尼哈番每寵以殊禮其方定蜀也 御書存誠扁額秋興賦 命公子宏燦馳至軍前 賜之其既定蜀也 命宏燦再至軍齋賜弓一張馬六匹及宏燦以甯夏總兵 陛辭也復賜公 御製詩太極圖說刀一撒袋一其平滇而歸也 遣使郊勞 賜茶其掌鑾儀衛也時天寒 賜元狐裘帽各一其奉 詔入見也 天子停驂勞問呼將軍而不名其就醫江南也 命昇至觀德殿 聖躬親視憫惻者久之念其疾也則徹尙方珍物人葢鹿尾以 賜之念其老也則擇內城寬大第宅以處之或 賜

書存問或晝日三接大官賜食便殿命坐 隆恩殊錫近古未有  
有大事必就公諮訪或 召至京與諸大臣錯議必待公而決而  
公亦殫心盡瘁不爲依違在 上前知無不言無所隱避三十年  
師征噶爾丹 命公巡行塞外公相度地形施設營陣日以私財  
推牛饗士馳驟沙漠據鞍顧盼英風銳氣老而不衰 大駕親征  
公又扶病入 朝口陳兵事侃侃諤諤皆可見請施行 上方深  
倚毗之而公以不起聞矣公學問通達才思警敏每奏兵事皆躬  
自操牘不假手於幕客曰軍國大事非他人可代也日教子弟以  
忠義曰 君恩深厚汝曹宜盡力居喪哀毀骨立若不能勝者治  
家嚴而有法門無雜賓蓋其內行醇備又如此公生於明天啟元

年十月卒於康熙三十六年三月年七十有七娶郭氏 贈一品  
夫人繼娶李氏 封一品夫人再娶白氏子五人宏燦左都督管  
浙江黃巖等處總兵官宏燮山東按察司副使管天津道事宏煜  
內閣中書舍人宏煒宏熿尙幼女三人孫六人銘曰

天翊 聖運篤生人傑桓桓趙公威武惟烈早歲杖策從王於征  
搴旗奪蝥目無堅城爰制中權爰總戎律嚴明有威卒伍齊密畿  
輔之地姦宄是區挈持維綱以鋤以誅關中叛渙將驕卒狂風馳  
颯驅迅掃樓槍巴蜀梗化滇黔阻兵 主憂臣勞抗章請纓遂率  
所部練卒五千鼓行而南擣其中堅腹敗支披莫敢齟齬整旅入  
郛前歌後舞市不易肆農不輟耕烏言卉裳壺漿來迎蠶叢既定

揚旌渡瀘環城三市拉朽摧枯賊首朝投降幡夜豎氛祲盪滌復  
我疆土凡此大功 帝曰爾庸告於文人勒鬯銘鐘大官授饔尙  
衣賜服彤弓盧矢驂驪駉公之在朝 天子是毗公之既歸  
天子用思國有大事爰詢爰謀公徐一言奉爲圖球公之材武如  
罴如虎公之智略如風如雨公之精誠如火不滅公之亢直如鐵  
不折恃其孤忠以報 一人至老不悔厥聲斷斷惟 天子明獎  
其勲勞生有殊恩死有厚褒以勞定國以死勤事臣忠 主聖古  
莫與二歷觀載策此爲不朽我作銘詩垂示永久

右墓誌銘嚴虞惇撰

按嚴公此篇當係代張文貞  
公撰詳略小異因兩存之

公諱良棟字西華陝西甯夏人年二十四以武勇受知於大將軍

孟喬芳從英王征陝投潼關遊擊再隨經略洪承疇征雲南遷副將康熙元年滇王吳三桂奇公奏擢廣羅鎮總兵公知三桂有異志以疾辭三桂大怒欲劾誅之總兵沈應時爲異詞以解免隨入關補天津總兵十三年三藩反陝西大震甯羌惠安兵變殺經略提督 聖祖命公征之議者疑公陝人不可信公請畱家口於都而已率勁兵馳往 上許之時官兵敗散屯堡荒廢公沿路曉示招官歸原汛兵歸原伍劾貪冒募健兒軍威大振斬首逆熊虎等四人甯夏平上疏奏蜀爲滇黔門戶若不先恢復則滇黔路不通請乘勝進兵 上許之公率兵抵密樹關遇賊敗之禽其將徐成龍遂取徽縣過高山深箐數十重晝夜兼行抵白水壩時康熙之



十八年除夕也壩爲川江上流與昭化脣齒俗號鐵門坎賊防守尤力沿江立營爲石圍木柞張礮公下令曰元旦渡江大吉違者斬黎明公騎驕馬率麾下五千人橫刀渡江江淺爲萬馬騰簸波濤盡立呼聲震天賊連發礮傷數十人無敢回顧者賊大驚曰此老將軍軍令如山不可抗也方格關天忽風吹馬如吹舟頃刻抵岸斬賊郭景儀等獲器械旗幟馬匹無算餘賊奔竄追之再勝於石峽溝十日而克成都公入城秋毫無犯收金銀印二百六十僞劄千奏繳之上大喜手詔褒美加勇略將軍兵部尙書總督雲貴公密奏滇黔恃蜀爲捍蔽今蜀已得而吳三桂又新死宜乘機速進上許之當是時王師征滇貝子彰泰自貴州進兵滇池將

軍賴塔自廣西進兵黃草壩滿漢兵十萬餘圍城九月未下米斗  
四金月需米六萬石公至軍卽向貝子陳三策其一稱欲取內城  
先破外護使賊匹馬不能出方可招降其一稱我兵市圍太遠自  
歸化寺至碧雞關東西七十餘里調呼不靈宜掘裏壕相攻偏其  
一降者宜分別收養不宜盡發滿洲爲奴貝子不悅以滿洲語相  
駁詰而公又漢人不解滿語張目牴牾幸公已奏 聞 詔下悉  
如公策貝子不得已與兵二千攻得勝橋公望見橋頭礮臺甚密  
白晝攻所傷必多乃伏馬兵於南壩兩岸分步兵爲三隊營壕牆  
外牆上架交槍子母礮身披馬繇持大刀督陣夜二鼓攻橋賊盡  
出死戰其帥郭壯圖親搏戰三進壕牆而伏兵三起應之列炬如

星槍破雨下賊敗走公奪橋追至三市街再敗之天猶未明也平  
旦入東南二門郭壯圖舉火自焚三桂孫世璠自殺餘賊盡降雲  
南平加一等精奇尼哈番 召入都以將軍管鑾儀衛事公破城  
所得降將僞官俱不殺並代奏乞恩以故樂爲盡力每戰有功然  
本秦人性慙氣陵其上首搦取蜀之計將軍吳丹王進寶等咸嫉  
忌吳故大學士明珠從子怙寵而貪公尤輕之每論事輒不合初  
吳三桂聞公取蜀大恚遣將胡國柱陷永甯建昌兵部責公不救  
議削爵 聖祖不許公引兵克復兩郡追賊至大渡河 聖祖命  
公乘勝進滇而大將軍貝子履櫛公先追獲胡國柱再往公不從  
攻得勝橋與兵甚少公爭之許以在南壩相救及鏖戰救不至得

橋又改命蔡毓榮守之公積不平入朝屢忿爭於大學士明珠前明珠雖誑以好語然以吳丹故心終不善也公乞骸骨歸許之康熙三十五年上征噶爾丹以公老將復召公年已七十五遂上表明心迹一疏分十四條洋洋數千言貶諸將軍不值一錢而自序戰功最苦爲部臣所抑語氣傲捍御史龔翔麟劾以大不敬宜斬上優容之命赴行在問方略寵賜優渥憫其老放歸數年薨諡襄忠公雖武人好觀通鑑家居聞知縣呼騎過門便拱立喚家人子弟齊起曰父母官過敢不敬乎其樸誠如此子四人位皆至制府中丞

論曰以馬伏波之勳而晚年主恩衰替范蔚宗以爲功名之際理

固應然公之功名有類伏波其長者家兒爭相傾軋則有甚焉且  
誣公謀反然而竟以令終者何也孔子曰惟天惟大惟堯則之  
聖祖如天無所不照無所不容公遇 聖祖公勝伏波矣公薨  
聖祖諭祭云事久而乃績彌彰人往而朕心長眷嗚呼使死者而  
無知則可死者而有知其如何讀而感感而悲也

右傳袁枚撰

予曩讀寶應王先生白田存彙中有代人祭勇略將軍文其詞氣  
憤憤不平若劉向谷永之頌陳湯然者杳不解其所以然之故今  
觀此錄雖於甯夏之事言之未詳而以下所書則皆與祭文脗合  
如十八年四月良棟疏言甯夏底定

原文作湖南底定疑誤

宜取漢中興安

以圖四川臣願率所屬步騎五千獨當一路 上嘉許之下圖海  
議行十月期師四路進圖海與將軍佛尼勒征興安涼州提督孫  
思克與將軍畢力克圖征略陽王進寶與將軍費雅克征鳳縣良  
棟獨率甯夏兵征徽縣於是良棟進密樹關先襲黃清關分賊勢  
大破之復徽縣孫思克甫至階州良棟遂趨略陽擊走吳之茂復  
遣兵取陽平關徇沔縣王進寶亦復鳳縣定漢中良棟會之於甯  
羌十九年正月與王進寶分道進連挫賊於白水壩石峽溝青菁  
山降龍安渡明月江賊驚潰僞將軍汪文元巡撫張文德等降遂  
復成都此與祭文所云及其從軍西指勇略奮發料逆賊可以一  
戰而擒而憤諸帥之畏懦恇怯於是慨然率先義兵獨倡 聖朝之

所嘉許同僚之所忌嫉猥當一路之任而僅予以羸疲五千之卒乃公獨能以弱摧強以寡擊眾固已顛覆巢居剖破窟宅而承其餘威者乃得以取其毛髮指爪者合蓋進取漢中四川之策實自將軍發之四路並進路各二帥而將軍乃獨當一面且能先復徽縣再破略陽錄中所書獨字甫字遂字先字皆宜著眼也既復建昌永甯等處卽疏請趣湖廣兵速取貴州廣西兵速取雲南上是其言以疏示在事諸大臣令協謀定議尋與湖廣廣西四川兵約期並進烏丹出永甯良棟出建昌會吳世璠遣胡國柱夏國相等復陷永甯犯瀘州敘州寇建昌良棟子宏燦與提督李芳述等破賊鳳凰村觀音崖賊之在敘州瀘州永甯者皆遁此卽祭文所

云師乘不和獨以一身支柱於傾側擾攘之中城已危而復固軍已敗而復全者其不和之故今不可攷然永甯非將軍所出路咎當別有所歸而將軍之子又能力戰復之是此役不惟無罪而且有功矣其至雲南也時大將軍彭泰統諸路軍圍雲南城營城東歸化寺西連環雞關賊負固數月不下良棟至議奪橋薄城彭泰令諸軍分進良棟次南壩連破賊壘奪土橋新橋得勝橋先薄城諸軍繼之遂平雲南此卽祭文所云其環寇之師十萬環城之期九月咸視之如毒蛇猛獸不可嚮邇公乃觀察形勢相度機宜聚米畫沙無不周悉而轉戾夫蹙縮退避者之心而不使其鋒穎之或出卒之豺牙密厲虺毒潛吹始授公以偏裨之任遂乃芟夷兩寺



席捲三橋大破其藩籬由是醜徒震驚兇渠授首曾不踰時而掃  
刮乎七八年抗拒之逋賊者蓋其時必將軍屢請進師而大將不  
聽其後至不得已始令分軍以進而先薄城者惟將軍則雲南之  
平將軍爲首功無疑矣夫得首功者必膺上賞爾公爾侯當不後  
於諸將乃事定之後轉論其失陷永甯建昌之罪落職改授鑾儀  
使二十五年始復將軍總督原銜此必有如祭文所云奇猷偉烈  
倬然暴著於天下而顧加之以莫須有之詞誣之以不可活之罪  
爲此錄之所未備者祭文安得不爲之頌冤哉考吳逆之叛始於  
康熙十二年至十七年三桂死其大勢已摧敗矣陝甘已定湖南  
已平即可兩路進兵東西同奮乃十八年取漢中四川之議建自

將軍十九年湖廣兵速取貴州廣西兵速取雲南之策亦建自將軍二十年三路兵俱抵雲南矣復遲久不進徒以水環其城橋不可越耳而奪橋薄城之議亦建自將軍先薄城者亦惟將軍故祭文有曰蓋嘗考其始末公則耕之種之炊之饑之迄乎啟甌而轅釜也乃皆以給於他人而不知誰之所得也嗚乎豈不悲哉夫才大則忌者必多功高則爭者必眾故晉武平吳渾濬爭功隋文平陳韓高爭功將軍復氣性不佳故一時幾爲所掩然掩於一時卒獲伸於異日康熙三十五年授將軍一等子爵乾隆間且命其爵世襲罔替而仁皇帝優卹之旨且有偉男子之褒又謂其性躁心窄每與人不合朕保全功臣始終如一彼所奏無不準行知臣

莫若君將軍亦可無憾於地下矣 皇子臨喪 恩踰格外忠襄  
之諡邁冠等倫且爲其妻子謀安全之計祭文所云天知吾忠  
上知吾直伏讀 褒嘉獎諭之語足以信後世而榮子孫者信不  
虛也余獨愛王先生所爲文慷慨激昂按之悉與史合是爲百世  
下有傳文而朱先生所錄大抵簡嚴亦字字洗刷明白按以私家  
之論不爽銖毫百代下亦可稱信史矣於是合參其文而爲之書

右事錄李祖陶撰

康熙五十九年春正月奉 諭征討雲南時滿漢官兵合計四十  
餘萬貝子彰泰等離雲南城四十里安營一面臨湖一面抵山並  
未設兵湖中斷其水路致賊寇米糧照舊運行城內並無危急後

趙良棟率甯夏兵至云我等大兵連營四布不就近速戰迨至日  
久米糧不繼滿兵無妨綠旗兵何以存立耶彰泰云 皇上祭養  
之滿洲豈可輕進委之於敵且爾兵初來亦宜體養何可令其傷  
損趙良棟不從彰泰之言自率標兵前往力戰奪取得勝橋而趙  
良棟之兵亦瘁甚矣彰泰又向趙良棟云爾兵已瘁應暫撤回令  
總督蔡毓榮率兵看守趙良棟云我死戰所得之地何交與他人  
看守乎因此彰泰亦進軍圍城賊兵被偪而出在桂花寺地方與  
我兵接戰大敗之吳世璠等蒼黃失措無所逃匿乃自殺餘賊獻  
城投降此亦由決於進戰乃得成功也

石東華錄王先謙編

平滇之役趙襄忠公良棟實爲首功而操守尤不可及城破時諸將爭取子女玉帛公獨戒所部營城外秋毫無所犯又訪得吳逆司覺庫之人以藩宮簿籍進呈於是諸將所乾沒盡發覺而三桂寵姬二人一歸將軍穆占一歸總督蔡毓榮者事亦上聞公獨以廉潔蒙聖祖褒獎蓋公雖武夫居然有曹武惠下江南氣象矣

右紀聞陳康祺撰

國朝耆獻類徵初編卷二百七十七目錄

將帥十七

桑格

喀齊蘭

希福

鄂克濟哈

孫思克 曾孫慶成

王臣

朋春 子增壽

周卜世

阿南達 子阿喇納



國朝耆獻類徵初編卷二百七十七

通奉大夫前署江西巡撫江西布政使司布政使湘陰李桓輯

將帥十七

桑格

桑格滿洲正白旗人姓喜塔臘氏戶部侍郎庫禮之子庫禮以軍  
功得騎都尉世職又以考滿及遇 恩詔晉一等輕車都尉加一  
雲騎尉長子堯泰襲旋卒停襲順治十七年更定襲例庫禮之一  
等輕車都尉加一雲騎尉應世襲桑格由三等侍衛襲父職

聖祖仁皇帝康熙六年以桑格善射擢一等侍衛十二年五月授護  
軍統領十三年三月逆藩耿精忠叛應吳三桂 上命定南將軍



希爾根帥師赴江西以桑格參贊軍務八月奉諭曰江右爲粵東咽喉江浙唇齒相關綦重今兵民之心尙持兩端若不先滅地方小醜大兵難以前進爾當協同將軍領重兵進剿毋使兵力單弱致有疏失時耿精忠之僞都督易明陷撫州桑格同副都統席布率兵規復賊眾四萬餘迎戰擊敗之進薄撫州城賊眾自建昌至倚城結壘合城內賊抗拒桑格同席布督兵奮擊克賊壘連敗賊眾賊棄城竄遁追剿百餘里復撫州入城駐守十月易明糾賊五萬復自建昌來犯桑格甫渡河擊之賊墮水死者無算斬賊將楊三李茂等於陣十一月希爾根移師撫州桑格率兵趨剿距城九十里之碣石隘口斬賊甚眾十四年正月剿賊上高縣斬僞總

兵朱一典謝以泰等遂乘勢破賊將阮國棟等於新昌縣北山復  
二縣城進圍東鄉克之復擊敗賊眾於長興鄉連破賊營斬賊將  
邵連登等易明引賊竄遁遂復建昌六月鎮南將軍尼雅翰以廣  
州兵少請 敕桑格率兵赴廣東總統軍士守禦 詔以江西賊  
寇未平令前鋒統領覺羅舒恕移兵前往桑格仍畱援剿十五年  
二月安親王岳樂統師由袁州剿吳三桂賊帥夏國相等於萍鄉  
桑格合諸軍並進破賊十二寨於來龍山夏國相等竄走長沙十  
八年二月隨安親王復長沙 上賜桑格詩有百戰威名已早揚  
之句八月進征武岡賊帥吳國貴馬寶張祖法等踞隘口拒戰桑  
格偕副都統伊巴漢等督兵攻剿越三晝夜以礮擊斃吳國貴賊

國朝通志卷二百七十一  
二  
眾悉潰追朔至楓木嶺之木瓜橋十一月安親王奏令率每佐領  
下護軍三名還京二十年五月 詔以桑格前此出征尙能奮勉  
回京後委頓不堪解護軍統領任以世職隨旗行走三十五年二  
月 上親征噶爾丹桑格署護軍統領分管鑲白旗大營五月師  
至克魯倫河同內大臣阿密達請追朔逃寇得 旨俞允分隸左  
翼軍隨平北將軍馬思喀追朔至巴顏烏蘭西路軍已擊敗噶爾  
丹於昭莫多會師收集降眾護送至張家口尋還京 命復護軍  
統領原品三十八年二月卒子阿住襲世職

右 國史館本傳

喀齊蘭

喀齊蘭滿洲正黃旗人姓伊爾根覺羅氏先世居瓦爾喀地祖赫臣當太祖高皇帝勦業時率族屬來歸卽俾轄之爲佐領從征烏拉有功奉使葉赫抗節不屈葉赫貝勒錦台什使人害之太祖旋滅葉赫令其子克宜福刃警人以祭又襲管佐領事天聰四年太宗文皇帝征明克永平以克宜福爲捉生將敗敵兵生擒二人獲馬十七匹又爲前哨斬明兵二人獲馬一匹望見敵踞山結營馳還以告太宗遣大臣率兵破之八年彙敘開劾以來諸臣功次子騎都尉職世襲罔替崇德二年授吏部副理事官六年隨鄭親王濟爾哈朗圍明錦州其城東關廂之蒙古諾木齊

等謀內應爲明將所覺圍困之克宜福衝入破敵陣援以出並護其家口來歸得 優賚 世祖章皇帝順治二年授 福陵總管兩遇 恩詔晉世職三等輕車都尉尋卒喀齊蘭其次子也初由前鋒校襲管佐領授吏部理事官十三年署參領隨甯海大將軍伊爾德勒明魯王朱以海遺黨於舟山屢戰皆捷凱旋紀功授護軍參領 聖祖仁皇帝康熙十三年任前鋒參領隨順承郡王勒爾錦討逆藩吳三桂十八年大軍自荊州渡江克復松滋縣都統根特副都統瑪爾齊哈令喀齊蘭率前鋒兵征澧州將薄城賊眾迎拒喀齊蘭擊潰之轉戰追逐至江岸生擒三人獲纛幟軍械無算城中僞文武官以城降凱旋紀功擢正黃旗蒙古副都統二十

一年六月調本旗滿洲副都統二十四年二月以病乞罷命原  
品致仕三十八年十月卒 賜祭葬如例子凱音布初襲克宜福  
三等輕車都尉世職仕至禮部尙書別有傳

右 國史館本傳

本草綱目卷之二十一

四

--	--	--	--	--	--	--	--	--	--

希福

希福滿洲正紅旗人姓他塔喇氏世居安楚拉庫路祖羅屯國  
初率八百戶來歸列五大臣編佐領父哈甯阿由護軍參領隨征  
錦州松山大軍入山海關擊敗流賊李自成追至望都縣總敘前  
功授騎都尉世職卒子漢初罕襲從征蘇尼特部騰機思等陣亡  
贈三等輕車都尉弟班初罕襲遇 恩詔晉二等輕車都尉希福  
班初罕兄初任二等侍衛順治七年襲世職兩遇 恩詔晉一等  
輕車都尉又一雲騎尉授護軍參領康熙七年擢正黃旗蒙古副  
都統十二年逆藩吳三桂叛希福隨大將軍順承郡王勒爾錦往  
湖廣勦禦十三年陝西提督王輔臣叛於甯羌據平涼秦州 命



國朝通志卷一百一十七  
五  
希福同雲貴總督鄂善等率見駐襄陽蒙古兵移守興安漢中十四年三月貝勒洞鄂征隴州復關山進兵秦州希福攻克東西二關十五年調守隴州十六年遷前鋒統領十七年閏三月 詔赴湖南駐守茶陵十一月隨簡親王喇布由衡州之安仁縣進征十八年正月希福率兵攻衡州府夜半薄城下統署前鋒參領戴屯等奪門入賊帥吳國貴夏國相等驚遁復其城得 旨嘉獎下部議敘六月遷正紅旗滿洲都統時僞將軍馬承蔭以南甯降 上命希福率所部兵赴廣西同鎮南將軍莽依圖自南甯進定雲南十九年五月馬承蔭復叛糾二萬眾迎戰於陶登希福偕副都統馬世泰進擊之賊大敗遁追殪甚眾閏八月奏南甯兵缺馬大軍

深入途險遠恐誤軍機 上諭以柳州南甯桂林駐兵之馬通融  
給發並趣都統瑪奇送馬赴南甯時莽依圖卒於軍以都統賚塔  
爲征南大將軍十二月希福隨賚塔至西隆州僞將軍何繼祖等  
踞石門坎築城以拒二十年正月希福偕瑪奇等率前隊履險進  
攻後軍繼進夾攻大敗之盡奪隘口翌日乘勝馳安籠所復其城  
降僞總兵陳義魁繼祖遁新城復糾僞將詹養等踞黃草壩列象  
拒戰希福領前鋒進勦自卯至未破賊營二十二獲象馬器械無  
算二月抵曲靖復馬龍州等城並遣營總碩塔等馳勦嵩明州斬  
關入賊遁殲其眾遂會大軍圍雲南省城吳世璠偕僞將胡國柄  
劉玘龍等犯我軍希福率前鋒奮擊陣斬國柄玘龍及僞總兵九

人賊馬寶胡國柱等聞雲南圍急由四川還救六月希福同提督桑格迎勦馬寶於烏木山敗其眾馬寶遁姚安降於軍前九月躡國柱等於鶴慶麗江復蹙之於雲龍州國柱勢窮自縊王緒李匡等自焚死餘賊悉降二十一年十一月擢西安將軍 諭曰陝西地方緊要因爾練習軍務特簡此任須加意操演毋騷擾百姓至漢中必選精兵戍守不得以疲弱者發征先是希福隨征長沙失利部議革將軍世職 上念希福勞績甚多褫本身加級從寬畱將軍任及伊父二等騎都尉世職時川陝平定部議將西安撥守漢中之滿洲將軍兵各一千名撤半仍畱一千名輪戍二十五年希福以棧道遞送勞苦疏請並撤部議不准 上曰蕩平以來漢中

駐防無益朕不忍使兵民交困其輪班戍守及永遠駐防俱著停止二十七年復調正紅旗蒙古都統二十九年噶爾丹擾塞外諸蒙古上命裕親王福全征之希福參贊軍事破賊於烏蘭布通三十年以老乞休上慰留之三十一年四月調正紅旗滿洲都統並授建威將軍統師駐右衛三十三年噶爾丹師內向將侵根敦戴青命希福率右衛兵同將軍費揚古等赴圖拉禦賊尋疏請大同總兵康調元率綠旗兵三千同行並請派發察哈爾兵上以綠旗兵多則馬更少且滿洲兵有八千所向無敵希福遇事疑阻令仍駐防右衛三十四年兵部疏劾不收入旗撥送馬致糜錢糧革職三十八年卒

右 國史館本傳

鄂克濟哈

鄂克濟哈滿洲正黃旗人姓納喇氏由侍衛署副都統兼佐領康熙十二年逆藩吳三桂叛分擾陝西湖廣十三年十月上以河南府乃四達之地距潼關鄖襄皆近駐防其地所在有警可策應命鄂克濟哈偕副都統色格率每佐領驍騎三人往駐十二月逆鎮王輔臣叛於甯羌命鄂克濟哈偕將軍阿密達率所部兵赴西安勦禦十四年正月上以蘭州爲近邊要地應遣兵駐守命鄂克濟哈參贊阿密達軍務移師蘭州勦禦並防階州文縣諸處三月鄂克濟哈擊賊於涇州城南擒斬僞總兵衛民譽等復涇州五月復敗賊眾於甯州近城東山斬僞副將張三僞參將王廷

警及賊眾八百餘復甯州得 旨嘉獎下部議敘十六年隨撫  
大將軍圖海進偪禮縣驛門等處敗賊於芭蕉園擒斬無算復塔  
什堡十七年九月議取漢中興安提督王進寶趙良棟及將軍畢  
力克圖分路進鄂克濟哈隨圖海由興安進漢中興漢相繼恢復  
十八年十二月圖海以漢中要地請撥滿兵千令鄂克濟哈領振  
武將軍印同副都統哈塔駐守 從之十九年正月進取四川  
命鄂克濟哈率漢中滿兵合將軍烏丹爲良棟進寶後勁二月大  
兵分路進剿成都保甯相繼恢復 上以四川已定 諭鄂克濟  
哈同烏丹卽精簡士卒馳赴重慶爲進取雲貴計三月 諭曰四  
川與雲貴接壤賊必乘閒來犯其檄趙良棟同鄂克濟哈等於各

要路立營深溝高壘堅爲守禦八月 諭曰四川漢中滿兵雖爲  
數不少今當進取雲貴著於滿洲蒙古漢軍每佐領下各派護軍  
二人驍騎四人共帶兵千人令護軍統領佟佳率赴四川旣至鄂  
克濟哈同將軍烏丹酌量分爲二路時湖廣提督徐治都疏報瀘  
州永甯諸處失守逆賊譚洪旣降復叛閏八月鄂克濟哈以兵復  
瀘州九月擊賊於托川雅自午至酉奮勇大戰賊棄營宵遁捷  
聞下部議敘十月良棟疏報賊犯仁懷烏丹擁兵不急援致永甯  
失守得 旨成都距永甯不過七八百里烏丹不急赴援貽誤已  
甚著速解將軍任還漢中鎮守其四川官兵俱付鄂克濟哈統領  
與趙良棟會商進剿十一月鄂克濟哈疏言烏丹解將軍任後兩



路官兵俱臣統領建昌永甯相距千餘里不能兼顧請分路進取  
命署西安將軍佛尼勒爲建成將軍領永甯一路兵與總督哈占  
會剿二十年三月鄂克濟哈等以建昌軍棄城出自劾失援請嚴  
加處分 諭曰鄂克濟哈久駐成都旣不能追敘州諸處來犯之  
賊復不馳援建昌以致失陷著解將軍印還漢中同將軍圖海守  
漢中諸處七月 召還尋授二等待衛三十年授正黃旗副都統  
三十三年遷護軍統領三十四年八月 命偕副都統扎喇克圖  
巡邊十月噶爾丹擾喀爾喀遊牧 上命調蒙古各扎薩克兵以  
鄂克濟哈見赴汛界所有蘇尼特阿巴噶阿巴哈納爾各部兵  
命領侍衛內大臣索額圖偕鄂克濟哈前往收集各駐要地偵禦

三十五年隨征噶爾丹凱旋 命駐守甯夏三十八年卒

右 國史館本傳



孫思克 曾孫慶成

孫思克漢軍正白旗人三等男孫成功次子初任王府護衛 世祖章皇帝順治八年二月管佐領六月授刑部理事官十一年六月遷參領十三年考滿廕一子入監尋隨大軍由湖南進征貴州雲南屢立戰功 聖祖仁皇帝康熙二年正月擢甘肅總兵官五年三月同提督張勇疏言厄魯特蒙古僻處海隅雖通西藏亦荒徼絕塞非有肥饒地土資生 朝廷曲示招徠准開市口貿易且以境內數十萬之番族令每年輸納駝馬牛羊與彼爲厄魯特蒙古者理應感戴 皇上鈐束部落各安邊境乃墨爾根台吉等狼心不改鷹眼未化蟻聚蜂屯於祁連山上縱牧內地之大草灘去

冬不遵撫慰抗拒於定羌廟爲官兵擊退稍挫其鋒猶不悛改狂肆愈甚聲言糾合部落一股直入河州臨洮鞏昌一股進逼西甯一股分犯涼州狡謀叵測宜迅速創懲方可議修築而嚴固守得旨下廷臣密議以兵端不可輕動令嚴防邊境仍撫恤番人以和其心於是思克偕張勇修築邊牆自扁都口西水關起至嘉峪關止六年八月內地往牧黃城兒大草灘各處之厄魯特蒙古盡數徙去思克至南山各隘相度衝險撥兵固禦總督盧崇峻疏聞下部知之十三年六月諭獎效力邊疆有年下部議加銜右都督是冬平涼提督王輔臣叛應吳三桂臨鞏諸郡相繼從逆蘭州危急思克遣遊擊劉衍等移兵協防自統兵進攻苦水洋值蘭州

已失守乃駐河西尋回涼州十四年五月疏言前因督臣哈占定議南北兩路兵同時進勦將軍張勇總兵王進寶等從金城關渡河規復蘭州思克自涼州領標兵由阿壩紅水蘆塘索橋人跡不到之草地結筏渡河規復靖遠一路幸賴天威遐播靖遠周圍三百里城堡皆已納款正擬趨固原會大兵於平涼不料西海蒙古墨爾根台吉等已從山口入內地與官兵拒敵副將陳達傷亡臣畱參將劉選勝等守靖遠由草地渡河回涼州以保河西根本重地墨爾根台吉引眾出口而甘州所屬之高臺與紅崖犁園等堡有黃番頭目入口搶掠合數千餘騎攻圍暖泉順德諸堡臣卽自涼赴甘番族乃遠竄因將軍張勇約期會勦王輔臣復渡河而

東因草地往來兵丁勞苦十倍他鎮乞 恩加犒賞得 旨往來  
防朔具見忠盡兵丁各加犒賞閏五月同張勇等圍鞏昌時定西  
大將軍貝勒洞鄂圍秦州城中賊眾屢出犯其逆黨自四川至者  
結寨秦州南山上日益猖獗洞鄂檄思克率兵二千駐秦州西賊  
勢乃窮僞總兵陳萬策僞道馬肇升赴思克營乞降僞總兵巴三  
綱遁遂復秦州南山賊潰竄思克同振武將軍佛尼埒等追擊於  
閭關敗之乘勝克禮縣復敗賊於西和奪門入斬僞官三十清水  
伏羌等縣皆復乃赴鞏昌會勦遁降將陳萬策等入城曉諭僞道  
陳台孫總兵陳可等以鞏昌十七州縣降河東悉定八月會勦平  
涼思克由靜甯隆德進擊走賊將李國樑陣斬賊兵五百餘生擒

僞守備一千總二復靜甯州進次華亭僞副將高鼎率將弁二十八兵一千餘迎降遂抵平涼與大軍合十五年三月貝勒洞鄂奏言大軍圍平涼半載賊屢出犯思克標兵徒步當先敗賊於南山者四敗僞總兵蔡元於城北者四又九處設伏敗賊於南門僞總兵文姓引賊二千掩襲掘壕阻思克軍揮兵急擊賊遂退復偏者三俱敗之剿涇州白起寨僞副將李茂思克先至寨下遣領旗李錦先登擒李茂斬賊數十又敗賊於南山甲子峪及馬營子麻布嶺諸處宜酌示鼓勵紀功敘錄五月隨撫遠大將軍圖海破賊於虎山墩王輔臣窮蹙乞降思克還涼州八月諭部臣曰自逆賊變亂以來奸徒附和侵擾地方大兵未集人心不無動搖張勇王進



寶孫思克一聞蘭州之變卽率兵勦殺賊眾收復城邑其功甚大  
及大兵攻取平涼復同心協力展布謀猷兼以訓練士卒忠義素  
孚故能身先行陣所向克捷朕甚嘉之於軍功議敘之外應從優  
加恩孫思克升爲涼州提督並授一等輕車都尉世職十月疏言  
全秦底定仰仗 天威臣何功可錄蒙 皇上溢格優升復授世  
職臣卽粉身碎骨萬不敢辭五月虎山墩之戰隨大將軍圖海相  
度地形并偵通固原路徑賊伏兵萬餘猝起來犯臣率領隊兵奮  
戰追擊十餘里雖敗賊眾而賊刀斫臣右臂傷筋及骨迄今閱五  
月已成殘疾乞假解任回旗得 旨卿久鎮巖疆勦除賊寇奮勇  
克敵屢建戰功新簡提督正資料理不必求罷十六年四月彙敘

前此軍功晉三等男時噶爾丹侵西北諸蒙古其濟農等爲所敗突入沿邊寨內擾居民思克同張勇以兵驅逐乃徙去十八年七月上敕圖海調思克與提督趙良棟等勦賊漢中興安圖海奏九月初旬四路進發思克與將軍畢力克圖由略陽進會有詔因京師地震令內外大臣各抒所見思克疏言漢中興安皆崇山疊嶺勢險路紆逆賊盤踞有年又創斷各路要口我兵未能長驅直入賊兵爬山越嶺如履平地稔知小路曲徑潛躡我後以絕餉道爲害滋甚大將軍圖海定議四路進兵雖分賊勢終憂兵單緣旗兵每人止有一馬常需馱載甲冑器械馬料不足羸瘦甚多步兵背負棉甲乾糧不皆強壯惟滿洲勁旅堪恃第爲數亦無多若

各路調取又恐秦省三邊地偏番夷秋高馬肥乘機思逞不若今  
秋暫緩進兵揀選各營強壯飼秣馬匹俟來春二三月間塞外草  
尚未生水泉尙涸番夷不敢內犯之時多調邊兵以資戰守秦地  
大半皆山土瘠民貧不產秔稻所種惟麥豆之屬向有捐納一項  
稍裕軍需今已停止專事採買用民負載馱運雇賃之價數倍於  
應輸之賦各路需餉甚多山徑狹隘輓運維艱或照向年捐例轉  
輸協濟亦宜緩期熟計俾士馬得以飽騰況出征官兵聞京師地  
震傾壞房屋壓斃人口各有內顧之憂俟來春人心稍定兵糧俱  
足再議進兵未爲晚也疏入 上命學士拉隆禮至涼州宣諭  
詰問曰陝西綠旗兵較之各省曩推精銳賊能跋涉山嶺我兵何

獨不能漢中興安久爲內地滿漢大兵經行熟悉孫思克何得視同絕域荒誕其辭凡將帥用兵前爲衝鋒後顧餉道自有一定機宜儻以賊閒道潛來斷絕餉道爲憂怯懦不前則永無破賊之日矣各省綠旗兵皆只給一馬越境征勦粵東粵西閩楚諸處今又進定滇黔較之平定境內漢興勞逸何如耶凡將軍提鎮募兵時必選精壯毋得濫收充數定例嚴明如果兵非強壯難以應用則孫思克平日所司何事滿洲兵在陝西者亦不少且有將軍圖海籌畫周詳何得妄稱單弱正值秋成涼爽各處賊寇大敗震驚之餘不速行蕩平反欲於來春青黃不接之時進取設或二三月間進取之後四五月間番夷馬肥思逞又將若之何粵東粵西山

嶺亦多何曾預備糧餉官兵豈有止食稻米不食他粟之理陝西  
數年以來未曾勞民轉運漢興雖多險阻非隔省可比今恐輓運  
累民來春又誰爲轉運耶當逆賊敗遁之時急令進兵者正爲早  
定地方以安百姓耳今以輓運維艱請開事例爲詞其規避進兵  
明甚八旗官兵世受渥恩不特房屋傾圮無足重輕卽赴湯蹈火  
誼亦難辭何得妄言人情憂慮孫思克封疆大臣前者陝西境內  
淪陷卽應議處念同大軍進剿宥過計功加不次之擢給世襲之  
官當捐軀報國自請破賊安疆乃身任提督統轄全師不思奮力  
前進反煽惑人心飾詞妄奏深負朕恩速行詰取供詞思克乃自  
引罪拉隆禮還奏得 旨俟事平日再議十一月思克與畢力克

圖敗賊眾於階州文縣成縣進駐沔縣 詔思克還涼州尋以總督哈占請移駐莊浪防守河東河西二十年三月慶陽賊渠耿飛倡亂糾叛番達爾嘉濟農等犯河州思克與張勇剿平之二十二年四月追論前奏緩進兵罪革三等男爵及提督仍留總兵任二十三年六月遷甘肅提督二十八年三月北套生番犯內地掠錫喇偉古爾番族思克督兵截阻斬獲甚眾二十九年十月出使西域學士達瑚郎中桑格歸至嘉峪關外爲西海阿奇羅卜藏所劫思克聞報卽遣遊擊朱應祥計賺其宰桑質於關外始反我使臣別遣副將潘育龍遊擊韓成等擣其巢穴斬馘四百餘阿奇羅卜藏遁復遣人赴西海詰問各台吉責償所掠物各台吉懼聲阿奇

羅卜藏所有以償思克奏請免其窮治 諭嘉盡心籌畫區處合宜如所請行三十年二月疏言肅州一協去甘州五百里涼州一千里極邊之地外偏西海北套哈密諸部內則番族插帳與民雜處噶爾丹巢穴離邊月餘程其姪策妄阿喇布坦見在西套住牧雖叔姪爲讐恐將來復合有侵奪西海之舉嘉峪關外係其必由之路所設副將威望不尊兵馬不滿一千不足以資控禦調兵接應緩不濟急不可不作先事未然之防請設總兵一員兵三千以固邊圉庶可漸消窺伺又甘肅地瘠民貧一切布種收穫與腹地迥別一年一收縱遇豐年輸將國賦之外僅贍八口並無蓋藏本地兵馬糧料不敷供支節年折價已苦無處羅買萬一征調雲屯

何以接濟宜於河西要地屯積糧草以備戰守但本地無糧可買  
輓運又恐勞民惟捐輸是賴而本地富庶之家有限請無論本省  
別省官民一例捐納加級紀錄職監俟邊儲稍充卽行停止九卿  
議 從之三十一年三月 詔嘉久著勞績加太子少保予騎都  
尉世職五月疏報遣總兵潘育龍等追來降復叛之番眾於庫列  
圖嶺斬級四十餘擒百二十人請將叛首齊奇克正法宥其從人  
妻子解京 上免齊奇克死令安插內地十一月自陳乞休 優  
旨慰留加振武將軍銜三十二年二月 命內大臣郎岱領京營  
兵至甯夏同思克駐防卽以思克爲參贊探噶爾丹聲息三十三  
年正月疏報巴圖爾額爾克濟農之弟博濟於三十年間叛逃復



帶部落窺邊經臣遣兵同總兵柯彩出邊擊敗今聞其兄蒙恩  
安插賀蘭山並以博濟逃後被獲人口發往收養自悔前罪率所  
屬男婦百餘來投 詔與巴圖爾額爾克濟農同住牧三十五年  
二月 上親征噶爾丹由中路 命撫遠大將軍費揚古由西路  
進思克率陝西兵出甯夏至翁金地與費揚古會五月 上駐蹕  
克魯倫河噶爾丹聞 駕親臨蒼黃遁去費揚古邀擊之於昭莫  
多思克率綠旗兵居中與東西二軍并力迎戰自未至西斬級俘  
獲無算追逐三十餘里噶爾丹引數騎遠竄捷奏至奉 諭褒獎  
召赴京 命侍衛迎勞 賜袍褂帽鞞等物並 御製詩箋有鷹  
揚資遠略宿望在西陲之句入 覲賜春園 賜御書綏懷堂額

及端罩四團龍補服孔雀翎朝帽朝衣朝珠鞍馬並給隨帶官兵糧料 命赴肅州駐兵探噶爾丹往哈密聲息三十七年敘昭莫多戰功加一雲騎尉三十九年二月以病乞休 遣御醫及兵部官往視仍 命畱任調養是月卒 詔從優議卹 贈太子太保賜祭葬如例諡襄武七月櫬還 命皇長子前往奠醊 賜鞍馬銀二千兩 諭廷臣曰聞孫思克喪同時自甘州至潼關沿途軍民無不號泣相送若平昔居官不善何以得此誠可謂將軍矣復諭兵部曰孫思克謀勇素裕居官甚優久鎮巖疆允稱良將給還前所革世職部議併爲一等男加一雲騎尉以其子承運襲 世宗憲皇帝雍正十年入祀賢良祠 今上乾隆三十二年以思克

嵩吳三桂反叛及噶爾丹犯邊時懋著勞績其一等男爵 詔予  
世襲罔替

右 國史館本傳

孫思克漢軍正白旗人先世居廣甯順治六年授二等護衛擢參  
領隨大軍征湖南滇黔屢有功康熙二年授甘肅總兵時西海厄  
魯特蒙古住牧黃城兒大草灘大黃山一帶延擾居民思克分別  
疆界驅令遠徙又勦獲攘卜台吉克代海番宰僧哈兔等奏請正  
法番人膽悸不敢南牧十三年吳三桂反平涼提督王輔臣叛應  
之臨洮蘭州失守思克從蘆塘渡河進攻復靖遠衛十四年加左  
都督噶爾丹部番侵掠甘屬洪崖堡河西一帶告急思克馳赴救

援賊驚遁復渡河攻取蘭州鞏昌適秦州逆賊巴三綱糾川賊肆  
出擊走之臨洮蘭州平遂進剿王輔臣於平涼至紅寺兒生擒僞  
守備等獲僞劄器械馬匹靜甯隆德請州縣悉定師過六盤山雨  
如注攀崖陟峻賈勇前進僞參將江會升率眾降抵臥羊山僞總  
兵高鼎亦迎降乃北至平涼與大兵合十五年攻虎山墩鼓勇當  
先臂受創深入寸許血漬衣甲冒死斫陣所向無敵賊眾大敗輔  
臣勢窮乃降升涼州提督授三等男十八年隨大兵進剿川賊  
聖祖念河西要地特令回汛鎮守駐莊浪二載土寇耿飛等倡亂  
以次削平之二十三年調甘肅提督屢擊剿賊番邊境肅清三十  
年番目阿氣勞藏劫奉使至西域者思克卽夜發兵擣其巢斬數

百人番目眾台吉懼罪籲恩乃奏釋之尋奏請肅州設總兵一員  
增兵二千名合協標舊兵立中左右三營以壯邊勢 從之加太  
子太保給騎都尉世職授振武將軍三十五年同撫遠大將軍費  
揚古合兵進剿噶爾丹至昭莫多大敗之奏捷 聖祖御製凱旋  
詩以賜三十九年卒 聖祖遣官祭奠追贈太子太保諡襄武加  
授一等男兼一雲騎尉世職

右 國史賢良小傳

慶成

慶成孫氏正白旗漢軍人曾祖一等男加一雲騎尉甘肅提督孫思  
克自有傳祖五福官至鑲紅旗漢軍都統慶成於乾隆四十一年

由閒散挑補鑾儀衛整儀尉四十二年授治儀正四十五年兼公  
中佐領四十六年授廣東惠州協都司洊擢督標中軍副將五十  
三年隨總督孫士毅征安南擒賊目陳名炳偽指揮黎廷偽內衛  
栗全等 賞戴花翎給錫郎阿巴圖魯名號五十四年補正黃旗  
漢軍副都統在乾清門行走五十五年擢戶部右侍郎十一月內  
閣學士尹壯圖奏各省倉庫虧缺 上命慶成帶同尹壯圖往山  
西直隸山東江蘇各省盤查俱無虧缺五十六年正月回京在  
御前侍衛上行走九月授正黃旗護軍統領十一月轉左侍郎五  
十七年授古北口提督嘉慶元年四月楚省邪匪滋事 命赴南  
陽一帶統兵進剿賊目姚之富劉之協等勢甚鴟張慶成偕將軍

恆瑞巡撫景安連敗之於雙溝張家集官莊王家岡等處旋偕恆  
瑞奏副都統永保總統襄陽軍務 上嘉其和衷賞金盒荷包六  
月賊屯棗陽了兒山夥黨據張塢連營十餘里我兵鼓勇進奪左  
邊賊營八處右邊五處縱火焚其連營賊焚剽踐踣死者三四千  
生擒賊首宋廷貴陳正五賊由龍門山西竄紅土山七月破之於  
大高頂殲斃無算擒賊首黃玉貴 恩加太子少保銜時姚之富  
劉起榮張富國等賊眾五六萬聚鍾祥縣慶成偕永保督兵冒雨  
進擊殲賊數千生擒一千餘名 上嘉之晉太子太保銜疊 賜  
玉搬指大小荷包九月賊敗遁雙溝經我兵追剿復向東北奔竄  
擾及唐縣滹河鎮慶成等因官兵疲乏一時不能分布圍剿僅以

設法兜截虛詞入奏 上嚴飭之賊旋竄棗陽太平鎮官兵四路  
並進攻破賊屯十一殲三四千擒二百餘名慶成身受矛傷 上  
嘉其奮勇賞金盒大小荷包十一月賊由棗陽竄至黃龍壩偷渡  
滾河 上以慶成等未能設法兜捕致賊渡河向西奔竄實屬無  
能 命革去花翎及太子太保銜巴圖魯名號時永保逮問 命  
尚書惠齡總統軍務 諭曰永保調兵未能妥協恆瑞慶成舒亮  
亦隨同附和惟知在賊後尾追仍令東奔西竄其罪均無可解著  
惠齡到彼嚴加訊問據實覆奏十二月追擊黃龍壩賊匪殲斃多  
名復偕惠齡剿賊於王家城梓山連克之二年元旦剿賊於興龍  
集山梁轉戰一晝夜追奔數十里殺賊二千餘 諭曰恆瑞慶成



舒亮因貽誤在前各知愧懼奮勉出力若能迅速蕲功不但可贖前罪並當酌量施恩著各賞鑲玉如意一柄大小荷包以迓春祺而昭優眷惠齡亦奏言慶成等領隊打仗尙屬奮勉請畱營效力上允之又諭曰慶成前在安南軍營曾有勞績又因係五福之孫是以擢至提督此次派往湖北軍營冀得其力近聞不曉軍務且年少識淺往往自作聰明眾心多不悅服著惠齡景安查明慶成如果剋扣徇私不得兵心等事據實奏聞卽著慶成來京尋因連次殲賊多名並射中逆首劉起榮擒之諭曰慶成近日自知改悔奮勇出力仍畱軍營帶兵前罪不必深究二月剿賊於曾家店慶成帶領巴圖魯侍衛等生擒執旗賊目及夥匪多名胸受矛

傷尋以賊向東北擾及豫境復領兵抄截連敗之於確山五里川  
盧氏火燄溝等處均得 旨嘉獎四月賊首李全王廷詔陷鄖西  
慶成帶兵收復賊仍分股逃竄一竄鄖西之夾河關一竄陝楚交  
界之岔口 上以慶成剿賊總落賊後據奏到圖摺前後舛錯且  
偕惠齡行走遲延使賊乘閒遠颺屢奉 嚴旨切責嗣因姚之富  
合夥由白馬石竄渡漢江 上嚴飭之革二品頂帶暫畱提督任  
閏六月楚匪竄入開縣慶成偕惠齡擊敗之南天硯火燄壩又敗  
之於鎧蓋窩阮家溝等處 上以此次慶成首先出力賞還花翎  
嗣以剿敗川楚合夥之賊擒首逆高明貴 賞玉喜牌大小荷包  
九月偕恆瑞截擊楚省敗回竄陝之賊奪獲賊營九處殲擒一千

數百名洵陽地方肅清餘匪竄興安迄南山深處慶成卽馳往漢中截擊大敗之於司渡河得 旨賞賚時川省逆匪王三槐等滋擾保甯川東等處復有羅其清冉文儔分股焚掠十一月 諭川省需兵甚急恆瑞慶成若畱駐漢中聲勢不能聯絡自當移兵由廣元赴川與宜縣併力合擊旋統兵由甯羌入川沿途俱有斬獲疊奉 恩賞三年三月截剿羅其清股匪骸中槍傷 諭慶成受傷較重著解提督任回旗調理四年正月瘡愈仍在 御前侍衛上行走屢請赴軍營剿賊四月授四川成都將軍 命赴陝西軍營六月奏俟直隸兵到齊卽取道南山探迎賊蹤剿辦七月參贊明亮剿賊張漢潮股匪慶成偕侍衛永保協剿聞映祥股匪竄入

徽縣兩當慶成等馳擊之並未會合明亮夾擊張漢潮明亮亦奏  
言據獲賊供稱有兩日行三百餘里並無官兵追趕之語 上以  
慶成永保懷挾私見坐誤事機命總督松筠密行查察復 命尙  
書那彥成赴陝將慶成等革職拏問嚴訊玩誤實情復因慶成得  
軍需餽送奉 旨查抄 諭曰慶成之曾祖孫思克曾於國初著  
有勞績又有公主下嫁伊家而慶成之祖五福亦任御前侍衛始  
終勤慎今慶成雖因帶兵不力得受餽送獲罪但念伊前次打仗  
曾經受傷所有慶成住房一所及公主陪嫁地三十一頃六十畝  
零金冊一分俱著加恩賞還十一月松筠覆奏慶成前隨同永保  
行止稽延多日後分兵追賊究未能趕上賊匪遲誤之罪亦無可

辭除得受湖北餽送依不枉法賊律絞監候輕罪不議外合依失  
誤軍機律擬斬監候 上念慶成係受傷之人擊剿張漢潮時亦  
尙能跟蹤追剿奉 旨改發伊犁效力贖罪嗣松筠奏令赴吉蘭  
等軍營協同堵剿 恩旨免其發遣 賞給藍翎侍衛先是高家  
營戴家營股匪分竄慶成領固原甘涼兵赴鞏星提其西北截剿  
至經略額勒登保檄剿高二馬五夥匪慶成連克之於禮辛鎮何  
家衝被賊矛穿透皮衣兩層復攻占山梁衝賊隊入斃賊一千四  
五百生擒二百餘名 上嘉其奮勇出眾賞給三等侍衛三月殲  
首逆馬五之子馬狗兒四月剿伍金柱曾柳股匪均奮勇出力  
命以四品翎頂補授陝安鎮總兵七月伍金柱冉學勝張世龍馬

五張添倫合爲一股窺伺陝境我兵分路截剿使不能越過渭河  
添倫捨命奔竄慶成追擊之於教場壩麻池溝等處多有斬獲殲  
僞元帥宋麻子 恩加三品頂帶 優旨賞賚伍逆被官兵殲斃  
其餘匪曾芝秀竄擾南山慶成帶兵二千擊敗之十月 命兼署  
固原提督並給二品頂帶額勒登保赴川會剿所有陝兵三萬俱  
歸慶成節制十一月川匪冉學勝冉添元樊人傑先後偷渡漢江  
北岸 上以慶成不能先事防堵 嚴飭之責令戴罪立功旋截  
擊高馬股匪克之餘匪折回奔竄十二月高逆股匪復由安康五  
塊石及洵陽大棣溪偷渡慶成因在西路堵剿未能趕往截擊奉  
旨申飭六年二月偕總督長麟擊敗之殲獲多名並追剿竄匪陳

朝觀魏棒顏勝可等四月徐添德樊人傑復至江岸偷渡欲竄鄖  
西參贊德楞泰擊之擒二逆之妻慶成扼要嚴堵不令躡淺過江  
得旨交部議敘尋實授固原提督九月諭曰慶成係陝省大  
員自應在陝西堵剿如餘匪復行竄近慶成等務悉力截回儻任  
彼闖入惟慶成等是問十月截擊張添倫殘匪於甯羌之二郎壩  
旋有楊開甲餘孽千餘西竄廣元張家溝慶成率將弁奮擊殲擒  
賊匪七百餘並獲開甲之子楊麟生恩加一品頂帶十一月川  
匪苟文明竄入甘境慶成邀擊之賊鋒大挫仍竄川省廣元上  
嘉之賞還錫郎阿巴圖魯名號時辛聰劉文受股匪經官兵在棧  
東剿敗竄棧西黑河慶成飭將弁嚴率馬隊馳往甯沔追剿擒辛

聰之師曾顯章僞總兵張添潮七年擒獲賊目羅半千搜捕關平  
溝零匪及鳳縣兩當竄匪棧西黑河餘孽淨盡二月張添倫被官  
兵殲斃嗣添倫姪張喜與魏洪升合夥由川省竄棧西入略陽慶  
成督兵抄截斬獲多名賊北竄擊敗之於鳳縣兩當交界地方賊  
西竄又擊敗之於黑松店首逆張喜被擒我兵赴棧道搜捕魏逆  
亦就擒餘匪分竄紫柏山老林隨率兵勇裹糧入捕生擒賊目康  
二麻子殲僞總兵張昌元等張魏股匪剿捕殆盡仍 賞給太子  
太保銜並蒙 優賚先是慶成丁父憂因軍務緊要仍畱剿賊至  
是南山殘匪無多 諭令回旗守制是年九月 命署湖北提督  
九年五月服闋實授十月補四川成都將軍十一年六月 陛見



有旨詢問曾否戴過雙眼花翎慶成奏在副將任內隨孫士毅征安南曾經賞給總兵銜得有雙眼花翎嗣奉諭來京大學士和珅告以見已徹兵不應帶用是以不戴嘉慶二年勦捕邪匪拏獲劉起榮解京時高宗純皇帝欲賞給雙眼花翎又經和珅奏止等語命軍機大臣查前辦理安南軍務諭旨檔案並孫士毅奏摺俱無此事上以慶成欺罔孤恩無所忌憚革職發往黑龍江效力贖罪十二年四月諭曰慶成在軍營宣力有年且受有傷痕著施恩賞給藍翎侍衛充作圍場總管十二月授二等侍衛十三年擢馬蘭鎮總兵兼總管內務府大臣賞給三品頂帶十四年三月賞還二品頂帶六月授湖北提督九月補福州

將軍十五年奏福州近海地土蒸溼北馬不習水草易於受病請於見拴馬五百六十匹酌畱馬四百匹儘敷騎操又旗兵生齒日繁請卽以裁減之馬一年應領乾銀添設養育兵每月支食銀一兩覈計一旗可添二十名八旗約添一百六十名毋需另籌別款旗兵生計亦得寬裕下部議行十七年三月卒 諭曰慶成歷任將軍提督效力戎行打仗受傷著有勞績獲咎後棄瑕錄用簡授至福州將軍茲猝因病逝聞之殊爲軫惜著加恩照將軍例給予卹典尋 賜祭葬 予諡襄恪子繼德見任江西袁州府同知繼倫見任鑾儀衛治儀正

右 國史館本傳

國朝書房考卷之二

三

王臣

王臣甘肅甯夏人康熙三十九年任永州鎮總兵永爲交廣門戶  
蠻獠雜處臣至簡卒伍汰老弱嚴塘汛之防壁壘一新行旅無恐  
復捐俸賑水災勸立義學郡人德之爲建書院以祀

右傳李元度撰

--	--	--	--	--	--	--	--	--	--

100

100

朋春 子增壽

朋春滿洲正紅旗人姓棟鄂氏何和哩之四世孫也順治九年六月襲其父哲爾本一等公爵 聖祖仁皇帝康熙十五年 恩加太子太保授正紅旗蒙古副都統二十一年二月調本旗滿洲副都統八月 命同副都統郎坦率兵赴黑龍江時鄂羅斯人來邊境者咸稱爲羅刹朋春奉 諭曰羅刹犯我黑龍江邊境昔曾發兵進討未獲翦除近又侵入精奇哩江諸處恃雅克薩城爲巢穴蔓延益甚爾等至達呼爾索倫遣人赴尼布楚諭以捕鹿之故因詳視陸路近遠沿黑龍江行圍徑薄雅克薩城下勘其居址形勢度羅刹斷不敢出戰如出戰姑勿交鋒但率眾引還朕別有區畫

賜御用裘服及弓矢以行十二月還奏羅刹久踞雅克薩恃有木  
城若發兵三千攜紅衣礮二十具即可攻取陸行自興安嶺以往  
雖無險山而林木叢雜途徑窄隘冬雪之時沙結堅冰夏日遇雨  
泥深淤阻惟輕裝可行水程自雅克薩還至愛濬城於黑龍江順  
流行船僅須半月觀兩岸悉可牽挽若逆流行船約須三月較從  
陸路倍期運糧餉礮具爲便見有大船四十小船二十六宜增造  
小船五十餘 詔甯古塔將軍巴海副都統薩克素建木城於黑  
龍江呼瑪爾二處調所部兵一千五百往駐造船運礮二十二年  
正月擢正紅旗蒙古都統三月調本旗滿洲都統二十四年正月  
詔選福建投誠善用藤牌兵在八旗及安插山東山西河南者四

百人付鑾儀使林興珠臺灣投誠左都督何祐轄領赴盛京朋春  
統之進剿以副都統班達爾沙瑪拉護軍統領佟寶等及林興珠  
參贊軍務師旣行 上遣侍衛關保往黑龍江傳諭曰兵凶器戰  
危事古人不得已而用之朕以仁治天下素不嗜殺爾其嚴諭將  
士毋違朕旨以我兵馬精強器械堅利羅剎勢不能敵必獻地歸  
誠爾時勿殺一人俾還故土宣朕柔遠至意五月師薄雅克薩城  
遣人以書諭降不從軍其城南集眾船於城東南進紅衣礮於城  
北將夾攻之城下三面積柴爲焚城狀城中大驚其頭目額里克  
舍窮蹙乞降乃宣 恩諭宥其罪額里克舍垂涕稽顙謝引六百  
餘人徙去毀其城以願來歸附之巴什里等四十五戶及前此掠



往之索倫達呼爾百餘戶移內地安輯師旋紀功二十九年七月  
上命裕親王福全爲撫遠大將軍勦噶爾丹以朋春與都統蘇努  
等參贊軍務蘇努率左翼朋春率右翼八月朔至烏蘭布通噶爾  
丹依山列陣右翼兵爲河岸泥淖所沮左翼兵由山腰衝入大破  
之日暮收兵次日噶爾丹遣使矢誓請和以緩我師乘夜由大磧  
山遁去十一月師旋部議王大臣調度乖方不追勦敗寇罪革職  
任上以此舉旣擊走噶爾丹槩從寬處分朋春降四級畱任三  
十一年三月解都統任赴西路軍前管營隊三十五年正月仍復  
正紅旗蒙古都統命爲撫遠大將軍費揚古參贊由西路勦噶  
爾丹五月破賊於昭莫多凱旋因本隊陣亡護軍驍騎十八人未

收遺骸議罪以應敘昭莫多軍功抵免三十六年七月彙敘西路  
出師奮勇勞績增注所襲一等公 敕書三十八年六月以疾解  
都統任四十年四月疾卒于增壽循例銷去 恩詔所加之爵改  
襲三等公四十一年九月授正黃旗漢軍副都統四十三年三月  
調鑲藍旗滿洲副都統五十一年罷任六十年卒子恆泰襲爵授  
散秩大臣 世宗憲皇帝雍正九年追 封何和哩爲勇勤公其  
世襲之三等公亦加號勇勤

右 國史館本傳

國朝三才類事卷之二十一

三

周卜世

周卜世漢軍正黃旗人父繼新管佐領任鎮江副都統 世祖章  
皇帝順治八年二月卜世由監生授通政使副理事官五月遷大  
理寺副理事官十六年八月遷刑部郎中十八年十一月授長蘆  
鹽運使康熙六年巡視鹽政甯國玲奏卜世帶徵積年鹽課全完  
予議敘部臣以無例寢議 聖祖仁皇帝諭曰原疏內稱道府等  
官完帶徵六萬兩以上者不論俸滿卽升今周卜世自任事以來  
設法帶徵全完可嘉宜優敘內升以示獎勵尋定議依限全完鹽  
課三十萬以下卽升及加級紀錄有差卜世征完三十五萬兩以  
上從優內升七年二月授右通政八年十月轉左十年四月遷太

僕寺卿尋游遷太常寺卿大理寺卿十二年四月擢倉場侍郎十三年十一月因逆藩吳三桂陷湖南四川 詔設直隸山西山東河南等處援剿提督總兵招兵自隨以下世爲山東提督應設標下官員聽於武進士舉人內揀選給劄效用又自疏請兼用旗下舊人才能素著之參將祖朝選守備張所元等隨營十一月駐青州十二月調山西提督部議標設四營各官員兵丁及製買營馬盜甲器械聽其酌量行時陝西提督王輔臣叛賊將朱龍等四路侵掠陷延安卜世撥兵防河四月賊自石樓渡河卜世遣參將陳茂林擊走之十月疏言甯武一協管轄三關七路其兵馬錢糧盜案原係提督統轄嗣因提督奉裁歸大同鎮兼轄今臣旣以提督

統轄全省甯武文移由大同轉報往返稽延請仍歸提督統轄爲  
便疏下部議 從之十五年九月疏劾山西巡撫達爾布令屬員  
派民出銀爲己建生祠請移蒲州守道駐平陽俾得規避衝要徇  
隱貪劣之平陽知府袁國梓臨汾知縣劉通濬不行糾劾以私怒  
抗禁無辜酷刑考訊 詔達爾布解任 命侍郎果斯海往察審  
覆奏蒲州守道不應移駐平陽達爾布違禁建祠誣良濫刑屬實  
應革職杖流卜世所指袁國梓劉通濬贓款屬虛應革職得 旨  
免達爾布杖流卜世免革職十六年九月 命率所轄官兵赴湖  
廣軍前標下參將祖朝選等各加銜一等兵丁加賞賚時賊帥吳  
應麟踞岳州十七年六月大將軍貝勒尙善令卜世統兵進洞庭

駐君山規取岳州賊乘烏船出犯擊賊之復奉令防禦東湖卜世  
移駐扁山敗賊兵於西湖柳林背擊壞賊船四賊遁入城將軍鄂  
訥疏劾副都統德業立與卜世不截堵賊船 詔大將軍貝勒察  
尼嚴覆奏卜世畏縮怯懦應革職得 旨從寬畱任戴罪圖功十  
一月移師九馬背等處截賊糧道十八年岳州賊遁卜世同輔國  
公溫齋等追剿至南靖港斬賊二千餘復由大荆驛追殺賊眾至  
王家鋪太平川又同都統覺羅珠滿規復湘陰師至歸義河遇賊  
眾二千餘斬殺過半擒僞官四員進薄城下督兵樹雲梯登城殲  
賊三百餘入城撫集難民萬餘尋奉 詔聽綏遠將軍蔡毓榮調  
遣十九年三月進次大敷溪偵賊踞麻一汛分兵水陸齊進捉據

隘口斬二千餘人追奔數十里八月進征貴州攻克塘頭隘連克  
蔣溪鎮江閣小巖關大巖關太平關及鸚鵡渡殲賊兵六百餘乘  
勢恢復思南府二十年四月剿賊遵義城守僞總兵劉應昌等七  
人以城降賊帥馬寶遁踞白蠟坎卜世乘勢追逐至鴨溪口殲賊  
一千五百餘撫降正安州仁懷綏陽桐梓等縣六月奉 詔駐守  
遵義二十一年以雲南既平撤回時裁山西提督議政王大臣等  
奏卜世前經議敘功加十等因不堵截岳州賊船抵罪嗣隨大軍  
剿滅各處賊眾應予開復或以文職用或候補提督得 旨以本  
旗相應員缺補用二十四年管佐領二十九年授參領三十年擢  
正紅旗漢軍副都統三十二年擢都統三十五年二月 上親征



噶爾丹令卜世領正黃旗小營以從四十年正月以老疾乞休得  
旨原品休致是年四月卒 賜祭葬如例

右 國史館本傳

阿南達 子阿喇納

阿南達蒙古正黃旗人姓烏彌氏三等子巴賴都爾莽柰之孫內大臣哈岱之次子也初任侍衛由三等游擢一等 聖祖仁皇帝康熙八年輔政大臣鼐拜獲罪拘禁王大臣等以阿南達素與黨附請革職擬立斬籍沒得 旨寬免仍任一等侍衛尋兼佐領二十七年噶爾丹侵掠喀爾喀阿南達奉 命偕喇嘛商南多爾濟齋敕往諭以休兵和好噶爾丹旋遣使入 朝而肆掠如故二十九年二月 命阿南達往會喀爾喀諸部兵進剿噶爾丹三月以尙書阿喇尼副之阿南達還奏噶爾丹爲託多額爾德尼擊敗窮蹙奔竄至有兩人其一騎者及削木爲杖者請發滿洲勁旅乘機

往朔 上命選察哈爾兵六百阿南達率之赴圖拉策應西路都  
統額赫納軍五月阿喇尼奏請移西路兵會朔阿南達率兵北度  
瀚海會 命裕親王福全爲撫遠大將軍阿南達以兵會之八月  
敗噶爾丹於烏蘭布通三十一年奉 命赴甯夏招和碩特部台  
吉巴圖爾額爾克濟農來降是年十一月擢正黃旗蒙古副都統  
三十一年二月 上聞噶爾丹將取糧哈密 敕郎坦爲昭武將軍  
備兵甯夏以阿南達屢至邊境偵悉敵情 召還三十五年二月  
上親征噶爾丹以撫遠大將軍費揚古率師出西路 命阿南達  
往喀爾喀諸扎薩克旗分選熟識路徑者二十人爲嚮導五月  
上由中路進剿至克魯倫河噶爾丹望見 御營大驚奔竄阿南

達同費揚古由圖拉進趨昭莫多聞噶爾丹遁歸特勒齊費揚古  
令阿南達同前鋒統領碩岱副都統阿迪等率兵先往挑戰佯卻  
誘賊至昭莫多大軍合擊敗賊追逐三十里擒斬無算噶爾丹引  
數騎遠竄阿南達赴行在奏捷召詢交戰情形阿南達具述  
其詳復奏言陣獲厄魯特人皆云噶爾丹聞哨卒報稱皇上親  
征猶不信謂必遣將前來無足懼後有彼所親信人由大軍縱歸  
具言親征果真軍威難敵乃惶懼鼠竄屬下人多怨懟者噶爾  
丹亦深以爲悔上曰此番師出卽奏膚功皆上天眷佑也乃  
班師命阿南達駐守肅州七月詔移兵邊境偵噶爾丹聲息  
相機勦撫阿南達尋疏言昆都倫額濟內諸處各遣官率兵分駐

哨探臣親率巴圖爾額爾克濟農之兵復與提督李林隆商議增發綠旗兵攜子母礮位赴布隆吉爾相度要隘分置策應乃還肅州 上以所奏示議政諸大臣曰阿南達處處備兵朕甚嘉之噶爾丹之自昭莫多敗竄也其部眾多離散噶爾丹多爾濟者其妻弟也勢窮蹙持兩端阿南達至布隆吉爾擒其哨卒肆格遣歸招降噶爾丹多爾濟遂遣使通款阿南達因其使檄哈密回人曰聞逃來人言噶爾丹窮困所屬不及千人無口糧冬衣儻來投汝地汝卽擒之令噶爾丹多爾濟助汝汝勿疑又傳語噶爾丹多爾濟曰哈密若有噶爾丹聲息報汝汝卽遣人來報一面往助哈密協力而行十一月阿南達復往布隆吉爾噶爾丹遣其族姪固蒙多

爾濟等與達賴喇嘛青海諸台吉通問阿南達偵知率兵追及於素爾河擒固蒙多爾濟等百餘人至肅州並以賊書十四函呈奏三十六年正月哈密回人擒噶爾丹之子色卜騰巴爾珠爾等獻於軍前阿南達械送至京閏三月疏言厄魯特晉巴徹爾貝來降詢知噶爾丹窮蹙臣請竭力進征殲滅醜族上命阿南達與李林隆率甘州兵二千進剿軍至塔爾河聞噶爾丹已死其屬下台吉丹濟拉將竄巴里坤依策妄阿喇布坦阿南達率兵追之旋奉詔還駐布隆吉爾以待丹濟拉來歸九月丹濟拉詣哈密乞降阿南達遣人護送入覲是年敘昭莫多軍功予雲騎尉世職尋奉詔率兵駐西甯四十年六月卒於西甯予祭葬如典禮以

次子阿敏多幹襲職 世宗憲皇帝雍正三年從其長子巴里坤副將軍阿喇納請追 賜諡恪敏

右 國史館本傳

阿喇納

阿喇納蒙古正黃旗人姓烏彌氏副都統阿南達長子康熙十九年襲其祖哈岱一等子爵二十七年授三等仔衛游遷一等待衛五十年任上都達布遜諾爾牧廠總管五十三年授散秩大臣五十五年十月 聖祖仁皇帝命往巴里坤爲參贊大臣 諭揀選八旗察哈爾勁卒並會隨阿南達出兵舊人共四百名率之以行會駐阿爾台散秩大臣祁里德奏請進剿策妄阿喇布坦 詔阿

喇納先往祁里德軍前會同喀爾喀王貝勒貝子公等詳議進兵事宜再赴巴里坤五十六年七月靖逆將軍富甯安由巴里坤分兵三道進剿阿喇納領首隊兵選五百人潛師襲賊邊界至烏蘭烏蘇擒哨賊二人用爲嚮導進兵至烏魯木齊乃還五十八年七月率兵四千與將軍富甯安分道擊賊邊進至齊克塔木擊破賊營擒斬二十人餘悉降之進次開展回眾踞城守我師奮擊擒一人縱之歸令傳諭城中曰師行討逆非襲擊若等若速歸順赦勿誅否則破城悔無及矣回眾三百餘人皆降還入吐魯番酋目沙克北珀爾等悉眾降附會富甯安軍於烏蘭烏蘇凱旋六十年六月吐魯番回人托克托馬木特等以萬餘人駐魯克齊木擊敗準



噶爾兵乞內附阿喇納奉 詔率兵二千往駐吐魯番收撫其眾  
九月奏請於初冬雨雪時乘賊無備進兵襲擊尋以冬寒不宜深  
入 諭令偵賊情形就近襲擊是月賊人來犯阿喇納遣侍衛克  
什圖迎戰而自率兵策應戰甫接阿喇納至分所率兵爲三衝擊  
賊陣賊不能禦敗入林中舍騎步戰中槍礮多斃賊大創盡棄軍  
械馬匹遁我兵追捕數十里擒斬百餘人捷 聞授副將軍仍駐  
吐魯番六十一年六月 詔議進兵勦賊機宜二月奏言賊進退  
雖熟蹤跡甚輕火器雖多鉛藥甚少我軍慮周而器備勝賊者一  
賊恃槍戰少弓箭我軍鋒銛弓勁勝賊者二賊眾臨陣易敗惟伺  
隙劫掠我軍部伍肅整無間可乘勝賊者三賊以乘夜盜馬爲得

計我軍有備賊不得入勝賊者四賊侵我邊外曠地遊牧自謂便  
易我軍一至賊顧戀妻子牲畜不能一心迎戰勝賊者五以勁旅  
直擣伊犁不難埽蕩巢穴惟賊徑甚多處處可以通我駐兵後路  
賊來一夕可至若遠設汛界被賊攔截輒至消息阻隔卽今所種  
吐魯番地畝亦須防踐擾請將巴里坤阿爾台兩路大兵移駐烏  
魯木齊臣等移駐附近吐魯番險要之地彼此接應既可守護屯  
田亦可斷賊人潛襲之路其進剿大兵宜分三路阿爾台兵由科  
布多沿河越喀爾齊斯河進發巴里坤兵由烏魯木齊進發吐魯  
番兵由阿勒輝口越那喇特嶺進發賊三路來迎則勢分易敗若  
一路拒戰則我以一軍奮擊趣兩軍直抵其妻子屯駐之地彼必

不能兼顧賊所恃爲險要者三嶺然步行可上非若棧道之難也  
所恃以資生者牛羊乳酪久駐則水草無多牲畜易竭勢必離散  
請及時聚糧練兵相機剿滅疏下議政大臣尋議阿喇納陳奏詳  
明能得肯綮我兵屯墾之地防賊潛犯宜令酌留馬兵捍禦擒剿  
惟阿爾台至烏魯木齊沙漠間阻二千餘里往返較遲今賊已竄  
匿伊犁稍緩則其黨自相疑貳然後統兵進取爲便 世宗憲皇  
帝雍正元年七月疏言察哈爾兵久在行間遇軍營護軍校驍騎  
校補用但軍中出缺甚少較之未嘗效力及軍中撤還之人升補  
較遲未必平允請 敕部酌議疏入 諭議政大臣曰自進剿策  
妄阿喇布坦已經入載凡後徵之京營八旗及盛京黑龍江甯古

塔西安右衛滿洲綠旗蒙古察哈爾官兵有久在行閒卽行升用者嗣後令諸路將軍詳加揀選將應升名冊咨送各旗都統護軍統領及督撫提鎮遇有缺出卽行題補並令揀員署理俟補授之員升轉時卽以署員請補則行閒旣獲升遷之路卽各營才力可用者亦無慮致歎積薪其交兵部通諭中外知之九月授阿喇納鑲紅旗蒙古都統仍畱駐吐魯番十月進征青海羅卜藏丹津允撫遠大將軍年羹堯請 命阿喇納率滿洲蒙古綠旗兵二千駐防布隆吉爾二年三月賊酋阿喇布坦蘇巴泰劫我邊境阿喇納遣總兵孫繼宗等率兵擊之追奔至推默爾賊兵拒戰大敗之賊竄還獲牲畜器械甚眾七月卒於布隆吉爾遺疏爲其父阿南

達請謚部議以副都統例不予謚格之 特旨如所請行又 諭  
曰副將軍阿喇納駐軍布隆吉爾宣力有年患病溘逝朕心深爲  
軫惻加恩予一等子爵外賞給騎都尉世職許其子並襲於甘肅  
藩庫內給銀一千兩交與阿喇納之弟準扎布送柩回京十一月  
喪還 命入旗蒙古大臣迎奠 予祭葬如典禮謚僖恪以其子  
伍彌泰襲世職爲三等伯十年九月禮部以應入賢良祠諸臣列  
奏 上諭曰阿喇納恪謹持躬忠誠奉職前者西陲用兵宣力年  
久收復吐魯番平定青海俱有勞績其應否入祀下九卿會議尋  
入祀賢良祠 今上乾隆十五年加伯號曰誠毅伍彌泰見任散  
秩大臣

右 國史館本傳 按阿喇公名  
一作阿爾納

阿爾納蒙古正黃旗人世居察哈爾祖哈岱父阿南達世積軍功授一等子世職阿爾納於康熙十九年襲職歷任散秩大臣五十四年準噶爾厄魯特策旺阿拉布坦侵犯哈密 聖祖命吏部尙書富甯安至西安與將軍席柱議援剿阿爾納銜 命同行策旺阿拉布坦襲取西藏五十九年大兵往定藏地別調阿爾泰巴爾庫爾兩路官軍分道路準噶爾邊境其巴爾庫爾屯駐之兵靖逆將軍富甯安自率三千人由烏魯木齊入阿爾納領兵四千人由吐魯番入至齊克塔木擊破賊營悉降其眾進至皮禪城城中回紇固守不下阿爾納齊兵圍之遣所獲賊兵一人歸諭令投順皮

禪城首領率三百餘人降遂深入吐魯番界中吐魯番之阿克蘇  
爾坦及總管沙克扎拍兒等亦率眾迎降阿爾納回至烏蘭烏蘇  
與富甯安合兵凱旋由是策旺阿拉布坦震駭逃竄不暇他顧而  
西藏遂復六十年復 命阿爾納統大兵進取吐魯番因駐防其  
地策旺阿拉布坦來犯吐魯番城阿爾納遣侍衛克什圖等迎戰  
親率官兵策應至中途賊眾二千人與克什圖兵列陣交戰阿爾  
納分兵三隊奮勇衝擊賊敗入林中棄馬步戰我師追躡之矢礮  
齊發擒斬數百人餘眾奔潰獲器械駝馬無算是年九月授爲協  
理將軍益於吐魯番築城濬隍屯田畜牧爲持久計阿爾納在塞  
外久周知山川阨塞及賊中形勢嘗疏言我兵之勝賊者五兵器

多一也弓矢利二也部伍整齊三也賊素以盜馬爲得計我師防守嚴賊不能入四也賊雖遊牧無定處卒不免妻子牲畜之累五也如欲進兵宜分三路阿爾泰之兵由科布多濟厄爾齊斯河前進巴爾庫爾之兵由烏魯木齊前進吐魯番之兵由阿納輝口隴那拉特嶺前進賊三路來迎則勢分而易敗若聚爲一路我以一軍攻之兩軍直擣其巢穴賊必不支且賊保伊犁恃三嶺爲固然皆可步行而上非有巉巖之險也賊之生命寄於牛羊屯聚日久水草易罄勢必離散此時滅之如摧枯拉朽之易耳 聖祖深嘉納之其後策旺阿拉布坦數遣使奉貢物因澤卜尊丹巴胡土克圖請罪乃 命阿爾納移軍駐布隆吉爾雍正元年升鑲紅旗蒙



古都統平定青海亦在事有功二年七月卒於軍 賜帑金一千  
兩遣官護其喪歸加一騎都尉世職晉三等伯祭葬如典禮諡曰  
僖恪

右 國史賢良小傳

國朝耆獻類徵初編卷二百七十八目錄

將帥十八

薩布素

開音布

覺羅舒恕

拉哈達

莽奕祿

俞益謨

馬斯喀

弟馬武  
從子保祝

穆誠額

額赫納

雷如

珠滿

唐布順

彰庫

李芳述

李林隆

阿密達

補錄

南天章

長沙縣志卷之八

--	--	--	--	--	--	--	--	--	--

國朝耆獻類徵初編卷二百七十八

通奉大夫前署江西巡撫江西布政使司布政使湘陰李桓輯  
將帥十八

薩布素

薩布素滿洲鑲黃旗人姓富察氏其四世祖充順巴本 太祖高  
皇帝時由岳克通鄂城率丁壯屯吉林遂家焉薩布素初由領催  
授駝騎校遷協領皆在吉林康熙十六年四月 聖祖仁皇帝以  
長白山爲 本朝肇迹發祥宜崇秩祀 敕遣內大臣覺羅武默  
訥侍衛費耀色塞獲禮索爾等前往瞻視六月至吉林欲選曾往  
者導引弗可得甯古塔將軍巴海令協領薩布素率兵二百攜三

月糧以隨循溫德亨河陸行七日至卓隆鄂河復乘舟由幹努呼  
河逆流二日至佛多和河順流一日抵訥殷陸路爲林木所阻翌  
日薩布素率兵伐木開路行三十餘里陟山巔升樹而望又行數  
里登高峯望之遣人還告武默訥望見片片白光卽長白山計相  
距止百里餘矣武默訥等後一日至復開路行一日詰朝又行雲  
霧塞徑恍惚聞鶴鳴六七聲尋聲疾走因得鹿蹊密林叢翳進至  
山麓蹊誦 敕旨畢雲霧忽開有路半山石砌若平臺五峯環拱  
南一峯稍下如門山水左流爲松花江右流爲大小訥殷河中潭  
不流者周三十餘里由潭邊陟山五十餘丈香樹紛郁黃花燦爛  
徧地積雪卽向所望見片片白光也薩布素曰此地人跡罕到不

宜久留遂叩拜而返至山麓有羣鹿自山奔墜時竚立視者七人  
鹿適介其七薩布素謂武默訥曰此山靈所贈也令從者挈之以  
行不數十步回首瞻望已雲霧彌山矣仍由訥股行十五日乃還  
吉林八月武默訥等入奏 敕禮臣詳議尊封長白山之神秩祀  
如嶽鎮自是春秋望祭於吉林城西南九里溫德亭山永著爲典  
十七年八月擢薩布素甯古塔副都統二十一年八月 上遣副  
都統郎坦朋春率兵赴黑龍江時鄂羅斯人來邊境者咸稱爲羅  
剎郎坦朋春奉 諭曰羅剎犯我黑龍江邊境昔曾發兵進討未  
獲翦除近又侵入精奇哩江諸處恃雅克薩城爲巢穴蔓延益甚  
爾等往偕甯古塔副都統薩布素率兵至達呼爾索倫遣人赴尼

布楚諭以捕鹿之故因詳視陸路進達沿黑龍江行圍徑薄雅克薩城下勘其居址形勢度羅刹斷不敢出戰若以食物來餽可受而量荅之其自黑龍江至額蘇哩舟行水路及額蘇哩通甯古塔之路擇隨行之參領侍衛同薩布素往視十二月郎坦朋春還奏雅克薩城易取狀 上命建木城於黑龍江呼瑪爾二處調甯古塔兵一千五百往駐造船艦運礮具以薩布素同將軍巴海統之二十二年四月薩布素與巴海奏言黑龍江呼瑪爾距雅克薩城尚遠若駐兵兩處則勢分道阻且過雅克薩有尼布楚等城羅刹儻水陸運糧增兵救援更難爲計宜乘其積貯未便速行征剿一俟造船畢度七月初旬能抵雅克薩卽統兵直薄城下疏下議政

王大臣議如所請 上以所議七月進攻未協機宜令再議因諭曰甯古塔兵未諳行軍紀律將軍與副都統分管又不能齊心巴海可畱守吉林薩布素同甯古塔副都統瓦禮祐領兵前往俟抵彼相度形勢奏請酌行尋 允王大臣議額蘇哩在黑龍江呼瑪爾之間可以藏船且有田隴舊跡宜建立木城令薩布素瓦禮祐統兵駐守七月索倫總管博克等招降羅刹三十一人 詔賞其頭目二人衣帽赴薩布素軍前效力九月 命前鋒統領郎坦會商駐兵事宜尋奏言額蘇哩今年七月卽經霜雪若於來秋移甯古塔兵往駐恐地寒霜早諸穀不穫難以餬口應就近移達呼爾兵五百人先於來春赴額蘇哩耕種量其秋收再以甯古塔三



千餘兵分爲三部更番駐防 上曰兵丁頻事更番必致困苦非  
長久計宜在黑龍江建城永成豫備殿具船艦設斥堠計程置驛  
有警則乘蒙古馬馳擊常時按程以行由水路陸續運糧積貯黑  
龍江乃設將軍副都統領之十月擢薩布素爲黑龍江將軍十一  
月疏言羅刹來歸之宜番鄂噶番席圖頌三人效力勤勞宜與新  
投誠之吉禮過哩鄂佛那西等酌給官職以示鼓勵得 旨授宜  
番驍騎校餘授七品官其新投誠之鄂佛那西等 賜裘帽令馳  
驛赴薩布素軍前酌遣招撫二十三年五月疏報營總鄂羅順抵  
羅刹界遣宜番等招撫二十一人以歸七月疏請今年暫停攻剿  
俟來年四月進兵 上曰前遣侍衛關保傳諭薩布素率水陸兵

丁刈羅刹所種田禾則雅克薩城自困薩布素亦言羅刹田禾應  
行踏毀今乃奏請暫停是坐失機宜矣薩布素尋以失誤軍機上  
疏請罪 上以薩布素見在領兵進剿 諭部俟事竣察議 命  
都統瓦山侍郎果丕與薩布素會議師期二十四年正月奏言我  
兵四月杪水陸並進攻雅克薩城儻萬難攻取則刈其田禾 上  
諭王大臣曰薩布素所奏四月進兵不過刈取田禾事必無成此  
皆商遣黑龍江狂悖之人從中阻議不欲事成而薩布素出身微  
賤高視若輩不敢有違用兵所關甚鉅宜周詳籌畫期於必克儻  
謀事草率羅刹將益肆猖狂矣乃 命都統朋春鑾儀使林興珠  
臺灣投誠左都督何佑分率八旗綠營兵丁及藤牌兵赴黑龍江

會剿五月抵雅克薩遣人以書諭之不從薩布素同朋春等軍其城南集戰船於城東南列紅衣礮於城北將夾攻之先積柴城下爲焚城狀城中大驚其頭目額里克舍窮蹙乞降先是薩布素屢奉諭行軍不可多行殺戮至是朋春宣上恩德額里克舍垂涕稽顙謝引六百餘人徙去我軍毀雅克薩城捷聞諭議政王大臣曰大兵迅速征行破四十年盤踞之羅刹於數日之間獲雅克薩城克奏厥績薩布素向來逗遛不進兵之罪概從寬免至雅克薩城雖已克取防禦決不可疎應於何地駐兵彈壓其速議具奏尋允所議以副都統溫岱納泰駐守黑龍江薩布素移駐墨爾根建城防禦二十五年正月薩布素奏遣人往偵羅刹復至雅

克薩築城盤踞請於冰消時督修戰艦相機進剿 諭曰羅剎復  
築雅克薩城若不速行撲剿勢必積糧堅守圖之不易其令薩布  
素暫停墨爾根處兵遷移家口速修船艦統甯古塔等處兵赴黑  
龍江城酌留盛京兵守之所部二千人攻取雅克薩城尋 命副  
都統郎坦班達爾沙領兵會剿八月奏言臣等遵 旨圍雅克薩  
城已三面掘壕築壘壕外植木椿鹿角分汛防禦城西對江另設  
一軍於未流漸時泊船東西兩岸令堵尼布楚援兵至流漸時卽  
藏船上流之港內以資守禦軍中馬匹有疲羸者請半發黑龍江  
半發墨爾根駐防兵飼秣得 旨如所請行九月鄂羅斯察罕汗  
遣使上疏納款乞撤雅克薩之圍 上諭以別遣使來議地界

命薩布素撤圍城兵列艦結營尋以鄂羅斯使臣費耀多囉等已抵喀爾喀土謝圖汗境 詔薩布素還駐墨爾根又以噶爾丹侵掠喀爾喀傳 諭費耀多囉等按期定議二十八年四月費耀多囉等至尼布楚 詔調黑龍江兵一千五百隨內大臣索額圖等赴尼布楚定議令鄂羅斯自毀雅克薩城徙其人去以格爾必齊河北岸爲彼界立碑垂示久遠二十九年薩布素奏以前此崇倫總管安珠瑚等所種官田二千餘畝分給墨爾根兵丁屯糧三十一年同宿古塔將軍佟寶奏建齊齊哈爾城及伯都納木城以科爾沁進獻之錫伯卦爾察達呼爾壯丁萬四千有奇分駐二城編佐領隸上三旗並設防守防禦等官三十四年遵 旨陳奏進剿

噶爾丹豫備事宜言興安嶺北形勝之地索約爾濟山爲最已遣  
熟識路徑官兵自盛京吉林墨爾根三路度至山遠近分置程站  
其無水處掘井以待若山之東北呼倫貝爾諸處有警則與臣駐  
軍之地近卽率墨爾根兵先進吉林盛京兵繼之若山之西烏勒  
輝諸處有警則盛京兵先進臣率部下兵及吉林兵繼之皆會於  
索約爾濟山以待 上可其奏又 諭曰聞噶爾丹順克魯倫河  
而至薩布素速卽遠行偵探儻賊犯車臣汗地聽酌量禦勦卽踵  
其尾以進三十五年二月 上親征噶爾丹由獨石口出中路大  
將軍費揚古由歸化城出西路 命薩布素扼其東路 諭領侍  
衛內大臣等曰近聞噶爾丹將欲東行故令薩布素整兵設偵防

其竄逸所派盛京甯古塔及科爾沁兵以薩布素總轄凡口外所  
報軍務悉使知之薩布素尋奏言各路調集之兵於四月初由索  
約爾濟山刻期進克魯倫河四月 上親臨克魯倫河噶爾丹西  
竄爲費揚古所敗薩布素奉 詔就喀爾喀河附近擇好水草處  
秣馬六月 命率兵一千移駐科圖餘皆遣還七月 詔分所部  
兵五百隸費揚古軍三十六年正月 召還京尋令仍回原任九  
月疏報沿河被水之十八莊請以舊貯糧米按丁散給 上曰薩  
布素前曾奏稱收貯糧米三萬餘石年久漸朽與其積之腐爛何  
若散之爲有益且出陳可濟軍糧易新便於收貯其如所請行初  
邊境有墨爾哲勒氏屯長累世輸貢康熙十年其屯長扎努喀布

克託請率眾內移甯古塔將軍巴海安輯之墨爾根編四十佐領  
號爲新滿洲三十四年薩布素奏於墨爾根兩翼各立一學設明  
教官選新滿洲及錫伯索倫達呼爾每佐領下幼童一名教習書  
藝是爲黑龍江建學之始 上嘗問薩布素免死罪犯聚集黑龍  
江慮生事否薩布素奏言兇徒俱分給新滿洲爲奴勢孤力散惡  
不能逞至是 上憶其言以 諭大學士等曰人命所關重大朕  
數年以來凡盜案止誅首惡其從犯俱免死發遣黑龍江每慮聚  
集或至生事曾問及薩布素據所云則不惟全活甚眾且新滿洲  
亦資益良多矣三十七年四月奏錫伯達呼爾佐領阿穆瑚朗巴  
琳等曠誤防哨 諭曰薩布素任黑龍江將軍年久諳練地方事



務亦得軍民之心錫伯達呼爾編入佐領已數年矣理合遵行禁  
令今曠誤防哨不可不嚴加處分佐領阿穆瑚朗巴琳俱革職交  
薩布素懲治嗣後若有此等不遵法紀者令薩布素酌量治罪以  
聞九月 上巡幸吉林 諭大學士等曰薩布素授任以來爲國  
效力訓練士卒平定羅刹勤勞可嘉其予一等輕車都尉世職並  
以朕御袍及纓緯於眾前宣諭賜之三十八年黑龍江副都統關  
保爲其所劾罷之協領都爾岱訐告濫用驛站車馬諸款薩布素  
以訐告在劾罷後陳奏 上以關保未任副都統時久爲侍衛  
諭大學士等曰薩布素辦事明敏然器局卑瑣朕巡幸吉林每見  
其逢迎近侍朕聽政多年何事未歷僉王端良夫豈不辨彼近侍

何能爲關保各款俱實料薩布素不能袒護可卽令其察審尋覆  
奏察審關保疲勞驛站擬革職枷責 命從寬降五級調用三十  
九年五月薩布素奏黑龍江屯堡因災荒積欠米石請俱俟豐年  
陸續交倉得 旨前因羅剎侵擾內地是以駐兵黑龍江設立官  
堡造員屯糧原欲多積米石厚備軍儲仍令革任總督蔡毓榮經  
理十二堡薩布素曾奏其皆有成效後因其十二堡荒棄無收復  
請停止屯糧將壯丁改歸驛站其餘官堡通課日多並從前貯存  
倉米支散無餘致駐防兵餉匱乏薩布素難辭其咎令明白回奏  
八月奏言官屯耕種雖未失時而地氣早寒秋霜損稼又累經水  
旱不能交納官糧兵丁餬口無資因以舊存倉米按丁支放由臣

庸劣不能遠謀所致至前奏蔡毓榮所管十二屯堡停止耕種罪實難辭今請以齊齊哈爾墨爾根駐防兵每年輪派五百人遣往錫伯等處耕種官田督令未及霜降悉行收穫夏秋閒以船貯穀運至齊齊哈爾倉收存其所買耕牛田器籽種先於備存俸餉內支用俟次年收穫日扣還歸款則糧儲裕而兵餉可充疏下戶部察議尋議錫伯諸處屯種事宜應如所請行其以蔡毓榮荒廢之屯地妄報成效實屬瞻徇又以貯存穀石混行給散不能嚴飭兵丁屯糧納稞應令賠償逋穀一千二百三十餘石歸倉並請旨嚴加治罪上命侍郎滿丕等前往察訊四十年正月滿丕等奏薩布素徇私捏報屯種浮支倉穀應斬得旨免死革任并革去

一等輕車都尉世職在佐領上行走尋授散秩大臣未幾卒

右 國史館本傳

國朝正史卷一百一十八

九

開音布

開音布滿洲正白旗人姓西林覺羅氏初由筆帖式授內閣中書  
累遷兵部主事內閣侍讀工部郎中詹事府少詹事 聖祖仁皇  
帝康熙二十六年八月授光祿寺卿十月遷都察院右副都御史  
會湖廣巡撫張汧爲御史陳紫芝劾奏款蹟 命開音布同直隸  
巡撫于成龍山西巡撫馬齊往訊得實論罪如律二十七年二月  
擢戶部右侍郎三月 命監理高郵寶應下河工程十一月疏言  
工所需用夫役甚衆應於高郵等十一州縣內各派夫千名卽有  
添設不得過二萬之數前在河工官員有諳練河務者請選用五  
十員以供臂指又請濬串場河並丁溪草堰白駒石槿及河垛場

車兒埠滔子窪至苦水洋諸處事宜俱如議行二十八年正月

上南巡過淮安 命侍郎徐廷璽于成龍閱視下河還奏自丁溪

至白駒有通海之口三處及丁溪上流馮家壩河道應仍挑濬其

申場石礎諸工可悉停部議下河工程減停應歸河道總督王新

命管理 上因召開音布還京授正白旗滿洲副都統先是高郵

州民以車邏鎮三壩放水至淹田麥控訴開音布疏劾州同茹兆

相干總馬崇私開壩閘 詔尙書張玉書等察審以三壩各閘例

於四月朔開放開音布誤劾覆奏下部議開音布降一級畱任罰

俸一年尋擢提督九門步軍統領三十年二月 上以京師外城

巡捕三營舊爲兵部督捕侍郎所轄與內城不相聯屬 命改隸

步軍統領下九卿等詳議改鑄提督九門步軍巡捕三營統領印  
總司內外城捕務所獲逃盜等犯移送刑部完結三十三年五月  
天壇外新修道路工竣開音布奏言新修之路聽人照常行走不  
久又壞應派綠旗兵看守令往來之人止走兩旁勿行中路 上  
曰如此禁約殊於朕意不合蓋修葺道路專以便民也若派兵看  
守不許行走則修之何用且云禁行中路看守之人必並禁兩旁  
不便於民應仍聽人照常行走後若毀壞令步兵稍稍葺治三十  
五年八月擢兵部尙書仍兼步軍統領九月疏言巡捕事務緊要  
請添設郎中主事各一員下吏部議行三十六年九月授鑲白旗  
滿洲都統解尙書任三十八年九月以年老 命解都統任專管



步軍統領事四十一年五月卒於官 賜祭葬如典禮諡肅敏

右 國史館本傳

## 覺羅舒恕

覺羅舒恕滿洲正白旗人武功郡王禮敦之五世孫也順治十二年任侍衛由三等游陟一等 聖祖仁皇帝康熙八年六月授兵部督捕侍郎十年三月遷吏部侍郎十三年三月逆藩吳三桂陷湖南 命內大臣希爾根爲定西將軍帥師之江西以舒恕參贊軍務尋署前鋒統領六月 諭希爾根於每佐領下撥驍騎三名付舒恕勦賊時閩逆耿精忠遣賊犯江西陷撫州九月舒恕隨希爾根進勦擊敗偪城立營之賊賊自城中出拒又自建昌路率眾來犯連擊敗之賊尋棄撫州奔竄舒恕督兵追殺數十里十二月擊敗屯踞東鄉縣界賊眾十四年三月賊復犯撫州舒恕督參領

邁蘭協領綽勒捫等迎勦敗之於七里岡追殺三十餘里時建昌已恢復餘賊尙據新城縣五月舒恕偕都統覺羅霍特督兵克復縣城擒僞遊擊許定國又偕總兵許貞敗賊於宜黃復宜黃崇仁安樂三縣未幾廣東告急上命舒恕率兵赴援十月授鎮南將軍時叛鎮馬雄偕吳逆僞將王宏勳糾眾犯高州勢猖甚舒恕擊之失利退駐肇慶十五年二月平南王尙可喜病篤其子之信通賊倡兵作亂舒恕退回贛州簡親王喇布以聞詔舒恕堅守南安梅嶺以保固江西十六年三月諭曰今大兵分路進征逆賊不暇窺顧其改授副都統莽依圖爲定南將軍率兵赴粵侍郎舒恕量畱甲兵同巡撫佟國楨守贛州舒恕尋遣知縣郭毓秀招

降僞官劉定邦卽令持扎招撫僞總兵關世榮僞副將周先德等  
別遣遊擊陳廷玉招撫僞總兵張輝僞副將鄧瑞等復遣都司廖  
正英招撫僞總兵王受之合計降兵數萬先後疏 聞六月授南  
安將軍七月簡親王以吳逆聚寇宜章將窺南韶入奏 詔莽依  
圖迅赴韶州舒恕率兵守南安南雄爲之聲援舒恕尋遣副都統  
赫勒布率兵赴韶州十七年二月將軍額楚疏報總督金光祖潯  
州失利 諭舒恕迅赴南雄鎮守兼顧韶州四月將軍穆占疏言  
郴州桂陽新復輜員遠闊賊來無兵可禦請 敕舒恕移駐守  
時尙之信已反正亦以宜章地方緊要請令舒恕駐守 詔舒恕  
具南雄韶州情狀以聞舒恕疏言南韶爲湖南江西廣東三省接

壤要地不可輕離十二月莽依圖疏報梧州危急 詔曰南雄韶  
州已爲內地舒恕其率所屬兵迅赴梧州十八年四月卽軍前授  
都察院左都御史六月逆賊吳世琮糾眾犯南甯城中食盡旦夕  
且陷額楚等引前鋒兵擊敗西山賊眾舒恕同莽依圖督眾繼進  
預遣左翼兵潛出山後截賊歸路盡殲之世琮負重傷以數十騎  
遁南甯圍解十月舒恕以病劇乞回肇慶調理 詔回京既 召  
對 諭大學士等曰朕以舒恕病劇必實故召還京師昨見之神  
色如故絕無病狀舒恕前在高州敗回肇慶復自廣州退奔不據  
韶州南雄諸要地竟還贛州致江西全省震動又以巡撫金備之  
言盡洩於尙之信又不欲將軍傅宏烈進兵恐嚇阻撓舒恕身爲

將軍負如許重罪不思勦力自贖詐稱病劇肆行欺罔著鞫候宗人府俟旋師之日嚴察議奏十九年七月裕親王福全等覆訊以舒恕身爲將軍詐稱患病不行奏明私以印信 敕書交將軍莽依圖罪一又前進取高州至電白爲賊所敗罪二又自廣州敗出不據韶州南雄諸要處以遏賊勢乃退還贛州致江西全省震動罪三又因巡撫金儁之言已知尙之信逆謀乃不行密奏反疑金儁之言爲吳逆離間計遣人潛告尙之信云以安其心辦理錯謬罪四又阻撓傅宏烈進兵罪五應革職任籍沒家產得 旨革職免籍沒三十四年二月授鑲黃旗滿洲副都統六月出任山西右衛左翼護軍統領七月授甯夏將軍時 上以噶爾丹欲掠墨爾

根濟農 諭安北將軍費揚古加意防備費揚古自請率兵駐防  
阿爾察圖蘇穆哈達地以舒恕率兵一千五百往駐歸化城北額  
勒蘇台地十一月授費揚古撫遠大將軍以舒恕同都統伊勒慎  
等參贊三十五年正月 上親征噶爾丹由獨石口出中路授舒  
恕揚威將軍率右衛兵隨費揚古出西路五月費揚古擊敗噶爾  
丹於昭莫多舒恕率右衛兵還駐納喇時六月奉 詔回歸化城  
籌辦凱旋軍糧八月疏請仍赴喀喇穆倫費揚古軍前十一月  
上駐蹕棟斯拉 召費揚古議軍務以舒恕暫署大將軍事三十  
六年閏三月 詔費揚古移師郭多里巴勒噶遜舒恕仍以揚威  
將軍留駐喀喇穆倫屢收納降人遣送入京並偵奏噶爾丹困窘

狀五月黃揚古疏報噶爾丹竄死 詔敘功 予舒恕雲騎尉世職 召還京三十七年三月擢正藍旗滿洲都統四十年十二月以病乞休致仕四十二年五月卒年六十有五 賜祭葬如例子 延壽襲雲騎尉由侍衛游擢歸化城副都統右衛將軍

右 國史館本傳



國朝首屆封爵列傳

卷一百一十八

七

拉哈達

拉哈達滿洲鑲黃旗人姓鈕祜祿尚書車爾格第五子也初任侍衛兄法固達襲父騎都尉兼雲騎尉世職世祖章皇帝順治七年因其祖額亦都以來世有勞績晉三等輕車都尉尋卒拉哈達襲職兩遇恩詔晉至一等輕車都尉十七年授兵部督捕侍郎十八年擢工部尚書列議政大臣聖祖仁皇帝康熙三年授鑲黃旗蒙古都統八年調本旗滿洲都統十三年四月授鎮東將軍駐防克州時逆藩耿精忠叛應吳三桂犯浙江拉哈達甫至克州奉諭曰杭州爲浙江要地以爾素有才能遣往暫理杭州將軍印務並諭以浙江一應軍務與平南將軍賚塔總督李之芳等

公同商酌毋分彼此七月賊自溫處犯金華拉哈達遣副都統沃申偕副將陳世凱等迎擊大敗之擒斬僞都督閻標等及其僞官百十餘兵七千餘時賊分犯黃巖台州甯波紹興俱騷動提督塞白哩屢疏告急上既命康親王傑書爲大將軍統師赴浙貝子傅喇塔爲甯海將軍分兵赴台州援剿復詔康親王未至之先援剿事宜俱聽賚塔與拉哈達商酌以行及康親王至金華上命副都統雅塔哩署杭州將軍拉哈達仍以都統赴康親王軍前參贊軍務十四年五月拉哈達分兵擊賊於處州復松陽宣平二縣十五年九月隨康親王進征福建耿精忠乞降時海賊鄭錦踞漳泉興化賊將許耀率賊三萬偪福州營於烏龍江之南小門山

眞鳳山拉哈達率兵渡江奮擊奪其營十四追奔四十餘里擒僞  
總兵四僞副將以下三十餘人十二月授甯海將軍十六年同賚  
塔進剿興化連破敵營二十六斬僞總督趙得勝復興化僞總兵  
郭維藩以仙遊降許耀竄泉州據城拒守拉哈達乘夜進圍之漏  
未盡梯城入斬許耀及僞總兵僞副將等泉州平遂復漳州及海  
澄等十縣沿途招降賊將四百二十二員兵四千一百七十名移  
師征潮州叛鎮劉進忠迎降拉哈達還福州十七年四月鄭錦之  
僞總統劉國軒陷平和犯海澄拉哈達遣副都統瑚圖等擊賊於  
碧落泉潛石山河灣及紅蕉寨葛布山皆有斬獲賊斷江東橋及  
長泰同安諸小徑我師不能進海澄遂陷副都統穆赫林提督段

應舉死之漳平同安惠安相繼失守賊復犯泉州 詔責拉哈達  
不急援海澄俟事平論罪嚴趣其禦賊泉州拉哈達欲由長泰大  
路進值江水泛漲泥濘難行時侍讀學士李光地丁憂家居遣人  
來迎請爲嚮導拉哈達遂率兵由南靖之蒼峯嶺朝天嶺至漳平  
招降在城之僞總兵黃瑞標張勝等及僞官二十餘兵四百有奇  
復踰石柱嶺趨安溪進薄泉州賊乃竄遁十八年拉哈達遣遊擊  
趙雲剿賊於泉州之臭塗澳斬五百餘級焚其寨先是賊偏泉州  
於沿海東石地築城掘壕扼金門廈門要害至是拉哈達遣副都  
統沃申率兵攻之水陸並進冒鎗礮登城斬僞參將遊擊數員擒  
僞總兵陳深及賊眾百六十餘人餘賊溺死者無算獲其僞印及

船廠器械十九年拉哈達同巡撫吳興祚由同安港口進至潯尾  
招降賊寨分兵徑渡拉哈達居中吳興祚由左總兵王英由右直  
趨廈門而賚塔與總督姚啟聖提督萬正色楊捷總兵黃大來等  
皆如期至三面合擊賊不能支遂克之隨遣兵趨金門僞總兵吳  
國俊等迎降鄭錦遁臺灣 詔康親王還京拉哈達與副都統馬  
思文率兵千人守福州二十一年八月 上以進取臺灣有綠旗  
兵及駐防漢軍足用滿洲兵可撤 命拉哈達率之還京二十二  
年王大臣等議拉哈達陷海澄時不能救援應降世職爲三等輕  
車都尉罷都統任 上念其隨康親王平閩有勞績且久任都統  
能稱其職寬免革任二十四年以老病致仕四十二年七月卒年

七十有七 予祭葬如例子博雅柱襲

右 國史館本傳

莽奕祿

莽奕祿滿洲正白旗人初隸鑲白旗姓富察氏世居葉赫曾祖阿布岱國初來歸授騎都尉莽奕祿於順治元年六月襲職七年九年屢遇恩詔洊晉二等輕車都尉十一年以署參將隨靖南將軍珠瑪喇征廣東明桂王朱由榔將李定國糾步騎四萬據新會縣之山峪列礮象拒戰我軍奮擊賊潰奔別將以賊四千自山頂馳突我兵又敗之奪山隘定國遁師還敘功晉世職一等康熙元年授護軍參領十三年逆藩吳三桂叛莽奕祿署護軍統領隨征湖廣十五年三月由石首縣進軍太平街賊八千餘拒戰莽奕祿同護軍統領伊勒都齊夾擊敗之斬百餘級賊遁回營復隨貝



勒察尼分兵夾擊陣斬三百餘十七年五月擢鑲白旗蒙古副都  
統十九年十一月隨征南將軍穆占征貴州恢復靖遠清平及平  
越府時逆孽吳世璠踞貴陽僞將軍韓天福踞新添衛莽奕祿與  
前鋒統領薩克察巴圖魯等領驍騎擊敗之殪賊千餘追奔三十  
餘里乘勝復龍里縣進薄貴陽吳世璠遁遂克之并復威清敷勇  
平壩鎮西等衛及定番州城二十年正月進軍平遠州賊僞將軍  
高起隆夏國相王永清楊應選張足法儂朋王會等擁眾二萬踞  
城西南山拒戰莽奕祿與副都統花色等統前鋒護軍奮擊敗之  
殺賊四百餘遂攻城自午至酉再敗賊斬級千餘於是王會降高  
起隆等遁招降僞官三百四十四兵三千七十復平遠三月同遊

擊王成功等領兵四千追剿逸賊張足法等賊倚山拒戰我軍連  
奪三山賊敗走邀奪高家橋陣斬千餘人墜崖死者無算旋收復  
黔西大定諸城擒僞巡撫張維堅等斬之均得 旨議敘遂入雲  
南會大將軍賴塔軍於曲靖擊敗賊兵進圍省城八月調滿洲副  
都統並 命參贊軍務十一月吳世璠自殺雲南平還京共得功  
牌五敘不及職二十二年四月遷護軍統領管佐領二十三年九  
月遷蒙古鑲白旗都統二十四年十月調滿洲都統三十年十月  
授荊州將軍三十九年十一月調荊州滿洲兵二千剿打箭鑪蠻  
上以莽奕祿年老令畱鎮荊州以副都統珠滿阿濟禮領兵往四  
十二年二月以老乞休 允之六月 上幸塞外莽奕祿赴 行

在請 安 賜御書引年老將額 御衣一襲東珠頂帽孔雀翎  
入內大臣班八月卒年七十 諭曰莽奕祿才品優長簡任將軍  
實心効力勤勞最久茲聞溘逝深爲軫惻下部議卹 賜祭葬如  
例諡敏肅子色爾敏例襲騎都尉兼一雲騎尉六十一年十一月  
世宗憲皇帝御極 恩詔下部察奏舊日出征八旗官兵因少一  
功牌未敘職者 特追授莽奕祿雲騎尉世職並改入正白旗

右 國史館本傳

俞益謨

俞益謨甘肅甯夏人康熙四十二年任湖廣提督鎮守紅苗負固時出劫掠上命與尙書席爾達等督師進剿益謨由桃源經辰龍關達五寨直抵賊巢別遣副將偈龍蓬鳴保控賊肩背而自疾馳據地良坡扼賊腹心以大礮擊之賊穿土穴爲巢不爲動使謀者偵之知賊伏小天星寨以守出奇兵奪其地復以礮擊大天星寨山搖谷震賊始窮蹙乞降復猶豫不卽至益謨益設伏屢破之賊眾駭愕聽撫遂班師

右傳李元度撰

國朝文獻通考卷之...

三十一

--	--	--	--	--	--	--	--	--

馬斯喀 弟馬武 從子保祝

馬斯喀滿洲鑲黃旗人姓富察氏米思翰長子也初任侍衛兼佐領 聖祖仁皇帝康熙二十七年由護軍參領授武備院卿明年遷鑲黃旗滿洲副都統尋兼內務府總管三十四年擢領侍衛內大臣三十五年正月 命兼管火器營事二月 上親統大軍由中路征噶爾丹馬斯喀領鑲黃旗烏鎗兵以從先期奉 命同內大臣等議定出征營陣隊伍序次三月 駕駐郭和蘇臺 命閱畱牧馬匹還奏畱牧馬匹數逾三千僅有阿巴噶蒙古總管派八十人守視應於蘇尼特諸蒙古增派六十人各以其長官董率分馬羣爲七以二十人管一羣擇水草佳處牧放悉令阿巴噶總管

奇塔特稽察遇盜馬者羈候治罪 上允其奏四月 駕駐什巴爾臺距克魯倫河已近而西路軍尙未至圖拉 諭王大臣集議機宜信郡王鄂扎等請駐師稍待馬斯喀同內大臣蘇勒達明珠等議奏曰西路軍爲雨所滯未克進行無庸待之宜卽進薄敵營上從馬斯喀等議五月師至克魯倫河噶爾丹望見 御營大駕奔竄 上親統師追至拖諾山 命馬斯喀爲平北大將軍率兵進剿至巴顏烏蘭噶爾丹先已遇西路軍於特呼勒濟轉至昭莫多大敗竄遁其屬下丹巴哈什哈等率百餘人赴巴顏烏蘭乞降馬斯喀迎會西路軍收集降人千餘奉 詔遣官衛送至張家口外乃班師任事如舊列議政大臣九月扈 駕出邊經理軍務十

二月 命率兵駐大同三十六年正月授昭武將軍移師赴甯夏  
閏三月 敕參贊撫遠大將軍費揚古軍務先是伊拉古克三胡  
土克圖自內地竊馬逃歸噶爾丹至是噶爾丹死率三百餘人奔  
投策妄阿喇布坦四月費揚古令馬斯喀以降人導引率兵追之  
馬斯喀行越月至摩該圖知伊拉古克三胡土克圖遠去已數日  
不能追及引兵還 上遣侍郎常綬等齎 敕往諭策妄阿喇布  
坦得伊拉古克三胡土克圖及其弟蒙額里以歸磔誅之議政大  
臣等以馬斯喀追剿遲緩論革任得 旨馬斯喀辦內務府事尙  
優從寬畱內務府總管及佐領四十一年授鑲白旗蒙古都統四  
十三年六月卒 賜銀千兩 遣內大臣一員侍衛十員奠茶酒



命皇子於發引時往送 賜祭葬如典禮諡襄貞弟馬武亦  
出侍衛兼管佐領康熙二十七年以一等侍衛同學士開音布奉  
命視開中河先是河道總督靳輔議開中河匯駱馬湖之水以通  
漕漕運總督慕天顏謂中河雖開不久卽淤徒費無益至是工竣  
馬武同開音布往閱還奏商賈由中河行舟利達無阻惟漕艘載  
重必盡塞支河之口使駱馬湖水悉匯中河始得進行乃漕督慕  
天顏禁止堵塞支河口勒令已進中河之漕船退回有意阻撓得  
旨下法司逮勘慕天顏褫職論罪事詳慕天顏傳三十五年 上  
親征噶爾丹奉 命同侍郎阿爾拜閱視獨石口外隨征綠旗兵  
赴 御營復 命卽從征五月凱旋十月從 上駐蹕歸化城

命以牛羊迎犒凱旋右衛兵還奏兵丁步行者多食用未裕 詔  
兵部按籍賞銀每兵三兩四十三年十月擢鑲白旗漢軍副都統  
四十八年正月因兄大學士馬齊與內大臣阿靈阿等議奏改立  
皇太子事獲罪馬武亦禡職五十年起爲內務府總管六十年擢  
鑲白旗蒙古都統明年 世宗憲皇帝御極授領侍衛內大臣四  
年十月 冊封怡親王以大學士馬齊爲正使 命馬武副之  
特旨俱加一級十二月疾 遣太醫院診視 諭曰馬武事我  
皇考五十餘年不離左右恪恭謹慎當盛暑嚴冬無幾微倦怠之  
色其生平胸懷坦白情性和平朕追念 皇考凡昔年侍從之人  
皆加恩眷况馬武年齒最高效力最久 聖眷最渥之人朕聞其

國朝通志卷之三十一  
病重屢降旨往視諸大臣合詞勸止遣親王皇子前往代朕看視  
尚望其痊可僕至不起著照伯爵賜與卹典賞銀一千兩並給與  
世職以示朕優眷老臣之至意尋卒 賜祭葬如典禮諡勤恪  
子三等輕車都尉世職以其子薩喇襲

右 國史館本傳

保祝

保祝滿洲鑲黃旗人姓富察領侍衛內大臣馬武子雍正元年三  
月以監生授三等侍衛四年三月在 乾清門行走五月襲佐領  
世職九年十一月擢 御前侍衛十二年十二月襲三等輕車都  
尉十三年十一月授正紅旗漢軍副都統乾隆元年調正黃旗滿

洲副都統二年三月赴西甯辦事閏九月疏言多倫尼托克安圖等七族及因察族哈爾受族遣人赴西甯交馬價銀並帶貿易之貨行至茶戶遇郭洛克格爾側等賊番掠去銀貨并傷從人今多倫尼托克安圖等族願將掠去馬價卽行補交因察族亦隨後補解臣查郭洛克格爾側番族係四川松潘鎮所轄已咨川督飭緝究擬至多倫尼托克安圖等族係新附番民中途被劫隨卽補交其向化輸誠洵屬可嘉請將該番今年應貢馬價仰邀 聖慈寬免以卹遠番其補交銀兩准抵次年正貢奏入 諭曰所奏甚是照所請行十月疏言西甯所轄之番民四十族零居襍處遠近不齊每歲因輸馬價銀赴西甯者每族不過數人而川省所轄之郭

洛克邊界乃必由之道人單勢弱閒被劫殺請嗣後馬價銀兩年  
彙貢一次至應貢年令各番族預傳集所居遠近分兩起結伴同  
行仍按其族分大小貢馬多寡每起以五六十人爲率可無劫殺  
之慮並免每年跋涉總理事務王大臣議行十一月 命來京三  
年四月署馬蘭鎮總兵十二月署廣東提督四年八月奏惠州府  
連日大雨山水驟涌河流頓高二丈倒灌入城兵民房屋多有浸  
塌臣會同道府分別瓦房草房酌給銀兩俾百姓隨時修復又衝  
塌兵房七十間請撥從前買馬價內存贖之項估值量給使被水  
之兵獲寬裕料理 上是之十一月實授六年七月潮陽縣民因  
暫止平糶罷市三日未幾嘉應州土豪攔截採買穀船四十餘隻

保祝俱以實在情形具奏 上以此風不可長著巡撫王安國嚴  
究勿縱安國尋奏分別首從人犯定擬如律保祝疏言今歲雨澤  
未勻早稻豐歉不一地方官固曾開倉平糶但於五月中旬即以  
早稻將登並未計及秋成如何遽行停止以致米價日昂愚民自  
罹法網請糶阻攔若非疊遣營員彈壓開導幾至莫遏夫倉儲原  
備民間不足儻以五月即停爲例不顧民間何用預備見在早稻  
薄收晚禾甫插宜預將應糶應卹分別辦理報 聞八月奏永安  
歸善二縣被水 諭曰地方官設有料理不妥百姓不得實惠之  
處據實奏聞十月奏瓊州乏食應飭有司或動公採買或招商轉  
運 上命其告知總督慶復隨時畱心十一月疏言練兵除常期

操演外每歲秋冬率弁兵於附近山原往來馳逐使士卒習勞  
諭曰此固美舉然不可擬累地方也七年十月調直隸提督九年  
二月奏喀爾喀蒙古王子德木楚克遣護衛巴達瑪等關領俸銀  
巴達瑪私帶硝磺出口並於駝馱內搜出銅條鐵塊解刑部收審  
至蒙古原關俸銀及所帶駝馱飭令中軍及守關滿漢官兵照數  
查明交原人帶管備文押解理藩院查收辦理得 旨嘉獎四月  
保祝以病告 命御醫馳驛前往診視旋准解任調理十年十月  
授正紅旗蒙古都統十二年四月卒 賜葬銀八百兩諡恭簡

右 國史館本傳

穆誠額

穆誠額滿洲正紅旗人姓薩哈爾察氏世居綏哈 太祖高皇帝時烏喇有蘇庫努來歸其高祖也 世祖章皇帝順治十三年穆誠額以前鋒參領隨甯海大將軍伊勒德征浙江舟山時僞英毅伯阮思僞總制陳六御等列戰艦二百餘抗拒海島穆誠額率水師迎擊賊眾大敗旋署護軍統領隨定遠大將軍世子濟度征福建至則海賊鄭成功竊踞閩安散布賊眾於汀泉漳福諸屬泉州大營村聚眾千餘穆誠額偕營總瑪拉擊敗之斬賊渠李梁及其眾七百餘級復隨大兵擊敗僞提督黃常等於新湖澳福全所及魏陀白沙河等處十四年敘功 子雲騎尉世職 聖祖仁皇帝



康熙十五年穆誠額隨撫遠大將軍圖海至陝西討叛鎮王輔臣師至平涼城北之虎山墩賊眾萬餘迎戰穆誠額隨前鋒統領穆占率兵奮擊大敗賊眾追殺十餘里收獲軍械馬匹無算二十三年擢授本旗蒙古副都統二十五年敘平涼戰功晉世職爲騎都尉二十八年以老病致仕四十三年卒 賜祭葬如例孫阿斯海襲世職雍正七年阿斯海以前鋒侍衛從征準噶爾九年準噶爾犯我北路軍營靖邊大將軍傅爾丹遣前鋒統領丁壽等迎戰於庫爾圖嶺賊據險要傅爾丹令移營至和通呼爾哈諾爾賊遽衝突我師阿斯海力戰歿於陣 賜卹加一雲騎尉以其子書敏襲

右 國史館本傳

額赫納

額赫納滿洲鑲藍旗人姓納喇氏世居葉赫祖蘇巴海國初來歸父渥和訥任世管佐領額赫納襲職任護軍尋遷護軍參領順治十四年隨甯南靖寇將軍貝子洛託征雲南康熙元年隨靖東將軍濟席哈勤平山東棲霞縣土寇于七十一年擢鑲藍旗蒙古副都統尋駐防山東兗州十四年九月以逆藩吳三桂耿精忠叛賊黨分犯江西命簡親王喇布爲揚威大將軍由江南移鎮江西詔額赫納參贊軍務十五年正月麻姑山賊王永召等犯江西省城額赫納同副都統席布敗之先是叛鎮馬雄句瀆賊王宏勳擾廣東上命簡親王於副都統額赫納巴爾堪內擇一爲將

軍統兵援廣東王請以額赫納往 命倍道速進未至而平南王  
尙可喜病其子之信以韶州南雄叛應賊連閩粵諸寇謀犯贛州  
額赫納退守南贛賊屯蓮塘口額赫納率頭隊敗賊眾斬僞將黃  
輝陳可相等遂進兵芝坪敗僞總兵吳漢興焚賊營二十餘十月  
廣東提督嚴自明叛犯南康縣進圍信豐額赫納同副都統穆成  
格迎擊之因鎮鋪擒斬萬餘自明走南安信豐解圍十六年三月  
上命副都統莽依圖爲鎮南將軍赴粵以額赫納參贊軍務大兵  
抵韶州之信率官民歸正自明亦獻南安降十月三桂僞將馬寶  
王錦等營韶州城東山梗我運道額赫納同江甯將軍額楚分剿  
天敗之莽依圖以廣西巡撫傅宏烈兵單疏請令額赫納赴梧州

協勦得 旨額赫納速赴梧州卽與傅宏烈同定廣西十七年四月調鑲藍旗滿洲副都統時廣東總兵祖澤清據高州叛 命額赫納回勦之次電白賊悉精銳據守額赫納連破其營斬僞總兵江瓊等賊四千餘追二十餘里圍其城賊黨王得功降遂進攻高州澤清已挈家遁高州平時賊首吳世琮犯南甯十八年五月額赫納至貴縣會莽依圖兵由橫州直抵南甯敗賊於新村世琮中流矢以二十騎遁奉 詔速勦餘黨乘勝進取雲南十二月調鑲藍旗護軍統領十九年五月隨莽依圖進勦柳州至貴州之陶登遇僞將軍范齊韓馬承烈等由武宣迎敵額赫納同都統勒貝希福分路擊斬無算二十年正月僞將軍何繼祖擁眾屯安籠所拒

我師額赫納率前隊進剿大將軍賴塔繼之大敗賊眾復安龍所  
二月次黃草埔偽將軍王有功張光先等屯曲靖府羅平州界額  
赫納同希福擊走之奪賊營二十二擒斬甚眾大軍尋平雲南額  
赫納隨將軍班師二十三年調鑲藍旗前鋒統領二十四年擢鑲  
藍旗滿洲都統尋授議政大臣二十九年三月噶爾丹侵喀爾喀  
犯汛界上命額赫納同侍郎溫達等由歸化城分路偵禦會噶  
爾丹爲裕親王福全敗遁八月額赫納檄兵還三十五年以老乞  
休允之四十四年卒賜祭葬如例

右 國史館本傳

雷如

雷如山西蒲州人康熙四十五年任鎮寧鎮總兵苗出劫掠如督兵至巖坎營勦捕之苗遁去民自是安堵

右傳李元度撰



珠滿

珠滿滿洲正白旗人姓瓜爾佳氏先世居烏拉祖多和倫 國初來歸從征錦州廣甯有功授雲騎尉次子額赫瑪瑚以三等待衛隨安南將軍宗室洛託征海賊鄭成功進攻廈門力戰陣亡

聖祖仁皇帝康熙二年正月卽 贈雲騎尉無子珠滿其兄子也襲其職十三年署參領隨大軍征江西時逆藩耿精忠叛應吳三桂造賊黨犯南康珠滿隨征南將軍尼雅翰等擊敗之又敗僞總兵莊姓朱姓於沔津十五年隨大軍規復吉安破賊眾於惶恐灘十六年三月隨鎮南將軍莽依圖往廣東入韶州吳逆遣僞將軍馬寶等渡河來犯大軍分隊拒之珠滿由右翼奮戰連破賊營馬寶



等突圍得遁十八年六月隨莽依圖進剿廣西由橫州至南甯擊  
賊將吳世琮於新村西山大破之遂解南甯之圍十九年六月隨  
莽依圖討叛賊馬承蔭於柳州路經陶登敗其黨范齊韓詹仰等  
援兵是冬隨征南大將軍賴塔征雲南二十年正月擊賊將何繼  
祖王宏勳等於石門坎奪其隘口賊退據黃草壩二月克之遂進  
征雲南城陣斬僞將軍胡國柄等七月復隨都統希福等追擊賊  
將馬寶巴養元於烏木山賊潰遁乞降是年雲南平凱旋二十五  
年七月敘功晉騎都尉兼一雲騎尉二十七年六月授三等侍衛  
二十九年三月授護軍參領三十年正月兼管火器營事六月調  
前鋒參領三十六年六月擢荊州副都統三十九年十二月奉

命同副都統阿濟禮率荊州兵二千會剿四川逆蠻比至都統滿丕提督唐希順等已復打箭鑪遂駐師鴉隴江防守四十一年六月撤兵還荊州九月鎮筸紅苗作亂上命尙書錫勒達副都統圖師海徐九如統師剿撫諭以珠滿久於用兵凡事與商酌而行十一月撫降三百一寨惟天星一寨仍負固錫勒達與提督俞益謨等分四路追剿珠滿領兵協應攻克燕蘆寨斬戮無算餘寨悉平敘功一級四十五年二月擢江甯將軍四十六年三月上南巡至江甯賜紫貂冠服及良馬是年卒於官賜祭葬如例明年吏部請以其子撒木貝襲騎都尉兼一雲騎尉得旨珠滿人才壯健行閒勞績茂著人所共知自簡用將軍倚畀正切委任

未久忽聞奄逝深可憫惻所有世職著再加一雲騎尉授爲三等  
輕車都尉子伊子撤木貝承襲

右 國史館本傳

唐希順

唐希順甘肅武威人由行伍於康熙十三年拔補涼州鎮標把總是冬王輔臣叛應吳三桂臨洮鞏昌諸府縣相繼從逆十四年二月希順從總兵孫思克進勦河東復靖遠敗賊於伏羌西和禮縣諸處復秦州鞏昌靜甯十五年隨大軍敗賊於虎山墩希順奮勇爭先手足被矢傷得卹賞十六年敘功加八等子參將銜管提標右營千總十八年思克以希順騎射優長勞績甚著題補守備令同參將康調元攻復階州文縣十九年勇略將軍趙良棟規復四川調希順從軍尋補四川川北鎮標遊擊時逆孽吳世璠之僞將軍胡國柱等踞關山相嶺良棟軍由雅州進勦復榮經縣賊退

入箐口驛分兵扼周公橋黃泥舖諸隘結五營守險希順同總兵  
官李芳述康調元等進攻土地橋賊距正關三層密佈鎗礮伏兵  
橋左右擁竹木石屯拒戰我師連破其壘抵橋口希順與遊擊陳  
英陳應先選善走步兵千閒道穿後山箐透出長老坪從山頂下  
攻合橋口兵夾擊賊潰遁乘夜追襲次日黎明復敗賊於黎州克  
其城復敗賊於漢陽街追至大渡河奪渡口三遂進復建昌是冬  
隨良棟由金沙江進征雲南敗賊於玉皇閣三市街二十二年敘  
功加九等 予左都督銜二十七年補湖廣均房參將尋遷寶慶  
副將三十一年調臺灣水師副將逾年擢貴州威甯鎮總兵官三  
十五年 上親征噶爾丹 命希順隸西路進剿希順自貴州帶

親丁百晝夜行抵甯夏大兵已出塞希順兼程進會孫思克軍五月大敗噶爾丹於昭莫多大軍凱旋上命綠旗官赴京休息希順行次懷來縣上遣侍衛慰問抵京召見於暢春園賜宴及御服袍褂並命登舟賜遊內園賜貂皮披領朝服回任三十七年敘昭莫多功予雲騎尉世職次年擢四川提督疏言四川幅員遼濶外則蠻苗雜處中則水陸交錯誠爲巖疆重地提標三營兵丁僅及各省之半不足以資彈壓而敷調遣伏祈俯念蜀省邊險准照各省提標立五營每營設兵八百各照馬二步八例除見在二千六百名外尙需兵千四百名四川通省額兵三萬六千二十名臣徹底清查不容借公費親丁名色冒占積弊

盡除兵額充足卽於原額內酌量營汛緩急分別抽調多寡添入  
提標兵雖他移餉仍其舊至新增遊擊二員守備二員亦於通省  
營汛確查可以裁併者酌量抽調一轉移閒營伍均有實際再臣  
標將備等官必材技優長弓馬嫻熟又諳蜀省地利方克勝任請  
照陝西並松潘疊溪等營保題事例擇人地相宜之員坐名題補  
庶重地收得人之效部議不准 特旨俞允三十九年打箭鑪營  
官喋巴昌側集烈戕內地明正長河西土司蛇蜡渣吧又侵踞河  
東烏泥若泥嵐州等處總督錫勒達奏請移化林營參將李林標  
兵駐打箭鑪賊復抗阻攻圍烹壩冷竹關諸處希順檄調各路兵  
赴化林密疏以 聞 上命侍郎滿丕統荊州滿兵進剿並 諭

希順相機行事時賊兵五千餘立營十四於磨岡等處希順雪夜渡瀘分兵三路進剿一由子牛攻哪吒頂一由烹壩攻大岡希順親統官兵由咱威攻磨西面及磨岡別遣兵由頭道水登山向下夾攻連戰五日各路俱捷殲蠻兵五千餘人斬喋巴昌側集烈及熱奧籠遂克復打箭鑪喇嘛番民俱投順尋抵木鴉番日錯王端柱等繳明敕印歸附喇嘛番民萬二千餘戶四十年正月捷聞得旨嘉獎下部議敘三月疏言打箭鑪已復善後急需得人今川省副參遊守等官見缺二十八員蜀地沿邊番蠻環處出征固需能將防守亦需能員伏懇皇上俯念鑪蠻雖平用人正殷將見奉推升川省副將遊守等官暫免引見令速赴新任推升別省



者仍暫留原任俟新推之員到日交代後再赴新任得旨允行  
十月以病乞休命解任調理四十一年議敘加軍功五等病痊  
日以原官起用四十七年七月卒遺疏請以次子際盛襲雲騎尉  
並入籍四川從之予祭葬如例際盛由侍衛任江南安慶協  
副將卒襲除

右 國史館本傳

彰庫

彰庫滿洲鑲白旗人姓瓜爾佳氏父多克索哩於太宗文皇帝  
崇德三年從征明攻南皮縣以雲梯先登克之賜號巴圖魯  
予騎都尉世襲罔替世祖章皇帝順治七年九月三遇恩詔  
晉二等輕車都尉既卒彰庫襲聖祖仁皇帝康熙十三年以驍  
騎校署參領隨定南將軍希爾根征逆藩耿精忠至江西賊已陷  
建昌撫州等府乃先勦賊撫州僞都督易明擁兵拒戰擊敗其眾  
賊合建昌援兵來犯我軍復大敗之又殪僞都督楊益茂等於七  
里岡賊將邵連登眾號八萬令僞都督九人分領依長興山掘濠  
排列彰庫率兵衝擊屢有斬獲又至宜黃縣擊敗賊眾旋赴建昌

敗賊將李茂珠李復勝等於城南之鎮鼓山十九年五月隨都統勒貝勦賊廣西柳州時逆孽吳世璠之僞將軍范齊韓詹仰等糾賊二萬列柵於柳州之陶登彰庫領隊進擊斬獲甚眾賊潰遁二十年正月隨平南大將軍賚塔進征雲南連破賊將何繼祖王宏勳等於石門坎黃草壩等處乘勝薄雲南城下擊敗迎戰賊兵七月隨都統希福追賊將馬寶巴養元戰於烏木山大敗之馬寶等窮蹙來降是年賊平凱旋任佐領二十二年授護軍參領二十五年敘功 予騎都尉世襲罔替合所襲之職爲一等輕車都尉又一雲騎尉三十六年擢正藍旗漢軍副都統四十年調蒙古鑲黃旗副都統四十四年調鑲黃旗滿洲副都統四十五年致仕四十

七年十二月卒禮部以應否給與祭葬請 諭曰彰庫自任副都  
統以來並無顯著功績副都統祭葬著停給所有世職應得卹典  
照例給與子海寶康熙三十三年進士官翰林院檢討襲世職

右 國史館本傳



## 李芳述

李芳述四川合州人由行伍隸貴州大定總兵劉之復標下勦水西土司安坤有功授千總 聖祖仁皇帝康熙十二年冬逆藩吳三桂反劉之復從逆裔芳述往湖北據彝陵巴東關隘芳述謀脫走託他故畱四川其妻子在大定越五年乃得以計取至敘州逆孽吳世璠加芳述僞總兵徧之由巫山襲鄖襄芳述仍畱重慶十年正月勇略將軍趙良棟進取成都芳述遣弁赴軍前呈繳僞劄隨挽舟逆流而上率重慶府瀘州敘州所屬州縣文武官弁歸順三月趙良棟令芳述招降永甯卽鎮守之其城日久傾圮芳述督兵修築甫竣事僞總兵毛友貴等擁馬步兵萬餘來犯芳述督

兵迎擊賊卻走尋以悍卒數千偪城乘夜樹梯攀堞芳述率兵鏖戰斃賊千餘人斬毛友貴於陣獲器械旗幟無算偽將軍胡國柱王邦圖等復誘以偽劄及顯武將軍偽印芳述俱封送趙良棟軍前良棟奏芳述前陷賊中不從偽令率眾投誠順義可嘉今復固守孤城不惑餌誘可令爲前導以定雲貴 詔投爲隨征總兵官七月賊陷仁懷合江芳述移兵守敘州擒胡國柱所遣奸細二人械送趙良棟軍前斬以徇賊計不得逞旋犯敘州芳述於城外真武翠屏等山堅壁張旗幟以壯聲勢賊屢犯不克潛退馬湖謀出木川犍爲襲取成都芳述偵知之先率兵至犍爲扼其衝要大破賊眾躡擊至新增黃茅岡斬殺過半降其偽副將夏昇羅應甲等

收回被擄男婦二千餘十二月 詔投西甯總兵官仍進征雲南  
二十年四月趙良棟用芳述爲前驅由洪雅榮經二縣出大象嶺  
之左賊於關山前列五營據橋守險並於兩岸層布竹排伏賊於  
後鎗礮交發我兵欲攻橋口因地險不能進芳述同總兵康嗣元  
遊擊唐希順等由閒道繞出關山之後舉烽燧爲號首尾夾擊賊  
不能支退遁關口芳述督兵奮擊復大敗之追至大渡河降其僞  
總兵蔡國明斬獲無算時胡國柱踞建昌聞關山大象嶺俱失棄  
建昌走雲南芳述遂復越巂冕山等衛旋率師渡金沙江會大軍  
取雲南賊兵屯於得勝橋相持累月芳述以偏師奪取得勝橋拔  
其東西二營二十二年敘功加左都督三十一年投貴州提督四



十年十一月雲南總督巴錫疏劾遊擊高鑑審理訟案捏飾並劾芳述牒咨徇隱芳述亦劾巴錫置咨勿覈未會稟遽題有違成例部議令巡撫察審 上曰李芳述在西甯時甚有聲名此事似曲在總督巡撫與總督同事未必從公著遣侍郎溫達前往察審尋還奏高鑑捏詞稟報罪應徒巴錫未行詳審又不會同提督具題應降級李芳述護庇屬員不卽題參應罰俸議上 上命免芳述罰俸並免巴錫降級四十二年湖南鎮筵紅苗作亂芳述奉 詔移兵會剿深入苗地平糶塘山及葫蘆天星諸寨四十三年四月疏言貴州苗民雜處控制尤在得人保題武職請照文員例以久任苗地熟悉風土之人揀選數名題補送部引 見得 旨李芳

述提督巖疆居官甚優訓練兵丁俱極精勇所奏保題武職事如所請行四十五年四月 上諭兵部曰國家綏靖疆圉安輯軍民惟專闡元戎是賴有實能久鎮邊境懋著勞績者則獎勸酌庸宜逾常格貴州提督李芳述自歷行閒二十餘載屢立戰功及莅事黔省馭軍有法訓下知方威望著聞謀猷益殫見今舊將閱歲之久罕與比倫用沛殊恩特彰優異著加太子少保授爲鎮遠將軍以示朕褒寵勞臣至意四十七年十二月卒於任年七十有七得旨李芳述簡任巖疆素有威望效力年久茂著勤勞忽聞病逝朕心深爲軫惻下所司議卹 贈太子少傅 賜祭葬如典禮諡壯敏

國史館本傳

右 國史館本傳

馬

李林隆

李林隆漢軍正黃旗人父色稜授三等男順治十四年林隆襲康熙八年授鑲黃旗漢軍副都統尋兼佐領十三年逆藩吳三桂叛林隆隨大軍赴湖廣勦禦十五年川賊譚洪糾黨犯鄖陽順流而下泊陟嶺之琵琶灘陸路賊聯絡策應鄖陽至均州糧道梗林隆偕提督楊茂勳佟國瑤分路夾攻擒斬賊兵將一百數十名焚賊船獲偽劄器械無算糧道始通得 旨嘉獎十七年署河南提督二十九年大軍防禦噶爾丹八旗漢軍都統等請每旗增火礮一於都統副都統內遣一二人率將領軍校礮手送赴圖喇備用奉 旨李林隆人材勇健練習軍務著總管火礮與副都統阿南達偕

往三十一年投陝西提督三十三年 命偕振武將軍孫思克會  
 勘黃兒城增設官兵事三十四年 上以噶爾丹不靖 諭曰聞  
 噶爾丹將從嘉峪關外過哈密之南昆都倫及額齊內河往投達  
 賴喇嘛果爾此機斷不可失著副都統阿南達會同將軍博霽孫  
 思克提督李林隆公議確探擇便以行李林隆可選本標兵二百  
 名速往甘州商酌行事三十五年噶爾丹敗遁林隆奏請赴布隆  
 吉爾偵緝仍奉 旨同阿南達往三十七年還京投鑲紅旗漢軍  
 都統四十七年卒 賜祭葬如例

右 國史館本傳

阿密達

阿密達滿洲正白旗人姓他塔喇氏順治四年授三等侍衛游遷至一等侍衛兼佐領九年兼護軍參領十四年擢正白旗滿洲副都統康熙八年遷護軍統領十年擢領侍衛內大臣明年列議政大臣十三年三月襄陽總兵楊來嘉附逆藩吳三桂踞穀城叛河北總兵蔡祿初與來嘉並爲海賊鄭成功裨將成功死先後率眾來降並授左都督擢任總兵至是聯結謀叛蔡祿造烏鎗購騾馬令兵丁以捕魚爲名演習披甲適奉使侍衛觀保偵得其狀以奏聖祖仁皇帝命阿密達率護軍參領八員每佐領下護軍一名馳赴懷慶察視阿密達至祿不出迎集礮手以拒阿密達直入其廡

擒蔡祿及其家口以奏。上手敕諭之曰爾行未踰旬克濟厥事以遏亂萌朕心深爲喜悅但命至重須研審實方可正法毋得株連無辜至所俘人口散給士卒宜重賞被傷者以示鼓勵阿密達遵旨鞫訊得蔡祿與楊來嘉遣人往來潛謀投順吳逆且與子姪家人等私議若大兵來懷慶閉城以拒突圍往據太行山情狀奏聞。命將蔡祿及子姪同謀者俱正法時耿精忠亦叛。上慮江甯兵單撥滿洲兵千人駐守以阿密達總統授揚威將軍。五月命以所統兵習水戰九月授簡親王喇布揚威大將軍駐江甯以阿密達爲參贊十一月陝西提督王輔臣叛。命阿密達率兵赴西安明年正月仍授揚威將軍印以副都統鄂克濟哈覺

夸岱參贊軍務率所部兵及西安駐防兵之半赴蘭州勦禦大將軍貝勒洞鄂以西安兵單奏畱阿密達駐守 上以蘭州關係緊要仍 諭遵前旨行二月王輔臣踞平涼蘭州諸路皆陷賊洞鄂自率兵赴秦州尋 命阿密達勦平涼賊未至聞賊據涇州分兵遣鄂克濟哈擊斬偽總兵衛民譽獲馬匹器械復其城五月復遣兵敗賊於甯州之東山斬賊八百餘復甯州並得 旨嘉獎先是阿密達與平涼賊戰失利退駐涇州至是聞洞鄂與總兵孫思克等復秦州疏言逆賊王輔臣悉銳集平涼今秦州遁回之賊又至慶陽羣盜依山結壘與爲聲援臣以孤軍前進恐未易奏功乞 敕大將軍洞鄂酌量畱兵駐守秦州餘兵盡會平涼并 命提督



陳福及鄂爾多斯兵急取定邊固原以遏賊慶陽之援臣率兵出白水由平涼東面進取庶易爲力 上曰兵貴神速幾不可失平涼逆賊聞大兵克取秦州正驚擾我兵宜乘勝長驅攻取平涼將軍阿密達逗遛不前殊屬非宜前已增調太原兵近總督周有德又運送紅衣駁爾等當速取平涼八月洞鄂兵亦至平涼 命阿密達參贊軍務速行進攻是月分兵三隊進剿擊敗賊萬餘追奔至城外賊據山險拒守會總兵孫思克由西路入與大兵合剿屢敗賊眾十二月阿密達偕孫思克等分兵赴城西掘濠守護以防賊逸僞總兵蔡元糾賊眾四千由山梁攜火器來犯我軍擊敗之克取山梁擒斬甚多十五年二月 上以貝勒洞鄂等屯兵日久

未能滅賊 命大學士圖海代爲大將軍阿密達與洞鄂等並任  
參贊五月我兵分兩翼由虎山墩進攻阿密達與孫思克督兵大  
敗賊眾斬僞總兵二六月王輔臣降平涼平十七年二月圖海請  
三路進兵分剿叛附吳逆諸賊阿密達偕副都統覺和託四川總  
督周有德等率兵至秦嶺與賊戰斬馘三百撫定諸賊巢尋 命  
赴湖南安親王岳樂軍營協剿逆孽吳世璠十八年九月大兵克  
武岡州 諭阿密達與安親王酌議軍營畱兵事宜十一月奏言  
軍營滿洲兵每佐領酌畱十二人防守其每佐領八人前鋒二百  
人護軍每佐領三人驍騎并漢軍每佐領五人俱遣還 上命阿  
密達率之回京十九年十月授正白旗蒙古都統二十一年七月

以三逆平定 特遣大臣頒賞厄魯特喀爾喀諸部阿密達預焉  
二十二年三月兵部議阿密達在平涼攻戰時我兵退回不能禁  
阻應盡革職任 上曰阿密達爲人頗優且多勞績其令降五級  
從寬畱都統任二十六年八月調本旗滿洲都統二十八年十月  
復授領侍衛內大臣二十九年六月噶爾丹與喀爾喀構釁侵我  
外藩蒙古烏珠穆沁界 上命阿密達往領副都統噶爾瑪等所  
轄弁兵偵探賊情具奏七月以裕親王福全爲撫遠大將軍阿密  
達與公蘇努等爲參贊是月抵回河與噶爾瑪軍合復會尙書阿  
喇尼軍於葫蘆谷爾河以噶爾丹所在入奏 上以噶爾丹退回  
二宿之地似欲潛遁 命阿密達速選精壯馬兵率之前往便宜

行事時濟農胡土克圖使人至軍營阿密達遣郎中哈爾吉布等  
與偕至噶爾丹所未幾噶爾丹遣尊多伊格蘇爾爲使且述所以  
入汛爲索喀爾喀讐人弗敢秋毫侵犯阿密達以聞並奏賊衆內  
偏狀遂與蘇努會合裕親王軍分大軍爲三蘇努等率左右兩翼  
阿密達與王等統中軍以進八月朔至烏蘭布通噶爾丹依山列  
陣臥駱駝於林外據河以守我左翼兵由山腰衝入大軍臨之大  
敗其衆會日暮收兵次日剏殪餘寇賊堅壁據險遣使矢誓請和  
尋自錫喇穆稜河截水橫渡大積山夜遁去十一月師旋部議王  
大臣調度乖方既經戰勝不能乘機剏滅賊敗又不卽追殺以致  
窮寇遁走貽悞軍機又未經請旨擅率大軍內徙福全應革王

爵阿密達與蘇努等皆革職 上念我軍已擊敗厄魯特王大臣  
概從寬免革爵職阿密達降四級畱任三十一年二月以年老乞  
休 允之三十五年二月 上親征噶爾丹阿密達奏請隨征與  
康親王傑書管理鑲藍旗營務五月 駕至克魯倫河復奏請效  
力隸左翼大軍尋揀選精銳追剿噶爾丹以阿密達暫充將軍率  
畱後之滿洲兵及綠旗營步兵赴克勒和碩既至 命兼轄畱駐  
兵尋撤兵回京四十八年五月卒

右 國史館本傳

國朝耆獻類徵初篇卷二百七十八補錄

將帥十八

南天章

南天章字漢雯昆明人康熙乙酉武舉歷官湖廣提督公於講武之暇畱心文翰有祭征虜之風詩亦清婉可誦不愧滇中儒將云

右滇繫小傳師範撰



國朝耆獻類徵初編卷二百七十九目錄

將帥十九

海青 子岱豪

殷化行

吳英

烏達禪

馬際伯 弟見伯

覲伯

碩岱

滿丕





國朝耆獻類徵初編卷二百七十九

通奉大夫前署江西巡撫江西布政使司布政使湘陰李桓  
將帥十九

海青 子岱豪

海青滿洲鑲黃旗人姓戴佳氏父噶祿順治五年襲其叔色赫騎  
都尉世職三遇 恩詔加至三等輕車都尉十三年色赫之子塞  
勒年長改令襲職噶祿初由侍衛兼內務府主事累遷內務府總  
管 聖祖仁皇帝特授世管佐領卒後以海青襲海青甫十餘歲  
卽任侍衛入直 御前游擢一等侍衛康熙三十四年因征噶爾  
丹增造制勝礮 命海青於景山內董其事凡鑄礮四十有八工

既竣 敕八旗都統每旗選礮手一人各齎礮一由驛馳送大將  
軍費揚古軍中三十五年二月 上親征噶爾丹海青從三月辛  
未由青城 駐蹕滾諾爾遇雪從官及軍士服物由車運者及暮  
不至 上命海青以馳載既至之 內府帳房及食物柴炭分  
賜令棲息舉火海青尋復 命奏言軍士因衣服霑溼寒冽殊甚  
且未得爨食者多得蒙 頒給帳房食物柴炭眾皆歡躍如慶更  
生 上又諭曰馬亦畏寒其瘦者猶可無恙肥者或致凍斃宜順  
風馳二三里許令人圍繞之使氣息漸溫則無妨矣可諭眾知之  
四十一年正月奉 命同侍衛五格往西安校閱駐防騎射四十  
二年二月 上南巡 駐蹕山東長清縣界首鋪夜大風南村失

火延燒民舍海青率侍衛等撲滅之翌日 諭巡撫王國昌率司道等察火燬房屋 賜銀散給 命海青監視四十九年七月疾劇 遣誠親王允祉同侍衛常壽視之 諭曰海青自幼侍直內廷扈從巡幸甚爲出力見今不及伊之人已得爲副都統爾等往其家視疾卽宣述旨意授爲副都統未幾卒 賞銀一千兩 賜祭葬如典禮諡曰果毅 世宗憲皇帝御極 贈一品大臣 今上乾隆元年加 贈太子太保長子來文襲管佐領洊擢副都統護軍統領江甯將軍見大臣表次子佛倫官至領侍衛內大臣第三子岱豪初任侍衛雍正五年三月授鑲白旗漢軍副都統兼佐領六月調鑲白旗蒙古副都統七月調正白旗滿洲副都統六年五月

署正藍旗護軍統領兼署鑲白旗滿洲都統七年三月 命靖邊  
大將軍傅爾丹征噶爾丹策零以岱豪爲參贊大臣八年十月罷  
參贊仍以副都統留軍營九年六月傅爾丹令前鋒統領定壽副  
都統蘇圖同岱豪率兵擊賊於庫列圖嶺斬賊四百餘越一日賊  
兵二萬從高阜來犯我營眾軍戰卻之傅爾丹令移營和通呼爾  
哈諾爾賊兵潛伏山谷伺我軍甫移突入列陣阻截忽大風驟起  
雨雹交加賊并力衝散我軍定壽蘇圖分路勦賊爲賊所困副都  
統錫賚遣索倫兵援定壽索倫兵潰走賊勢猖甚晝夜環偏我營  
岱豪遂在營自縊死明年五月靖邊大將軍順承親王錫保以岱  
豪列陣亡冊入奏部議 予祭葬祀昭忠祠授騎都尉世職子倭

克精額襲 今上乾隆二十年六月 諭廷臣曰昔年和通呼爾哈諾爾進兵時岱豪等既不能殲賊立功又不能奮身拒敵束手受困徒以自盡了事夫果有捐軀之志何不死於矢石間爲此婦人女子之所爲乎對敵之際而領兵之人相率自盡豈不先折士氣似此怯懦無能之人損威失重卽自行引決猶當將子孫議罰尙何功之可錄乎所有和通呼爾哈諾爾等處用兵所得世職人員著軍機大臣及該部詳悉查明如有冒濫應行裁革者奏明請旨用副覈實獎勵之道尋 允廷臣議定壽蘇圖衝鋒陷陣矢盡力竭效忠自盡其世職准襲岱豪錫賚密承國覺羅海蘭赫達色在營中自行引決與奮身拒敵親冒矢石者不同並裁革世職

國史館本傳

右 國史館本傳

121

## 殷化行

殷化行陝西咸陽人初以王姓中式武進士康熙十三年隨經略莫洛營題補本標守備至甯羌會提督王輔臣叛莫洛遇害化行被脅羈秦州託病不爲賊用十五年投回陝西總督哈占題復原職十七年補陝西火器營守備隨振武將軍佛尼勒征牛頭山攻克上下嶺十八年大將軍圖海調化行馳赴寶鷄縣擊敗逆渠陳君極解西山堡圍復由大泥峪取兩河關拔賊營復興安州城十九年佛尼勒應援永甯化行爲前鋒於托川擊敗逆渠黑邦俊又於安甯橋擊走僞將軍胡國柱尋調援敘州府與西甯總兵李芳述守城擊退僞將軍尤廷玉大將軍圖海哈占以化行奮力合疏



題奏 特旨授漢中城守營副將二十年追勦國柱於安邊敘馬連峯石盤關等處奪險殺賊復馬湖府城二十二年追議輔臣叛時被脅從逆人員革化行職哈占以化行未爲賊用還職後屢從征有勞入奏 上念其功復原職旋補直隸三屯營副將二十三年敘前功加一等授署都司僉書兼管副將事二十五年 駕幸畿東化行扈從 行圍 賜御用佩刀二十六年擢福建臺灣總兵 賜貂裘白金三十年調襄陽鎮三十一年 上以陝西上年旱米價昂貴流民還籍者甚少 諭將襄陽米二十萬石運至商州自商州陸運至西安以資民食 命內閣學士德珠同化行及總督丁思孔親往司水陸輓運並招流民回籍三十二年六月事

竣調山東登州鎮總兵尋調甯夏鎮三十五年 詔領標兵三千  
隨撫遠大將軍費揚古由西路進剿噶爾丹至昭莫多大敗之三  
十六年三月 上幸甯夏化行迎 駕奏請 行圍花馬池以觀  
軍容 諭曰朕深悉軍情今噶爾丹未滅馬匹關係緊要甯夏兵  
來花馬池 來須七八日馬必疲乏夫獵細事耳今罷獵而休養  
馬匹以獵噶爾丹何如爾速遣人傳諭所屬官兵勿來花馬池候  
朕至甯夏閒暇之日閱爾軍容先是 上以噶爾丹窮迫西竄應  
發兵至郭多里巴爾哈遜偵擒至是撥甯夏綠旗兵五百人往  
詔嘉化行人才矯健去歲征噶爾丹時尤著勞績 命昭武將軍  
瑪思喀以化行爲參贊 賜孔雀翎閏三月化行率甯夏兵五百

至郭多里巴爾哈遜與大將軍費揚古兵會進至洪郭羅阿濟爾罕會噶爾丹竄斃朔漠平 詔班師三十七年三月請復本姓

從之六月追敘昭莫多功給雲騎尉世職八月擢廣東提督三十八年疏言武職坐名題補引 見未逾六年者請免咨送庶職不至久曠部議如所請又疏言臣標將弁請照沿海例坐名題補部臣以提標無坐名題補例議駁 特旨照所請行三十九年雷瓊道成泰慎瓊州營遊擊詹伯多等騷擾黎岐黎人王鎮邦犯寶亭等營兩廣總督石琳糾獲請革畱命禮部侍郎開音布內閣學士碩穆布赴鞫開音布等以鎮邦置重典其騷擾黎岐文武官弁按律定罪化行及琳巡撫蕭永藻平時約束不嚴分別降調會給事中湯

右曾亦劾化行及琳永藻平日失於覺察遲一載始具題 命化  
行及琳永藻各回奏部議琳永藻平日並未查出應降二級調用  
化行雖於鎮邦蠢動後查訪弁兵款蹟但從前未經查出應降一  
級畱任 從之先是化行鎮甯夏時以平定噶爾丹將從征之外  
委王國寶等二百三十二員題請議敘嗣因部檔被焚補造名冊  
誤註日期經部駁國寶等赴京叩 開會化行差役至京國寶等  
以化行敘功不公挾役至安西向化行妻索銀二千兩化行具疏  
陳奏並請解任赴京面質 上命川陝總督席爾達審明具奏席  
爾達訊國寶等並未嚇詐其銀係化行妻賞給化行誤聽差役之  
詞旨昧具奏應降二級調用得 旨降二級從寬畱任四十年十

國朝通志卷一百一十一  
月疏言廣州府屬連陽縣徭人八排毗連與居民村落相錯疊經  
撫諭不服且地僻山深往往奸匪勾通劫掠臣帶兵親行相度務  
使徭民允服十一月又疏言徭賊劫殺日甚其里入崗油嶺二排  
尤兇橫臣率右翼總兵劉虎駐里入崗近山遣韶州副將林芳入  
排勒獻有名賊徭該徭眾兇抗芳及兵役皆被害現今量添官兵  
加意防範臣暫回惠州與督撫面商會剿 諭曰殷化行前以連  
山徭人擾害百姓請率兵進剿今又奏副將林芳爲徭人所害官  
兵亦被傷殘化行卽回省城與督撫商剿顯係怯敵奔回副將亦  
係管兵大員爲徭人所害若不行征剿居民不獲安處著大學士  
九卿確議具奏尋議進剿 命化行及廣西湖南提督等各派本

省總兵一員領兵隨將軍嵩祝會勦四十一年四月師至連州三省兵分布要隘招降八排瑤人其爲首殺害弁兵之李貴鄧二等俱伏法餘眾悉就安置七月兵部追議林芳被害一案化行及虎俱貽誤軍機應革職提問 諭曰此事據嵩祝來奏殷化行劉虎兩路進兵其劉虎一路副將林芳戰歿殷化行一路官兵並無損失殷化行劉虎俱效力行閒暫免拏問著兵部尙書范承勳審明具奏嗣經范承勳察審以林芳陣歿時虎不顧首尾先行退回應斬化行平時不能安輯地方臨期復失救應應革職 詔革職從寬免死以化行軍前勞績甚著免革職以原品休致四十二年上幸西安化行迎 駕 恩賞化行子純四等侍衛四十九年卒

右 國史館本傳

吳英

吳英福建莆田人幼爲海賊掠置島中更姓王康熙二年九月赴  
泉州投誠給守備劄三年提督王進功征海賊鄭錦拔銅山城敘  
功加都司僉書銜尋授浙江提標都司十三年逆藩耿精忠叛僞  
帥曾養性連結叛鎮祖宏勳陷溫州分犯甯波紹興英隨提督塞  
白理擊敗賊兵招降僞總兵李榮春等遷提標左營游擊十四年  
四月提督常進功領水師至毛頭洋我軍先進者爲賊所困英乘  
船奮進用礮擊死賊將朱飛熊賊驚遁七月曾養性祖宏勳率賊  
十餘萬犯台州英獻計塞白理佯修茅坪山徑潛引兵從仙居縣  
涼棚小道襲賊後賊踞黃巖縣半山嶺以拒英同游擊曾承等冒



矢石前進陣斬僞都督劉邦仁邱天陞等及賊兵二千餘尋復黃  
巖縣城九月遷提標中軍參將十五年二月貝子傅拉塔規復溫  
州會養性祖宏勳率賊三萬餘用木馬拒阻乘夜焚劫我營矢集  
如蝟英所乘馬中礮斃卽斬賊奪馬力戰衝破木馬賊返走迫斬  
及溺水死者無算六月隨提督石調聲援象山賊屯踞石門西溪  
二嶺英同游擊侯奇副將汪國祥參將饒承德分兵三路前抵黃  
溪擊沈賊船殲殪甚眾遂復象山縣九月康親王傑書進征福建  
耿精忠降檄會養性祖宏勳率眾還閩溫州平僞總兵馮公輔猶  
盤踞松陽山中英入山招之出降其黨林惟仁等屯處州之柱溪  
周公源口及黃皮山楊梅灘諸處英相機勦撫斬賊五百餘降惟

仁及弁丁千餘名十七年五月海賊鄭錦犯泉州康親王檄提督石調聲赴援英率兵隨征僞帥劉國軒據洛陽橋英從上游陳山壩渡江以奇兵出賊後乘賊返顧遂造浮橋濟師前後夾攻斬賊六百餘級九月遷福建督標中軍副將尋爲先鋒赴援漳州偵知江東橋爲賊所焚燬賊眾分踞山寨英直前勦殺破其營壘轉戰至江邊用礮擊沈賊船督造浮橋以通漳泉路十八年四月劉國軒復引賊萬餘屯郭塘歐溪頭謀奪江東浮橋英率本標兵擊走之十二月擢同安總兵官十九年二月提督萬正色進征海壇英同甯海將軍拉哈達巡撫吳興祚由同安港口進攻破泗洲潯尾二處賊寨分兵徑渡拉哈達由中路興祚由左英由右用礮擊沈

賊船賊大潰遂克廈門僞鎮張雄黃端吳興隆吳俊率眾降是年十一月英奏復原姓二十二年正月調興化總兵官六月同水師提督施琅進取澎湖英與總兵朱天貴林賢等由八罩嶼乘風破賊游擊藍理陷賊圍英與施琅衝入擊傷僞總督林升救出藍理次日進取虎井嶼賊右先鋒陳諒僞鎮鄭仁等拒戰林賢中傷朱天貴中礮死英右耳亦中創益力戰大破賊復乘間躍入賊船手刃鄭仁餘賊駭竄劉國軒旋與鄭克塽乞降事詳施琅傳二十四年三月英入覲上問有何欲言英奏臺灣設兵八千請半爲鎮守半爲屯種諭曰邊地屯田古有成法爾具疏奏朕自酌行尋奏臺灣地勢南北延袤三千餘里四面海勢絕險土番止求衣

食素無他願從來小寇竊發皆內地奸民下海作祟陸師搜剿可盡前議設水師趕縮雙篷船一百號不特歲修多費且恐多船泊外洋或起奸人覬覦之心請減去十之八畱二十船分撥臺灣澎湖二處以傳遞文書其臺灣澎湖經制官兵一萬員名前議以鹿皮白儲通洋助餉誠爲善策然恃貨物交易以濟兵食不能如期給發而且波濤可虞臣見臺灣水田頗好俱係鄭錦親黨及僞鎮將所占不在民田之內今有鄭克塽所遺耕牛甚多除澎湖二千官兵無田可耕其防守臺灣之八千官兵以四千屯田每兵水田三十畝牛一頭令其耕種閒則操練則兵有恆產餉可省半矣疏下九卿詹事科道議令督撫提鎮會同酌行四月調浙江舟山總

兵官九月擢四川提督先是兩敘軍功由總兵加左都督銜子  
雲騎尉世職至是敘克澎湖平臺灣功晉世職三等輕車都尉三  
十六年擢福建陸路提督三十七年調水師提督四十四年上  
南巡 賜 御書作萬人敵扁額並 御書燕翼詒謀 賜其祖  
祠四十六年 上南巡復 御書世錦堂以 賜 上詢英閩地  
有海寇否英奏言海寇斷不至蔓延若蔓延則任臣等何用但海  
中與城郭不同城郭有里甲易於稽察海水汪洋乘一小舟到處  
可藏匿殊難緝獲然多由商販虧折資本不得已而劫奪不可遽  
謂之海寇也 上是其言 諭大學士等曰朕召吳英入語良久  
見其爲人篤實而明達朕言及海寇其所奏深得竅要尋 諭兵

部曰國家綏輯兵民又安海嶠必資威望素重之臣以畀干城之  
寄有能久鎮巖疆實彰勞績者則錫命酬庸宜加顯秩福建水師  
提督吳英當王師初定八閩卽親履行陣自偏裨以至大將敷歷  
四十餘年比任提督以來益殫壯猷克修軍紀目前諸將中明習  
水性訓練舟師者罕與比倫是用特渙殊恩膺茲異數著授爲威  
略將軍仍管水師提督事務以示優眷勞臣至意 回鑾後 御  
製七言詩存問有黽勉防微計未然之句五十一年七月卒於官  
年七十有六 詔贈太子少保 賜祭葬如例遺疏言次子應龍  
第三子應鳳俱官郎中請以隨標游擊第四子應鵬襲世職下部  
議 從之

右 國史館本傳

公諱英字爲高號媿能世居泉之黃陵徙大浯塘曾祖曰賓吾祖  
曰振泉父曰登並以公貴累 贈榮祿大夫妣皆 贈一品夫人  
公早孤值海濱搶攘用將才起家隨大師克平金廈功授都司僉  
書隸浙江提標歲甲寅三孽並興耿精忠軍出仙霞駐金衢旁入  
江西海寇響應東南震動或聞公聞人不可信提督塞公獨深契  
之授公左營游擊公奮勵甫視事三日追甯海梅坑賊進兵雙門  
解台州圍復破水賊張拱垣於三門港殲偽帥朱飛熊於毛頭洋  
軍氣大振旣鑲藍旗貝子到浙視師提督首薦公卽命爲前鋒公  
引兵揚言修毛坪路陰襲涼棚取之斬賊帥劉邦仁遂復黃巖貝

子奇之尋令復太平樂清等縣抵上塘遇賊兵二萬眾奮擊之斬數千級賊帥許奇保殘卒據綠帳隔河而陣公下令人負草一束夜乘潮填河而濟大破之遂由猴狲嶺奪其堡引大兵直至青田僞帥連登雲以十萬圍處踰二載聞青田破餉道阻絕遂夜遁有曾養性者耿之梟將也時擁大兵據溫乘我師初至分五路夜燒我營公急白貝子令諸軍棄營據險軍以不亂公自率精兵據大羊山阻其要路復請分兵五百抄伏敵後是夜賊衝殺數四公力戰達曙身中數創士不傷者才五十人天明單騎突之大師繼進伏兵並起賊自相踐蹋斬獲無算公逐之至溫州城下銳傷馬顛復奮起刃十餘人奪賊馬以戰貫其眾由將軍橋以歸初貝子收



兵失公所在大駭既見公喜且泣曰一身當數萬眾戰終夜不殆  
神衛汝忠耶是役也會養性僅以身免耿氏精銳盡矣未幾還守  
甯波中軍適賊船二百餘艘直臨定關公偵得定關守備方俊受  
僞劄爲內應請提督立斬以示賊賊遽退守象山公復請兵破之  
旋奉檄改捕大嵐山寇搜斬數百人餘黨潰散時耿已輸誠而松  
陽遂昌山寇游魂出沒貝二師石塘召公捕之賊首馮公輔屯  
戴火山素警公威名出就撫其別魁林維仁黃大相等擁眾黃鼻  
山左倚懸厓右臨深潭以獨木爲橋山廣表數十里莫可蹤跡前  
督撫遣人招之輒爲所殺公令諸軍持三日糧夜腰繩魚貫上席  
草而下至楊梅灘遇賊破之降其眾山寇悉平而海孽復熾陷海

澄困泉州斷洛陽長橋以阻援兵公以副總兵官從康親王救勦  
自仙遊分兵兩路由閒道解泉圍奪江東橋守之破砦十有九遂  
復海澄己未秋擢同安總兵官明年率舟師合大軍進攻金廈賊  
棄兩島遁回臺灣會靖海侯施公琅來提督海疆事議進攻澎臺  
引公自助遂以癸亥六月某日發銅山取八罩直抵澎湖賊勢盛  
前軍被圍公單船拔出之翌日進攻殺賊先鋒燒其船公所乘船  
忽爲潮水衝著石上賊船火烈將及公副將詹六奇駕小舟挽公  
避再三公以眾軍在船義不獨存堅卻之船忽浮起士氣益厲戰  
彌力賊大敗燬賊船百九十餘艘殲僞官將三百餘員殺溺兵五  
萬計所俘者皆縱遣使歸諭以恩信禍福整眾臨之賊勢窮納款

舉土降施侯凱還爾公鎮撫其地自海逆負險造亂四世歷六十年所公與施侯合謀七日而舉之 天子嘉公功眷待與施侯埒調鎮舟山海寇洪煥等二千餘人聞風歸命再擢四川提督破吳三桂餘黨楊善帥九經等散其眾川中洊經兵燹千村荆杞伏莽竊發公嚴塘汛懸賞購募獲積盜三百餘人斃其魁六十三人於杖盜賊屏息鎮蜀十有一年施侯既卒 上念閩海反側非宿將莫能鎮壓遂調公福建陸路提督旋改水師凡十餘年前後如京師朝 行所者再 御書作萬人敵四字以 賜加號威略將軍優以世職請老不許今年夏 上於熱河行宮 御製七言律詩一章將以錫公 命諸王以下大學士扈從諸臣皆屬和蓋追念

元勳所以褒崇之者甚備而公已於七月二十四日終於位矣疏  
聞 天子軫悼下部議恤其孤應龍等將以某月日葬公於某縣  
某地之兆狀公事績官階乞余銘其幽隧吾聞攻毒之餌恆出於  
瘴癘之區亂之興也其受亂之地必有人焉足以還自救也閩之  
亂亟矣莫甚於耿與鄭耿之平也公旣力諸原海氛之靖則施侯  
爲之主而公實贊之益公所至以功績自顯而造功於閩爲尤大  
余於公同爲閩人又姻好也知公深誌其可以辭乎公生前丁丑  
十月初七得年七十有六配夫人蔡氏前公卒子男十人應麟布  
政使司參議江西督糧道亦前卒應龍刑部郎中候補副使道應  
鳳王午舉人戶部郎中應鵬福建水師提標遊擊應鷗辛卯舉人

應鶴歲貢生應樞應權應機應璋俱幼應機余叔父永州總兵公  
壻也女五人皆適名族孫男十二人女十三人曾孫五人公持身  
寬厚謹恪官於家門不縱不苛鄉人久安焉待族媼朋好有恩禮  
雖勳高爵大異於古名將怙侈驕暴者故能以功名終著行間紀  
遇一編所錄皆實余嘗序而行之茲復誌公之槩而系以銘曰  
雲雷之屯君子經綸天造草昧以啟厥勳敵 王所愾綏我鄉人  
保斯土者人亦保焉望公松楸孰敢不尊千秋萬歲式固汝原

右墓誌銘李紱代某撰

烏達禪

烏達禪滿洲正白旗人姓納穆都祿氏父喀爾圖世祖章皇帝時任工部副理事官以監修奉先殿功成予雲騎尉世職聖祖仁皇帝御極游擢詹事副都統倉場侍郎左都御史刑部尚書康熙二十三年致仕二十五年二月卒賜祭葬如例以孫瑚里襲職烏達禪初任驍騎校康熙十年授三等侍衛游擢一等兼佐領二十七年喀爾喀土謝圖汗及哲卜尊丹巴胡土克圖率眾來降上既賜以牲畜糗糧至明年春土謝圖汗等以食不繼爲請命烏達禪同學士錫喇等馳發張家口倉米駝載兩月糧往徧給之二十九年六月喀爾喀部人殺牧長掠馬逃牧廠大臣瑪

希追捕弗獲烏達禪奉 命飭土謝圖汗執獻逃犯十餘人斬其  
首惡以馬還三十年五月 上幸邊外安輯喀爾喀歸附人眾先  
期 命烏達禪同內大臣索額圖傳 諭土謝圖汗哲卜尊丹巴  
胡土克圖詰其同部自戕及諸妄爲事成具疏自請罪 上駐蹕  
多倫諾爾 召集喀爾喀諸部長 諭宥其罪尋擢烏達禪正白  
旗滿洲副都統三十五年二月 上親征噶爾丹 命烏達禪率  
兵隨 御營出中路旣至克魯倫河噶爾丹竄遁西路爲大將軍  
費揚古擊敗五月扈 駕班師時噶爾丹屬人丹巴哈什哈等先  
後來降以時值炎暑暫居張家口外八月 上命烏達禪乘驛往  
遷之來京編隸八旗佐領九月 上復巡邊經畫軍務烏達禪扈

駕駐歸化城 頒賚出征凱旋右衛兵 命同索額圖宣 諭獎  
慰三十六年噶爾丹屬人額淋沁哈什哈等來降 上命烏達禪  
同學士喇錫詳詢之得噶爾丹與其台吉丹濟拉猜忌離散狀以  
聞三十七年三月 命同尙書馬齊侍郎滿丕往視喀爾喀諸部  
會盟宣 諭禁令七月 上詣盛京 詔馬齊等卽由會盟處還  
京 特詔烏達禪馳赴 行在三十八年正月奉 命招降巴爾  
瑚三千餘人安住察哈爾遊牧地編隸佐領九月巴爾瑚佐領額  
克圖等自察哈爾殺牧廠副使阿必達及驍騎校班第等掠馬駝  
攜孳以遁烏達禪率兵馳追時喀爾喀公錫卜推哈坦等已奉  
詔領蒙古兵圍之烏達禪至斬一百三十八人收其孳四百餘遺



三十九年授前鋒統領四十年陝西歲歉 詔烏達禪往賑之尋  
列議政大臣明年遷鑲黃旗蒙古都統四十四年十月調正藍旗  
滿洲都統尋以有疾 遣太醫診視四十八年乞休 詔以原品  
致仕五十一年十月卒年六十有六 賜銀千兩 命貝勒允禩  
公富善等奠茶酒 諭曰烏達禪隨朕收服喀爾喀厄魯特巴爾  
瑚等俱在事效力有功及簡任都統以來忠誠任事勤勉盡職偶  
以患病乞休朕不時存問方期頤養以享遐齡忽聞溘逝深爲軫  
惻下所司議卹 賜祭葬如典禮諡襄敏

右 國史館本傳

馬際伯 弟見伯 覲伯

馬際伯甘肅甯夏人父玉官游擊際伯由行伍於康熙十八年隨甯夏提督趙良棟征逆藩吳三桂叛黨復略陽賊遁陽平關追敗之以功加一等授千總十九年進征四川奪小關山復建昌二十一年雲南平下部議敘授參將銜三十五年隨振武將軍孫思克征噶爾丹大敗之於昭莫多敘功授副將銜三十六年授甯夏鎮標前營游擊隨甯夏總兵殷化行追擊噶爾丹至洪敦羅阿濟爾罕撤兵回汛三十八年遷靈州營參將尋遷督標中軍副將四十一年川陝總督覺羅華顯薦舉卓異擢四川建昌總兵四十二年六月丁母憂四川巡撫能泰以建昌鎮屬士民弁兵呈稱際伯嚴飭

汎防俾番賊斂迹地方安堵倡同府衛捐資月課禁兵丁霸奪行  
市廉潔自持日用物俱給見價軍民愛戴籲請以際伯畱建昌總  
兵任 命在任守制四十六年 陞見調西甯鎮總兵 賜孔雀  
翎及鞍馬四十九年以失察階州西固堡境外番族殺傷寨民並  
戕官兵部議降二級戴罪圖功五十年授四川提督五十一年卒  
四川總督能泰以 聞 諭曰馬際伯簡任提督正資料理忽聞  
溘逝朕甚憫惻應得卹典察例具奏尋議 贈右都督 賜祭葬  
如例諡襄毅弟三人見伯顯伯覲伯見伯康熙三十年武進士三十  
六年隨殷化行勦噶爾丹至洪敦羅阿濟爾罕敘功以守備補用  
三十七年授直隸正定協標右營守備三十八年遷直隸撫標中

軍游擊三十九年遷雲南督標中軍副將四十二年擢山西太原  
總兵 上西巡 賜御書三軍挾纊額並貂褂蟒袍等物四十三  
年丁母憂 命在任守制四十七年疏言烏槍久奉禁例今商民  
尙有私用者請令民間烏槍繳官類有必需處止許長一尺五寸  
刊某地某人姓名違者治罪硝磺乃火器所用應嚴禁私賣均如  
所請四十八年 上幸五台見伯迎 駕 賜孔雀翎四十九年  
九月以弁兵內通曉文義者奉 特旨入鄉會武闈應試見伯疏  
陳三事一武經七書註解互異請 敕儒臣選定一部頒行一  
文廟祭祀文臣自驛丞以上皆得陪祭武臣惟副將以上方准陪  
祭請一體行禮一武生於中式後能講明論語書旨再准出仕疏

入部臣議駁 上諭大學士等曰馬見伯此奏亦是武經七書朕俱閱過其文義駁雜不能皆合正道孟子云仁者無敵又云天時不如地利地利不如人和與其用權謀行私曷若以王道行仁義之爲愈也朕曾躬歷行閒深知用兵之道如七書所言安可盡用耶今於七書中作何分別出題及增用論語孟子出題之處另議至條奏祭祀文廟令同城武弁與文臣一體行禮於理甚合著照所請行嗣經九卿議覆武生武童試論二篇第一篇於論語孟子中命題二篇於孫子吳子司馬法中命題武會試試論二篇策一篇五十四年正月調直隸天津總兵五月大軍勦策妄阿喇布坦見伯請領兵赴西路協勦得 旨俞允五十八年擢陝西固原提

督五十九年正月 上授貝子延信爲平逆將軍率兵進藏以見  
伯參贊軍務三月連敗策零敦多卜於齊諾郭勒綽馬喇等處十  
月凱旋師次打箭鑪見伯病卒遺疏入 諭曰馬見伯簡任提督  
率領各營官兵參贊軍務實心效力勞績懋著忽聞病逝深爲軫  
惻應得恤典察例具奏尋 賜祭葬如例顯伯初名英由把總歷  
官雲南永泰協副將覲伯康熙四十二年武進士選三等侍衛四  
十七年授巡捕南營參將五十一年遷山西殺虎口副將五十四  
年策妄阿喇布坦擾哈密覲伯率兵赴推河偵禦六十一年七月  
擢大同鎮總兵仍畱軍前雍正元年六月回任九月 陛見 賜  
孔雀翎十月奉 旨赴甘州駐防幽丹衛二年四月撤兵還汛三

年正月疏奏改隸營制事宜一殺虎口副將原轄之北樓東路二營參將歸大同總兵轄一山陰路原轄之井埤城守備歸平魯路朔州城守備歸甯武營乃堡把總歸老官營俱歸殺虎口副將轄一平魯路參將歸殺虎口副將轄英平魯路屬之破虎堡弁兵分隸助馬路轄一利民路參將移駐甯武爲甯武營參將其利民路參將中軍守備改爲利民營守備甯武營守備改爲參將中軍守備並增撥利民路把總一隸之均如所請行二月 諭曰爾於前陛見時朕曾面諭諸事聽巡撫諾敏教導近聞爾等俱聽年羹堯指示殊爲不是此舉干係爾等功名嗣後諸事當與署巡撫伊都立商酌而行五月追議前在軍營因細事與將軍等爭競奉 旨

革職發往鄂爾坤圖拉管轄屯田兵效力五年十月奏獻瑞麥一  
莖十五穗 諭曰今歲各省俱產嘉禾頃馬觀伯復獻瑞麥朕觀  
自古帝王本不以祥瑞爲尙因今歲爲遵行藉田典禮之初卽獲  
感召天和是以特爲表著但恐地方有司未必深悉朕心或借端  
粉飾致有隱匿旱潦不以上聞者著將雍正五年以後各省所產  
嘉禾停其進獻乾隆元年觀伯卒於軍營

右 國史館本傳





碩岱

碩岱滿洲正白旗人姓喜塔喇氏先世居尼雅滿山有昂郭都哩  
巴顏者當 太祖高皇帝時來歸碩岱其五世孫也 世祖章皇帝  
順治十八年以二等侍衛兼參領隨睿親王多爾袞討大同叛鎮  
姜瓖復渾源州九年三月 上幸南苑碩岱與一等伯巴什泰及  
蒙古侍衛素尼並從素尼猝拔刀殺巴什泰碩岱卽舉所執長槍  
擊素尼立仆擒之置諸法 上嘉其勇敢 予騎都尉兼一雲騎  
尉世職十三年授護軍參領十五年隨征南將軍卓卜特由廣西  
征貴州時明桂王朱由榔之將李定國李成蛟等分踞黔西要隘  
碩岱率兵渡盤江擊敗成蛟於涼水井復擊敗定國於雙河口十

六年大軍攻雲南追勦定國至騰越碩岱遇伏於磨盤山力戰克捷十八年山東土賊于七踞棲霞縣之岨嶠山作亂碩岱隨靖東將軍濟什哈往勦斬獲賊黨無算于七竄入海 聖祖仁皇帝康熙六年擢前鋒統領十三年冬逆藩吳三桂反 上以荊州地當衝要 命碩岱領前鋒兵先諸軍進發固守荊州俟諸軍繼至再進據常德以遏賊勢十三年正月碩岱至荊州二月賊陷常德及澧州犯宜昌時順承郡王勒爾錦統大軍至碩岱奉 詔參贊軍務同護軍統領額斯泰等援宜昌擊卻賊將劉之復陶繼智等十四年十二月 諭責順承郡王駐荊州久未能恢復湖南郡邑罷碩岱參贊十六年安親王岳樂自江西進圍長沙碩岱隨征南將

軍穆占都統宜里布等移兵助攻取道岳州韶岡河遇賊艘四十餘運糧至擊取之進圍長沙數月賊負固不下 詔穆占移師規取衡州碩岱隨穆占征茶陵賊棄城遁攸縣碩岱同宜里布率兵追勦賊據河岸拒戰我兵奮擊賊潰奔遂復攸縣十七年隨穆占恢復郴州永興桂陽興甯還駐郴州賊將馬寶胡國柱等犯永興碩岱率兵往援戰失利都統宜里布護軍統領哈克三沒於陣副都統託岱宜思恭等還郴州碩岱棄營入永興城穆占奏劾之詔免逮繫令立功贖罪時賊勢猖獗屢犯永興碩岱同前鋒統領薩克察等嬰城固守逾三月吳三桂死賊乃遁去十八年大軍復寶慶武岡撤八旗兵三之一還京碩岱同內大臣阿密達等率

以行既至京追議永興戰敗罷任革世職二十九年起爲正白旗滿洲副都統三十年隨定北將軍瓦岱征噶爾丹至克魯倫河偵賊眾遠去旋師三十四年十月同都統噶爾瑪率兵駐大同三十五年正月 上親征噶爾丹統師出中路以撫遠大將軍費揚古出西路費揚古請選大同所駐護軍二百八十人爲前鋒 詔以碩岱署前鋒統領率之往四月 上統師擊噶爾丹於克魯倫河噶爾丹聞風驚遁時碩岱與費揚古並在圖拉 上度賊必遁往西路先傳 諭費揚古邀賊費揚古偵賊至特埒爾濟口令碩岱率前鋒挑戰且戰且卻誘至昭莫多合圍奮擊斬獲無算噶爾丹引數騎遠竄師旋擢碩岱內大臣敘功 子雲騎尉世職 上念

其勞績素著 命復前所革世職晉爲三等輕車都尉五十一年  
卒年八十有四 賜祭葬如例以其第三子納丹珠襲職第四子  
海綬於雍正七年以護軍校隨大將軍傅爾丹征準噶爾九年擊  
賊於和通呼爾哈諾爾力戰陣亡議卹 子雲騎尉世職子沙通  
阿襲

右 國史館本傳



滿丕

滿丕滿洲正藍旗人姓伊爾根覺羅氏自其曾祖珠瑚達以來世  
管佐領 聖祖仁皇帝康熙十一年由贊禮郎授理藩院主事十  
四年遷刑部員外郎十九年授監察御史兼襲管佐領二十五年  
五月御史李時謙疏論刑部勘鞫原任奉天府通判戴純責處屨  
工人傷重殞命讞證參差遽坐故殺擬絞請 敕法司詳勘刑部  
奏李時謙滿丕於法司會議處共言此案宜改輕由戴純之兄工  
部員外郎戴綸有賄囑情弊並得 旨下法司再審法司以聽許  
賄囑定讞戴純仍擬絞戴綸李時謙滿丕並革職二十八年李時  
謙以廷臣薦舉復原官滿丕隨都統郎坦赴尼布楚與鄂羅斯使



人費耀多羅等議地界毀雅克薩城而還時 駕幸古北口外行  
圍滿丕詣 行在奏事處乞代奏願往歸化城北路軍營效力得  
旨滿丕從雅克薩來不必出征暫在行圍之處隨朕進京二十九  
年六月授理藩院郎中借員外郎鄂齊爾齋 敕宣示噶爾丹七  
月 上命裕親王福全統師往烏蘭布通 親臨邊塞 特授方  
略滿丕持噶爾丹奏章還呈 覽於古北口 御營又奏言噶爾  
丹賊壘與大軍相距不過百里臣願往軍前擊賊 上可其奏遂  
赴烏蘭布通領火器營發槍礮擊敗賊眾得頭等功牌是年擢內  
閣侍讀學士明年遷內閣學士三十一年二月遷理藩院右侍郎  
明年轉左侍郎三十三年五月將軍費揚古奏噶爾丹遣人至言

欲通貢偵知有男婦二千餘隨行 上命滿丕馳往歸化城詰問  
來使遣之還仍以噶爾丹奏章呈 覽七月 詔費揚古進師圖  
拉尙書阿喇尼率蒙古兵爲前哨 諡稱滿丕效力之心甚殷可  
協同阿喇尼經理驛站尋以圖拉無警撤回三十四年七月 命  
往歸化城北協理軍務至則散給噶爾丹使人梅宰桑等餼糧宣  
敕 還十一月同副都統阿南達率喀爾喀進兵駐四子部落蘇  
尼特部落兩界要地偵備三十五年二月 上親征噶爾丹由中  
路以費揚古爲大將軍出西路滿丕分管自京派發西路之兩藍  
旗兵由翁金至圖拉五月破賊於昭莫多七月奉 詔還歸化城  
察奏凱旋官兵行糧及撫輯降人諸務九月自請仍赴費揚古軍

同駐喀喇穆倫地十一月奉 詔移駐喀爾喀遊牧界外塔拉布拉克偵防噶爾丹侵掠三十六年閏三月收降噶爾丹屬人扎木素等由驛遞送歸化城安插奏述扎木素言噶爾丹前在薩克薩圖呼哩克夜聞大礮三聲隨有潮海旁採捕之人驚告以瀚海飛塵若霧兼聞礮聲大兵已偪近矣眾皆惶恐擾亂噶爾丹避徙十有六日至哈薩克圖哈喇阿濟爾罕地扎木素不願從行逃出來降奏至報 聞未幾噶爾丹果竄死阿察阿穆塔台費揚古班師上召滿丕還京列議政大臣 子雲騎尉世職三十七年三月同尙書馬齊副都統烏達禪出邊莅喀爾喀諸部會盟三十八年六月兼鑲黃旗滿洲副都統三十九年十一月 命往四川總統調

發官兵勦撫番蠻四十年二月同提督唐希順奏報分兵三路攻復打箭鑪駐兵木鴉十二月奏報鴉隴江濱瞻對喇衮革布什咱綽斯甲布諸土目各率所屬戶口投誠繳明代印信號紙應請授五品安撫司之職其副爲六品土百戶 頒給印信號紙下部議從之四十一年三月擢正藍旗蒙古都統五月 召還京四十二年九月以疾乞罷 命原品致仕五十一年卒子蘇保襲雲騎尉

右 國史館本傳

